



# PHILOSOPHÆ UNIVERSÆ INSTITUTIONES

QUAS

JUSSU MINISTRI GENERALIS TOTIUS ORDINIS MINORUM

**SANCTI FRANCISCI**

ELUCUBRATUS EST P. DIONYSIUS A S. JOANNE IN GALDO

SACRÆ TH. LECTOR JUB. ET EX-PROVINCIALIS EIUUSD. ORD.

AD USUM SCHOLARUM SERAPHICÆ FAMILIÆ

**TOMUS PRIMUS**


**PHILOSOPHÆ HISTORIAM, LOGICES,**

**ET ONTOLOGIÆ ELEMENTA**

CONCLUDENS

**EDITIO SECUNDA**

**AB AUCTORE IN MULTIS EMENDATA, AUCTA, ET PERPOLITA**



**R O M Æ**

**TYPIS CLEMENTIS PUCCINELLI**

MDCCCXLVI.

THE UNIVERSITY OF CHICAGO

LIBRARY

1960

1960

1960

1960

1960

1960

1960

1960

1960

1960

1960

1960

1960

1960

1960

1960

REVERENDISSIMO PATRI

**P. ALOYSIO A LAURETO**

TOTIUS ORDINIS MINORUM S. P. N. FRANCISCI

**MINISTRO GENERALI**

ETC. ETC. ETC.

**P. DIONYSIUS A S. JOANNE IN GALDO**

EJUSDEM ORDINIS ALUMNUS

S. P. D.

*Pater Pater*

**T**uae vere paternae epistolae, qua ad alteram Philosophiae Rationalis editionem, exhausta jam prima, me excitabas, atque ad reddendas Ordinis nostri juvenibus aptiores hujusmodi Institutiones hortabaris, lubenter obsecundatum spondeo. Fidem meam liberaturus operi manum admoveo, atque plura scripsi, ex quibus, quid haec primae praestare possit editioni, potes colligere, Pater Reverendissime!

Quapropter in hac altera istarum Institutionum editione, quam minori festinatione curavi, multa addita videbis, permutata multa, plura detera, atque aliqua omnino deleta. Siquidem illam primam a mendis, quae irrepserant, maxima sollicitudine perpolivi; aliquas meas emendavi hallucinationes; nonnullas demonstrationes refeci; philosophorum systemata, praesertim Germanorum, latius evolvi; opinamenta diductius explicavi; illustravi loca obscura; quaedam argumenta vel depurgavi vel deduxi; plura vel adjeci exempla vel substitui; plures quoque doctrinas addidi, quas mihi occurrerunt aut lectione, aut meditatione;

demum prorsus rejeci, quae veritati haud respondere videbantur. Profecisse juvat, nec ulli crimini vertendum.

Verum piaculum foret praetermittere, me in hac altera editione haud omnia esse explanaturum, quae forte aliquis requirebat, ne scilicet essem legentibus gravis, atque facile intelligentibus molestus. Quare consectaria remanentiora, exempla quaedam obvia vel spontanea, atque nonnullas explanationes praeceptoribus, cultioribusque reliqui. Quandoquidem arbitror, imo profiteor, aliquid in Institutionibus praeceptoribus esse concedendum, quin et juvenibus ad altiora scrutanda idoneis, ut istis illi sese commendarent, atque istorum excitaretur ingenium. Ceterum, cum unus tantum annus huic Philosophiae parti, hae praesertim aetate, tribuatur, cumque Institutiones veritatum elementa complectantur; procul dubio multitudo rerum tractandarum in Philosophia Rationali ad pauca quaedam erat coarctanda. Verum credidi semper, neminem sibi posse persuadere, se unius anni studio Philosophiae apicem attingere, philosophique nomen merere.

Institutiones itaque confeci, quae humanae cognitionis leges patefacere, cognitionis fundamenta exponere, atque nostrae rationis aeterna manifestarent problemata. Perspicuitatem, et brevitatem, quas doctus quisque Elementorum scientiarum dotes praedicat, sectatus, praecise scripsi, atque nullum praetermisi essenziale objectum. Campus Philosophiae est adeo exporrectus, ob novas praesertim disquisitiones, ut nemo illam percurrisse se gloriari fortasse valeat. Neque ego glorior, aut gloriatus sum.

Sed quisnam adeo desipuerit, ut in errorem numquam esse lapsum crediderit, aut non posse labi? Veritatem equidem dilexi, a qua distare pertimesco; dilexi et examen, quo ingenium acuitur, atque partus valet gignere robore, veritate, pulchritudine refertos. Falsum me, anima

*contradicente, dixisse, non potest nullus introspicere, atque demonstrare. Precor tamen, ne quis ex alienis rumoribus, aut ex unius vel alterius capitis lectione obiter perfuncta, praejudicatam de toto opere ferat sententiam.*

*Haec, Pater Rme, praefari volebam. Tu vero, quid potius, meliusque pro nostri Ordinis utilitate ex meis scriptis vel resecandum, vel seligendum, vel permutandum, vel recipiendum tua sagacissima mente, tuaque prudentia existimas, tolle, aut secerne, aut deme, aut permitte, aut praecepe; Tu, qui, quae in nostro Ordine optantur, vel requiruntur, vel expediunt, ex ejus perspicuis culmine. Interim seraphicam benedictionem effragilo, tuamque dexteram reverenter deoseulor.*

*Datum Campibassi ex S. Joannis Baptistae coenobio  
Kalendis Novembris 1846.*

*Paternitati Tuae Reverendissimae*

*Humil. Addictissimus, Obsequentiss. servus, et sub.*

**F. DIONYSIUS A S. JOANNE IN GALDO**



# PHILOSOPHIAE HISTORIA

1. Ita a natura est homo comparatus, ut perenniter exoptet felicitatem, ad quam omnia sua dirigit vota, omnesque cogitationes, actionesque convertit. Jam vero haec felicitas, quam hic assequi possumus, ex uno dimanare potest sapientiae studio, quod philosophia nuncupatur, accepto vocabulo a Pythagora, qui a Leonte Phliasiorum principe quaesitus, qua maxime confideret arte, philosophum seipsum appellavit (1).

2. Interea antequam ad singulos Philosophiae partes animum convertamus, externam ejus formam considerandam suscipimus, usi more illius, qui, ad singulas aedificii partes examinandas progrediens, externam illius speciem prius oculis collustrat. Porro generatim de philosophia tria perquiri possunt, quatenus nempe sit ejus origo, et vices, quodnam ejus objectum, quatenus ejus partes. Et in primis Philosophiae electiones tironibus proponentes, de ipsius historia in antecessum breviter eos instruendos ducimus. Sicut enim animum addit agricolae ad agrum excolendum vocato ipsius agri extensionem, qualitatem, vepres, munditiam, heri morem noscere; ita juvat juvenes, antequam philosophiam ingrediantur, ipsius varios anfractus, systemata diversa, viros erroribus, aut veritatibus propugnatis celebres in philosophiae historia cognoscere, quae cum Religione, quae basis est omnis scientiae, connectitur, mentis vires excitat, juvenesque, qui tot opposita vident cogitata, modestos reddit.

3. Ad philosophiam vetusti sapientes retulerunt quidquid de Supremo Numine, de humanae sobolis proprietatibus, de caelorum, terraeque qualitatibus, atque de geniis

(1) Itaque philosophia est amor, seu studium sapientiae, scilicet nians ad sapientiam, quia et tempore, et diligentia indigemus ad eam comparandam, et quia absoluta ejus notitia non utique potitur quisquam.

uni ductu rationis naturalis licet disserere. Quare recte eam Tullius (*De off. l. 2. c. 2.*) definiuit rerum diuinarum, humanarumque, et causarum, quibus hae res continentur, scientiam. Ast temporis progressu, maiori diligentia, ac labore naturalium rerum scrutatis proprietatibus, in classes philosophiam tribuentes, pro variarum rerum tractatione Logicam, Metaphysicam, Mathesim, Physicam, Ethicam vocarunt. Imo veluti philosophiae partes Medicinam, Historiam naturalem, Chemicam habuerunt. Ast nos, uti videbimus in philosophiae partitione, philosophiae vocabulum ad partem rationalem coarctamus.

4. De philosophiae historia haec acturi haud erimus solliciti de causis, effectibusque rationes afferre, quod philosophiae finis est (§. 3.) ; sed rationalium scientiarum originem, ac progressum apud varias gentes strictim exhibebimus (1). Qua in re illud admonitum lectorem volumus, haud nos confidere, semper assecuturos esse veritatem, cum aliquorum philosophorum, sectarumque signabimus tempora, aut describemus doctrinam. Saepe enim usuvenit, alia, atque alia designari iustia ab historicis pro sectarum varietate, ac temporum vetustate, atque ad multiplices sensus philosophorum dicta detorqueri.

5. Interim, ut ordine hac in re procedamus, historiam hanc nostram in quatuor partimur epochas (2). In prima philosophiae historiam texemus a mundi exordio ad graecas usque scholas; in secunda de Philosophiae incremento disseremus a graecis scholis usque ad *Eclecticisum*, uti vjunt; in tertia de Philosophiae vicissitudinibus loquemur ab *Eclectismo* ad illius instaurationem: in quarta demum dicemus de Philosophiae instauratione ad haec usque tempora.

(1) Historia philosophiae non est ipsa philosophia, sed narratio partium humanae rationis modo propugnatorum, modo impugnatorum, atque respicientium philosophiam veluti scientiam, deducta ordine, quo illos partes humana edidit ratio. Quapropter deberemus omnes recensere humanae rationis fortis ad philosophiam spectantes, atque simul describere, et designare vitam, indolem, doctrinam, patriamque philosophorum, nec non tempus, gentem, locum, in quibus illi philosophiam doctuerunt, causasque etiam referre, quae ipsos ad tantum negotium impulerant. Sed nos compendium, non historiam philosophiae omnibus numeris absolutam, nostris atumnis exhibere statuimus.

(2) Siquidem si quis vir ingenio potens, vel aliquis nova doctrina est causa, cur scientia quavis directionem mutet, novas quaestiones introducat, veterum rerum faciem commutet, diversamque inquisitionis spiritum in dato tempore statuat, innovatio haec *epocha* appellatur.



## EPOCHÆ I.

DE PHILOSOPHIAE HISTORIA A MUNDI EXORDIO  
AD GRAECAS USQUE SCHOLAS

6. Cum ex sapientiae studio felicitas, ad quam homo innato velut pondere tendit, praecipue dimanet (§. 1.); recte inferitur, hominem ab exordio mundi philosophandi votum cum existentia recepisse, ideoque primum hominem philosophorum principem extitisse. Et hoc non obscure ex eo colligitur, quod Adam cunctis animantibus nomina imposuerit, et *omne quod vocavit Adam animae viventis, ipsum fuerit nomen ejus* (Gen. 2. v. 19.). Quandoquidem hoc minime ille perficere potuisset sine earum potissimum rerum scientia, quae vita, sensuque donantur. Adde, quod Deus providus sit, nec Adamo, quem adulta aetate, et tanquam universae generationis parentem condidit, negare potuerit eorum cognitionem, quae ad consentaneam filiorum disciplinam, et ad se tuendum, dirigendumque necessaria videbantur. Quod ex eo pariter colligitur, quod antiquissima monumenta, quae dogmata philosophica theologicis confusa, et veluti implicita praeseferebant, philosophiam non humanum, sed divinum ex traditione receptum demonstrare videantur inventum. Vide S. Thomam (*Opuscul. de scientia primi hominis.*)

7. Adamum porro filios, et nepotes suos nongentorum et triginta annorum spatio eandem rerum scientiam, qua ipse potiebatur, docuisse perspicuum est. Et reapse Mathusalem Adamum superstitem habuit annis 243, atque cum Noe vixit annis 600, obiitque ipso anno diluvii; Noe vixit cum filio suo Semo, qui cum Abrahamo vixit annis 50; Abraham filium Isaac, et Isaac Jacobum, et Jacob duodecim filios habuit. Inter istos Levi vixit usque ad Moysen. En quomodo propagari potuerit, et reapse propagata est philosophia ab Adamo ad Moysen, qui eam Iudaicam gentem edocuit. Revera Cain (Gen. 4.) *aedificavit civitatem*, Iubal fuit *pater canentium cithara et organo*, Tubalcain fuit *malleator, et faber in cuncta opera aeris, et ferri*. Ast, in vario vitae genere distractis primis hominibus, alii venatores extiterunt brutorum latibula aucupantes, eorumque decipientes calliditatem; alii pastores soli

naturam, temperiem, foecunditatis, gestationisque tempora, morbos, remedia accurate exquirentes; alii agricolae addicti in detegenda soli natura, in dignoscendis seminibus, in explorandis viribus animalium, quae laborum suorum socia sibi adscisciebant. Ex his porro ad ferrum, lapides, ligna, caementa tractanda natae sunt artes, sine quibus instrumenta ad venationem, ad agrorum cultum, ad tot vitae usus necessaria defuissent. Haec scientia priscorum hominum fuit.

8. Universali cataclysmo humano genere pereunte, non item occidit naturae studium. Memoranda profecto sunt Noachi, Abrahami, Mosis, Davidis, Salomonis nomina, qui non solum sapientia, quae in Deum, ejusque perfectiones versatur, donabantur; sed ne rerum quidem naturalium ordinem, leges, phaenomena ignorabant, uti ex eorum libris non obscure colligitur. Salomon enim, ut alios sileam, *disputavit super lignis a cedro, quae est in libano, usque ad hysopum, quae egreditur de pariete: et disseruit de jumentis, et volucribus, et reptilibus, et piscibus* (3. Reg. 4. 33.). Quare perperam Heinnecius (*hist. philos.* §. 16.) scribit de Hebraeis: *Eorum sapientia magis in vera Dei notitia, et scientia morum, quam in speculationibus physicis constitisse videtur.* Hinc docet Josephus (*Antiq.* l. 1. c. 15.), ab Abrahamo Chaldaeos fuisse edoctos, imo testatur Eusebius (*Praep.* l. 4. c. 17., et l. 10. c. 5.), Phoenices scientiam ab Abrahamo, et litteras ab Hebraeis accepisse, licet alii alia sentiant (§. 11.). Non itaque male recentiores aliqui putant, philosophiam, quae cum Religione copulatur, et ex ipsa enascitur, penes varias gentes fuisse eandem Religionem primitus revelatam, sed postea corruptam, et fabellis refertam. Imo generice dici potest cum Ventura, *primam populorum philosophiam religionem fuisse.* Quod etiam colligitur ex sacris libris gentium, qui simul philosophica continent systemata, atque revelationem quendam supponunt. Scientiae rationales cum opinionibus religiosis semper pari passu ambulant, uti docet experientia. Verum temporis processu et ipsi in sectas divisi sunt Hebraei, quorum alii Essaei, alii Sadducaei, alii Pharisei pro eorum dogmatum varietate dicti sunt. Ceterum non est tacendum, cogitationes plurimas, praesertim illas, quae Deum respiciunt, Adamo, ejusque Nepotibus tributas, de quibus in sacris litteris fit mentio, a Deo ipso illos accepisse. Verum nos philosophiam in subjecto

existentem, non in causa fontali, in hac historia contem-  
plamur (1).

9. Primi omnium, qui inter gentes scientiis navarunt operam Chaldaei creduntur, qui Deum supremum confitebantur, atque varios intelligentiarum ordines a Deo emanatarum, vel, uti alii volunt, Deum dicebant principium igneum totam per naturam diffusum, et ex eo mundum emanatum. Zoroaster, qui Nemrodi aetate floruit, uti S. Epiphanius adrisit, scientiarum parens apud Chaldaeos habetur, atque Belus Semiramidis pater, veluti Astronomiae auctor. Multo in honore apud ipsos habitus est Berosus, qui an. 280 ante Christum vixit, atque Chaldaeorum scripsit historiam, eorumque scientias in Graeciam invexit.

10. A Chaldaea progressa est artium disciplina ad Persas, qui, duce altero Zoroastro, qui Darii Hystaspis tempore floruit, duo numina, seu rerum principia sibi invicem adversa coluerunt, malorum auctorem alterum dictum Arimanium, alterum bonorum dictum Oromazium, et inter illa tertium Mithrae nomine. Magi apud illos sunt, qui scientias colunt, quas in Graeciam primus intulisse Ostanes dicitur. Circa mali originem idem cum Persis sensisse Arabes, praecipue Sabaeos, atque circa plura edoctos ab illis fuisse, ex disputationibus amicorum Jobi colligunt eruditi.

11. Phoenices autem magnam nominis celebritatem nacti sunt, praecipue ob litterarum et nauticae inventionem, et siderum observationes, quae a Sanchoniatone Berytio, qui ante dirutum Ilium vixisse creditur, et a Mocho, sive Moscho acceperunt. Ab iisdem atomorum systema emanasse docent Strabo, et Cudworthus. Cadmus Phoenicius habetur veluti coloniae dux in Graeciam deductae, et ex Phoenicia in Graeciam litteras intulisse creditur.

(1) Tria docet Tennemann ( *Manual. della storia della filos. Napoli 1833. Introduz. Gen. cap. I. §. 16. ad 20.* ), nempe 1. non posse admitti populum philosophicum primitivum, alias supponeretur, totam scientiam habuisse ortum a Revelatione; 2. unum populum Graecum statuisse epocham in Philosophiae historia; 3. a Thalete Philosophiam exordium accepisse. Verum 1. nescio, an Tennemann audeat inficiari Revelationem, qua posita, in rerum principio homo profecto erat subjective philosophus; 2. certe in Oriente multae philosophicae scholae ante Graecos fuere; imo in Italia exstebat schola Pythagorica, uti notat Balthassar Poli; 3. non a Thalete, sed potius a Pythagora incipiendum foret, quia ante Thaletem exstebat quidam sacer institutus sacerdotalis Pythagoricus, imo et in Aegypto; ac proinde ab Italia potius exordiri deberet Philosophiae historia, uti notant (loc. cit. ) Balthassar Poli, et Romagnosi.

12. Multum in literalibus excolendis disciplinis Ægyptii proficere, quos magistros adibant saepe Graeci sapientes, in quorumque sapientia praedicant sacrae litterae eruditum Moysen. Licet Deum unum, rerumque omnium opificem, animarumque transmigrationem admisisse Ægyptios credant aliqui, non desunt tamen, qui cum Persis (§. 10.) convenisse dicunt circa Theogoniam, nempe Osiridem pro Oromazio, Typhonem pro Arimanio, Orum pro Mithra admittentes. Plurimum excelluisse in Mechanica Ægyptios ex pyramilibus, et obeliscis apparet; plurimum praestitisse et in Astronomia et in Geometria, qua fines agrorum ex Nili exundationibus permixtos denuo constituere tenebantur, putant eruditi. Ægyptiorum sapientia Hermeti, sive Mercurio auctori tribuitur, cui longo post tempore alter successit Mercurius, cognomine Trismegistus.

13. Indi principem sapientiae Buddham venerati sunt, quem Brahmanes, seu Bramini sequuti sunt: qui, habiti veluti diligentissimi siderum observatores, mundum a Deo emanatum jactabant, Deumque dicebant per omnes mundi partes diffusum, animarumque metempsychosim profitebantur. Eandem doctriam Sinis tribuunt historici, qui eorum primum legislatorem Fokiam dicunt, cui postea successit Confucius, quem a. 551. ante Christum, ingenio, sapientia, virtuteque praestantissimum, philosophiae, atque politicae magistrum praedicant historici. Multa quoque de astronomia tribuuntur Sinis, sed hisce temporibus non satis probata. Imo docent Colebrooke, Cousinus, M. de Martes, alique eruditi, apud Indos a veteribus temporibus fuisse scholam, dictam Sankhya, hancque divisam in plures sectas, quarum primam erexit Kampila, eamque atheam. Tenebat haec schola, futuras poenas devitari veritatis cognitione, quae consistit in distinguendis principiis *perceptilibus*, et in *imperceptilibus*, et praesertim in distinguendo principio cogitante in homine; quaeque acquiritur sensatione, inductione, affirmatione. Quae *percipi* possunt, ad vigintiquinque juxta hanc scholam reducuntur, nempe 1. natura, causa universalis. 2. intelligentia producta a natura. 3. conscientia statuens propriam existentiam. 4. ad 8. terra, aqua, ignis, aer, spatium, producta a quinque particulis elementorum. 9 ad 13. quinque particulae elementorum a conscientia productae. 14. ad 24. quinque sensus externi necessarii ad sensationem, et quinque alii ad actionem, producti etiam a conscientia, et sensus communis; quae copulata cum intelligentia, et con-

scientia instrumenta sunt perfectae scientiae. 25. anima nec producta, nec producens, individua et multiplex, sensibilis, immaterialis, aeterna. Docebat insuper, creationem complecti octo ordines. semideorum superiores, qui sublimem aerem incolunt, et quinque inferiores, uempe quadrupedes, aves, reptiles, vegetabiles, hominem, qui in ima obscuritate degunt. Deum negabat, utpote qui nequit acquiri sensibus, ratiocinio, revelatione; ast *Intelligentiam* admittebat a natura procedentem, originem omnium existentiarum. Ex quo patet hac in schola contineri materialismum, fatalismum, pantheismum.

14. Alteram scholam ex Sankya instituit Gôtama, quae rationalium Indorum est, quaeque divisa et ipsa est in duplicem classem, quarum primam Gôtama, alteram Kan'a'da promovit; illa Logicam et Metaphysicam; haec physicam corpuscularem versabat. Tota haec schola animam a corpore divisam, corpusque iners moventem, infinitam, aeternam, cogitanti organo mentali, quatuordecim qualitatibus ornatam, et praeter ipsam etiam animam supremam, et creautem professæ est. Quinque sensus externos, unumque internum, materiam vero in statu atomorum aeternam admisit. Gôtama sexdecim categorias, sex autem Kan'a'da cognovit.

15. Fuit inter Indos etiam schola Idealistica, dux Vêdânta, qui materiae existentiam negavit, atque unam professus est essentiam energeticam, in qua sunt omnes naturae modificationes. Fuerunt deinde Supernaturalistae, qui, doctore Djaimini, doctrinam colligunt ex Vêdas, qui erant libri sacri revelati a Deo Brahmâ, quique praecepta, preces, sacrificia continent. Haec schola dicta est Mômânsâ, cui plura addidit Pantandjali, qui meditationem, et ecstasim docuit, regulasque ad haec peragenda similes illis, quibus utuntur recentiores *magnetisantes*. Fuerunt demum Eclectici, quorum aliqui, magistro Djalauiani, profitebantur, ex atomis universum esse ortum; entia alia esse animata, et alia inanimata; actus quatuor esse puros, et quatuor impuros; alii vero, praeceptore Bouddhas, negarunt veritatem librorum Vêdas, et isti divisi sunt, sed omnes veluti haeretici habitu persecutionem passi sunt. Admittunt quoque Iudi librum eonditum a Mano saeculo decimo secundo ante aer. vulgarem, qui agit de creatione, educatione, matrimonio, oeconomia domestica, modo vivendi, mulierum purificatione, devotione, regimine politico, legibus poenalibus et civilibus, mercatoribus, famulis, expiatione,

transmigratione, deque finali beatitudine. V. Balthassar Poli -  
(*Supplementi al Manuale di Tennemann*). (1).

16. Apud Sinenses quoque reperti sunt libri Meng-Tseu a Mencio, et Tao-Te-King a Lao-Tseu conditi. In primo laudantur veteres Imperantes, reprehenduntur Reges vi pacem conciliantes, probatur humanae naturae bonitas, refutantur errores aliquarum sectarum, anima a corpore distincta admittitur, ratio sectanda dicitur, ut caelo serviatur. In altero vero admittitur transmigration, Intelligentia suprema dicta *Tao*, cum nomine, et sine nomine; ut nominabilis, mater rerum corporearum; ut innominabilis, principium caeli et terrae, corporea, et incorporea, quae contemplanda dicitur absque ullis terrenis desideriis. Mencio saeculo quarto, Lao-Tseu saeculo sexto ante aer. vulg. ponitur (2).

(1) Non abs re erit hac in re notare cum Cantù (*Stor. univ. t. 2. epoca 2. p. 1. c. 10. et seqq.*, et *Sulle Religioni Documenti alla storia univ. vol. un. p. 2. n. 2. et 3.*), 1. apud Indos probari Ens supremum *Brama*, ejusque tres emanationes admitti in *Brama*, *Visnu*, seu *Vichnou*, et *Siva*, qui *Trimourti*, seu Trinitatem Indorum efformant; 2. *Brama* dici creatorem omnium, atque Auctorem quatuor librorum sacrorum, qui vocantur *Vedas*; *Visnu* omnium conservatorem; *Siva* destructorem, et hostem; 3. quemvis ex hac Trinitate deum pluries incarnatum dici, atque suos habere sacerdotes *Braminos*; 4. Trinitatem quoque admitti efformatam ex uxoribus *Brama*, *Visnu*, *Siva* vocatis *Sarasvati*, *Lacmi*, *Bravani*, aliaque nominibus; 5. videri quidem Religionem, et Philosophiam Indorum continere emanatismum, pantheismum, materialismum, aliosque errores; sed *Ragia Ram mohun-Roi*, qui Braminus ex India in Anglia a. 1830 profectus morabatur, oppositum narrare; 6. atque dicere, libros *Vedas*, quos creationis mundi aetatem habere dicitant Indi, fuisse abhinc annis 2000. redactos a *Viasa* in compendium, dictum *Vedanta*; 7. a *Vedas*, et *Vedanta* colligi, Indos probare Ens supremum, incomprehensibile, ineffabile, invisibile, omnia cernens, omnia creans, sub variis tamen formis representatum; huic enti supremo deberi cultum adorationis, ipsique esse obediendum; animas huic Enti supremo devotas post mortem in ipsum absorberi. De pantheismo Indorum potest videri Marel (*Saggio sul Panteismo c. 8.*), et praecipue Colebrooke (*Essais sur la Philos. des Indus*). Animadvertit tamen ipse Cantù, et Tennemann (*Introduz. particul. §. 67. edis. Nap.*), adhuc nesciri, utrum doctrina Indorum fuerit indigena, vel ab aliis gentibus sit accepta, vel mixta cum aliena.

(2) Sed notat Mattini (*Storia della filos. disc. 1.*), et G. Ferrari (*nota al §. 69. di Tennemann. Napoli 1833*), primam religionem apud Sinas fuisse inventam a *Fou-hi* a. 2900. ante Christum, eamque mixtam cum astrologia, et magia esse repositam in caeli, terrae, astrorum, viriumque naturae cultu; a. 800. ante Christum *Lao-kiun* doctrinam veterem reformasse, sectamque composuisse *Tao-tse*, cujus objectum erat *Tao*, ens nempe sine corpore, et figura, omnium rerum origo, regula suprema; a. 597. ante Christum a secta *Tao-tse* ortas esse sectas *Jang*, et *Mè*, quarum prima pro norma actionum humanarum egoismum absolutum admittebat, altera vero amorem sine ullo discrimine erga omnes; a. 550. *Confucium* veterem religionem innovatam a *Lao*;

17. Apud Æthiopes Atlantem plurimum praestasse in Astronomia, docent eruditi; ex quo caelum suis humeris sustinere fabula confecta est. Inter Scythas commemorantur Abaris, Anacharsis, Taxaris, Zamolxis. Orpheum inter Thracas doctrinam calluisse, probatur ex eo, quod lyra sua silvas et saxa movisse, fluviorum cursum prohibuisse, ferasque mitiores reddidisse, fabulae testentur. Apud Gallos et Germanos Druidae, et apud Britannos Bardi, qui eorum erant Poetae et sacerdotes, sapientes habiti sunt. Sed satis de primis illis temporibus, in quibus scientiarum infantiam strictim contemplati sumus.

## EPOCHÆ II.

### A GRAECIS SCHOLIS USQUE AD ECLECTICOS PHILOSOPHOS.

18. Relictis heic quae fabulas sapiunt, quaeque mythologica constituant philosophiam, quam Orpheus, Hesiodus, Homerus, ceterique Graecorum sapientissimi poetae sunt prosequuti, multiplices referre graecorum sectas sive scholas, arbitramur, quarum aliae unam, aliae alteram, philosophiae partem excolentes, multas veritates, et errores plurimos nobis tradiderunt. Scientiarum studium apud Graecos circa a. 600. ante aeram vulgarem est exorsum, sapientesque sunt vocati, qui in qualibet scientiarum parte aliis praestiterunt. Creditur Graecia a coloniis aegyptiis, phoeniciis, phrygiisque artes, notionesque philosophicas accepisse, licet omnino ignoretur pars, quae indigena erat, quaeque extranea.

19. Septem fuerunt in Graecia viri, consensu omnium, sapientes appellati, Thales Milesius, Solon Atheniensis, Chilon Lacaedemonius, Pittacus Mitylenaeus, Bias Prienaeus, Cleobulus Lindius, Periander Corinthius. Origo istorum, uti Ausonius et Valerius Maximus narrant, haec fuit. Quidam

*Kian* in vitam revocasse, atque satagentem componere sectas *Jang*, et *Mé* docuisse, virtutem in medio consistere; a. 450. *Mong-tse* fuisse persecutum missionem Confucii; a. 65. post Christum Buddhismum in Sinense imperium invectum esse, atque a. 1400. post Christum floruisse sectam *Yu-Kian* a suo fundatore dictam; demum recentiores philosophos ex libro *Y-King* admissae ens supremum *Tai-Ki* omnia creantem, conservantem, omnipotentem, fatuque obnoxium.

Milesii jactum retis emerant; extracto rete, inventus est cum piscibus tripus aureus. Suum esse ajebant Milesii, sibi vindicabant piscatores. Aditum est Apollinis oraculum, cujus responsum fuit, sapientissimo illius aetati tripodem deberi. Omnium consensu ad Thaletem delatus est, a quo ad Biantem remissus, tamquam se sapientiorum: hic eadem de causa Pittaco obtulit: ab hoc ad alios, quos laudavimus, transmissus, donec ad Thaletem rediret: qui demum statuit Apollini dicandum, soli vere sapienti, et sapientiae largitori. Admirata Graecia illorum virorum magnitudinem animi, eos et esse, et vocari debere sapientes judicavit (V. Forcell. v. *Sapiens*). Ethicam, et politicam praecipue isti sapientes coluere, leges, praeceptaque ubique edocentes, et Respublicas condentes, aut disruptas componentes.

20. Inter graecorum sapientum sectas Ionica est prima, ex qua aliae passim ortae videntur, si Italica excipiantur, quae veluti fons aliarum et ipsa extitit. A Thalete, qui cir. a. 600. ante aer. vulg. floruit, Mileti in Jonia orto initium haec sumpsit schola. Ipse plures gentes adiit earum doctrinas addiscendi causa, in patria scholam erexit, suosque docuit, quae meliora collegerat. Doctus in astronomicis geometriam coluit, eamque suis forsitan inventis auxit; causam supremam esse confessus, licet omnia deorum plena affirmaverit; animas immortales statuit; mundum ex aqua efformatum dictitavit. Thaleti in Ionica schola successit Anaximander, et huic Anaximenes, ambo Milesii, sed ambo a Thaletis doctrina aliquantulum delinantes, rerum omnium principium esse infinitum quid, vel potius aerem, dixerunt; fortasse Deum sustulere. Anaximenes auditor fuit Anaxagoras, qui penitus prospiciens duo distinxit in mundi molitione, materiam, et mentem, hancque esse a materia distinctam, omnisque motus principium docuit, mundumque ex partibus similibus constare aestimavit. Huic Archelaus successit, qui mundum ex partibus dissimilibus conflatum voluit, Physicusque dictus, quia physices studium inivit Athenas, ubi Socratem auditorem habuit.

21. Socrates Atheniensis, ex quo Socratica schola dicta est, ex Sophronisco Sculptore, et Phaenaraeta Obstetrice ortus, circa a. 470: ante aer. vulg., hominum sapientissimus appellatus, duo statuit criteria, unum ad sophistarum (1) arro-

(1) Sophistae scientiam externam veritate destitutam fallaci dialectica, fucatoque stylo sordidatam, quam sola utilitas promovebat, praeseferebant. Inter ipsos recensentur Gorgias Leontinus, Protagoras Abderites, Prodicus, aliique.



gentiam retundendam, alterum ad revocandos homines a nimia curiositate discendi ea, quae ad vitae emendationem nihil prosunt. Primum illud sic enunciabat: *unum scio, me nihil scire*; alterum: *quae supra nos, nihil ad nos*. In eo totus erat Socrates, ut homines seipsos explorarent, motus animi compescerent, virtutem et sapientiam labore ac studio acquirerent. Duobus viis utebatur: Socrates ad excitandos animos ad veritatem, atque ad reddendam rationem de certitudine, in qua esse gestiebant, ironia nempe, et interrogatione. Hinc Socrates habetur veluti *caput, et fons philosophiae*, ut ait Tullius (*l. 1. de Orat.*). Vide Monti (*Lezioni di Eloq.-Socrate.*). Legem naturalem a Deo deducebat, virtutisque post mortem praemia deberi profitebatur. Deos communes publice coluit, sed clam contempsit. Quare iusimulatus, quod Deos despiceret, veneno ab Atheniensibus sublatus est; sed populus facti poenitens accusatores exilio mulctavit, eique statuum aeneam dedicavit. Nihil reliquit scriptum, omniaque deperiissent, quae docuerat, nisi ejus discipuli Xenophon, Cebes, Plato servassent.

22. Euclides Megarensis, qui floruit circ. a. 400. ante Christum, et ex quo *Megarica* orta est secta, mulieri indutus veste clanculum Athenas ingrediebatur ad Socratem audiendum, quia poena capitis ingredi Athenas Megarae civibus erat interdictum. Suo ingenio indulgens, et Dialecticae praecipue studens, adeo disputationis studio abripiebatur, ut ejus schola *eristica*, seu litigiosa postmodum sit appellata. Ex Euclide, diverso ab Euclide, qui in geometria postea magnum sibi comparavit nomen, extitere discipuli Eubolides, Euphanthus, Apollonius, Stilpo, aliique, qui omnes a disputandi prurigne sophistae sunt vocati. Eubolides inventor dicitur septem sophismatum, non ut iis uteretur, sed modum ipsa refutandi reperiret. Stilpo negasse fertur realitatem idearum universalium, quia objecta tantum singularia conspiciamus. Vide Martini (*Storia etc. disc. 2.*).

23. Eliacam scholam condidit Phaedo Eliensis, alter Socratis discipulus, qui minime recedens a mera Socratis doctrina megarensibus sophistis toto se opposuit studio. Ei successit Plisthenes, et huic Menedemus Eretriacus, ex quo Eretriacae schola illa dicta est. Tandem illam rexit scholam Asclepiades, alius ab illo, qui tempore Caesaris Romae exercuit medicinam.

24. Spectatissimum Socrates auditorem Platonem habuit, qui Athenis a. 429. ante aer. vulg. natus est, et Socrati decem

aunis operam dedit, dein Euclidi Megarensi, postea Theodosio Mathematico, demum Philolao. Discendi studio plures suscepit peregrinationes; ex quibus in patriam redux scholam instituit in loco, quem publico gymnasio quidam Academicus destinarat, *Academicam* proinde dictam. Materiam aeternam admisit Plato, licet natura sua confusam, informe, temere agitatam, atque a Deo in ordinem redactam, postquam Deo restitisset, ex cuius resistantia mala orta sunt (in *Timaeo*); Deum confessus est supremum, immaterialem, liberrimum, providum, potentissimum; alios deos minores posuit, et daemones a divina substantia emanantes, quibus rerum sensibilibus molitionem tribuit; animas hominum praexistisse corporibus, atque per emanationem a Deo avulsas, rerumque intelligibilium notitia donatas putavit. Ceterum istae animae in corporibus detrusae notiones ingenitas oblitae sunt, quae denuo contemplatione possent reminisci, sicque iterum ad Deum accedere, uti ipse docebat. Creditur Plato putasse animam nostram, cum aliquod factum perquirat, lumen *anticipatum* de hoc facto habere, alioquin non perquireret, hocque lumen ideas innatas vocasse, aliisque suasisse vulgarem, quam ipse non probabat, opinionem de animarum praexistentia. Hinc docent de Salinis, et de Scorbiat (*Précis de l'Histoire de la Philos.*), Platonem Ionicam (§. 20.), quae sensista, et Italicam (§. 31.), quae idealista fuit, composuisse scholas, trique facta in nostro admisisse intellectu, nempe sensationes mutabiles, notiones objectorum mutabiles, et ideas immutabiles, necessarias, universales. De hisce Platonis ideis loquitur Tullius (qq. acad. l. 4. n. 9.) dicens: *mirifice Plato ideas erat complexatus; ut in his divinum quiddam esse diceret.* Et hae ideae Platonis in *Timaeo* evolvi videntur, in quo, interprete Marsilio Ficino, ait: *fateri oportet, esse speciem, quae semper eadem sit, sine ortu, atque interitu, quae nec in se accipiat quicquam aliud aliunde, nec ipsa procedat ad aliud quicquam, sensuque corporis nullo percipiatur, atque hoc est, quod ad solam intelligentiam pertinet.* Deinde tenent Martini (*Storia etc. disc. 2.*), et Tennemann (*Introduz. particul. t. 1.*), Platonem praeterea docuisse, dari substantias corporeas, et incorporeas; causas veras, et physicas; unam intelligentiam esse causam veram, et liberam, omnesque causas relativas pendere ab *abso-*luto necessario, quod initio, et fine caret; substantiam non esse phaenomenon, sed quiddam *reale* secum semper habere; materiam esse ens mutabile, in aeterno spatio indeterminatum,

ferique corpus, cum spatio constringitur; tres animas existere in homine, rationalem, appetentem, sentientem, duasque postremas esse materiales, et mortales. Summum bonum in contemplativa scientia, qua possumus Deo similes fieri, reposuit Plato, qui mathematica plurimi faciebat, utpote ad contemplationem disponentia. Plura etiam de politica disputavit Plato, qui illi sociam faciens moralem docuit, legem non ab arbitrio, sed ab invariabili natura hominis procedere; cognitionem hominis, ejusque relationum esse sapientiam; sensum communem, seu instinctum moralem esse actionem instinctivam intelligentiae super voluntatem; quatuor esse praeceipuas virtutes, sapientiam, temperantiam, fortitudinem, justitiam; moralem esse concentum inter actus humanos, et supremam legis rationem, politicam esse scientiam congregandi homines in societate, ibique eos sub vigili morali continendi; felicem esse regnum, in quo rex philosophiam colit, vel philosophus est rex.

25. In Platonis schola ordine praefuerunt Pseusippus ex sorore nepos, Xenocrates, Polemo, Crantor, Crates, qui illibatam praeceptoris custodientes doctrinam, academiam veterem constituerunt. Arcesilaus vero, qui Crateti successit, parum immutata Platonis doctrina, academiam mediam condidit, in qua praepositi sunt Lacydes, et Evander Egesinus. Post hunc rexit scholam Carneades, qui, aliis inductis mutationibus, novam fundavit academiam, quam sunt inoderati Clitomachus, Philo, qui Ciceronem, et Antiochum Ascalonitam auditorem habuit. Hoc erat discrimen inter has academias, quod Plato per intellectum scientiam, et per sensus opinionem haberi doceret; Arcesilaus nihil sciri posse, et suspensionem sapienti relinqui dictitaret; Carneades veritates, a nobis tamen nullimode intelligendas, admitteret.

26. Aristoteles Stagiritis Nicomachi medici filius et Platonis discipulus natus an. 384. ante aet. vulg. Athenis in Lyceo, quem ad exercendam juventutem in arte gymnastica, et militari Pericles condiderat, novam erexit scholam *peripateticam* appellatam, quia deambulans docere solebat. Suo eximio ingenio fere omnes scientias est complexus Aristoteles. Logicam a Platone receptam ad meliorem redegit formam, ejusque figuras, et modos exposuit. Logica Aristotelis est inter monumenta ingenii humani maximum, ait Saint-Hilaire, neque post Aristotelem aliquid novi nacta est Logica praeter claritatem, inquit Kantius. Statuit Aristoteles decem praedicamenta, seu cognitionis elementa, substantiam, quantitatem,

qualitatem, relationem, locum, tempus, situm, possessionem, actionem, passionem. Admisit intellectum *agentem*, qui instar lucis ex *speciebus impressis*, seu imaginibus in phantasia relictis ab objectis, objecta veluti irradians imagines spirituales, seu *species expressas*, haurit; et intellectum *patientem*, qui hasce spirituales species recipit. Omnes ideas a sensibus originem ducere statuit, ex quo effatum illud peripateticorum: *nihil est in intellectu, quod prius non fuerit in sensibus*. Deum confessus, ejus existentiam a primi motoris necessitate demonstravit. Materiam, vel, ut alii voluit, mundum aeternum asseruit. Triplicem in homine statuit animam vegetativam, sensitivam, intellectualem, quam postremam immortalitate donatam dixit. Moralem philosophiam egregie ampliavit in suis Ethicorum libris, in aliis ad Eudemum, in duobus magnorum moralium, in libro de virtutibus, in duobus oeconomicorum, et in politicis. Corporum naturam scrutatus est, atque brutorum proprietates descripsit, opibus adjutus Alexandri M., cujus praeceptor decem annis extitit. Neque pulchras reliquit artes, quarum principium in naturae imitatione reposuit; rethoricam, atque attem Poeticam magna evoluit sagacitate, omne scibile humanum veluti complexens. Quare tum Alexander, tum Aristoteles suamente totum mundum respexisse visi sunt; sed sors Aristoteli favit, non Alexandro, qui, militibus tumultuantibus, totius Orientis plagas suae nequivit subjicere ditioni, demortuusque inceptum consilium ad finem non perduxit (1). Inimicorum invidia Chalcidem

(1) Praeter supra recensita Aristoteles docuit, artem, sagacitatem, scientiam, ratiocinium, sapientiam esse facultates intellectivas, aut harum effectus; sapientiam esse *theoreticam* et *practicam*; theoreticam dividi in mathematicam, physicam, ontologiam, theologiam; *practicam* vero in artes technicas, et actus humanos, de quibus egit in Ethica, Politica, Oeconomica; in anima esse intellectum, et voluntatem; esse illam in intellectione activam, in sensatione passivam; praeter quique sensus dari sensum fundamentalem, seu ropascientiam; voluntatem supponere perceptionem, et bonum cum vero, malum cum falso confundi; principium motus rei dici *entelechiā*, quam omnibus corporibus viventibus tribuit, sensibilitatem, rationem, voluntatem esse principia moralia, summumque bonum consistere in absoluta perfectione; servitutem obnoxiam non opponi juri naturae; nullam regiminis formam posse omnibus populis convenire; publicam educationem esse privatae praefereendam. - Vide Martini (*Storia, etc. disc. 5.*) - P. Ventura (*Del principio fondamentale della vera filos. Roma 1846.*) docet, Aristotelem in metaphysica ad verbum transcripsisse Iudorum libros, quos habuit, devicta Iudia ab Alexandro, atque hoc colligi ex memoria Societatis Galeatii. Credit quoque Mastrofini (*Met. subl. t. 1. l. 1. c. 2. §. 24.*) post Genuensem (*Elem. met. p. 3. prop. 9.*), Aristotelem, non recte de animae humanae natura sensitse, nec penitus eam a

anlogiens Theophrastum ex Eresso successorem in Lyceo habuit, quem Strabo Lampsacenus est secutus, inde Licon Troadis, postea Aristo Caens, et demum Critolaus, et Diodorus. Theophrasto sua scripta reliquit, qui scripsit haeredem Neleum, cujus posteri ea condiderunt sub limbo, ex qua effossa post 130. annos vendita sunt Apelliconi Tejo, ex quo ad Tyrannionem Grammaticum pervenere, qui ambo lacunas suffecerunt. Illis potitus Andronicus Rodius disposuit, quae ad Logicam, Ethicam, Physicam pertinent, post physica, quae de ente agebant, reponens, dicta proinde *metaphysica*; ex quo metaphysica facta est. Philosophia peripatetica multos sectatores habuit, sceptrumque tenuit usque ad saeculum XVII, et ultra.

27. Antisthenes Atheniensis et ipse Socratis auditor Sectae Cynicae fuit pareus, florebat vero cir. a. 424. ante Christum. Spreta Logica et Physica, Ethicae excolendae totus incubuit, hancque unam suis tradidit discipulis. Ipse summum bonum in virtute reponebat, qua una similes Deo homines esse possent, unumque Deum supra populares deos probabat. Cynici adeo ambitiose virtutem affectabant, ut, spreto omni vitae cultu, corruptos hominum mores summo rigore insectarentur. Dicti sunt Cynici a Cynosarge gymnasio, ubi versabatur Antisthenes, vel a graeca voce, quae canem significat, a canina mordacitate, qua in hominum vitia nullo discrimine invehiebant, vel quod canum more in propatulo et vesci, et ventrem exonerare, et turpia patrare non dubitarent. Inter Cynicos est notissimus Diogenes Sinopensis, qui rerum contemptu, et invicto animo in adversis ferendis praeceptorem superavit. Diogenes ponitur cir. a. 414. ante Christum. Cynica schola fuit a Stoica absorpta.

28. Zeno Cratetis Cynici, Stilponis Megarici, et academicorum Xenocratis, et Polemonis auditor natus est a. 340. ante Chris. Cittii in Cypro insula. Porticum Athenis nactus Polignotti figuris ornatum, scholam ibi habuit, *Stoicam* a porticu dictam, et sapientiam docuit. Cynicorum more praesertim Ethicam excoluit; Deum unum admisit, fato tamen subjectum

corporis modificatione, vel harmonia quadam secrevisse. Sed Balthassar Poli (apud Tennemann in notis) putat, perperam Aristotelem inter rigidos Empiricos reponi, atque Platoni opponi, quia isti duo philosophi nomine tenus inter se adversantur, dicente Tullio (qq. Acad. l. 1.): *philosophiae forma instituta est Academicorum et Peripateticorum, qui rebus congruentes, nominibus differebant.*



ac veluti mundi animam (1); animam humanam igneis particulis conflata assertuit; beatitatem in una constituit virtute; solum proinde sapientem beatum, liberum, regem, aliosque servos, et miseros credidit; animam sapientis post corporis mortem ad ultimum aetherem reverti, ceterorum vero animas per inferiores aeris regiones volitare jactitavit; vitia omnia aequalia, virtutesque omnes aequales posuit. Celebriores Zenonis discipuli fuere Herillius Chalcedonius, Cleantes, Crysippus, Diogenes Seleuciensis, Antipater Sidonius, Possidonius, quem Rhodi docentem Pompejus invisit, et Tullius audivit.

29. Aristippus Socratis auditor ortus Cyrene in Africa circ. a. 435. ante Christum sectam Cyrenaicam instituit. A casta Socratis doctrina deflectens, ultimum hominis finem in voluptate corporis, nihilque natura honestum, vel turpe agnovit. Ei successere Aristippus ex filia nepos, Theodorus Atheus, Epitimidus, Hegesias, Annicerides, qui praeceptoris dogmatibus latam viam vitiis reserarunt. Siquidem *Theodorus* verbum sine sensu dicebat patriae amorem, ore invero castitatem, justitiam, temperantiam ex albo virtutum expunxit, Deumque inficiatus est. *Hegesias* docebat, in hac vita voluptatum summam vinci a doloribus, inferebatque mortem esse vitae praefarendam, oportereque proinde hanc breviorum reddere. *Anicerides* voluptates esse quaerendas dictitabat, sed aliquas esse recusandas, si publica juberet salus. Cyrenaica schola absorpta est ab Epicurea.

30. Epicurus ortus Athenis a. 340. ante aer. vulg. ibi amoenum emit hortum, in quo docendi munus suscepit. In rebus sensibilibus Epicurus veraces credidit sensus, et ab his ideas derivari asseruit; in intelligibilibus criterium in clara rei notione reposuit; in rebus moralibus dolorem fugiendum, quaerendam vero esse voluptatem statuit. Licet haud desint, qui de voluptate corporis, uti Cyrenaici, Epicurum fuisse loquutum putant; post Gassendum tamen fere omnes eruditi credunt de placida mentis quiete, quam sine virtute dicebat consistere non posse, voluptatem accepisse. Quare plurimum commendabat temperantiam, fortitudinem, prudentiam, justitiam. Ceterum impie docebat, universum efformatum ex

(1) Imo videtur Zeno cum aliis Stoicis probasse *pantheismum materiam*, nempe docuisse, Deum esse hunc mundum, materiam ejus corpus, animam vero quoddam subtilissimum principium, uti notat Melillo (*Nuovo corso di filos. intellett.* vol. 3. pag. 246. ediz. Nap.). Notat quoque Baylius apud Galluppi (*Filos. della vol. volume 4. § 7.*), Stoicos fatum quidem admisisse, sed simul libertatem humanam fuisse tuitos.

turbulento, et fortuito atomorum concursu in inani infinito confuse volitantium; deos esse corporeos, beatos, nullam mundi curam habentes; animas humanas a subtilissimis atomis esse conflatas, ipsasque dissolvi post corporis obitum, *ceufumus in altis aeris auras*, uti cecinit Lucretius. Atomorum doctrinam dicitur accepisse Epicurus a Moscho Phoenicio (§. 11.).

31. Pythagoras Samius, ex quo philosophia nomen accepit (§. 1.), Plerocydis discipulus, postquam Ægyptum, Phoeniciam, Chaldaeam, Persidem perlustraverat, in Italiam venit, in eam partem, quae magna Graecia dicta est, sedemque Crotone figens, magno auditorum affluxu philosophiam docuit. In duas classes partitus discipulos alios Acroaticos vocavit, seu Pythagoricos, quibus omnia suae scholae arcana pandebat; alios Acusmaticos, seu Pythagoreos, qui ejusde rebus moralibus publicas lectiones audiebant. Pythagoras sedulam navavit operam Arithmeticae, Astronomiae, Geometriae, Musicae, ipsique tribuitur demonstratio de quadrati hypothenucae cum quadratis cathetorum aequalitate. Deum unum, rerum omnium principium, omniaque permeantem admisit, eique deos minores, daemonesque subjecit. Animas humanas a Dei substantia delibatas, atque immortales asseruit, et post mortem de corporibus in corpora transire, et quandoque in bestias mitti professus est. Hinc esum carniū prohibebat, dicebatque, se in bello Trojano fuisse Euphorbum, qui revixit in Homerum, postea in pavonem, deinde in Pythagoram; licet, a comicis philosophos deridentibus hoc inventum fuisse, supponi possit. Mundum aeternum dixit, quem *cosmos*, seu ordinem appellavit. Discipulos nactus est Zeleucum et Carondam legislatores, Empedoclem Agrigentinum, Archytam Tarentinum, Tymaeum Locrensem, Philolaum Crotoniatem, cui tribuitur terrae motus circa solem doctrina. Tanti faciebant Pythagorae auditores ipsius auctoritatem, ut interrogantibus dicere solerent: *ipse dixit; ipse autem erat Pythagoras*. Creditur Pythagoras natus a. 584. ante aer. vulg., nempe a. 16. post Thaletem, uti docet Meiners (4). Ast ante Pythagoram in

(1) Docet Petrus Perrone (apud Tennemann. Append. 3. Ediz. Nap.) scholam Jenicam (§. 20.) a Pythagorica in eo differri, quod illa ope sensuum ab effectibus ad causas ascenderit, omnes cognitiones a sensibus derivaverit, veritatesque tantum contingentes pronaverit; Pythagorica vero purae, abstractaeque cognitionis formis veritatem quaesiverit; mundum ideale respexerit, veritatesque tantum necessarias agnoverit. In schola Pythagorae unitas est principium tum materiae, tum formae, atque numeri habentur veluti rerum prin-

Italia scientias et artes coluere Etrusci, qui regimen, leges, religionem, propriumque habebant idioma. Quare non immerito recentiores eruditi demonstrant, non Italos a Graecis, sed Graecos ab Italis, quos et ipse Plato in Sicilia consuluit, scientias, et artes accepisse, atque philosophiae historiam ab fontibus Italiae, quae ante Indos etiam doctrina florebat, esse eruendam ( V. Cuoco in suo *Platone in Italia*, Romagnosi in nota apposita Introductioni *Manualis Tennemann*, Balthas. Poli in *supplemento quarto al Manuale di Tennemann*).

32. Xenophanes Colophone in Asia Minori natus circ. a. 617. ante aeram vulg., jam peragratis Italia, et Sicilia, Eleaticam sectam instituit, ex Elea dictam Magnae Graeciae urbe, ex qua celebriores habuit auditores. Statutis principiis, *ex nihilo nil fieri: et scientiam dari non posse, nisi de re immutabili*, inferebat, quidquid est, esse aeternum, et infinitum, hocque omnia in se comprehendere. Quare mundum aeternum asserens unam statuit substantiam, in quo impio praeluserat Spinozae, auctorque sic extitit *idealismi subiectivi*, quo ponitur, solas ideas existere absque adiutorio sensuum, quin existant objecta. Ei successit *Parmenides Eleates*, qui duo elementa terram, et ignem statuit circa a. 460. ante Christum, terram elementum ponderosum, negativum, ignisque limitationem; ignem vero elementum penetrans, positivum, reale, intellectuale, voluitque aeternum, immutabile, indivisibile, replensque spatium, quidquid existit, uti ait Tennemann; terramque demum in universi centro posuit (1); *Melissus Samius*, qui cum suo praeceptore universum infinitum, et sine vacuo ratus est; docuitque, reale non posse neque produci, neque interire, esseque sine principio et fine, unum, immutabile, indivisibile, partibus carens, demum es-

cipia; ipse enim numerorum proprietates in objecta transtulit, atque in naturae legea mathematica transmutavit formulae. Pythagorae doctrina tamen obscura omnino reputatur tum quia nec ipse, nec ejus discipuli aliquid scripserunt; tum quia indoles illius doctrinae erat abstractio, et ideale; tum quia multae notitiae apocryphae de vita, doctrinaque ipsius circumferuntur, tum quia non facile secerni potest ejus doctrina ab eo, quod ab discipulis est additum.

(1) Non desunt eruditi, qui ex eo probare nituntur, Parmenidem unum esse immortale, independens, aeternum admisisse, quod in ipsius poemate, quod Bessarion latine reddidit, legatur:

Ingenitum quando est, ait et immortale necesse,  
Ingenitum, immotum, immensum, sine fine perenne,  
Quod nec erat, nec erit, totum nuncesse satendum est  
Unum, continuum. . . .



se apparentiam, quod sensibus offertur; *Zeno Eleates*, quem Aristoteles dialecticae auctorem dicit, quique florens circa a. 460. ante Christum, statuit nihil esse *reale*, neque concipi posse objectum divisibile, motum in spatio, ipsumque spatium; *Leucippus*, qui a. 500. circ. floruit, quique praeter atomos admisit vacuum, et motum, docuitque, omnia concursu vel separatione atomorum nasci, vel interire, atque animam esse atomorum aggregatum, mundumque ex fortuito atomorum concursu esse conditum; *Democritus Abderites*, qui circ. a. 460. tempus negans tribuit aeternitatem atomis, spatio, motui, durationi, cum Leucippo de anima sensit, ejusque vulgavit doctrinam, qui tamen, audito quocumque fortunae casu, in risum erumpebat, oculosque sibi eripuit, ut in contemplatione versaretur; *Heraclius Ephesinus*, qui ignem elementarem rerum principium posuit, et de omnibus flebat, vitamque suam in silvis ob hominum odium traduxit; *Protagoras Abderites*, qui Athenas reliquit, quia de diis ei dubitanti mors minabatur; *Anaxarchus*, qui magna fortitudine tormenta tulit, quibus eum subiecit tyrannus Nicocreon. Ceterum duplex schola Eleatica asseritur, *metaphysica* et *physica*, quarum prima ad idealismum, altera ad materialismum ducebat.

33. Pyrrho aetate paulo Aristotele posterior, nempe circa a. 360. ante aer. vulg., de omnibus perpetuo dubitandum esse dicebat. Sectatores ejus modo Pyrronici a praeceptore dicti sunt, modo Aporetici a dubitatione, modo Sceptici ab inquisitione veritatis numquam assequendae, modo Acataleptici a rerum incomprehensibilitate. Docuit proinde Pyrrho, mentem hominis contentam esse debere de apparentiis; boni vero, malique discrimen a legibus, moribusque hominum esse repetendum. Hanc doctrinam, demortuo Pyrrhone, amplexi sunt Arcesilaus, et Carneades mediae, novaeque Academiae magistri (§. 25.), et qui ei succedere, Eurilocus, Ptolomaeus Cyrenensis, alique plurimi. Ceterum non desunt, qui mitiori in sensu Pyrrhonem exponunt.

34. Omissis hic veteribus Etruscis, de quorum doctrina multa congerunt eruditi, de Romanis aliquid dicendum superest. Nullus inter ipsos philosophus, dum Reges et Consules dominabantur, recensetur. Ast Graecia devicta *victorem vicit*, artesque intulit *agresti Latio*. Incensi proinde latini graecae philosophiae studio, variis sectis nomina dederunt. Academiam coluerunt M. Brutus, M. Terentius, Varro, M. Piso, Tullius; Stoicam professi sunt Q. Lucilius Balbus, Scipio Africanus, Mutius Scaevola, M. Cato, Seneca, Epictet.

tus; Epicuream sunt amplexi Torquatus, Vellejus, Trebati-  
tius, T. Pomponius Atticus, Lucretius Carus, qui eleganti  
carmine Epicuream doctrinam collegit; Peripateticam tenuerunt  
Tyrannio. Andronicus Rhodius, Plinius senex, Alexander  
Aphrodisaeus. Ceterum Platonis placitis praecipue inhaerebant  
Romani, utpote quae regundae Reipublicae aptiora videbantur.  
Quare Tullius 1. Tuscul. c. 17. dixit: *errare me hercule malo cum Platone, quam cum aliis vera sentire.*  
Adde, quod cum Philosophia Romanorum esset *essentialiter*  
practica, uti probant multa jurisconsultorum monumenta  
nobis relicta, aliae scholae praeter Platoniam parvum profectum  
habere, et facere poterant, uti notat Poli (*nota apud Tennemann vol. 2.*). Imo et multi veteres Ecclesiae Patres  
Platonem sequebantur, quia magis ad instituta Religionis  
Christianae accedere credebatur. Sed haec satis de scholis  
graecis.

### EPOCHÆ III.

#### DE PHILOSOPHIAE VICISSITUDINIBUS AB ECLECTICIS PHILOSOPHIS AD ILLIUS INSTAURATIONEM.

35. Dum sectae, de quibus in praecedenti epocha disseruimus, inter se dimicarent, scientiam suam praeclaris ditaverunt  
inventis Mathematici, quos inter celebriores fuere Aristarchus,  
Euclides, Eratosthenes, Archimedes, Ipparchus, Ptolomaeus,  
qui scholam Alexandrinam, quam Reges Aegypti instituerant,  
illustrarunt.

36. Inter haec Evangelica lux, quae legitime cum Hebraeorum  
philosophia (§. 6. 8.) connectitur, hominibus affulsit. Pudit  
Ethnicos philosophos, suas doctrinas Christianis esse inferiores  
veritatibus, quae Deum discernunt a mundo, quem creatum a  
nihilō praedicant. Quare ad ignominiam vitandam veterum  
philosophorum placita ita explicare conati sunt, ut ab illis  
cognita dicerent, quae Christiani docebant, atque systema  
confece- runt opposita conciliandi, *syncretismum* (1) appellatum.  
Ast alii minore praeoccupati illusionē,

(1) *Syncretismus* quondam usurpatus ad ineundam urbium Cretae  
foedus postea est translatus ad exprimendam informem diversorum  
systematum unionem, quae a Brukero vocatur *absurda methodus*, atque  
*detestanda syncretismi pestis*.

ab unoquoque veterum philosophorum selegerunt quaedam, quae sibi meliora videbantur, unumque efformarunt philosophiae corpus, *eclecticisimum* dictum, cujus auctor saeculo Ecclesiae secundo, Alexandriae dicitur Potamus. Plurimi Christiani eum sequuti sunt, inter quos praestiterunt Athenagoras, Pantenius, Clemens Alexandrinus, Origenes, Justinus Martyr, Anatolius Laodicensis Episcopus, Arnobius, Irenaeus, Lactantius, Synesius, Eusebius, et ipse Augustinus.

37. Ast, quoniam nil sanctum est, quo non abutantur impii homines, eclectica philosophandi ratio in veritatis, Religionisque detrimentum conversa est (1). Ammonius enim Sacca Platonem sequutus, Alexandriae scholam erexit Juniorum Platoniorum, docuitque nulla fuisse a Christo tradita, quae laterent Platonem. Haec secta, quae Graeciam, Syriam, Italiam, aliasque R. Imperii provincias pervasit, sectatores habuit infensissimos Religionis hostes, Photinum (2), Porphyrium, Jamblychum, Hieroclem, Simplicium, quorum doctrinae Julianum Imperatorem contaminarunt, corruerunt, atque apostatam reddidere. Haec schola Neo-Platoniorum consistebat in rituali exorcismis, incantationibus, atque nocturnis, superstitionis, subterraneis, magicisque operationibus referto, uti ait Diderot in Enciclopedia. Ammonius Sacca florebat circa a. 193 post aer. vulg.; Photinus natus est Nicopoli a. 205; Porphyrius a. 233, et Romae Photinum audivit; Jamblychus mortuus est a. 333; Simplicius florebat circa medium saec. sexti; Julianus mortuus est a. 363. fuitque discipulus Crysanti Sardenis, qui Neo-Platoniorum somnia docebat. Discipulus Ammonii dicitur etiam Longinus natus Athenis a. 213, atque ejusdem sectae promotor asseritur Proclus natus Constantino-poli a. 412, et mortuus a. 485. Creditur cum Neo-Platonismo

(1) Tanti mali multae causae afferuntur, nempe casus graeci spiritus; confusio spiritus Graecorum cum illo orientalium: *enthusiasmus* orientalium vestigia premendi; status dissolutionis Imperii R.; scepticismus, qui probatis veritatibus adversabatur; platonismus Ethnicorum Christianae Religioni oppositus; timor ex proxima polytheismi ruina exortus. Vide Tennemann (*Ediz. Nap. period. primo vol. 2.*).

(2) *Photinus unitatem*, carentem intelligentia, libertate, omnibusque attributis, constituit principium necessarium, atque omnis realitatis fontem; dicitur *unitatem* ab aeternitate extitisse, atque a Deo emanasse; ab *unitate* emanasse *Mentem*, sive *Intellectum*; ab Intellectu *animam supremam*; ab anima suprema mundi sensibilis *animam*, quae est principium vitae, et motus. Videtur Pythagoram imitatus (nota ad §. 31), atque praelusisse Schellingio (nota ad §. 68.). Vide Galluppi (*lettera ad un amico-Panteismo di Schelling, e di Hegel*).

incepisse etiam *Kabbala*, nempe quaedam imaginaria sapientia divina, secreta traditione inter Hebraeos propagata, cujus historia fabellis scatet. Dicitur vero *Kabbalae* auctor, vel promotor Rabbini Akibha mortuus a. 138. post aer. vulg. In ipsa praeter innumeras fabulas asseritur lux quaedam primitiva, ex qua, uti tela ab aranea, omnia, scala semper decressenti, emanant. Vide de his Tennemann. Ceterum, sublato e vivis Juliano, secta cecidit, et simul studium artium ubique languere visum est, quod Sophistarum ope auctum videbatur; sed philosophiae Patrum locum cessit (1).

38. Quapropter vix Boetius, (2) paucique Ecclesiae Patres in philosophia peripatetica exculi saeculo quinto recensentur, atque in aliquibus coenobiis usque ad octavum saeculum philosophia delitescere visa est. Tandem sub octavi saeculi finem Arabes, Aristotelis codices adepti, eos in patrium traustulerunt idioma, atque in Hispanias ab ipsis occupatas, illos variis illustratos commentariis, praesertim Avicennae et Averrois, invexerunt, scholasque erexerunt. Devictis deinde Arabibus, opera Alcuini Carolus M., conquisitis undique sapientissimis viris, pluribus in locis Occidentis Imperii collegia, academias, scholas instituit; sicque philosophia, quae saeculo decimo per Europam progressa est opera Gerberti, qui Pontifex fuit nomine Silvestri II, e suis emersa est tenebris. Aristotelis doctrina tamen ubique sceptrum tenebat, quae,

(1) Docet Balthassar Poli apud Tennemann tunc temporis quinque *Eclecticis* scholas floruisse, nempe *Alexandrinam*, quam fundavit Potamus, quamque Christiani Alexandriae morantes secuti sunt; hancque ortum dedisse mysticismo Ammonii Sacca; *Atheniensem*, quae opera Plutarchi Atheniensis philosophiam Orphicam, Ermeticam, Pythagoricam, Platoniam, Aristotelicam conciliare satagebat; *Romanam*, quae fuit verus syncretismus; *Christianam*, quae a philosophis colligebat, quidquid Religioni Christianae favebat, eratque verus Eclecticismus; *Gnosticam*, quae jactans, se scientiam Dei supremam, et arcanam habere, dogmata Hebraeorum, Chaldaeorum, Persarum, Graecorum, atque Christianorum miscuit. Inter Gnosticos recensentur saecul. 1. Simon Magus, Menander, Cerinthus; saec. 2. Carpocrates, Valentinus, Marcion, Cerdon, Bardassanes; saec. 3. Manes, alique, qui in tres sectas sunt divisi. Prima Deum unicum principium probabat, ex quo, tanquam ex fonte lucis, diversi spirituum ordines emanant, qui dicuntur *Aeones*; altera duo principia, bonum, et malum perpetuo bello inter se pugnantis admittebat; tertia unicum principium lucis, et tenebrarum docebat; sed hae sectae in aliis somniis conveniebant, praecipue in admittenda materia veluti principio malo.

(2) Boetius natus a. 470. et jussu Theodorici regis ob falsos perditionis rumores interfectus aliqua Aristotelis opera vertit, atque Papiae carceribus detentus non peritum opus *De Consolatione Philosophiae* scripsit.

quia omnes occuparat scholas, scholastica dicta est, ipseque Aristoteles per excellentiam *philosophus* est appellatus. Ceterum non defuerunt saeculo XI, XII, XIII, qui lumine revelationis illustrati de Deo, atque de officiis praeclara, et pretiosa dixerunt. Noti quippe sunt Luitprandus, Lanfrancus, S. Anselmus Cantuariensis, S. Petrus Damianus, S. Anselmus Lucensis, Bruno, Petrus Diaconus, Landulphus, S. Bernardus, Gherardus Cremonensis, Albertus M., S. Thomas, S. Bonaventura, Joannes Duns Scotus, aliique, qui Theologiae, Mathematicae, Jurisprudentiae, Medicinae sedulam navarunt operam.

39. Verum doctores illius temporis Aristotelis doctrinam minime expendentes, sed de ratione eum interpretandi dumtaxat contententes, in tres classes divisi sunt. Prima erat *Nominalium*, qui ideas universales ne mentis quidem conceptus reputantes, eas tantum verba, nomina, vocisque flatus dixerunt. Creditur Stilpo Megarensis (§. 22.) sic prius tenuisse, postea saec. XI. Roscellianus, dein Ockhamus ex Minoritarum familia saec. XIV, ac demum Hobbesius, Hume, Stewart. Secunda erat *Realium*, qui ideas universales sua objecta habere in mente, et in natura dictitabant. Gulielmus de Champeaux contra Roscellinum hanc sententiam est tuitus, ipsaque Platoni etiam tribuitur. Tertia erat *Conceptionistae*, media inter sectas Nominalium, et Realium, quae conceptus mentis ideas universales statuens, docuit, ipsas exprimere naturas, et proprietates in individuis determinabiles. Haec sententia, quae vera est, tribuitur Aristoteli, Abaelardo, Scholasticis, Loeckio. Vide Rosminium (*Saggio sull'origine delle Idee vol. I. c. 6.*)—*Conceptionistae* in plures et ipsi abierunt familias, quarum praecipuae fuerunt Thomistica, et Scotistica, quae in iis, quae minime dogmatibus opponuntur, inter se aliquando decertarunt.

40. Ast irretiti illi praeceptores *formalitatum*, *haecceitatum*, *realitatum*, *passionabilitatum*, *futuritionum*, *occultarum qualitatum*, *apathiae*, *sympathiae*, *antipathiae* vocabulis, Logicam, Metaphysicam, Physicam densissimis obvolvebant tenebris. Sed linguarum, artium, Medicinae, Jurisprudentiae, Theologiae, licet et ipsae etiam subtilitatibus refertae, studium minime languebat, cum praeclarissimi viri, quorum nomina longum enarrare foret, in illis excolendis toti incumbere (1).

(1) Docet Tennemann (*vol. 2. periodo 2.*), scholasticam, quae sic dicta est a scholis, a Carolo Magno (§. 53), qui regnavit ab anno 753 ad a. 775,

41. Decimo tertio saeculo instar insoliti sideris fulsit Rogerius Baco, ex Minorum familia, natus a. 1214, et mortuus a. 1294, qui Astronomiam, Chemicam, Mathematicam, Medicinam, Mechanicam excolens, cameram opticam, speculam, telescopium, pulverem nitratum suo studio invenit, aut perfecit, dictus proinde Doctor mirabilis. Decimo quarto vero, et decimo quinto saeculo ad eclecticam philosophandi rationem aliquantulum reversi sunt illi praeceptores, opera praesertim Dantis Aligherii, Francisci Petrarca, Joannis Boccaccio, maximorum magistrorum poetarum Italorum. Quae philosophandi ratio longius progressa est, ex quo graeci in Concilio Florentino interfuere, atque deinde, capta a Mahomede II. Constantinopoli, petierunt Italiam, secum philosophorum veterum scripta ferentes. Neque omittendum est, a saeculo IX. ad XV. quae barbara solent appellari, plura fuisse inventa. Nam a. 876. Georius presbyter organum hydraulicum invenit; Rogerius Rex Siciliae artem conficiendi

institutis, seu novum philosophandi modum, initium sumpsisse opera Alcuini mortui a. 804. Notat vero Balthassar Poli, Scholasticam fuisse *Theologicam*, adhibitam in Theologia; *Arabicam*, quae erat ipsa Aristotelis Philosophia ab Arabibus commentata; et *Philosophicam*, in Logica, et Metaphysica adhibitam. Huic Scholasticae finem ponit Cousinus in Baconem, vel Cartesio; Brukerus in Lutherum; alii vero tenent, post Baconem etiam in usu fuisse philosophicam Scholasticam. Ipse Tennemann Scholasticam in plures dividi epochas, in quarum prima ponit Alcinum; Rhabanum Mamonem mort. a. 856; Ioannem Scotum Origena, qui floruit circa a. 877, Deumque omnium rerum substantiam statuit; Lanfrancum natum Papiae a. 1005; haereticum Berengarium, qui saec. XI. dogmatizavit; Petrum Damianum Ravennatem nat. a. 1001; Anselmum Cantuariensem mor. a. 1117; in secunda recenset Roscelinum (S. 39), qui florebat a. 1089; Petrum Abaelardum mort. a. 1142; Hugonem Victorinum nat. a. 1092, Petrum Lombardum, dictum *Magistrum sententiarum*, mort. a. 1164; in tertia statuit Alex. Halensem, *doctorem irrefragabilem*; Albertum M. ex Ord. Praed. nat. cir. a. 1205; S. Bonaventuram ex Minorum familia, natum a. 1221; S. Thomam Aquinatem nat. a. 1225; Henricum Gandavensem mort. a. 1293; Ioannem Duns Scotum ex ord. Minor. nat. a. 1275; Aegidium Colonna Romanum nat. a. 1247; Franciscum Mayronem, et Rogerium Baconem ex Minor. ord.; Raimundum Lullum, aliosque, qui secuti sunt commentaria super Aristotelem facta ab Averroe, qui nat. Cordubae cir. a. 1217. erat Mahometi superstitioni addictus; a Mose Maimonides Hebraeo, qui etiam Cordubae natus est a. 1150, atque ab aliis in quarta ponit Oechamum mort. circa ann. 1343; Petrum Card. de Alliaco nat. ann. 1350, aliosque plures. Cousinus vero in tres epochas partiur scholasticam, nam, in qua Theologiae anella fuit Philosophia; alteram, in qua Theologiae Philosophia sociata est; tertiam, in qua Philosophia a Theologia est distracta. Verum huiusmodi epochae respondentne rei veritati? Sic quaerit, et merito quaerit Poli in *notis* apud Tennemann.

serici faciliorem a. 1130; Alexander Spina ex Ord. Praed. a. 1280 usum conspiciellorum; usus chartae lineae coepit a. 1300; ars typographica inventa est a. 1462; novi orbis detectio a Christophoro Columbo facta a. 1492. etc. etc.

62. Non novas scholas tamen condiderunt, sed veteribus adhaeserunt illi doctores. *Platonicam* quippe professi sunt *Gemistus Pleto*, qui, quia deprimens Aristotelem maxime Platonem venerabatur, mutata *a* in *e*, *Pleto* dictus est; et *Bessario*, qui duo Florentiam venire a. 1438; *Joannes Picus Mirandulanus* m. a. 1494; *Marsilius Ficinus* m. a. 1499; *Franciscus Fabricius* Ficini discipulus m. circa finem saec. XVI; alique, qui Magiae, et astrologiae praestigiis abrepti sunt: *Epicuream* excitarunt Crysostomus Magnenus circa medium saec. XVII; Sannertius mor. a. 1637; Gassendus m. a. 1655, qui tamen eam purgarunt ab iis, quae Religioni sunt adversa: *Aristotelicam* vero secuti sunt aliqui Graeci, Fracastorus, Piccolominaei, alique. Plurimum in Italia Aristotelem, et scholasticos insectati sunt Franciscus Patritius m. a. 1597; Bernardinus Telesius m. a. 1588; Laurentius Valla Romanus m. 1457, qui Aristotelis categorias ad tres coarctavit, nempe ad *ens*, *qualitatem*, et *actum*; in Gallia Petrus Ramus m. a. 1572, et Petrus Gassendus; in Germania Rodolphus Agricola m. a. 1485, et Daniel Hofmannus m. a. 1600; in Hollandia Erasmus m. a. 1536. Petrus Pomponatius natus Mantuae a. 1462, et ejus discipuli Simon Portius m. a. 1553, Paulus Jovius m. a. 1552, Julius Caesar Scaliger m. a. 1559, Jacobus Zabarella Patavinus m. a. 1589. eo tempore de animae humanae immortalitate philosophice non senserunt. Floruerunt tunc temporis et Thomas Campanella Calaber m. a. 1639, Hieronymus Cardanus Papiensis m. a. 1504, Iordanus Brunus Nolanus m. a. 1600, obnormis ingenii viri, qui ante Cartesium a dubio generali incipiendum putarunt, atque a factorum conscientiae examine procedendum, sed postremus de Religione non bene sentiebat. His accense Angelum Poliziano m. a. 1494, et Nicolaum Card. Cusanum m. a. 1464. Aristoteles tamen adhuc habebatur Philosophiae magister, a quo recedere nefas erat. Causae autem, cur tanto tempore ejus jugo ingenia subjecerint, recensentur multae, nempe parvum exercitium in cernendo systematico cognitionum nexu, positivarum cognitionum inopia, nimia linguarum ignorantia, quaedam aristotelicae doctrinae cum Theologia conformitas, syllogistica methodus in tradenda veritate faciliior, consuetudo auctoritati etiam in rebus philosophicis deferendi, philosophia Peripatetica cursum fere

integrum complectens philosophicum. Vide Tennemann (*vol. II. p. 3. periodo 3.*). Interim fervebant ingenia, mentes excitabantur, animi hinc inde pugnabant, quasi nova appropinquaret epocha, in qua philosophia alios haberet cultores animosiores. Ita se res habuerunt usque ad saeculum XVI, in quo philosophiae instaurationis est incepta.

## E P O C H A IV.

### A PHILOSOPHIAE INSTAURATIONE. AD HAEC USQUE TEMPORA.

43. Saeculis XVI. et XVII. copiosis ob naturalia inventa, despectis inanibus subtilitatibus, ad conterendum peripateticæ servitutis jugum, atque ad jucundissimum naturæ spectaculum, ejusque arcana exploranda plures docti omnem contulerunt operam, philosophiæ restauratores communi suffragio conclamati. Eminent inter ipsos Galilæus Galilei, qui ortus Pisis a. 1564. recentioris physiciæ pater non immerito censetur. Siquidem, licet in Astronomia eum præcesserint Tychonius, Keplerus, Copernicus, tamen telescopii inventor, hanc gloriam Rogerio tribuamus (§. 41.), habetur, ac diligentissimus cæli observator. Ipse vidit Jovis Satellites, Veneris phases, Lunæ prominentias, Solis maculas, numerumque stellarum ingentem detexit. Ipse, falsis demonstratis Aristotelis placitis de gravitate, et motu corporum, in mechanica, et in hydraulica plura invenit, leges descensus gravium, leges projectionis, et penduli oscillationes determinavit; aerisque pondus ostendit, adjutus opera clarissimi Torricelli ejus discipuli. Ipse motum terræ circa solem, quod Pythagoræ, aut Philolao Crotoniati primum tribuunt eruditi (§. 31.), et postea a Copernico in lucem protractum dicitur, observationibus diligenter institutis communivit. Eum ex Italia sequuti sunt Torricellius, Castellius, Vivianus, Cavalerius, Magalottus, Montanarius, Cassinus, Fridericus Cesi; et ex aliis regionibus Baylius, Guerrikius, Levennoeki, Ugenius, alique multi, qui Mathematicam, Astronomiam, Physicam, Historiam naturalem illustrarunt, auxerunt, ornaverunt.

44. Franciscus Baco Baro de Verulamio natus a. 1561 in Anglia, omnium scientiarum instaurationem proclamans, usus analysi, inductione, analogia, experientia constanti,



methodico dubio, philosophorum vitia detexit, veramque scientiae viam aperuit. In suo *novo organo* praejudicia removere satagit, quae *idola* tribus, *idola specus*, *idola fori*, *idola* theatri appellat, iterque pandit ascendendi per gradus continuos a particularibus ad axiomata minora, deinde ad superiora, demum ad generalissima. In libro de *dignitate*, et *augmento scientiarum* moralem philosophiam in *Ethicam*, et *Doctrinam civilem* divisit, illamque in duas partes, quarum prima agit de bono morali, et hominum officiis, altera de modo animi excolendi ad virtutem consequendam. De doctrina civili tantum innuimus, quod ex ea Grotius juris publici ideam sumpsisse credatur. Animam sensibilem brutis et hominibus, rationalem hominibus tantum, Aristotelico jugo nondum excusso, tribuit. Aureas sententias de Theologia edixit, quarum non est praetereunda illa: *leves gustus in philosophia movere fortasse ad atheismum, sed pleniores haustus ad Religionem reducere*. Hujus indolis sunt omnia fere Baconis opera, in quibus tamen ambages saepe inextricabiles inveniuntur (1).

45. Non multo post floruit in Gallia Renatus Cartesius natus a. 1596, qui fervido suo ingenio indulgens systema confecit ex parte fictitium, magno tamen plausu exceptum. Meditationes suas a corrigendis praejudiciis de praeconceptionibus opinionibus incipit, primumque dubitandum esse monet. Deinde animadvertit de seipso dubitare non posse, quia, si cogitat, atque dubitat, certo existit. Ast non recte progreditur. Statuit siquidem, *omnes res, quae clare, et distincte concipiuntur, veras esse*, ex quo infert, Deum existere, quia claram, et distinctam ideam Dei habet. Porro has claras, et distinctas ideas a Deo animabus, dum crearentur, esse impressas, quemadmodum in cera sigillum, docuit, Platonis ideas innatas in lucem revocans. Animae essentiam in perenni cogitatione, sicut in extensione materiae essentiam posuit; causas secundas viribus expoliavit; corpus, animam-

(1) Docet Perrone (*apud Tennemann in nota*) suffultus Humii sententia, Baconem a Galilaeo in hoc alium fuisse, quod ille vestigia signarit, iste creator fuerit philosophiae experimentalis, et inductivae; ille praecepta dederit, iste methodum statuerit in scientiis naturalibus. proficiendi: ille viam theoreticam, iste practicam in veritatis inquisitione indigitaverit; ille matheseos omnino ignarus Copernicanum systema spreverit, iste ad miraculum mathesi instructus illud systema novis communiverit argumentis; ille stylo duriusculo, et affectato, iste amaeno, vivacique sit usus. Imo animadvertit Poli (*ibid.*), methodum inductivam a Bacone adhibitam fuisse a Thelesio, a Iacobo Acontio, a Leonardo Vinci, Viris Italis, inventum.

que Deo occasionem dare consentientes actiones perficiendi, amota mutua corporis, animaeque operatione, effutivit, systema occasionalistarum eudens. Deinum mundi totius opificium per vorticosum quemdam materiae motum explicare infelici exitu aggressus est. Dignus est Cartesius ea praecipue de causa, quod jugum servitutis in Logica, Metaphysica, Ethica amoverit; ast dubium universale a se statutum ad Protestantismum, imo ad Atheismum ducere videtur. Si enim de omnibus dubitandum unicuique foret, etiam de demonstrationibus mathematicis, de corporibus, de Deo, de terra, de caelo (Princ. de la Phil. p. 1.), licet religionem, et moralem ore tenus exciperet, quomodo verae sibi essent his de rebus veritates evidentes? Et concipiuntur *clare et distincte* omnes res ad Religionem, et mores spectantes? Jure proinde ejus philosophia damnata fuit a S. Congregat. Indicis die 20. Novembris 1663. V. Vincentius Gioberti (*Introduzione allo studio della Filosof. t. 1.*). Non desunt tamen, qui Cartesium mitiori in sensu interpretantur (1).

46. Cartesio sese opposuit Petrus Gassendus. Natus hic a. 1592, ac Mathesis praeceptor in Parisiensi Academia institutus, atomisticum systema instauravit; innatas ideas inficiatus est; quoddam reale commercium animam inter et corpus praeponit; quatuor mentis operationes indigitavit, ideam, judicium, ratiocinium, methodum. Epicuream philosophiam refecit, sed in pluribus emendatam, novisque additamentis illustratam. Ipse, cribrata, in multisque refutata Aristotelis Philosophia (§. 42), suam eudit divisam in *Physicam*, ad quam retulit metaphysicam, et Theologiam, in *Ethicam*, et *Logicam*, quam ultimam uti Introductionem ad Philosophiam, non ut ejus partem, respexit. Probavit quidem Gassendus animam rationalem, spiritualem, et liberam, sed huic ministram fecit animam materialem, animale, praeditam imaginatione. Demum statuit, virtutem esse medium, quo itur ad summum

(1) De Cartesio aliqui dubitant, utrum vere auctor systematis occasionum dicendus sit. Certe multi eum defendunt ea praecipue de causa, quia arctissimum posuit nexum animam inter, et corpus, et quia numquam Deum cogitationum nostrarum fecit causam. Sed extra omnem dubitationem est, ejus sectatores *occasionalismum* admisisse, ratos, idem Cartesium tenuisse, utpote qui, quamdam oppositionem inter spiritum, et materiam ponens, statuit, ab externo nullum nobis posse repraesentationem advenire. Multi quoque defendunt Cartesium a scepticismo, suffulti verbis ipsius (*De Methodo n. 3.*): *Sceptici dubitant, tantum ut dubitent: contra ego totus in eo eram, ut aliquid certi reperirem.* Vide Martini (*Storia della Filos. discor. 101. n. 2. contra Gioberti.*)

bonum, atque nostras ideas partem a sensibus, partim ab intelligentia derivari. Vide Martini (*disc.* 10).

47. Cartesianam doctrinam sunt amplexi Iansenistae e Portu Reali, Antonius Arnauld (1), Nicole, Blasius Paschal, quibus *ars cogitandi* tribuitur, necnon Sylvanus Regis, Antonius le Grand, aliique. Acerrimus vero Cartesianae doctrinae patronus fuit Nicolaus Malebranchius, qui natus a. 1638. omnia fere sui magistri placita eloquenti oratione ampliavit. In libro *de inquisitione veritatis* primum docet, sensus minime nos inducere in errorem, sed nos ipsos errare per falsam applicationem perceptionum, quas a sensibus accepimus. Deinde optima dicit de viliis imaginationis, eorumque causis; ast postea plurima effutit, quae fanaticum sapiunt. Nam cum Cartesio occasionalistarum systema, ac criterium in perceptione clara, et distincta statuit, et docuit, ideas a Deo procedentes, quas anima contemplatur, esse diversas substantias ab ipsa anima distinctas. Imo ulterius progressus credidit, homines in Deo contemplari ideas rerum, in Deo cognoscere corpora, in Deo animas humanas. Quare inferebat, se ideo credere corporum existentiam, quia fides docet a Deo mundum esse creatum. Ast ideas innatas inficiatus est, et Cartesianum dubium (2). Male quoque aliqui rentur, Malebranchium Spinozismo fuisse; cum minime animas cum Dei

(1) Qui tamen praecipue contradixit Malebranchio, fidissimo Cartesii discipulo.

(2) Ut omnes effectus a Deo pendere concluderet Malebranchius, statuit, 1. corpora aequae in quiete, et in motu concipi posse; 2. ideoque ideam corporis illam motus non continere; 3. ac proinde unum corpus non posse aliud corpus in motum ciere; 4. imo neque aliquem spiritum finitum posse corpus movere, neque corpus aliquod in animam sensationes producere, quia diversae naturae sunt anima, et corpora, nullosque est nexus inter spiritus voluntatem, et corporis motum; 5. ac propterea neque voluntatem, neque aliam, quamcumque animae facultatem posse ideas producere; 6. nullam proinde esse in homine vim producendi motum, cudiendique ideas; 7. ideoque omnes effectus in natura produci a perfectissima, et omnipotenti Dei voluntate, quae una est omnium effectuum causa; 8. hinc causam naturalem non esse veram, et realem causam, sed *occasionalem*, quae auctorem naturae movet ad agendum hoc vel illo modo, haec vel illa opportunitate. Vide Galluppi. (*Lett. Filos. lett.* 10.) Haec est ratio, cur aliqui non Cartesio (nota ad §. 45.), sed Malebranchio *de causis occasionalibus* systema tribuant, cum non ille, sed iste docuerit, Deum *occasione* perceptionum in anima excitare motus in corpore, et *occasione* motuum in corpore excitare sensationes in anima, ablato animam inter, et corpus mutuo commercio. Dicebat vero, animas videre in Deo ideas omnes, tum quia in Deo sunt omnium rerum ideae archetypae, tum quia Deo adeo coniunctissimae sunt animae, ut ille istarum locus dici queat, uti spatium est corporum locus ut ipse docebat.

substantia confuderit, imo substantias diversas eas statuerit. Gerdilio viro clarissimo Malebranchii placita renovare placuit saeculo sequenti (*V. Gioberti loc. cit. §. 45.*)

48. Coevus illis viris fuit Thomas Hobbesius Anglus natus a. 1588, qui est patrocinator tyrannidem; justum, et injustum ad conventiones reduxit; vimque potentium jus in debiles appellavit. Hinc docuit, homines ex mutuo timore esse consociatos in societate, ideoque omnem societatem oriri a vi, aut voluntate; ac propterea statum hominis primum fuisse belli statum; formas regiminis mixtas repugnare, atque Monarchiam, quam cum tyrannide confudit, Democratia, et Aristocratia esse praestantiores. Insuper statuit, infinitum non posse concipi, sed esse fidei objectum, atque Religionem in cultu externo consistere, esseque publicam vel privatam, illam civilibus legibus suffultam, istam arbitrariam. Vide Martini (*disc. 10.*). Omnes ideas a sensibus esse, memoriam, ac imaginationem sensationes debiliores dixit. Omnem ab homine auferens spiritum, animam in motu partium, quam perceptionem sensationum dixit, reposuit.

49. Ast novam philosophiae faciem, desinente saeculo XVII, dederunt Isaacus Newtonus, Lockius, Leibnitiuss. Primus natus in Anglia a. 1642. Galilaei doctrinis insistens duas illas materiae universales leges reperivit, inertiam, et attractionem. Deinde statuit, 1.<sup>o</sup> non plures admittendas esse naturalium rerum causas, quam quae verae sunt, earumque phaenomenis explicandis sufficiunt; 2.<sup>o</sup> effectuum naturalium ejusdem generis easdem esse causas; 3.<sup>o</sup> qualitates corporum, quae intendi, et remitti nequeunt, et quae omnibus, in quibus experimenta instituere licet, corporibus competunt, pro corporum universorum qualitatibus haberi posse. Attractionis vim in planetis contemplans, systema Copernicanum solido niti fundamento perbelle prospexit; molecularem affinitatem chemicam expertus est; lucem esse igneas particulas a corporibus luminosis avulsas demonstravit, licet alii recentiores putent, lucem esse phaenomenon, quod oritur ex aethere subtilissimo undique pervadente, atque a corporibus, quae luminosa dicuntur, excitato; colorum causam, naturam, diversitatem repetitis experimentis explicavit. Totus in Mathe-sis, et Physicae studiis illustrandis, adeo naturae mirabilia suspiciebat, ut specialissimam erga Deum venerationem pro opportunitate praeserferret. Cujus vestigia sequens Boyleus ejus discipulus, cathedram instituit ad Deum, ejusque cultum defendendum destinata, et Clarkius alter ejus discipulus,

profundissimam existentiae, et attributorum Dei demonstrationem edidit.

50. Joannes vero Lockius in Anglia natus a. 1632. Logicae, et Metaphysicae praecipue operam dedit. Opus ipse edidit *de intellectu humano*, in cuius primo libro innatarum idearum systema destruere conatur; in secundo omnes ideas per sensationem, et reflexionem statuit; in tertio de idearum agit *signis*, quorum usum tum ad explicandas ideas aliis, tum ad illas in memoriam revocandas, ut eis in ratiocinio utamur, demonstrat; in quarto de cognitionibus humanis loquitur, quarum gradus, extensionem, certitudinem, probabilitatem evoluit, erroresque patefacit. Quare totus est Lockius ad destruendas ideas innatas a Cartesio probatas (§. 45.), ac proinde ad statuendum principium, *nihil esse in intellectu, quod prius non fuerit in sensibus*, ex quo deducit, *animam esse tabulam rasam*. Ceterum probavit et ipse ideas, et cognitiones *a priori*, quae ab experientia non proficiscuntur, uti sunt veritates mathematicae. Vide Galluppi (*Lett. filos. lett.* 3.). Deum demonstrat; ast ejus spiritualitati contradicit, cum de humanae animae spiritualitate dubitare videatur; putavit enim Lockius, non posse sciri, utrum potuerit Deus materiae cogitationem tribuere. Nec recte sensit de humana libertate, quam accepit pro facultate agendi secundum volitionem, et nolitionem, sicque libertatem *a necessitate* sustulit, illam a *coactione* tantum probans; et de corporum existentia, cujus cognitionem *non carere omni dubio, omnique incertitudine* professus est (*l. 4. c. XI.*). Imo cum ipse asserat, *nos non habere neque habere posse ideam substantiae*, profecto de corporum, quae certe substantiarum aggregata sunt dicenda, existentia dubitasse videtur. Plurimum Lockio debent Logica, et Metaphysica, sed ipse plura menda commisit, vacua plura reliquit. Ejus *sensismi* philosophiam sectati sunt, eamque ad materialismum protraxerunt La Metrie, Cabanis, Helvetius, alique.

51. Godefredus Guillelmus Leibnitiuss Lipsiae ortus a. 1646 fuit summus mathematicus, summusque metaphysicus. Posuit duo principia: *eadem res non potest esse simul, et non esse: et nihil existit sine ratione sufficienti existentiae suae*. Juxta ipsum Deus ita praeordinavit status successivos corporis, et animae, ut semper correspondentes essent, quod est *systema harmoniae praestabilitae*. Ipse enim docet, Deum animas condidisse vi sibi efficiendi universi repraesentationes, quarum una in altera, haecque in altera, sicque deinceps, ra-

tionem habet, usque ad primam, supra quam anima agens absque externorum objectorum impressione evoluit vi sua omnia successiva phantasmata; atque creasse corpora, in quibus seriem motuum posuit, quorum unus in altero usque ad primum rationem habet, haecque corpora datis largitus est animabus. Quare juxta hoc systema in anima evolverentur illae repraesentationes, etiamsi mundus non extaret, quod est idealismum, et transcendentalismum Kantii, aliorumque Germanorum profiteri. Rationales animas cunctas in mundi exordio procreatas, atque suis involutas corpusculis in protoparentum visceribus inclusis docuit, quod est systema *involutorum*. Corporum elementa statuit simplicia, et *monades*, *unitates*, *entelechias* vocavit. Tota de *monadibus* theoria Leibnitii haec est. Posuit 1.<sup>o</sup> existere corpora, ideoque entia simplicia, ex quibus illa constant; 2.<sup>o</sup> haec simplicia numerum efformare; ideoque ipsa esse unitates, seu monades, ac proinde corpus quodcumque constare monadibus; 3.<sup>o</sup> monades esse substantias, neque quidquam posse extrinsecus recipere; ac propterea animas humanas, quae et monades ipsae sunt, non ab externo, sed vi sua in se producere sensationes, quae sunt repraesentationes compositi in simplici; 4.<sup>o</sup> actuales repraesentationes in antecedentibus, et has in aliis, usque dum perveniatur ad statum primitivum, habere rationem sufficientem; 5.<sup>o</sup> ideoque statum primitivum supponere repraesentationem compositi in simplici, et vim repraesentativam in anima; 6.<sup>o</sup> sed statum hunc primitivum unius monadis esse diversum a statu alterius monadis primitivo, licet unaquaeque monas suum habeat; 7.<sup>o</sup> animam, et unamquamque monadem habere repraesentationes monadum corporis, et quas habet unaquaeque monas; ac propterea animam, et quamcumque aliam monadem habere virtutem repraesentandi sibi universum, cujus idea dicitur *schema*; 8.<sup>o</sup> animae perceptiones esse claras vel obscuras, prout earum est conscia, vel non, sed obscuras esse perceptiones monadum corporis; 9.<sup>o</sup> cognitiones necessarias, quae non a sensatione vel ab objecto, sed ab anima seu subjecto oriuntur, esse innatas. Notat tamen Galluppi (*Lett. Fil. lett. 4*), in Leibnitii systemate omnes cognitiones esse necessarias, omnesque proinde innatas, cum omnes a subjecto oriantur. Verum praeter monades finitas Leibnitius admisit *monadem monadum*, nempe Deum, cujus limitationes effusionis *effulgurationis* monades finitas dixit, in qua doctrina emanationes creaturarum substantiarum videntur includi. Deinde suo systemati veluti contradicens, axiomatis loco

statuit, *nihil esse in intellectu, quod prius non fuerit in sensu, nisi ipsum intellectum*; Cartesii philosophiam dixit non meliorem, sed meliorem praeparationem ad philosophiam, non sanctuarium templi, sed celsissimum perystilium; mala distribuit in metaphysica, physica, et moralia, atque docuit, Deum fecisse optimum hunc mundum. Providentiam Dei, aliasque Religionis dogmata contra Baylium tuitus est in sua Theodicaea, eaque non contra, sed supra rationem ostendit. Linguam universalem inveniri, statuique posse putavit, quae in perquirenda veritate fungeretur officio, quo funguntur signa algebrica, et arithmetica. Leibnitii philosophiam, quae huc, illucque sparsim in suis operibus reperitur, in idealissimum, imo et pantheismum ducere, aliqui putarunt. Vide Tennemann, sed praecipue Barchoux de Panhoen, qui Philosophiam Germanicam recentem docte describit. Leibnitii doctrinas acerrime sunt tuiti Wilfingerus, Tummistius, alique, sed praecipue Wolfius natus a. 1679. Uratislaviae, qui eas collegit, in systema redegit, perpolivit, auxit, regnumque Philosophiae in Germania tenuit fere unius saeculi medietate, sed nequivit in Galliam ingredi ob Lockii empirismum; reject tamen Wolfius monadum systema.

52. P. Baylius natus an. 1647, cum Leibnitio acerrime disputavit (§. 51.). Ipse modo huic, modo illi systemati fauet, nullumque constanter retinet; aliquando revelationem extollit, aliquando carpit; idea Dei utitur in excludenda corporum existentia, et humana libertate, et interim atheis patrocinatur; scepticismum summis extollit laudibus, licet saepe dogmatizet. Occasionem sui scepticismi a Malebranchiana doctrina de *causis occasionalibus* sumpsit Baylius. Ait enim in suo Dictionario (*art. Pyrrh. et Arcesil.*) edito a. 1697. 4.<sup>o</sup> qualitates corporum, quae sensus afficiunt, sive primarias, sive secundarias, esse apparentias, cum oppositum non repugnet; ideoque objecta externa non esse sensationum causas; 2.<sup>o</sup> scepticismum non posse sine petitione principii refutari, supponendo nempe aliquod verum; 3.<sup>o</sup> experientiae opponi axioma *ex nihilo nihil*, ac proinde nil certi sciri posse; 4.<sup>o</sup> tollere libertatem axioma illud, *conservationem esse continuatam creationem*. Vide Galluppi (*Lett. Fil. lett.* 10.). Usque adeo desipuit, ut manichaeorum principia defenderit. Dignus tamen Baylius, qui efferatur laudibus, ea tantum de causa, quia veterum placita cribravit.

53. Non sileudum hic est de Spinoza, qui philosophis accensetur. Natus Amstelodami a. 1632 ex Hebraeis parenti-

bus, et postea desertor factus Christianae Religionis, quam fuerat amplexatus, docuit unam esse in mundo substantiam, haecque esse Deum; spiritus vero, et corpora esse illius substantiae modificationes. Systema hoc pantheisticum, a Xenophane acceptum (§. 32.), atque geometrica methodo adornatum, Poiretus, Isaac Jaquelot, Wolfius, Gerdilius, multique alii refutarunt.

54. Floruit etiam saeculo XVII. Odoardus Herbet, qui natus a. 1581 innatas ideas destruxit, atque cognitionum humanarum originem in quodam rationis instinctu posuit. Hinc docuit, Religionem oriri a quodam lumine primitivo, et immediato, collatoque omnibus hominibus; atque animam esse veluti librum clausum, et a seipsa communes notiones, de quibus omnes conveniunt, educere. Floruit et Joannes Baptista Vicus, qui natus a. 1660. plura de Jure publico, de Logica, de Metaphysica meruit, licet a paucis intellectus. Quare non defuerunt, qui in ejus philosophia errores contineri dicerentur (1). Ceterum ipse sensum communem pro criterio veritatis posuit. Ens verum, quod Deus est, esse infinitum posse, nosse, et velle; hominem vero finitum posse, nosse, et velle statuit; Deum ex sensu communi, et ex idea Dei alias res deduxit; pluraque docuit, ex quibus Montesquieu, Gravina, Giannone, Filangieri, Genovesi, Pagano, aliique, suas eruerunt theorias (2). Floruit et Hugo Grotius, qui natus

(1) Notat eum Buchet (*Introduction à la science de l'Histoire*), ideam progressus indefiniti ortum habuisse a Bacoue, qui tres perfectibilitatis periodos statuit, nempe apud Graecos, Romanos, et nos, sed Jo. Baptistam Vico eam promovisse. Nam Vico (*Principii di una scienza nuova*) statuit tres aetates, deorum nempe, heronum, et hominum, in quarum prima homines inftar belluarum viventes, caelo tonante, credebant esse Jovem, in secunda duces sibi elegerunt, atque aristocratias instituerunt; in tertia post civiles discordias in monarchias coeluere. Sed credidit, societatem dissoluturam iri, homines in silvas redituros, atque demum inftar phaeniciis ex cinere societatem surrecturam, sicque continuo circulo homines perrecturos. Hinc concludit Buchet, ex hoc systemate Boulanger hausisse ideam progressus indefiniti, atque Hegel suam philosophiam juris.

(2) Nam in Logica docuit, in veritate inquirenda procedendum esse ratione, et historia, atque methodum adhibendam esse ex analysi, et synthesisi mixtam; non omnes scientias tractari posse methodo mathematica; mythologiam esse veram historiam; animam, quam in corde posuit, pollere memoria, phantasia, et arbitrio; axioma Cartesii, *cogito, ergo sum*, esse evincendum e converso, *sum, ergo cogito*, eum existentia praecedat cogitationem. In opere autem *Principii di una scienza nuova* docuit, in turri Babelica tantum filius Semis fuisse, cum filii Chami, et Iapheti essent inftar ferarum elingues viventes huc, illucque dispersi; homines ad societatem natos a familiis incepisse, primamque regiminis formam aristocratiam



a. 1583, in suo *jure belli et pacis* multa praeclara statuit circa jus gentium, ac fundamenta jecit naturae juris (1). Floruit Theophilus Galeus, qui mortuus a. 1677 philosophiam in verbo Dei scripto traditam esse docuit. Floruit Rodolphus Cudworthius natus a. 1621, qui eandem Galei sententiam tenuit, pluresque Platonis sententias propugnavit. Floruit Ricardus Cumberland natus a. 1632, qui, ad destruendum Hobbesianum systema, principium actuum humanorum benevolentiam statuit. Floruit Joannes Clericus natus a. 1657, qui Dei providentiam contra Baylium defendit, atque *naturas plasticas* Cudworthii tuitus est. Floruit Petrus Daniel Huetius natus a. 1630, qui demonstrationem evangelicam, censuram philosophiae cartesianae, quaestiones alnetanas edidit, summusque creditus est in qualibet scientiarum parte; ast auctoritatem extollens, humanamque rationem extenuans, scepticismum ad vitam revocavit (2). Floruit Samuel Puffendorfus natus a. 1632, qui jus naturae et gentium ex sociabilitate, uti Grotius etiam docuerat, deduxit, remota revelatione. Floruit Christianus Thomasius natus a. 1655, qui jus naturae ad praecepta negativa coercuit, atque ab amore officia deduxit, in quo eum sunt sequuti J. Gottl. Heinnecius, et Coccejus. Floruit Georgius Berkeley, qui natus a. 1684 idealismum instituit, corporumque existentiam dubiam reddidit (3);

elegias; linguam esse ab homine inventam; tres linguas primitus fuisse tribus aetatibus respondentes, hieroglyphicam, symbolicam, vulgarem; Numerum non extitisse, sed opera illius fuisse aut aliquorum coecorum cantus, aut plurim Scriptorum etiam tempore dissitorum. Vide Martini (*Storia disc.* 13.)

(1) Ceterum Grotio alii docti praecesserunt, praecipue Italus Albertus Valentini natus a. 1551. et m. a. 1611 in operibus: *Libri tres De jure belli, et De injustitia bellica Romanorum actio*.

(2) Huetius in *Tractatu de imbecillitate mentis humanae* totus est in statuenda divina auctoritate, quae una nos certos reddit, nostram cognitionem reapae realitati rerum respondere. E contra Antonius Muratori a. 1745 edidit opus: *Trattato della forza dell'intendimento umano, ossia il Pirronismo confutato*, in quo notat (*Prefaz.* n. 9. 10. 11.), Huetium non esse illius Tractatus auctorem.

(3) Berkeley (*Dial. inter Plam, et Phil.*) a. 1713. a Malebranchiana doctrina profectus docuit, 1. qualitates primarias, et secundarias corporum extra animam nostram non existere, neque nostrarum idearum archetypa nostris sensibus percipi; 2. invisibili visibile non posse esse simile, ideoque res externas nostris ideis non respondere; 3. corpora non esse nostrarum idearum causas instrumentales, quibus Deus non indiget in agendo, neque occasio- nales, cum dedecet Deum, ut a causis finitis, praesertim materialibus, ad agendum moveatur 4. corpora non esse substantias, sed res chimericas; atque in nobis rerum ideas produci a voluntate spiritus infiniti.

ast scientiae incrementis profuit per *theoriam de visione*, in qua Condillacho praelusit.

55. Sed varias in classes dividamus philosophos, qui saeculum XVIII. ex parte, et inceptum saeculum XIX. illustrarunt. Floruerunt in Anglia Samuel Reimarus, qui natus a. 1694. clare, et profunde de Logica, de Theologia, de belluarum instinctu disseruit; Goffredus Plowquet, qui natus a. 1716. Logicam ad simplicitatem reduxit, pluraque de metaphysicis ingeniose tractavit; Henricus Lambert, amicus Kantii, qui mortuus a. 1777. Logicam, et Metaphysicam mathematico rigore evoluit; David Harteley, qui notus a. 1704. Deum omnium naturae effectuum, et omnium humanarum actionum causam proclamavit, vimque intellectus ad nervorum vibrationem reduxit; David Humeus, qui natus a. 1711. connexionem inter causam et effectum abstulit, licet libertatem hominis ea praecipue de causa negaverit, quia omnis animae determinatio a praecedentibus dependeat motivis: scientiam omnem ad quantitatum, et numerorum relationem, et ad factorum experientiam coarctavit: idealismum, cum Berkeley corporum existentiam negans, in vitam revocavit; asseruitque nullo solido probari argumento Deum, providentiam, miracula, animae immortalitatem (1); Thomas Reid, Jacobus

(1) David Humeus m. a. 1776, ut scepticismum instauraret, statuit, 1. in duas classes dividi objecta nostrae inquisitionis, quarum prima *relationes idearum*, altera *res facti* comprehendit; 2. in prima classe esse omnes propositiones certas, aut quia *intuitivae* sunt, aut quia *demonstrativae*, uti propositiones Geometricae; in altera illas omnes, quae experientia videntur, et quarum contradictoriae possunt esse aequae verae; 3. propositiones secundae classis niti principio causalitatis, *non datur effectus sine causa*, hocque principium nullo niti fundamento, eum *causa*, et *effectus* sint duo facta *conjuncta*, et non *connexa*, cumque idea unius ad alterius ideam, independentem ab experientia, nos minime ducat; 4. quare nos neacire *connexionem* nostrarum idearum cum objectis externis, neque nos habere ideam *potentiae*, et *virtutis*; neque noscere posse, futurum esse simile praeterito; ideoque neque posse scire, utrum c. g. panis, qui heri nos nutrit, sit nutriturus hodie, et postea; 5. nos proinde quodam *sensu fidei*, seu *instinctu* ponere, *effectum esse a causa*, *futurum esse praeterito simile*, atque externorum objectorum realitatem, primarias corporum qualitates, sique fidem exhibere sensibus; 6. hoc quoque *instinctu*, seu potius Dei revelatione, nos rerum existentiam probare, eum rationis ductu, utrum praeter Deum aliud ens potuerit mundum creare, vel utrum mundus existat, haud noscamus; 7. animam propterea definiti successivem impressionum, et idearum illis respondentium, quarum recordamur, et conscii sumus. Quapropter Humeus vestigia praesit Malebranchii, quatenus et iste principium causalitatis negavit in natura creata (§. 47. not.), sed Malebranchium deseruit in consecratis; iste enim voluntatem Dei causam omnium effectuum dixit, Humeus vero de hac etiam unica causa dubitavit, philosophiamque impossibilem aestimavit. Vide Galluppi (*Lett. Fil. Lett.* 9. et 10.).

Beattie, Jacobus Oswald, qui in Davidem Humium insurrexerunt; Riccardus Price, qui empirismum, et sensum morale in metaphysica impugnavit; Henricus Home, et Adamus Ferguson, qui sensum commune propugnarunt; Adamus Smith, qui sympathiam morum scientiae principium constabilivit, quique natus a. 1723 et m. a. 1790. amicus Humii fuit, et cognitus praecipue est ob *Tractatum de divitiis Nationum*.

56. Ast de Thoma Reid aliquid diductius est dicendum. Natus ipse a. 1704 et mortuus a. 1796 Glascoyii scholam erexit, Scotiaeque philosophiae nomen dedit, medium iter ingressus inter Gallum empirismum, et Germanum idealismum. Reid, ut Humii scepticismum (§. 55. nota) convelleret, docuit; 1.<sup>o</sup> reapse experientiam non exhibere nobis aliquam *connexionis* ideam; ideoque opus esse in anima supponere aliquas veritates fundamentales *instinctivas*, quae sunt principia *sensus communis*, huncque constituunt; 2.<sup>o</sup> haec principia esse sequentes propositiones: verum est, quod experitur conscientia; ad animam pertinent sensationes, et cogitationes; memoria parit certitudinem parem conscientiae objecti praesentis; ego nunquam mutatur; res sensibiles perceptae sensibus reapse existunt; objecta externa non agunt super animam, neque haec super illa; 3.<sup>o</sup> quare ex facultate *inspirationis* nos probate objecta externa, qualitates primarias, ens in nobis cogitans, atque admittere, verum, falsumve esse, quod verum, falsumve percipimus; hominum testimonium esse veritatis criterium; causam supponere, quod est reale; futurum esse simile praeterito. Has veritates dixit Reid evidentes, et fundamentales, cum sint manifeste absurdæ oppositæ propositiones. Vide Galluppi (*Lett. XI.*), et Martini (*disc. 15.*). Itaque juxta Reid objecta externa operantur super organa, sensatio dein animam afficit, demum anima percipit, quin tamen haec tria sint connexa ulla causalitate; ideoque Reid statuit possibilem perceptionem absque objecti impressione, et existentia. Et reapse ipse docuit, animam nostram ponere objectum externum, statim ac agit in nos, ex judicio *intuitivo, instinctivo, primario*. Hinc deduxit, ab experientia interna neque posse argui, animam esse substantiam, vel polere libertate, sed has veritates, positis animae operationibus, ex judicio *instinctivo* dictari. Quare Reid totus in evolvendis animae facultatibus, de ejus natura non est sollicitus. Ipsum sunt æquuti Jacobus Beattie mortuus a. 1803, Dugaldus Stewart mortuus a. 1828, Jacobus Oswald, Thomas Brown, et

qui scoticam scholam jam collabentem aegre fulcire nititur non tam novorum argumentorum robore, quam diluendo adversa systemata, William-Hamilton. In Scotia floruerunt etiam Jeremias Bentham, qui utilitatem justi, injustique inatrem dixit; Georgius Combe, qui Craniologiam Gall professus est; Thomas Morgan, qui ideas morales a viribus physicis deduxit, omnes empirici. Alii cum Stewart Mackenzie amplexi sunt eclecticismum; alii cum Flockart a Dei idea incipientes, atque ad S. Scripturam provocantes *supernaturalistae* sunt appellati. In Hibernia alii Scoticam scholam, alii empirismum sectantur.

57. In Gallia, relictis Cartesio, et Malebranchio (§. 45. 47.) Lockii empirismo (§. 50.) praecipue adhaeserunt Montesquieu, Maupertuisius, Voltaire, Carolus Batteux, La Mettrie, Helvetius (nomina moribus, Religionique infausta). Hoc empirismi systema complexa est Gallia potissimum Helvetii, Condillachii, ac Bonneti opera. Helvetius enim natus a. 1715. impudenter impius docuit, animae facultates ad sensationem, et memoriam reduci, hancque esse debiliorem sensationem; animam ad corporis organizationem coarctans, ex varia corporis organizatione, et diversa educatione diversam acquirendi ideas capacitatem deduxit; omnem moralem scientiam ad utilitatem restrinxit, hancque ex voluptate physica more cyrenaico repetiit. Ipsum sequuti sunt auctor *systematis naturae*, Diderot, d'Alembert, Rousseau, Robinet, atque ceteri Galli Encyclopedistae; qui omnem philosophiam spreverunt, atque impudenter et temerarie de rebus ad mores, ad leges, ad Religionem spectantes egerunt (1).

58. Stephanus Abbas Condillachus natus a. 1715. omnes et ipse animae facultates ad sensationem, quae in illas transformatur, reduxit, statum supponens, cui modo unus, modo alter sensus detur, quibus facultates mentis pedetentim evolverentur (2). Abstractorum systematum amorem, ac proinde

(1) Montesquieu n. a. 1689; P. L. Moren de Maupertuis n. a. 1698; Maria Fr. Aroet de Voltaire n. a. 1694; Batteux n. a. 1713; Auctor *systematis naturae* est aut La Grange, aut Paulus Enrieus Districh Baro de Holbae m. a. 1789; Dionysius Diderot n. a. 1713; Joannes Le Rond d'Alembert n. a. 1717; J. B. Rousseau n. Genevae a. 1712. Non abs re hic Poli (nota apud Tennemann) notat, Rousseau non esse cum aliis sensistis confundendum, quia 1. ipse probavit sensum moralem internum, et spirituatem; 2. diutius sentire a judicare (*Emil. t. 3. p. 36. 46.*); 3. admisit in anima activitatem, et crevit sensibilitatem ab attentione, meditatione, reflexione; 4. materialismum vocavit contradictorium, atque verbum sine sensu.

(2) Docuit deinde Condillachus, statum non posse sensibus visus, auditus, gustus, olfactus attingere ideam alioquin rei extra se existentis, sed dom-

usum axiomatum, et propositionum generalium, quae adhiberi possunt post cribratas ideas singulares, ex quibus illae enunciationes generales eruuntur, extirpare conatus est. Signorum necessitatem ex eo praecipue repetivit, quod ipsorum vi mentis facultates exerceamus, ac conficiamus ratiocinia. Vi sermonis omnes scientias evolvi, quae omnes mathematico more tractari possunt, statuit. Instinctum a belluis auferens, eruditis eas reddidit, quod postea placuit Darwin. Plura de corporum existentia, in tractatu de sensationibus contra Berkeley, docuit; ast rem non integre confecit. Materialismi aliqui eum incusarunt; sed ipsum purgarunt viri doctissimi, quos inter Cl. Laromiguiere.

59. Carolus Bonnet natus a. 1720. physicarum rerum studiosissimus, Condillachum sequens statuam cum ipso supposuit, eumque aliquo modo emendavit. Animae activitatem in attentione, in voluntate, aliisque facultatibus demonstravit; ast eas explicare conatus est cerebri fibrillis, corporisque actione; atque libertatem *spontaneitatis* adprobans, illam indifferentiae labefactavit. In sua *Palingenesia*, in qua mortuorum resurrectionem explanare philosophice aggressus est, plus aequo peccavit.

60. Inter sensistas ideologos Destutt Tracy, qui natus est a. 1754, adnumeratur. Totum systema suum in Ideologiam, Grammaticam, Logicam, et in Tractatum de voluntate est partitus. Ideologiam ad cogitationem, et hanc, et omnes animae facultates, quas sensibilitatem, memoriam, iudicium, voluntatem dixit, ad sensationem reduxit. In Grammatica agit more Condillachiano de signis, quae sermonem componunt. In Logica, scholasticam vapulans, sensationem pro prima certitudine posuit, vimque *reflectendi* pro criterio veritatis sta-

taxat tactu, cui res externa resistit. Quare *soliditatem* statuit veluti pontem; quo anima extra se transit. Dixit etiam, animam sibi persuadere, extra se aliquid esse, cum *sentit*, ex principio causalitatis, quo posito, *judicamus*, extra nos esse res, quae *sensationes* in nobis gignunt. Quapropter Condillachus deduxit existentiam naturae sensibilis ex sensatione *resistentiae* et *judicio* aucto principio causalitatis. Hinc patet, Condillachum 1. probasse tantum sensationem omnium nostrarum cognitionum fontem, cum Lockius etiam *reflexionem* admiserit (§. 50); 2. ideoque putasse, omnes nostras cognitiones esse sensationes; 3. nostrum *ego* esse collectionem modorum, quos experimur, vel memoria reproducit; 4. corpora externa esse aggregata sensationum, quas anima ob sensum *soliditatis*, et principium *causalitatis* extra se projicit, atque in collectiones copulat; 5. easdem esse qualitates primarias, et secundarias corporum, quas distinxit Lockius; 6. extensionem esse phaenomenon, neque posse sciri utrum reales, vel apparentes sint primariae corporum qualitates. Vide Galluppi (*Lett.* 3.)

tuit. In tractatu de voluntate pro norma boni, et mali sympathiam constabilivit, atque de oeconomia publica egit, de qua elementares, et communissimas notiones evoluit. Prolixum dicendi modum secutus, spiritualitatem, et libertatem animae suo systemate inficiatus est.

61. Fere eodem tempore prodiiit opus Petri Joannis Georgii Cabanis mortui a. 1808. super *relationem physici et morali in homine*, qui Tracyana placita tenens, animae libertatem inficiatus est, quia omnes ideas, et morales inclinationes a constitutione physica, et a causis externis pendere ait; spiritualitatem vero, quia omnes animae actus ad sensationem, hancque ad sensibilitatem physicam reduci clamitavit. Hoc materiale physiologicum systema sunt amplexi Lamarck, Magendie, Alibert, Adelon, Broussais; impugnarunt vero Barteles, Berard, Virey (1), Dufour. Ast reviviscere coepit opera doctoris Gall mortui Parisiis a. 1828, qui in suo systemate craniologo omnes animae facultates, omnes affectus, omnesque virtutes et vitia a diversis cerebri organis pendere crocitavit. Sed Laurentius Martini nititur vindicare Gall (*discor.* 25. t. 2) a materialismi nota, cum numquam, ut ipse ait, Gall docuerit, organa mentis, et affectuum inducere necessitatem, aut istorum organorum actiones esse facultates morales. Neque hic est silendum de Volney, qui n. a. 1757. et m. a. 1820. sensisticam scholam, imo materialismum professus, docuit (*Cathechisme du citoyen, et La Loi naturelle*), 1.<sup>o</sup> principium moralitatis esse sui conservationem; 2.<sup>o</sup> servare seipsum autem esse idem ac laborare pro valetudine corporis, ad quod totus homo reducitur, 3.<sup>o</sup> bonum proinde esse, quod servat vel perficit *organizationem*, malum autem, quod eam destruere vel liebetare valet; 4.<sup>o</sup> vitam propterea esse unicum bonum, mortem unicum malum; 5.<sup>o</sup> virtutes esse habitus voluntarios pro corporis conservatione, vitia habitus malos ad corporis destructionem tendentes. Sic hujus materialistae absurda narrat Damiron (*Essai sur l'Histoire de la Phil. en France au dix-neuvième siècle*).

62. Degerandus et ipse inter empiricos recensitus; sed modestus, sobrius, accuratus; docuit, medium iter esse sumendum, atque ideo ab experientia tum interna, tum externa ad rerum cognitiones, et legitimas conclusiones esse transendum. Ipsum sequuti sunt P. F. Lancelin, La Place,

(1) Sed ipse Berard materialismi accusatur, utpotequi dicitavit, *intelligentiam in cerebro cogitare*; imo et Virey, qui docuit, *potentiam vitalem esse essentialiter intelligentem*, hominemque vocavit *membrum universalis organismi*. Martini (*disc.* 25.)

aliique. Sed Lancelin plura absurda evomuit, cum animam sensationum aggregatum statuerit, hominemque docuerit productum a natura repetitis conatibus, eique relictam curam speciem perpetuandi. Neque ab errore longe fuit La Place, utpotequi docuit, psychologiam non esse a physiologia secerendam, atque intellectus theoriam non esse dividendam a rerum externarum theoria. Martini (*disc.* 25.)

63. In Gallia extitere etiam philosophi *supernaturalistae*, qui divina nituntur auctoritate. Hujusmodi inter ceteros fuere Bonaldus, et Rob. Franciscus Abbas De La Mennais, qui sensuum, rationisque testimonium extenuantes revelationis necessitatem plus aequo extulerunt. Juxta ipsos ab initio homini revelavit Deus, quae ille scire debebat; ast in plures errores postea prolapsi sunt homines. Ceterum, quoniam non omnino ab eorum animis excessit primaeva revelatio, ideo tenenda sunt, quae communi consensione credit humanum genus. Et ut suum constabiliret systema Bonaldus, demonstrare est nisus, inutiles fuisse speculationes, et continuas veterum, et recentium philosophorum contradictiones circa physicam, scientiam morum, religionem, metaphysicam. Hinc linguam a Deo datam propugnavit, qua et ideae ordinis, et justitiae hominibus traditae sunt. De La Mennais ulterius progressus omnia incerta dixit, gratuiteque asserta, neque ad certitudinem nos pervenire posse, ni auctoritate humani generis, sensuque communi nitamur. Pluribus adrisit hoc systema, quod ad scepticismum adducere alii clamitarunt. Ast sensismus ex parte hoc modo confractus est. Quoad De La Mennais est notandum quoque, ipsum in detestabiles prolapsus esse errores, atque eo devenisse dementiae abisso, ut humanitatis philosophus factus, Sansimonismum procaciter propugnans, humanitatem veluti suum idolum reddiderit (*V. Esquisse d'une philosophie*). Hunc suum errorem cum aliis plurimis in bonos mores, in regimen politicum, in Catholicam Religionem evomuit iste apostata ab a. 1830 in variis opellis *L'Avvenire-Parole di un credente-Affari di Roma-Libro del Popolo-La schiavitù moderna-Il Governo, e'l Paese-Un sistema filosofico-Evangeli Esposti*. Miser! non videt, quo vadit! Vide *La scienza e la Fede* vol. 2. fasc. 11. 1841-Cenni su l'Ab. De La Mennais.

64. Et ut omnia complectamur Gallorum philosophorum systemata, notamus, eclecticismum esse sequutos non paucos initio saec. decimi noni. Inter ipsos adnumeratur Laromiguiere, qui natus a. 1759. docuit contra Condillachum, sen-

sibilitatem laud esse facultatem, ideoque sensationem non posse transformari in iudicium, in ratiocinium, in aliasque animae facultates. Sectati sunt eum Maine de Biran, qui mortuus a. 1824. activitatem, unitatem, causalitatem animae describens, a perceptione est exorditus (1); Royer Collard, qui m. a. 1845 in osculo pacis in anno 82. aetatis suae, qui que a. 1811. lectiones philosophicas dictitans, Psychologiam a sensismo, et Ethicam ab utilitate removit; alique plures. Inter recentiores vero Eclecticos praecipue recensetur Victorius Cousin, n. a. 1771, et auditor Royer-Collard, cui in tradenda Philosophia Parisiis successit. Inter diversa systemata ab ipso habita Kantii doctrinam secutus est, a qua etiam postea discessit. Sensismum praecipue aggressus est circa methodum, Psychologiam, Ontologiam, atque Eclecticismum pantheisticum in Galliam inexit. Methodum aliorum secutus, docuit, aliquas scientias ad cognitionem *utilis*, vel *damnosae*, alias vero ad cognitionem *justi*, et *injusti* nos ducere; ad illas physicas, et mathematicas, ad istas philosophiam referri; in philosophia oportere initium sumere in factis conscientiae, ideoque exordiri a *Psychologia*. Hinc statuit in primis, intelligentiam in homine primitus *sponte* se manifestare, nosque *spontanea*, atque *instinctiva* cogitatione primum nosmet, dein mundum, tandem Deum percipere. In *Psychologia* egit de *libertate*, seu activitate, vel personalitate, quam in *me* reposuit, et a cuius existentia potestatem, jus, obligationem, leges, officiaque deduxit; de *ratione*, quam dixit universalem, necessariam, immutabilem, impersonalem, absolutam, revelationem necessariam, et universalem, *logos* Platonis et Pythagorae, hominem Deum, verbum carnem factum, Deum humani generis, essentiam veram, et absolutam, fragmentum essentiae supremae, non vero Deum absolutum, non ens entium; demum de *sensibilitate*, quam definivit facultatem cognoscendi id, quod de externo mundo sub sensibus cadit, ideoque cognoscendi mundi existentiam, ejusque vires. *Rationis* postea *leges*, et *auctoritatem* evoluit; leges vero

(1) M. Maine de Biran diversas, oppositasque sententias habuit, nam in opere, *L'influence de l'habitude*, docuit, cogitationem esse *organisationis* phenomenon; in opere posteriori, *La decomposition de la faculté de penser*, sensit, in homine esse substantiam cogitantem distinctam a corpore; in tertio opere, *Examen des Leçons de M. Laromiguière*, dixit animam causam, substantiam, vim, principium activum, liberum, movens; demum in articulo *Leibnitz* inserto in 25. vol. Biographiae universalis systema Leibnitii de monadibus tuitus est. Vide Dumiron (*Essai sur l'Histoire de la Philos. en France au dix-neuvième siècle*).



contra Aristotelem (§. 26.), et Kantium (§. 77.) ad principia causalitatis, et substantiae, quae unum tamen sunt, atque coevae, restrinxit, sed ab iis deduxit ideas spatii, et temporis, possibilis, et realis, relationis, et modi, causae, et effectus, substantiae, et qualitatis, aliasque huiusmodi. *Auctoritatem* rationis autem neque in consensu hominum, neque in ratione practica; sed in quodam rationis *instinctu* posuit. Statuit quoque tria rationis elementa, *infinitem*, quod dicitur etiam unitas, substantia, causa prima, absolutum, aeternum, inconditionale; *finitum*, quod etiam vocatur multiplex, phaenomenon, causa secundaria, relativum, tempus, conditionale; atque inter utrumque *relationem*, qua *finitum* et *infinitem* ad se mutuo referuntur, illudque ab isto evolvitur. Hinc oriri ait tres epochas, nempe *inspirationis*, quae est epocha infiniti; *reflexionis*, quae est epocha finiti; *completæ reflexionis*, quae est epocha relationum; quarum prima Religionem, duae postremae philosophiam complectuntur. Quapropter juxta Cousinum conscientia habet tria elementa, *sensibilitatem*, quae est conditio posita conscientiae externa; *voluntatem*, quae est conscientiae centrum; *rationem*, quae est lux; ideoque facta conscientiae sunt *sensibilia*, *rationalia*, et *voluntaria*, illa duo necessaria, haec libera. *Ontologiam* demum vocavit studium cognitionum objectivarum, quas ex natura sua transcendentales dixit. Deus juxta Cousinum est substantia, et causa, semper substantia, et semper causa, unicus, et multiplex, aeternitas, et tempus, spatium, et numerus, essentia, et vita, individualitas, et totalitas, principium finis et medium, infinitus, et finitus, simul Deus, natura, et humanitas. Ex quibus deducunt scholae sensistica, et theologica, Cousinum esse delapsum in scepticismum, idealismum, fatalismum, pantheismum, quem postremum in Spinoza dilaudat in *cursu historiae philosophiae*. quemque videtur in suis *fragmentis* statuisse doctrina *creationis necessariae*. Advertit Galluppi (*Lett. Filos. avvertim. relat. al Signor Cousin*), Cousinum in nova suorum *fragmentorum* editione retractasse, vel a se expulisse pantheismum, et fatalismum, monito de hac re adjecto. Bene, an male ab impacta macula se purgaverit Cousinus, aliis judicandum relinquimus. Vide Damiron (*Essai de la Philos. etc.*) Martinum (*discor.* 21. 22. 23.), Galluppi (*Lett.* 14.), Maret (*Teod. lex.* 20), Gioberti (*Il Panteismo del Signor Cousin esposto da lui stesso*).

65. Verum ad sensum intimum, et ad sensum communem Reid (§. 56.) denuo redierunt hisce transactis annis ex  
Tom. I. 4

Gallis philosophis Thurat, Jouffroy, Damiron, Cardaillac, Dux de Broglie, Rossi in jure poenali, expulsis sensismo, idealismo, eclecticismo. Ceterum sensismum propugnarunt Toussaints, Comte, Alix, Gruyer, Torompert, alique, qui sedulam Psychologiae, aut Cosmologiae, aut Genealogiae operam navarunt. Ad principium vero humanae perfectibilitatis recurrunt philosophi historici Beniaminus Constant, et Guizot, qui humanas societates in infinitum dicunt esse progressuras in Religione, et in aliis ideis; quae omnia proinde veluti humana inventa in eorum systemate sunt censenda. Sed et philosophi *progressus* haece fere temporibus in Gallia visi sunt. duce Claudio Enrico de Saint-Simon, qui est mort. a. 1825. Iste primum militarem vitam, dein commercialem, demum litterariam videtur secutus. Opere ejus discipulorum Augustini Thierry, et Augustini Comte systema confecit, in quo docuit, homines *sub regno imaginationis* trasisse epocham Theologiae, et Poesis; dein *sub regno cogitationis* epocham philosophiae, seu purae abstractionis; demum *sub regno realitatis* epocham scientiae, seu rerum positivarum. Statutis deinde erroribus pluribus, quibus Deum unicam substantiam ponebat, noxam originis inficiabatur, abolebat proprietatem, futuras poenas destruebat, mulierem emancipabat, progressum continuum humanitatis profitebatur, asseruit, ideas religiosas veteribus temporibus salutares non posse in *actuali virili humanae rationis statu* influere, nisi modo retrogrado. Imo *ex expositione doctrinae Sansimonianae* anno 1. et 2. colligitur, in ipsa probari, Deum esse omnia existentia; hominem esse Deum in ordine finito; Deum continuo progredi; hominem etiam semper evolvi, usque dum Deus et homo fiat unum totum. Post mortem Claudii Enrici de Saint-Simon in plures sectas divisus discipulis, aliqui Christianismo demortuo, uti ipsi jaectabant, novam suffecerunt religionem laudatis ex erroribus, atque ex doctrina Fichtei, et Reid mixtam, ducibus Bazard, et Enfantin. Sed haec secta, huc, illucque ejus membris dispersis, divisus, aut ad Religionem Catholicam reversis, circa a. 1835. evanuit. Vide *Enciclopedia dell' Ecclesiastico (Sansimonisti)*. Ex hac secta tamen ortus est *Fourierismus*, duce Carlo Fourier, qui (*Théorie des quatre mouvements*) multis ambagibus mundi aeternitatem probavit, Deum cum natura confudit, atque Triunitatem efformavit ex Deo, ex natura, ex mathematicis, quae regunt motum Dei in creaturas. Ex ipsa quoque nata est secta *Humanitaria*, quam Petrus Leroux, et Reinsaud constabilire

conati sunt, docentes, hominem, ceterasque creaturas habere Dei naturam; Deum non esse extra mundum, neque mundum extra Deum; caelum esse infinitum ens, quatenus est invisibile, finitum vero, quatenus est visibile, naturam esse aeternam, et infinitam; infinitum creatum esse manifestationem infiniti entis, atque omnia, praeter Deum, continere. Ex ipsa demum orta est secta *Lamennaistica*, duce La Menais (§. 63.), quae tenet, unam esse substantiam, eamque modo indeterminato Deum, mundumque continere; illam substantiam fieri sua evolutione potentiam, intelligentiam, amorem infinitum, qui sunt tres personae; res omnes haud esse creatas, secus aucta foret Dei substantia; quaecumque in mundo existunt, esse Deum limitatum, nempe quamcumque potentiam limitatum Patrem, quamcumque intelligentiam limitatum filium, quemcumque amorem limitatum Dei vitam. Inter Philosophiam *absoluti*, de qua postea, et has sectas *socialistas* hoc discrimen videtur esse, quod istae personalem Deum, illa impersonalem ponat. De his vide Maret (*Teodic. lez.* 19. et *Panteismo cap.* 2.), et Martini (*Storia-Filosof. del Progresso.*) In hisce doctrinis includi videntur Materialismus, Deismus, Fatalismus, Pantheismus, Protestantismus, atque Anarchia, quae est regiminiis confusio. (V. Gioberti loc. cit. §. 45.)

66. Ad Germanos philosophos transeamus. Floruerunt decimo octavo saeculo in Germania G. Georgius Sulzer, qui natus a. 1720. labores suos super aethetica adhibuit, et eclecticismus est professus; G. Ber. Basedow, qui principia veritatis statuit felicitatem, sensum intimum, analogiam; Hebraeus Moses Mendelssohn, qui plures inquisitiones aetheticas, et psychologicas fecit; G. August. Eberhard, qui Leibnitii ideas revocavit; Christophorus Mainers, qui cogitationis legem ex cerebri fibrillis, earumque motu frustra ostendit; Tetens, qui Davidem Humium impugnavit, atque Lockii doctrinas ampliavit, quin in materialismum incideret (1).

67. Sed Emmanuelis Kant Konigsbergensis m. a. 1804. doctrinam evolvamur. Ipse edidit *Transcendentalem Philosophiam*, quam postea vocavit *Criticam rationis purae, rationis practicae, et iudicii*. In harum prima docuit, omnes humanas cognitiones exoriri ab experientia, nullamque siue experientia surgere ideam in intellectu; sed experientiam

(1) Basedow n. a. 1723. m. 1790; Mendelssohn n. a. 1729. m. a. 1786; Eberhard n. a. 1739. m. a. 1809; Mainers n. a. 1747. m. a. 1810; Tetens n. a. 1739. m. a. 1805.

non causam dixit, sed occasionem, in qua anima suam exercet activitatem. Deinde in qualibet cognitione supposuit elementum necessarium, et universale, atque elementum contingens, et mutabile, hoc veluti *materiam*, illud veluti *formam* cognitionis. Porro a *priori*, et *subjectivum* arbitratus est, quod in nostris cognitionibus est necessarium, universale, et immutabile; a *posteriori*, et *objectivum*, quod est in ipsis contingens, accidentale, et mutabile. Quare putavit, animam a sensatione excitatam objecta percipere externa, quae ab animae virtute exhibentur; sensus enim suggerit elementum contingens, veluti *materiam*, spiritus vero elementum necessarium, veluti *formam*, qua statim applicata materiae, objecti peculiaris idea enascitur. Idea corporis e. g. supponit sensationem, quae est phaenomenon transitorium, mutabile, contingens, et *materia* ideae; atque *formas* quantitatis, qualitatis, relationis, modalitatis, quae sunt quid necessarium, immutabile, et universale, et quibus intellectus sensationem vestit, ideamque corporis sibi efformat. Ob idearum multiplicitatem admisit Kantius formam multiplicem, statuitque alias pertinere ad *sensibilitatem*, alias ad *intellectum*, alias ad *rationem*. Formam *sensibilitatis spatium* constituit pro sensu externo, *tempus* pro sensu interno. *Intellectus* formas dixit *quantitatem*, *qualitatem*, *relationem*, *modalitatem*, quarum unicuique tres gradus tribuit; nam juxta ipsum *quantitas* complectitur *unitatem*, *pluralitatem*, *generalitatem*; *qualitas* includit *realitatem*, *negationem*, *limitationem*; *relatio* habet *substantiam*, *causalitatem*, *reciprocitatem*; *modalitas* demum continet *possibilitatem*, *existentiam*, *necessitatem*. Porro, doctore Kantio, tertius quique gradus in quavis ex his quatuor formis complectitur duorum priorum graduum synthesisim, e. g. generalitas est synthesis unitatis, et pluralitatis; limitatio est synthesis realitatis, et negationis, et sic de aliis formis. Formas *rationis* denique dixit *Ego*, *mundum*, *Deum*. Hinc patet discrimen inter ideas innatas Cartesii (§. 45.), et *categorias* philosophiae transcendentalis; illae enim nostris animabus ab auctore naturae dicuntur impressae, atque realibus respondentibus objectis; istae autem sunt principia ordinis idealis, et elementa subjectiva nostrarum cognitionum, quae forent sine illis impossibiles, nullis quae respondent objectis, uti notat Galluppi (*Lett.* 8.). Patet quoque, *rationem* juxta Kantium assurgere ad generales formas *Ego*, *mundi*, *Dei*, quae constituunt formam *absoluti*, et *Inconditionalis*, atque demum se attollere ad hoc unum

generalissimum, inconditionale, absolutum, sicque erectam se manifestare tribus modis, nempe quoad unum phaenomenicum, quoad modificationem eitis sentientis, quoad supremam conditionem possibilitatis. In *Critica rationis practicae* Kantius posuit *rationem practicam*, seu conscientiam dictitantem duo principia, *fungitor officio tuo, esto felix*; statuitque voluntatem personalem, virtutem ad completam felicitatem medium, ideamque boni moralis subjectivam. In *Critica iudicii* definivit iudicium facultatem copulandi particulare cum generali, seu concipiendi in generali contentum particulare, divisitque iudicium in analyticum, et syntheticum, probavitque etiam iudicia synthetica a priori. Hanc philosophandi rationem continere egoismum, idealismum, scepticismum, pantheismum, plures ostenderunt Kantii adversarii. Neque immerito, saltem de scepticismo, haec dicta sunt. Kantius enim *ontologiam* vocavit scientiam objectorum, quae in se intelligi nequeunt; *Cosmologiam* scientiam universi subjectivam; *Psychologiam* scientiam animae humanae subjective acceptam; *Theologiam* scientiam Dei, quatenus ab humana ratione Deus potest concipi. Deinde non est hic silendum, philosophiam *Transcendentalem* dici posse *Ideologiam*, utpote quae de nostrarum idearum origine agit. Verum in sensistica Ideologia omnes cognitiones a sensatione derivantur, in philosophia transcendentali a priori a subjecto repetitur datus ordo notionum, qui dicitur *transcendentalis*. In hac philosophia formae sensibilitatis sunt modi, in quibus sentimus; formae intellectus sunt modi, in quibus cogitamus. Quare Philosophia transcendentalis est illa, quae *formas*, seu modos nostrarum cogitationum, a priori determinat, et propterea dicitur etiam *formalis*, atque *critica*, utpote quae fundamenta, et qualitatem nostrarum cognitionum examinat, et statuit, uti ait Galluppi (*Lett.* 8.) Vide Barchoux de Panhoen.

68. Praecipue Kantium insectati sunt in Germania Moses Mendelssohn, Stamann, Iacobius, Eberhard, Feder, Platner, Meiners, Herder (†), multique alii. Verum ejus sectatores

(†) Docet Balthassar Poli (apud Tennemann in nota), J. Godefredum Herder, n. a. 1744. et m. a. 1803, inter alia opera edidisse unum, versum in gallicum idioma a E. Quinet (*Idées sur la Philosophie de l'Histoire de l'Humanité*), in quo, velut alter Plato Germanus, perpensis omnibus humanitatis elementis quoad omnia loca, tempora, aliasque circumstantias, docuit, hominem a Deo, vel a revelatione recepisse primum instructionis gradum, cursum peragere traditione, et imitatione, atque in felicitate finem esse reperiturum. Hinc concludit idem Poli, hunc auctorem post Vicum prae ceteris nobilibus condidisse pro humanitatis progressu monumentum.

fuerunt acerrimi I. Schulz, Schmid, C. Leon Reinhold, Salomon Maimon, Ioannes Neeb, Iacobus Fries, aliique quamplurimi. Quod heic negari nequit, illud est, nempe kantianam philosophiam plures clarissimos viros ad eclecticam philosophandi rationem reduxisse, pluraque ingenia excitasse ad excolendam Logicam, Metaphysicam, Ethicam, Theologiam, Aestheticam, relicto empirismo. Kantii systema prae ceteris amplexus est I. Gottlieb Fichteus, mortuus Berolini a. 1816, qui tamen, novae philosophiae auctor deinde factus, docuit, humanam animam quadam activitate donari, ac sui ipsius existentiam ponere, statim ac eam cogitando intuetur. Sed anima nequit proprium *ego* noscere, neque statuere, quin simul percipiat. quod reperitur extra proprium *ego*, quodque est *non ego*. Hoc *non ego* spiritus hominis continens, statim illud ponit sua ipsa activitate. Quare *ego* est absoluta *activitas*; productum ab *ego* est quidquid extra ipsum *ego* existit; uno verbo, *ego est subjectum. et objectum*, est ens absolutum et independens, est creator Dei, sui, et mundi (1). En ideali-

(1) Fichteus post Kantium examinare studens, utrum *ego a non ego*, an *non ego ab ego* procedat. Ponit proinde, philosophiam esse scientiam scientiae, atque propterea supponere principium certum, a nullo alia scientia deductum, a quo debet proficisci, et ad quod debet redire cognitio de homine. Primum principium ponit, *ego sum ego*. In hoc principio *ego* est subjectum, quod reflectit super se, sique sua activitas reperit obstaculum in *ego*, quod est objectum; *ego* sistit uti subjectum, et producit *ego* objectum, quod subjecto opponitur, et resistit; quatenus producit *ego*, *ego* est subjectum; quatenus opponitur producenti, *ego* est objectum. Ipsum vero *ego* objectum in contactu cum *ego* subjecto, est *conscientia*. *Ego* proinde est *absolutum*, seu *unitas absoluta*. Secundum principium a primo quoad materiam determinatum, et in se absolutum, est: *ego non est non ego*. Tertium est: *ego opponit non ego ad ego*. Distinguit deinde Fichteus *ego divisibile ab ego indivisibile*, docetque, *ego* divisibile non destruere indivisibile, sed tantum coarctare. Ut proinde servetur conscientiae identitas, tertium principium sic enunciat: *ego absolutum opponit ego divisibile ad non ego divisibile*. Ex quo deducit, oppositionem *ego* ad *non ego* esse principium *relationis ad ego absolutum*, et *ego divisibile* distinctum ab *ego indivisibili* esse principium *distinctionis*. Ex *ego* duo producuntur: *ego* ponit se veluti a *non ego* determinatum, et *ego* se ponit veluti determinans *non ego*. Quoniam vero subjectum sine objecto, et hoc sine illo esse nequit; ideo *non ego* est objectum *non ego*; *non ego*, quod est nihil, dat realitatem *ego*, alias *non ego* nequiret esse objectum. Cum *ego* ponit se determinatum a *non ego*, passive se habet; sed cum determinat *non ego*, se active habet; sique *actio*, et *passio* identifificentur in *ego*. Ita quoque *non ego* productum ab *ego*, passive se habet; sed est activum, cum opponitur ad *ego*, sique in *non ego* activitas est ipsa *passivitas*. Itaque *ego*, et *non ego* habent oppositas directiones, sique *ego* est activum erga *non ego*, passivum, cum ei opponitur *non ego*; sique *non ego* est activum, cum opponitur ad *ego*, passivum vero, cum est ab *ego*. Porro in

smum, et pantheismum! En mysterium, quo mysteria solvere conatus est Fichteus! Sequitur Fridericus Guillelmus Iosephus Schellingius natus a. 1775, qui Berolini professor a Fichteo aliquo pacto recessit. Docuit siquidem, ex *proprio ego* et *non ego* unum ens fieri, quod absolutum sit, et illimitatum, atque sic ex *objectivo* et *subjectivo*, ex *esse* et *noscere*, ex *ideali* et *reali* unum hoc absolutum efformans, systema confecit *identitatis absolutae*, quod idealismum, pantheismum, aut theismum complectitur (1).

haec apposita duplici directione *ego*, et *non ego* habetur *intuitio*, seu contemplatio, quae non est reflexio, sed operatio extra transiens, nempe productio. *Ego* videt, *non ego* videtur, sicque intellectus recipit materiam intuitionis, atque in *reale* convertit, quod erat *ideale*. *Ego* determinatum a *non ego* ad theoreticam partem; *ego* determinans *non ego* ad practicam pertinet; *ego theoreticum* est finitum, et dependens; *ego practicum* infinitum, et independent; *ego practicum* producit mundum, sicque *non ego* existit ab *ego*, in *ego*, et opera *ego*; imo *ego* producit ipsum *ego* sua activitate absoluta. Hinc *ego* est subjectum, objectum, identitas absoluta, absoluta realitas universalis, quae sub duplici forma *ego*, et *non ego*, hominis, et naturae manifestatur, est ipse Deus pantheistarum. Cum legimus Fichteum, atque cum ipso loquimur, anxii, oppressique videmur, uti si in loco essemus aere, et luce destituito, ait apposite Muret (*Teod. les. 17.*). Vide Martini (disc. 16.), Tennemann, Barchoux de Panhoen.

(1) En quomodo Barchoux de Panhoen Schellingii systema exponi. Juxta Schellingium, qui primum idealismum Fichtei suscepit incipiens ab *ego*, et postea ab *absoluto* initium sumpsit, *subjectum* ab *objecto*, hocque ab illo oriri aequit, ideoque dari debet *absolutum*, in quo identificantur subjectum, et objectum, nempe spiritus, et materia, et a quo evolvuntur. Porro, doctore Schellingio, *absolutum objectum* in tempore per *philosophiam naturae*, *absolutum subjectum* in tempore per *philosophiam intelligentiae* constituitur; sed supra has philosophias est alia nobilior, quae est *philosophia Identitatis absolutae*, seu *philosophia Identitatis subjectivi. et objectivi. idealis, et realis, cognitionis, et existentiae*. Quare *absolutum* est *Identitas subjectivi, et objectivi, mei, et non mei, idealis, et realis, cognitionis, et existentiae, unitatis, et pluralitatis, formae, et materiae*; atque semper *idem* remanet, licet has subeat formas, uti aliqua quantitas generalis, seu algebraica, elata ad superiores potentias, semper sibi identica est, licet formae differant. Verum, eodem semper permanente, *absolutum*, cum incipit evolvi, duas oppositas vias ingreditur, in quibus innumeras subit transformationes, quarum unaquaeque in una via cuique respondet in altera via. Hae viae sunt *ideale*, et *reale*, in quibus sunt *absoluti potentiae*, quae in *ideali* ad primum gradum erectae constituunt *virtutem, et scientiam*; ad secundum *bonitatem, et religionem*; ad tertium *pulchritudinem, et artem*; in *reali* vero ad primum gradum perductae constituunt *pondus, et materiam*; ad secundum *lucem, et motum*; ad tertium *vitam, et organizationem*. Ex quo deducit ipse, universum esse unionem, et connexionem *potentiarum realium absoluti*; Historiam vero esse unionem, et connexionem *potentiarum idealium absoluti*; *potentias reales* in fine suae evolutionis assumi in homine, ideoque humanitatem esse ultimum mundi complementum; *potentias vero ideales* in fine

69. Fridericus Henricus Jacobi, Fridericus Krappen, Cajetanus de Weiller, Jacobus Salet, spretis recensitis Kantii, Fichtei, Schellingii systematibus, docuerunt, Deum, providentiam, libertatem, immortalitatem, mortalitatem, omniaque, quae sunt supra sensus, ex sensu intimo revelari, qui nomen rationis recipit, philosophiam sensus interni, seu fidei efformantes. Imo Jacobi eo est progressus, ut diceret, *fidem instinctive rationalem*, seu sensum primum, et instinctivum internum nobis revelare mundum externum corporeum, atque mundum metaphysicum. Verum Gott. Henricus Schulze, quem in *conceptorum opere* est sequutus Joannes Fridericus Herbart, docuit, originem cognitionis humanae esse non posse nostrae cognitionis objectum, sufficiensque veritatis criterium inficiatus est, scepticismus novam viam aperiens. Deum Georgius Gulielmus Fridericus Hegel, conatus conciliare Fichteum, et Schellingium, magno verborum apparatu, et obscuritate, *idealismum absolutum* statuit in Logica, in Metaphysica, in Ethica (1). Sed haec de Germanicis sufficiunt, de quibus legendus est Tennemann in suo Manuali Historiae Philosophiae, et Barclou de Paulheu (*Histoire de la Philosophie Allemande*).

suae evolutionis absorberi in *statu*, seu *societate*; ideoque *hominem* ad *statum* se habere, uti *reale* ad *ideale*. Ut vero intelligentia finita valeat se extollere ad omnium rerum cognitionem, atque transgrediens series *Realis*, et *Idealis* possit *absolutae Identitatis* cognitionem pertingere, necessaria est *ratio*, qua una potest finita intelligentia habere *absolutae Identitatis* cognitionem, quae est philosophia, quae consistit in reditu *absoluti* supra seipsum. *Absolutum* in fine suae evolutionis *conatur* se espere, seire, comprehendere, uti est, *supremam Identitatem*; sui *conatus* conscientiam habet; tunc demum monstratur *philosophia*. Quapropter ad explicandam dualitatem phaenomenicam inerpit Kantius *a me, et non me* (§. 67); Fichteus a solo *me* (nota ant.); Schellingius ab *absoluto*, sive Deo. Haec sunt tria *Prioristarum* systemata. In Schellingii doctrina philosophi cernunt fatalismum, idealismum, pantheismum, imo nihilismum. Vide etiam Tennemann (*Filos. dell' Identità* (Maret Teod. lez. 18.).

(1) Laudatus enim Hegel n. s. 1770. et m. s. 1831., qui in Germania successit Schellingio, divisit Philosophiam in *Logicam*, quae est Scientia *Idae* in se, et per se; in *Philosophiam naturae*, quae est Scientia *Idae* in suo esse ad extra; in *Philosophiam spiritus*, quae est Scientia *Idae* a suo esse ad extra in seipsum redeuntis. Omnes alios obscuritate superans adeo aridam, durumque doctrinam statuit, ut, iudice Tennemann, intelligentiam prorsus opprimat nostram. Dixit siquidem; 1. *Ideam* esse id, quod est, substantiamque viventem, quae motu progressivo nunquam intercepto sub hac vel illa forma realis existentiae manifestatur; 2. *Ideam*, seu ens, vel realitatem esse proinde manifestationem *Idae* secundum motum progressivum, qui motus *Idae*, ejusque *identificatio* cum realitate praecipue apparet in



20. Ad Italiam nostram properemus necesse est, quae post Galilaeum (§. 43.) plurimos peperit philosophos, eosque praestantissimos. Recensentur inler empiricos temperatos Licetus Genuensis, qui Aristoteli adhaerens, in pluribus eum reliquit; Thomas Campanella (§. 42.), qui Aristotelis jugum exculiens, pleraque in metaphysicis excogitans, fuit causa inceptae instaurationis; Joannes Baptista Poita, qui Lavater, et Gall praecersit in libro *de humana physiognomia*; Petrus Sarpi dictus F. Paulus, qui in *arte bene cogitandi* sensationem ab objecto secernit, et sensus nullo in casu fallaces arbitratus est; Josephus Polizi Siculus Platiensis, qui pluribus peripateticis opinionibus vitam restituit; Angelus Andrioli, qui empirismo rationalismum copulavit; Laurentius Magalotti, Guidus Grandi, P. Ceva, M. Aurelius Severino Calaber, Martenio, Nicolaus Spedalieri, Ansaldo Grimaldi, Longanus, Spagnius, Muratorius, Antonius Genuensis, Baldinottus, P. Soave, qui lockianas doctrinas commendarunt, illustrarunt, propagarunt. De Antonio Genuensi nato a. 1712. notamus instauratorem philosophiae fuisse in Italia, summoque acumine de Logica, de Metaphysica, de Theologia, de Ethica, de Commercio scripsisse, optimaque meruisse. His accensendi sunt etiam Sarti, Tettonio, Pavesi, Josephus Capocasale, Briganti, qui omnes empirismum professi sunt, praecipue cum opera Candillachi, atque Destutt Tracy ad Italo-

Spiritus humani evolutione philosophicus; 3. ad quod intelligendum supponendum esse, destructas esse omnes entium realium proprietates, atque copulatas absque extensione in uno velut centro; destructas pariter omnes notionum proprietates, atque similiter conjunctas in uno centro; haec centra duo consideranda esse veluti duo germina realia, et idealia mundi, in quorum unoquoque omnia entia respectiva sunt unum ens factum, non quidem realiter existens, sed in *potentia* essendi; 4. illa duo centra, seu germina in idess converti, quae non existunt, sed sunt in *potentia* essendi; 5. haec duo centra, haec germina, hasque idess in *potentia* existentes confundi simul in alia sublimiori, et perfectiori unitate, quae est *Absolutum*, seu *Idea*, quae proinde est *notio pura*, et *ens purum*; *Idea* et *Ens*, *Ideale*, et *Reale*; 6. hinc *rationalis esse, quidquid est reale, et reale esse, quidquid est rationale*; 7. hanc porro *Ideam*, seu hoc *Absolutum* manifestari in tribus Sphaeris, in *Logica* nempe, si consideretur in se, et per se, in *Philosophia naturae*, si accipiat in suo esse ad extra; in *Philosophia Spiritus*, si intelligatur veluti rediens a suo esse ad extra ad seipsam. Hanc doctrinam quoque in scientia moralis, et politica evoluit. Haec Hegeli philosophia tres fractiones passa est, dictas *dextram*, *centrum*, et *sinistram*, quarum duse primae aliquatenus Christianismum affectare, licet ore tenuis, videntur; tertia in atheismum lapsa est, uti docet Marel (Teod. lec. 21.). Vide Galluppi (*Memoria*), et Barchous de Panhoen.

rum manus pervenerint; praesertim vero cum Tracyana philosophia omnibus communis evaserit opera Equitis Compagni, qui eam in italicum idioma vertit ( §. 58-60.)

71. Melchior Gioja Placentinus inter empiricos etiam recensetur. Ipse mortuus Mediolani a. 1829. ad facta continuo provocans ideologiam physicae, scientiam moralem voluptati aliquo pacto subiecit, impugnatus proinde ab Antonio Serbati Rosmini in opere, *Breve esposizione della Filosofia di Melchior Gioja*. Ceterum negandum non est, Melchiorum Gioja maxime meruisse de philosophia, quam communem, practicam, socialem, multisque suffultam eruditionibus fecit.

72. Joannes Dominicus Romagnosi mortuus Mediolani a. 1825. cum Gioja patriam, educationem, studium, systema, ingenii famam habuit communia. Nomine clarus ob *Genesim Iuris Pœnalis, et introductionem ad studium juris publici universalis*, plura edidit opera philosophica: in quibus docuit, ab experientia tum interna tum externa esse incipiendum; ideas a sensatione conjuncta cum oppositione *ego* ad objecta externa derivari; nullas dari proinde ideas innatas; proprio *ego* competere noscere, velle, exequi; criterium veritatis reponi in principio contradictionis; mentem humanam a mundo exteriori ad interiorum continuo procedere, ac in prima aetate ratiocinari phantasia, in secunda imitatione, in tertia comparatione, in quarta logica inductione; animae spiritualitatem a sentiendo *me*, uti unam, et individuum substantiam, corpora vero ex pluralitate substantiarum, atque ex oppositione phaenomenorum cum *me* intelligi; principium scientiae moralis constitui in ordine perfectionis, qui respicit proprium *commodum*, quod est centrum humanarum inclinationum, *utilitatem*, quae est finis scientiarum, et artium, *felicitatem*, quae est effectus relationum constituentium leges naturae.

73. Lallebasque, qui creditur Paschalis Eques Borelli, empirismum secutus, vitia systematum philosophicorum notans, philosophicorum vocabulorum analysim suscepit; cogitationis theoriam ad eccitabilitatem in genere, et in specie ad sensationem, iudicium, voluntatem reduxit; ideam cum perfectione confudit, iudicia varia deinde cribravit; ratiocinii naturam evolvit; voluntatis actus ad praelationis iudicium retulit; atque linguae praecipue italicae etymologias philosophice investigavit.

74. C. T. Mamianus della Rovere opinionum philosophicarum pugnam a methodi abusu derivat, criterii certitu-

dinem in intimo sensu, et sensu communi reposuit, ac in principio contradictionis; atque in hoc Reid, et Cousin discipulus videtur. Ab Antonio Serbati Rosminio in pluribus est vapulatus.

75. Neque hic tacendi sunt, qui empirismum in aliis scientiis professi sunt, uti Cicognara, Delfico, Pasquali, Vennanzio, Visconti, aliique in Æsthetica; Ferrarese, de Pamphilis, Rossetti in arbore genealogico scientiarum; Pasetti, Tomaseo, Ascarotti, Moscatelli, Mercucci, aliique in Paedagogia.

76. Contra empiricum systema scripserunt Palmerius Siculus, qui Freretum refutavit, Carli, qui Rousseavium aggressus est, Gerdilius, Falletti, Draghetti, qui Lockium, et Condillachum inipugnarunt, et, qui Cartesium sequuti sunt, Thomas Cornelius Cosentinus, Michael Angelus Fardella Drepanitanus, Alphonsus Borelli, Valentinus Alberti, Fortunatus a Brixia, Antonius de Martiis.

77. Rationalismum vero plures ex Italia philosophi sequuti sunt. Inter ipsos eminet Abbas Antonius Serbati-Rosmini, qui ideam *entis* innatam dixit, ratus, illam nullo medio acquiri posse, eamque donari immutabilitate, et aeternitate, quia hisce dotibus donatur metaphysica rerum essentia, atque interna possibilitas. Ex quo intulit, ideam *entis* esse primam veritatem, ultimam cognitionum rationem, formale certitudinis criterium; ad quam omnes veritates reducuntur. In qualibet cognitione porro duplex posuit elementum, alterum *formale*, sive *entis* ideam, alterum *materiale*, sive *sensum fundamentalem*. In anima tria posuit principia, *sensibilitatem*, *intelligentiam*, *voluntatem*, in quibus aliae concluduntur recensitae a philosophis facultates. *Sensibilitatem* aliam *spiritualem*, quae *intellectualis*, vel *moralis* est, aliam *physicam*, ad quam phantasia reducitur, dixit. In qualibet *sensatione* cognovit perceptionem *sensitivam*, vel *corpoream*, et *intellectualem*. quae rei cognitio est, quaeque est *interna*, et *externa*; in qua iudicium *instinctivum*, vel *reflexum* esse potest. Iudicium *instinctivum* ad intellectum, *reflexum* ad rationem pertinere ait. Ideam *entis* contemplatus est sub triplici respectu, ideali, reali, atque morali. Quae hucusque dicta sunt *ideale ens* respiciunt; *de reali entis forma* se dicturum spondit in Ontologia, quae nondum lucem prospexit; *morale ens* demum primum morale principium dixit, sine cuius idea universali principia reliqua moralia, et conclusiones minime intelliguntur. Huic triplici *entis* *ideae* omnes cognitiones tribuit Rosmini, qui examine iusti-

toto, ex desiderio felicitatis perfectae Dei existentiam demonstrare credidit; atque educationem in assimilando hominis spiritu rerum ordini extra ipsum positaram, et non vice versa, constabilire est conatus. Insectati sunt Rosmini praesertim Comes Terentius Mamiani, et Vincentius Gioberti, qui illum incusarunt idealismi, nominalismi, scepticismi, pantheismi, rationalismi Theologici. Sed illum sunt sequuti Receveur, Joannes Maggi, Josephus Bianchetti, Cajetanus Lusverti, aliique, atque praecipue D. Ceresa, qui posnit cognitionis principium in *subjectivitate*, quae *objectivitatem elaborat*, et cujus gradus sunt voluntas, ideae, conscientia, iudicia a priori, affectus.

78. Neque defuerunt, aut desunt, qui in Italia *supernaturalismum* amplexati sunt, quique, dejecta ratione, ad revelationem provocant, uti Vincentius Palmieri, Alexander Manzoni in sua *Morale Cattolica*, Marcus Mastrofini, Olivieri, Albertini, Caesar Cantù, Michael Parma, Antonius Ricardi, P. Joachim Ventura, qui ad sensum communem recurrens Theologiam cum Philosophia sociare molitus est, quique magno conamine ad sapientiae Christianae fontes revocare philosophiam laudabiliter est conatus (1). Ast hoc systema praecipue tuitus est Vincentius Gioberti, qui suam disceptationem philosophicam ab infinito Ente creatore exorditur, et ad creaturas descendit. Principium contradictionis, et rationis sufficientis, ex quibus secundaria principia dimanant, aperte profitetur. Utrumque in qualibet posuit notione, quia in qualibet idea, vel iudicio, vel ratiocinio duplex adest elementum, nempe *necessarium*, quod ab ente exhibetur, et ad *principium contradictionis* reducitur, et *contingens*, quod a primo reflexionis actu explicatur, et ad *rationis sufficientis principium* refertur. Formulam statuere volens, in qua superstruatur totum humanum scibile, ponit, *Ideam*, nempe verum absolutum, et aeternum, quam dicit infinitam, et immensam, esse terminum *intuitus* mentis nostrae; ipsam fulgere evidentiā non aliunde mendicata; atque a mente determinari, in verbo restringi, sicque intuitu secundario, et refle-

(1) Hic vir, nomen carum omnibus, qui philosophiam a vera non secernunt Religione, docet, ratiocinium esse *inventivum*, vel *demonstrativum*, atque philosophiam *inquisitionis* esse *studium veritates omnes individualibus hominis facultatibus nullo Religioni respectu habito, reperiendi*; philosophiam vero *demonstrationis* esse *studium veritates omnes a Religione, vel Traditionibus haustas, magis, magisque internoscendi, illustrandi, roborandique, argumentis undequaque petitis*.

xivo vestiri forma sensibili. Haec *Idea* sic determinata est *Ens* quod ipsa mens copulat cum *existente* mediante ratiocinio. Hinc formulam deducit: *Ens creat existens*. Vide Alphonsum Testa ( *Consideraz. sopra l'Introduz. allo studio della filos. per Vincenzo Gioberti.* ); qui illam formulam refutat cribratis ipsius auctoris dictis hac superre. Statuit hic profundissimus auctor, tria in anima humana esse considerata, *intelligibile*, quod respicit, quae *intellectu* capiuntur; *superintelligibile*, quod reponitur in iis, quae in rebus quibuscumque nequit *intellectus* attingere; *supernaturale*, quod refertur ad ea, quae in revelatis nostrum *intellectum* vincunt. In quovis objecto juxta hunc doctissimum virum est aliquid *intelligibile*, et aliquid *superintelligibile*; illud in objecto conspicitur, atque intelligitur, hoc non conspicitur, et supponitur; illud est objecti pars clara, hoc pars obscura; illud intellectum sua luce perlustrat, hoc intellectui subducitur; illud est lux, hoc tenebrae. Sine *intelligibili* cogitare non possemus, et sine *superintelligibili* noster intellectus foret perfectus, absolutus, ac divinum adaequaret intellectum ( *Degli errori di Filosofia di Antonio Rosmini Lett. 8. pag. 322. Bruxelles 1841.* ). Quoniam porro nullum est objectum quod ingredi, pervadere, ac penetrare valeat humanus intellectus; ideo *superintelligibile* in quavis nostrae cognitionis parte diffunditur, ait ipse ( *Introduz. allo stud. di filos. Bruxelles 1840. tom. 1. pag. 258.* ), tum quia ideas etiam clara latius obscurum habet, tum quia quivis fulgentissimus intellectus densissimis tenebris comitatur ( *ibid: nota 19. pag. 457.* ). Tota proinde *superintelligibilis* origo ex imperfectione, et limitatione subjecti cognoscentis oritur, ideoque est subjectiva. Tres in anima facultates posuit Gioberti *sensibilitatem internam, et externam*, cujus ope sensibile pertingit passiva abstractione. eique respondet *affectus; rationem*, quae activo intuitu *intelligibile* attingit, eique respondet *voluntas; superintelligentiam*, qua anima sibi persuadet, aliqua esse, ad quae nequit pervenire, eique respondet *desiderium beatitudinis*. Vide Martini ( *disc. su Gioberti.* ). Porro hisce facultatibus docet, omnes ideas a nobis haberi. Duplicem quoque distinguit *reflexionem*, nempe *ontologicam*, quae subjectum, et objectum contemplatur, et *psychologicam*, quae conscientiam complectitur. Sed dignus est Gioberti, ut attente a quovis italo legatur. Ipsum secutus est vir mihi et amicitia, et Ordine Religioso conjunctissimus, atque philosophiae excolendae addictissimus P. Antonius Maugeri a Catania Philosophiae

Professor in Catanensi Universitate in opere: *Genealogia della ragione filosofica*.

79. Ast Laurentius Martini in *Storia della Filosofia* Rosmini, Mamiani, Gioberti doctrinam censoriis virgulis signavit; atque plures ideas, pluresque tendentias ingenitas admittens, a vitae exordio nonnulla, non solum possibilia, sed et praesentia et determinata, animo praedicavit. Ex ingenitis vero ideis, quas sequuntur universales abstractione efformatae, sensum moralem, quo malum, et bonum respicitur, alterumque ab altero secernitur, et nexum intelligibilis cum sensibili, animam nostram eruere, dictitavit. Deinde statuit, ex tendentiis innatis surgere moralem instinctum, quo homo ad bonum inclinatur, uti movetur ad incognita objecta ab instinctu physico. Falsum proinde arbitratus est axioma, *nihil volitum, quin praecognitum*, cum homo ante rationis usum ad quaedam moralia opera determinetur. Ex quibus conclusit, legis aeternae argumenta esse illas tendentias cum ingenita legis idea connexas, divinamque esse conclamandam illam lucem, qua anima cujusque classis veritates intuetur. Hucusque Martini.

80. Ast Eclecticam philosophandi rationem multi hisce temporibus sunt amplexi, uti Corsini, Gorini, Scarella, Jannelli, et in legislatione forsitan Filangieri et Paganus. Inter ipsos tamen hac aetate praestat Paschalis Galluppi, qui, pluribus editis philosophicis libris, in quibus rationalismus, scepticismus, empirismus, idealismus convelluntur, docuit, conscientiam, seu sensum intimum esse principium indemonstrabile, ex quo omnes oriuntur humanae cognitiones. Siquidem, ait ipse, quisque sentit proprium ego, ejusque modificationes ab alio diverso productas. Ex quo subjecti modificati, et modificantis ideae deducuntur. Subjectum modificatum, utpote quod percipit, judicat, ratiocinatur, metaphysice unum, simplex, et spirituale dicitur; uti compositum objectum modificans, cujus impressiones subjectum sentit. Ex hoc principio et aliae eruantur cognitiones. Ideas abstractas, et universales sua vi animam efficere; sensibilitatem internam, et externam esse; innatas ideas haud existere; rerum essentias esse impervias; rectam rationem esse principium moralis scientiae, demonstrat. Facultates elementares animae appellat conscientiam, sensibilitatem, imaginationem, analysim, synthesisim, desiderium, voluntatem. Videantur ejus libri multa, et solida sapientia repleti, in quibus omnes fere nostri temporis errores philosophici examinantur, atque, instituta aua-

lysi, inproptulo ponuntur, atque refutantur. Eum nuperrime secutus est Melillo in opere: *Nuovo corso di filosofia intellettuale*, et *Catechismo Psicologico*, in quibus pretiosae sunt gemmae tum doctrinae, tum linguae italicae.

81. Non est hic praetereundus Petrus Tamburini Brixiensis, qui Hobbesium, Condillachum, Kantium impugnavit, amorem proprium, utilitatem, voluptatem a rebus moralibus depulit; obligationem in perfectibilitate, quae innitur natura humana, sensu communi, ordine, legibusque naturae, reposuit. Galluppi, et Tamburini doctrinas sectati sunt Tedeschi, Zantedeschi, Ricci, Rivato, Devincenzi, Riccobelli, Mancino, Balthassar Poli, alique.

82. Consulto omisimus alias Europae gentes; nam in Hispania, et Lusitania adhuc excoluntur Lockius, et Condillachus; in Belgio, Svevia, Russia, Dania, Polonia Kantio, et Schellingio adhaerent. Ast hic praetereunda haud sunt nomina eorum, qui in Europa ob praeclara inventa fama clauerunt. Aliquos laudavimus (§§. 41. 43. 44, 49.). Keplerus Teutonius vim centrifugam in corporibus per orbitam circumductis detexit; solem attractione donari, animadvertit; complura de genuinis causis motuum periodicorum orbium coelestium, ac de legibus, quas planetae sequuntur in excurrenda orbita sua, invenit; mundi harmoniam, cometas, dolorum, vinariorumque stereometriam disquisivit. Consuetudine conjunctissimus Keplero erat Tycho Brahe ex Dania, qui astronomiam novo ditavit systemate, quo statuit, in totius universi centro esse tellurem immotam, quam, ipso docente, primum lunae orbita, postmodum illa solis, tandem orbita fixarum circumambit. Credidit quoque Tycho Mercurium, et Venerem circa solem, sed ceteros planetas circa solem, et tellurem moveri. Hauxbée, Grey, De-Fay, Nollet, Muschembroek, utentes machinis pneumatica, et electrica elaboratis ab Othone Guerriке, ac Roberto Boyle perfectis, aereometriam atque pyrotechniam illustrarunt. Aeris elaterii agnita causa, atque ad calculum deductis, quae ad ejus proprietates spectant, Hirnicus hygrometriam, Dubellius barometriam, Fahrenheit thermometriam ampliarunt, aut compleverunt. Franklin, et Beccaria, contuentes, electricum fluidum cum igne elementari pergrandem habere affinitatem, recte intulerunt, electricum non esse aerem, non aetherem, non subtilissimam Cartesii materiam, non Gassendi atomos, sed esse speciale fluidum per omnia ubique diffusum, ex quo electrica phaenomena explanare licet. Comperta sic electrici natura et virtute,

Franklin excogitavit *cervum volentem*, quo electricum atmosphaericum dignoscitur, atque inde inventum est *parafulmen*, quo fulmen a turribus, domibusque propulsatur, *quadram magicum* substitutum *phyalae Leydensi*, *tabula fulminans* Beccariae, aliaque innuniera. Galvani, et Volta magneticam virtutem in electrico fluido reperiunt; atque excogitaverunt *electrometrum*, *electrophorum*, *pilam*, *apparatus Galvanicos*, quibus aquae decompositio obtinetur, et electro - magnetismus evolvitur. Priestley primus cognovit gas oxigenum; Scheele caloricum radian; Lavoisier combustionis theoriam. Cognita porro aquae genesi ex oxigeno, et hydrogeno, aeris vero ex gas multiplici, prodierunt *hygrometrum* Nolleti, *hydrometrum* Vilke, *electrometrum* ejusdem a Tiberio Cavallo perfectum, *calorimetrum* De La Place, *thermoscopium* Rumford, *aereometrum* Fahrenheit, *gravimetrum* Nikolson, *pilae siccae* Zamboni, quae scintillam unius pollicis, et succussionem causat, *electromotor* Patris Bessii, mirabilis *phyala Leydensis* Marianini, quae ex semetipsa oueratur, *machina electrica* recens Menici, aliaque plurima.

83. Ex dictis in hac quarta epocha consequitur, philosophos, qui studio operam post iustaurationem dederunt, fuisse 1. aut empiricos, qui nituntur experientia interna, et externa; 2. aut sensistas, qui ex una sensatione cognitiones deducunt; 3. aut materialistas, qui corporis organizatione suffulciuntur; 4. aut rationalistas, qui rationem humanam ad cognoscenda rerum principia, et essentias aptam supponunt (1); 5. aut spiritualistas, qui tum spiritus, tum materiae vires admittunt; 6. aut aprioristas, qui ingenitas ideas,

(1) *Rationalismus* triplici sensu accipi potest, nempe 1. pro systemate, quo ponitur, rationem dumtaxat naturalem esse cuiusvis veritatis fontem, et iudicem, negaturque quaevis veritas revelata, quae ipsius rationis captum superat; 2. pro systemate, quo, quin veritates revelatas neget, vel probeat, statuitur, quaevis elementa humanae rationis ex humana oriri cogitatione, atque primitiva synthesis copulari, efformarique phaenomenica experientiae objectis; 3. pro systemate, quo unum commune principium statuitur, una omnium rerum substantialis realitas, quae revelatur uti ratio, et universus visibilis, quorum utrumque est exterior Dei revelatio. Primum vocari potest *negativus*, utpote qui omnia subvertit; secundus *naturalis*, utpote qui rationem non evehit ad Deum, neque cum eo illam confundit, neque omnia ab infinito absorbere facit; tertius *absolutista*, quia omnia ad eam absolutum reducit. Primum probare praecipue Encyclopedistae elapsi saeculi; secundum Kantistae; tertium Fichteus, Schellingius, Hegel. Primum omnia mysteria inficitur; secundum experientiae opponitur; tertius utrumque complectens in eo ab utroque discriminatur, quod ad unum absolutum principium recurrat. Sic de Rationalismo loquitur Melillo (*Nuovo corso etc. l. 3.*).



et iudicia a priori profitentur: 7. aut idealistas, qui ideis dumtaxat nituntur subjecti, vel objecti, vel utriusque; 8. aut realistas, qui ex rebus existentibus sumunt initium; 9. aut supernaturalistas, qui ad principium divinum recurrunt; 10. aut mysticos, qui exordium ab incerta inspiratione sumunt; 11. aut eclecticicos, qui colligunt, quae meliora in aliis videntur; 12. aut syncreticos, qui colligunt etiam, quae opposita sunt, unumque conficiunt systema; 13. aut dogmatistas, qui certam supponunt cognitionem philosophicam ratione, aut divina auctoritate suffultam; 14. aut scepticos, qui dubitant fere de omnibus; 15. aut nihilistas, qui impossibilem arbitrantur cognitionem philosophicam. Ceterum haec systemata brevius reduci possunt ad materialismum (1), idealismum (2), eclecticismum, supernaturalismum; et facili negotio duo ex ipsis in unum confluere possunt; quia ex. gr. empirismus, et rationalismus possunt inter se minime pugnare.

84. Illud quoque ex historia philosophorum italorum intelligitur, quod philosophia in Italia sit praecipue empirica rationalis, abhorrens simul ab idealismo, et sensismo; sit eclectica, quoniam non sectam caeco impetu sequitur, sed veritatem, ubicumque inveniat, recipit; sit dogmatica omnem aufugiens scepticismum; sit simul theoretica, et practica, quia intellectum colit, et mores componit. Speramus interrim, labores italorum communi utilitati fructus uberiores progenituros esse, praesertim quia Germani, Angli, Galli modo huc, modo illuc se movent, palastramque vacuum derelinquere videntur. Speramus, tandem perventuram ad ultimam instaurationem, atque unam efformaturam esse phi-

(1) Notamus hic, materialisticam philosophiam in physica terminare in atomum; in metaphysica in sensationem; in Morali in utilitatem; in politica in individualitatem; in sermonis analysi in interjectionem.

(2) De duobus oppositis systematibus est hic dicendi locus. *Idealismus* est systema, in quo praeter ideas nil aliud reale probatur, mundusque ipse tantum realitatis habere dicitur, quantum habent ideae, quas de ipso habemus. *Idealismus* est *objectivus*, si docet, spiritum a nobis diversum, nempe Deum omnes in se amplecti rerum species, hasque pro lubito nobis manifestare; *subjectivus*, si tenet, animam humanam sibi veluti evolvere mundum, istiusque leges pedetentim procedere; *absolutus*, si credit, ideas tantum existere, et quidem sine subjecto, hasque constituere mundum. Oppositus *Idealismo* est *sensismus*, in quo omnes animae operationes ad sensationem reducuntur; *materialismus*, in quem ruit sensismus, quique docet, animam humanam esse organum corporeum, aut ipsam corporis organizationem; *physiologismus absolutus*, in quem materialismus cadit, quique explicare conatur intelligentiae phaenomena per cerebri protuberantias, et conglobationes. Vide Mellò (*Cath. Psych. sez. 2. c. 2. a. 6.*).

lophiliam, quae Europaea sit, quaeque cum Christi Religione amice conspiret. Ante Vincentium Gioberti, qui pro Italiae bono praecipue laborat, licet saepe ad incougrua divertat, de Genuo Italico relate ad philophiliam jam scripserat dissertationem, postea a. 1845. eusam Romae sub auspiciis docti viri comitis Caroli Emmanuelis Muzzarelli meritissimi S. R. Rotae Vice-Decani, Cl. Aloysius Parchetti ex Cle. Reg. Som. qui animos Italicos, in quibus sensismi, et transcendentalismi monstra numquam ingredi potuerunt, adhortatur, atque movet ad Rationalis Philosophiae studium, quod fundamentum statuit Ethicae, atque Religionis.

85. Qui plura cupit de veteris, recentisque philosophiae cultoribus, eorumque systematibus, adeat Plutarchum *De placitis philosophorum*, Diogenem Laertium *De vitis philosophorum*, Steucum *De perenni philosophia*, Des Landes *Histoire critique de la philosophie*, Guerdardum Wossium *De philosophia, et philosophorum sectis*, Stanlejum in *Historia philosophica*, Brukerum in *Historia critica philosophica*, Appianum Buquaefede in *Storia d'ogni filosofia*, et *Restaurazione d'ogni filosofia*, Aloysium Bonelli in *Disquisitione historica praecipuorum philosophiae systematum*, Gulielmum Tennemann in suo *Manuale della storia della Filosofia con note e supplementi dei prof. Giandomenico Romagnosi, e Baldassarre Poli*, S. Gotlieb Buhle in *Storia della ragion filosofica*, Degerandum in *Storia comparata dei sistemi della filosofia*, aliosque. Relictis iis, qui de historia speciali philosophiae penes varias nationes egerunt; circa Italicae philosophiae historiam legendi sunt Tiraboschi in *Storia della letteratura italiana*, quam Lombardi continuavit; Corniani *Sui secoli della letteratura Italiana*, quam auxerunt Ugoni, et Fichozzi; Ioannes M. Mazzucchelli, P. Andres, Ginguenè *Sull'origine e sul progresso dell'Italiana letteratura*, Abbas Bettinelli in *Risorgimento d'Italia*, Paschalis Galluppi in *Saggio filosofico*, et *Lettere filosofiche*, ceterique italici scriptores, qui passim, vel diffuse, praesertim a Danto Aligherio, de scientiis, et artibus italico egerunt.

# DE PHILOSOPHIA RATIONALI

## ANTELOQUIUM

86. Jam vidimus (§. 1.), philosophiam definiri a Tullio *scientiam rerum divinarum, humanarumque, et causarum, quibus hae res continentur. Scientia* enim est philosophia, non quasi nempe illa vox unum, nudumque veritalum complexum exprimat, sed quatenus indicat cognitionem objectorum, quae intellectus hominis clare, evidenterque conspicit (1). *Scientiam* proinde *veritatis, cognitionem veri, et boni, scientiam rerum omnium* persaepe veteres quamplures philosophiam vocarunt (2). Scientiam vero humana ratio consequitur aut extemplo conspiciens idearum convenientiam, vel ipsarum pugnam, vix habita earum collatione; aut illam

(1) Cognitio sive rei potest esse *historica, et scientifica; historica* est cognitio rerum, factorumque, quae hominem quotidie circumstant; *scientifica* est series processuum mentis, quibus aliqua facta modo aptiori disponuntur, et alia eruantur, quorum ope sive rei objecti cognitio completur. Illa est veritatis cognitionis initium, haec completa cognitio; illa sine ista est sterilis, haec sine illa, est vana. Utraque est Philosophia.

(2) Alii alio modo philosophiam definierunt. Ex Aristotele est *cognitio rerum, uti sunt*; ex Wolfio est *scientia possibilium, quatenus esse possunt*; ex Genuensi est *scientia rerum aeternarum, factarum, et possibilium, earumque causarum, finium, relationum, usuum*; ex Galoppio est *scientia cogitationis humanae*; ex Romagnosi est *scientia realitatis, et actionum rerum habita per causas, quae adsignari possunt*; ex Matthaeo Liberatore est *scientia realitatis, legum, principiorum, unde constat mundus corporeus, et rationalis*; ex Laurentio Martini est *scientia, quae perficit hominem moralem, hoc est intellectum, et voluntatem*; ex Gioberti (*Introd. allo studio della filos. Proemio p. 7. et 69.*) est *elaboratio principiorum rationalium facta adiutorio reflexionis, et sermonis, vel instauratio Ideae divinae in scientia*. Huiusmodi definitiones sunt nimis aeternae, aut obscurae, atque explicatione indigent multa, ut plene intelligantur. Proprior videtur definitio Tullii (*de off. l. 2. c. 2.*) relata. Signidem objecta philosophiae sunt *homo, mundus, Deus*; sed *scientia rerum divinarum, et humanarum, causarumque, quibus hae res continentur*, haec tria, uti examinenti patet, complectitur. Vide Matthaeum Liberatore (*Log. Introd. art. 1. §. 1. nota*), qui hanc nostram definitionem vindicat.

idearum convenientiam, vel pugnam subsidio tertiae ejusdam ideae, veluti quodam lumine, respiciens. Prima scientia *intuitiva*, altera *discursiva* dicitur, illa respicit judicia, quae donantur immediata evidentia, haec vero complectitur judicia, quorum idearum relatio non illico, vel obscure videtur, et *demonstrativa* quoque vocatur. Vide Storchenau (Log. part. 3. cap. 1. ).

87. Verba quae in definitione sequuntur, respiciunt objecta, circa quae versatur philosophia, quaeque tantum naturalis rationis ductu cognosci possunt (1). Verum horum objectorum quaedam naturali animae virtuti, quaedam vero sensuum ministerio subjiciuntur. Illa *rationalem* philosophiam; haec vero *empiricam* constituunt. Philosophia *rationalis* complectitur Logicam, Metaphysicam, Ideologiam, quae modo usitato in scholis vocabulo *philosophia* tantum dicuntur; Philosophia *empirica* continet Physicam, Chemiam, Historiam Naturalem, Medicinam, et alia. De illa est hic dicendi locus.

## PARS PRIMA

SEU

### DE LOGICA

88. Logica, quae a graeca voce oritur, *rationem, aut sermonem* exprimente, *rationatrix*, et *sermocinatrix* est. Illa mentis operationes in veritatis inquisitione moderatur, haec vero tradit media, quibus veritas detecta aliis monstratur. Quare Logica recte definitur *scientia, quae dirigit mentem nostram in perquirenda veritate, atque in ea jam cognita aliis manifestanda*.

(1) Cave igitur credas, philosophiam agere de iis, quae Theologiam revelatam respiciunt; illa enim versatur circa ea, quae rationis limites non superant, quaeque ex intimis principiis ex recto ipsius rationis usu cognosci possunt; haec vero circa ea, quae patent ex Dei revelantis auctoritate. Sed simul cave ab iis, qui a divina revelatione praescindunt, vel eam negant; qui enim praescindunt, indignam homini rationali, praesertim Christiano, philosophiam docent, atque relinquentes revelationem, quae est rationis fulcrum, errandi, vel saltem dubitandi periculis se obijciunt; qui vero excludunt, in impietatem vel lapsi sunt, vel labentur, quod et ex eo maxime patet, quod veritates ra-

89. Hominem ad verum perspicendum, ipsa natura impellente, duci, intimus testatur sensus. Et reapse aliqui sunt, qui sibi relictis, nulloque edocti praeceptore iudicia, et ratiocinia adeo recte conficiunt, ut veritatem quaesitam saepe assequantur. Haec vis, aut dispositio mentis humanae, quae major, minorve est, pro intellectus cujusque acumine, *logica naturalis* dici potest, quae in *recto sensu*, seu in quadam mentis sagacitate naturali reponi potest. Ast saepe homines lumine naturae tantum ducti, nulloque suffulti duce verum pro falso amplectuntur, uti Ixion nubem pro Iunone. Hinc necessitas orta est *Logicae Artificialis*, a nobis definitae (§. 88.), quae praeceptis suis suppleret rationis, seu Logicae naturalis insufficientiae (1). *Artificialis* proinde Logica congruis, electisque institutis mentem dirigit; *Naturalis* autem una nititur rationis virtute. *Naturalis Logica artificiali* est difficilior, quia illam propria experientia quisque comparat; est angustior, quia nemo omnia praecepta lucusque detecta sibi relictus invenire potest; est fallacior, quia sine duce facilis est in errorem casus (2). Ex quibus intelligitur, Logicae objectum esse omnes actiones, quibus humana mens veritatem attingere enititur. Igitur Logica laud complectitur illas rationis actiones, quas moderandi Ethicae officium est. Ceterum *Logica* est ars praemittenda cuique scientiae addiscendae, cum ejus adjutorio facilius, brevius, ordinatius discere, et tradere scientias possimus.

90. Logicam hanc in tres partimur sectiones, quarum prima de animae multiplici actione, secunda de methodo, tertia de veritate agit. Illud heic monemus, nempe nos promiscue accepturos vocabula *rationis*, *mentis*, *intellectus*, *animi*, *animae*, quae in Ideologia speculativa enucleabuntur.

tionalem vitam respicientes *per rationem investigatae paucis, et post longum tempus, et cum admixtione multorum errorum perveniant*, uti loquitur S. Thomas (1. p. q. 1. a. 1.).

(1) Quae Logica *artificialis* confecta est 1. ab ipso naturae lumine, quo reguntur homines; 2. ex sedulo studio, experimentis, et exercitio, quae capacitatem auxerunt, errores, errorumque causas detexerunt; 3. ex nostra, et alienis erroribus.

(2) Logica *artificialis* proinde dici potest *sensus communis* ad regulas quaedam reductus, uti eam pulchre vocat Testa.

## SECTIO I.

## DE ANIMAE HUMANAЕ ACTIONIBUS

91. De animae humanae actionibus in primis agemus, ut postea ex his ad ejus facultates, et a facultatibus ad ejus naturam ascendamus, et sic a cognitis ad ignota procedamus. Iam vero mens humana vel rem sine affirmatione, aut negatione intuetur, et *percipere* dicitur, vel de eodem objecto aliquid affirmat, negative attributum, et dicitur *judicare*; vel relationem subjecti cum attributo subsidio tertiae ideae dignoscit, et *ratiocinari* dicitur. *Percipit*, qui in rosa odorem attingit; *judicat*, qui affirmat, negative odorem hunc esse rosae; *ratiocinatur*, qui alterius floris odore utitur, ut hujus rosae odorem inferat. Primus mentis actus *simplex perceptio*, alter *judicium*, tertius *ratiocinium* nuncupatur. In hac itaque sectione agemus de *simplici perceptione*, de *judicio*, de *ratiocinio* (1). Et quoniam sermocinatrix Logica cum ratiocinatrice copulatur (§. 88.); ideo de illa quoque disserentes, de terminis, de propositionibus, de argumentatione totidem adnexis capitibus loquemur.

## CAPUT PRIMUM

## DE SIMPLICI PERCEPTIONE

92. *Perceptio* est simplex mentis intuitus absque affirmatione, vel negatione (§. 91.). *Idea* vero, quae ex graeca voce, quae *speciem* significat, emanat, est quidquid in mente versatur immediate post rem perceptam. Quare *perceptio* est mentis actio, *idea* vero ejusdem actionis terminus, licet

(1) Haec partitio oritur ex ipsa natura ratiocinii. Nam *ratiocinari* dicimus, cum aliquid ob aliquam asserimus rationem, ut si dicerem; *mundus est creatus, quia est contingens*. In ratiocinio proinde veritatem ignotam a nota deducimus. Veritas autem nota complectitur aliquid, quod est, vel non est hoc aut illo modo. Sed quoniam mens nostra *judicat*, quum asserit, aliquid esse, vel non esse illo modo, patet ratiocinium *judiciis* constare. Verum ut mens nostra *judicet*, aliquid esse, vel non esse illo modo, debet cognoscere illud aliquid, ejusque modos. Cum porro cognitio, vel notio rei alicujus sit *idea*; ideo *judicia* ex ideis efformantur. Quapropter tres sunt praecipuae mentis operationes.

una sine altera esse nequeat. Non desunt philosophi, qui putant, *ideam* includere iudicium; quia *idea* rem existentem supponit, res vero existens *ideam entis*, *idea entis* autem complectitur rem, et possibilitatem. Imo docet Melillo (*Nuovo corso etc. Logica Empirica* c. 2. a. 1. et c. 3. a. 1.), Platonem, S. Thomam, Bossuetum, Reid, Cousinum, Rosminium, aliosque Rationalistas Catholicos hanc doctrinam habuisse, quam ipse tuetur, de iudicii necessitate ad habendam *ideam*. Hinc notat, ad *sentiendum* sufficere, ut objectum minori, maiori-que energia sensibus objiciatur; sed ad habendam *ideam obiecti* requiri, ut *cognoscamus*, seu concipiamus mente id, quod in objecto sensationis reperitur, alias anima nostra *sentiret*, sed non haberet *ideam*. Concipere vero in objecto aliquid ipsi inhaerens, seu videre alicui objecto aliquas inhaerere qualitates, est *judicare*. Ergo ad *ideam* obiecti habendam requiritur iudicium, quod *instinctivum* vocat Reid (§. 56.), Cousinus *spontaneum* (§. 64.), Rosminius *deductum* (§. 77.), Melillo *intuitivum*, vel *constitutivum*. Sed hic notamus quoque, inter *ideam*, et *notionem* aliquos distinguere, dicentes, *ideam* referri ad objectum concretum, *notionem* vero ad objectum abstractum; e. g. *idea* Petri, *notio* iustitiae.

93. In qualibet *idea* sunt considerata 1. subjectum, sive principium, a quo illa ceditur; 2. objectum, quod illa exhibet; 3. modus, quo illa objectum repraesentat; 4. medium, quo subjectum conspiciat objectum a se distinctum. Quare de ideis hic agendum est, prout hisce sub respectibus accipiuntur.

## ARTICULUS PRIMUS

### DE IDEIS QUOAD SUBJECTUM INSPECTIS

94. *Ideas* omnes in primis vel virtute sibi ignota mens humana conficit, et *acquisitae* dicuntur, vel homo ab suae existentiae initio menti suae infusus ab auctore naturae recepit, et *innatae* appellantur. Utrum *ideae* existant innatae, in Ideologia speculativa disputabitur. *Acquisitae* *ideae adventitiae* dicuntur, si eas mens nostra, velut causa efficiens, sensuum ministerio sibi comparet; *factitiae* vero, si absque sensuum ministerio, tamen adventitiarum adiutorio eas cudat. *Idea* montis *adventitia*, *idea* centauri *factitia* est. Istae *ideae factitiae* ab anima cuduntur vel *similitudine*, uti si ex acqui-

sita idea turris alias imaginetur torres; vel *associatione*, si nempe ex pluribus ideis sibi acquisitis unius compositi ideam sibi effingat, uti idea monstri horatiani initio artis Poeticae descripti; vel *ratiocinio*, si ab notis ad ignota progrediatur, uti si ab ideis operationum mentis mens ipsa ad sui ascendat naturam; vel demum *ampliatione*, aut *diminutione*, cum ideas acquisitas vel augeat, vel minuat, uti est idea gigantis, vel pigmaei, quam addendo, vel minuendo ideam, quam habet, hominis, sibi efformat. Ideae *factitiae* aliae dicuntur *fictitiae*, quarum objecta possunt existere; aliae *chimaericae*, quarum objecta existere repugnant. *Mons aureus* est idea fictitia, *circulus quadratus* chimaerica. Cetera in Ideologia discutientur.

## ARTICULUS SECUNDUS

### DE IDEIS QUOAD OBJECTUM INSPECTIS

95. Ideae *objectum* est id, quod idea repraesentat. Huiusmodi objectum aut est, aut esse potest. Quare *nihili* absolute nulla idea dari potest, licet istud *negative* cogitare mens queat, intuens nempe possibile sua viduatum possibilitate, aut potius in terminis, qui simul stare nequeunt, se figens. Deinde ideae objectum vel est undique determinatum, et a ceteris distinctum, uti *Petrus*, vel est saltem ex parte indeterminatum, uti *aliquis*; vel tandem est penitus indeterminatum, uti *omnis*. Primo casu *singulare*, secundo *particulare*, tertio *universale* objectum dicitur. Ens itaque constituitur objectum *singulare*, sive *individuum* per quarundam proprietatum collectionem, quae pluribus sunt communes, et per collectionem proprietatum, quae undique illud determinant, aliisque sub omni respectu haud congruunt, hoc versiculo inclusae: *forma, figura, locus, tempus, stirps, patria, nomen*. Hoc ex exemplo patet Caci descripti ab Ovidio (l. 4. Fast.). Constituitur vero *objectum particulare*, cum ipsi nonnullas aliis communes notas tribuamus, uti si dicamus, *aliquos homines esse doctos*. Demum objectum dicitur *universale*, si habeat cum ceteris notas communes, uti *animal*, hominibus ac belluis commune (1).

(1) Nam entia omnia possunt concipi aut veluti substantiae diversimode modificatae; aut veluti modi substantiae inherentes, aut veluti subjecta individua individuis modis ornata. Accepta duobus prioribus modis sunt mentis no-



96. Qualitates illae, quae ens individuum reddunt, dicuntur *notae*, quibus una ab altera re discriminatur. Istae notae aut sunt ejusmodi, ut ab ente nequeant abesse, quia ejusdem essentia muletur, et *essentiales*, uti *ratio* in homine, dicuntur; aut tales, ut abesse queant, non mutata entis essentia, et *accidentales* appellantur, uti *doctrina* in homine.

97. Ex his facili negotio intelligitur, ideam ratione objecti repraesentati esse aut *singularem*, quae individuum; aut *particularem*, quae aliqua individua, vel aliquod individuum indeterminatum; aut *universalem*, quae qualitatem totius classis, sive qualitatem communem individuis speciei unius omnibus, vel omnibus unius generis speciebus, includit, vel exprimit. Idea Petri est *singularis*; idea alicujus hominis indeterminate accepti est *particularis*; idea hominis in genere, est *universalis*. Quare idea universalis non est idea unius classis, vel collectionis, ut vult Smith (*dissert. sull'orig. dell' lingue*), neque idea archetypa, et veluti typus, et exemplar aliarum, uti adrisit Condillacho (*Traité des sens. p. 4. ch. 6.*), sed idea qualitatis communis *totius*, non *unius* classis. Et hic. notamus, ideam *singularem*, atque *particularem* mutari, mutatis individuis, quae exprimuntur illis ideis; non ideam *universalem*, quae immutabilis permanet, mutatis quocumque modo individuis, quia exprimit non individua, sed communem qualitatem.

98. Sed universalis idea triplex esse potest, nempe *speciei*, *generis*, *differentiae*. *Species* est notio universalis exprimens qualitatem, sive notam, quae convenit pluribus individuis, uti *homo*, quae vox omnes homines singulatim acceptos exprimit. Quare non immerito *species* dicitur *individuum similitudo*. *Genus* est notio universalis exprimens qualitatem, sive notam, quae convenit pluribus speciebus, uti est *animalitas*, quae notam designat homini, brutisque communem. Recte proinde dicitur *genus similitudo specierum*. Ceterum tum *species*, tum *genus* plures notas exprimere possunt; sed tunc illae notae considerantur per modum unius. Sic e. g. *vita*, *sensus*, *ratio* considerantur in uno *homine*, quae vox speciem exprimit; sic *vita*, et *sensus* in uno *anima-*

træ conceptus, tertio modo considerata sunt entis reapse existentia, atque complectuntur substantiam, et modos, quibus substantia existit, alias modi existerent sine substantia, sive sine existentia. Hoc itaque tertio modo considerata, sunt entia *singularia*, sive *individua*; duobus primis modis sunt *generalia*, vel *particularia*.

*li*, quod *genus* indicat, accipiuntur. Unum *ens* ab alio, sicut una *species* ab alia, et unum ab alio *genere* nota aliqua, vel notis aliquibus secernitur. Illa nota, vel notarum complexus *differentia* vocatur, quae proinde *individualis*, vel *numerica*, *specifica*, et *generica* esse potest, prout huiusmodi nota, vel notis individuum ab individuo, species a specie, *genus* a *genere* distinguitur. Quare *differentia* numerica inter ea, intercedit, quae sunt ejusdem speciei; *specifica* vero inter ea, quae sunt ejusdem generis; *generica* demum inter ea, quae sunt ejusdem superioris generis.

99. *Genus* multiplex esse potest. Quandoquidem aut omnes omnino species in aliqua conveniunt qualitate, qua nulla alia est universalior, et *supremum* dicitur; aut aliquae species in aliqua conveniunt nota, quae proxime adhaeret speciei, et *infimum* appellatur. *Ens* est *genus* supremum, *animalitas* vero infimum. Alia inter ista existunt genera, quae *media* dicuntur, quia inter supremum, et infimum sunt. Ex quo patet, *genus* unum ad speciem reduci posse, si quoad *genus* consideretur se superius. Nam *substantia* ex. gr. licet respectu *corporis* sit *genus*, est tamen species respectu *entis*.

100. In ideis considerata sunt *comprehensio*, et *extensio*. *Comprehensio* est complexus proprietatum, quas aliqua idea sub se continet; *extensio* vero complexus subjectorum, quae sub illa idea continentur. Sic hominis ideae *comprehensio* complectitur animalitatem et rationem, *extensio* vero omnia individua sub specie hominis contenta. *Comprehensio*, et *extensio* ita mutuo nexu devinciuntur, et ratione inversa progrediuntur, ut una aucta, altera semper minuatur, et vicissim. Sic si ideam hominis ad individuum ex. gr. Cartesium restringam, *extensio* unum continebit individuum, *comprehensio* vero omnes proprietates Cartesio proprias, et communes cum aliis hominibus; si vero ideam hominis ad *genus* extollam ex. gr. *animal*, tunc *extensio* omnia bruta, et omnes homines continebit, *comprehensio* vero proprietates *animali* proprias, et communes aliis superioribus generibus, nempe sensum, animam, vitam, substantiam, possibilitatem.

101. Hinc patet 1.<sup>o</sup> *comprehensionem* gradatim minui, cum progrediamur ad genera superiora, usque dum ad *genus* supremum perventi in una *possibilitate* eam reponimus; e contra minui *extensionem* cum a *genere* supremo ad media, et ab istis ad species descendamus; 2.<sup>o</sup> proinde magis individuum *comprehendere*, quam species, magis spe-

cies, quam genera; 3.<sup>o</sup> quare a genere ad species, et a speciebus ad individua nos recte ratiocinari, sed non vicissim.

102. Verum existitne extra mentem universalis ideae objectum? Hoc diu disputatum fuit Reales inter, et Nominales (§. 39.). Ast certum est contra Reales nullum existere reale objectum universale in rerum natura, cum, quidquid existit, omnimode determinatum, ideoque et singulare sit (§. 95 nota). Certum quoque est contra Nominales, universale cum suis proprietatibus existere in singularibus, uti homo ex. gr. existit in Petro, Titio, et quidem, ut animal ratione praeditum. Sic lis composita dicenda est. Quare doctrina Conceptionistarum (§. 39.) est vera; ideae enim universales sunt conceptus mentis habentes fundamentum in rebus ipsis, seu in similitudine individuorum saltem possibilium, quam efformamus ex comparatione plurium individuorum, aut abstrahendo qualitatem individui, despectis aliis. Adde, quod si ideae universales sint juxta Nominales verba et nomina, ideae esse debent, quia nomina sunt signa conceptuum mentis; et ideo ideae universales nomina universalia expriment, uti notat Rosminius (*Nuovo saggio* vol. 1. c. 4.)

103. Mentem hominis a singularibus ad universalia posse ascendere, et ab istis ad illa descendere, experientia interna edocemur. Duplici sua operatione mens humana hoc perficit. Nam a singularibus ad universalia proficiscitur *abstractione*, qua, posthabitis proprietatibus objecti, suam attentionem convertit tantum ad unam, quam veluti avulsam a suo subjecto respicit, ideamque sibi creat ejusdem speciei individuis communem, quae proinde universalis est; ab universalibus vero ad singularia mens nostra descendit *compositione*, qua ideae universalis objecto aliam, atque aliam addens notam, objectum ipsum reddit undequaque determinatum, et ideo singulare. Si ex. gr. mens humana, neglectis notis (§. 95.) jam allatis, unam doctrinam in Galilaeo contemplatur, hancque ab ipso veluti distractam, universalem ideam *abstractione* consequitur, omnibus doctis communem (1). Si vero illas notas (§. 95.) addat doctrinae, ideam Galilaei singularem sibi comparabit (2). Porro idea comparata *abstractione* dicitur *ab-*

(1) Praeter *abstractionem* ad ideam universalem efformandam, requiritur etiam *judicium*, quo affirmamus, qualitatem conceptam ab suo subjecto avulsam esse determinabilem e. g. in aliis individuis speciei, ad quam subjectum illud pertinet, ex quo illa qualitas est separata.

(2) Leibnitiuss (*Nouveaux Essais* l. 3. §. 3.), et Rosminius (*Nuovo Saggio* vol. 1. ses. 5. c. 4. a. 8.) putant, nostram mentem ab ideis universalibus

*abstracta*, *concreta* vero, quae habetur *compositione*. *Abstractio* analysim, *compositio* synthesim includit. *Abstracta* vocatur quoque ab aliquibus idea qualitatis, quam in objecto consideramus, neglectis aliis notis; ast haec dici potest *abstracta* quoad mentem, *concreta* vero quoad objectum. Non omnes ideas universales esse abstractas, putant aliqui, quia ex. gr. *concreta* est idea hominis in hoc exemplo: *homo est animal ratione praeditum*. Verum hic *concretismus* in mente est, non in objecto extra mentem posito, cum ideae universalis nullum sit objectum reapse existens. Quare quaevis idea *universalis* est *abstracta*, non autem quaevis *abstracta* est *universalis*; idea enim *abstracta* est idea qualitatis consideratae veluti avulsae a suo subjecto; idea vero *universalis* est idea qualitatis communis pluribus individuis, vel speciebus (§. 98.). Sed quoniam quaevis idea *universalis* est etiam *abstracta*, ideo haec potest esse singularis, particularis, et etiam universalis. Deinde abstractio fieri potest quatuor praesertim modis, nempe 1.<sup>o</sup> concipiendo separatum ab altero, quod alteri conjunctum est, quodque separatum potest existere, uti animam absque corpore; 2.<sup>o</sup> concipiendo modum, nihil de substantia cogitando, uti albedinem absque corpore; 3.<sup>o</sup> concipiendo in modo aliquam affectionem, aliis affectionibus praetermissis, uti tantum directionem in motu, omitta velocitate; 4.<sup>o</sup> concipiendo aliquid commune pluribus individuis, vel speciebus, uti humanitatem in pluribus hominibus; hoc ultimo modo nascuntur ideae universales.

104. Praeterea in objecto (§. 95.) nostrae ideae aut unum quid dumtaxat discernitur, uti *color* albus; aut in ipso plura considerari possunt, uti *triangulus*. Primo casu idea *simplex*, secundo *composita* dicitur (1). Quare ad hoc, ut idea dicatur *composita*, non est necesse, ut objectum semper physicis partibus constet, sed sufficit, ut in ipso plures sint proprietates. Illud tamen non est omittendum, ideas simplices, et majori jure compositas, haud esse in omnibus easdem, quia non eadem est in omnibus sensuum structura, et status; non

ad singularia procedere, et non vice contraria. Nam juxta ipsos mens nostra post longum examen in objecto praeter qualitates communes esse quid proprium animadvertit. Sed perperam; quia, licet nos lateret ratio, cur unus entis qualiter a qualitate alterius entis simili sit diversus; tamen scimus, primam primi, alteram alterius esse propriam. Sic albedinem unius ab alterius albedine discernam, licet nesciam, in quo albedo unius ab alterius albedine differat.

(1) Ideas simplices partim *sensibus* acquiritur, uti sunt ideae colorum, saporem, odorum, sonorum, voluptatis; partim ope *reflexionis*, aliarumque facultatum animae, uti sunt ideae existentiae, cogitationis, voluntatis.

eadem educatio, et cultus; non eadem aetas, et sexus. Sic certe non eandem habent ideam substantiae, Dei, imo odoris e. g. rosae, et ceteras huiusmodi omnes sive ignari, sive docti, sive sensibus bene valentibus, sive infirmis instructi. Ideae compositae aliqui *associatam*, de qua loquuti sumus (§. 96.), addunt, quam dicunt in mente excitatam occasione aliarum idearum, quae cum illa simul habitae sunt. Sic ex. gr. si, viso horto, amicum, quem allocutus sum in illo horto, recordabor, idea amici *associata* dicitur, quae ad compositam referenda est. Ideas *associatas* autem acquirere, seu efformare possumus *sensatione*, uti idea exercitus, quae plures continet alias sensibus habitas; vel *ratiocinio*, uti idea Dei, quam habemus ex universi contemplatione; vel *imaginatione*, uti idea centauri, quam ex aliis sibi efformant poetae, et pictores; vel *institutione*, uti sunt ideae, quas ex libris vel magistris excipimus.

105. Relate ad objecta sunt quoque ideae *reales*, quae objecta extra mentem existentia repraesentant, et *phantasticae*, quarum objecta ab ipsa mente efformantur. Idea solis est *realis*, est *phantastica* idea centauri (1). Ceterum etiam *possibilitas* potest esse objectum ideae *realis*, cum illa sit aliquid extra mentem, a qua minime dependet.

106. Insuper si objectum ideae cum alterius ideae objecto ita connectatur, ut unum sine altero concipi nequeat, idea dicitur *relativa*, uti idea praeceptoris connexa cum illa auditoris; si vero ideae unius objectum ex se intelligatur, neque alterius ideam excitet, illa *absoluta* dicitur, uti idea circuli. Et hic notamus, ideae relativae objectum ita aliquando videri absolutum, ut nulla connectatur relatione cum alio, cum tamen relationem ad aliud dicat. Exercitus ex. g. qui Romuli aetate *magnus* putabatur, *minimus* erat tempore Reip. Ideae quantitatum, et qualitatum accidentalium sunt semper relativae, quia quantitas, et huiusmodi qualitates plus, minusve admittunt. Sic *magnus*, *parvus*, *pulcher*, *deformis*, *doctus*, *ignarus*, *perspicax*, *hebes*, et alia huiusmodi vocabula ideae relativae exprimunt.

107. Objectum nostrae ideae aut ita in se existit, ut alio non indigeat, quo fulciatur, uti est *lapis*; aut alio indiget, in quo existat, uti *doctrina*. Illius idea est *substantiae*; istius vero *modi*. Porro idea *substantiae* est semper singularis, quia

(1) Saepe tamen idea *phantastica* accipitur pro idea rei corporeae, vel quae instar corporeae percipitur, quaeque *phantasma* in mente excitat.

est idea objecti existentis, licet non desint, qui tantum possibilitatem in *substantia* admitti posse contendunt. Idea vero *modi* est semper relativa, quia dicit relationem ad substantiam, in qua existit.

108. Demum idea despescitur in *veram*, si suo respondeat objecto, et *falsam*, si non exhibeat rem, uti est in se. Cartesiani omnes veras; Lockiani neque falsas, neque veras; alias veras, alias falsas aestimavere Peripatetici. Dissidium forte manavit ex diversa ratione explicandi idearum *veritatem*. Si enim *veritas* in convenientia idearum cum objectis externis statuatur, aliae *verae* sunt, aliae *falsae*; si vero in convenientia idearum cum objectis a mente conceptis constituantur, omnes ideae verae sunt. Itaque nostrae ideae *objective* spectatae possunt profecto esse *falsae*, uti est falsa idea auri, quam quis sibi efformat videns aurichaleum, quia difformis est ab objecto; *subjective* autem spectatae sunt omnes *verae*, cum sint determinatae modificationes nostrae animae conceptis objectis conformes. Ceterum si veritas reponatur in *affirmatione*, vel *negatione* convenientiae attributi cum subjecto, neque falsitas. neque veritas potest esse in ideis, praesertim in hypothesi illorum, qui iudicium in ideis non recognoscunt (§. 92.), quia tunc ipsae nil affirmant, vel negant.

## ARTICULUS TERTIUS

### DE IDEIS QUOAD MODUM REPRÆSENTANDI OBJECTA INSPECTIS.

109. De ideis et hic disserendum est inspectis quoad modum, quo ipsae objecta repræsentant (§. 93.). Saepe accidit, ut quolibet loco, et tempore mens nostra aliquod objectum vivide perceptum ab aliis discernere valeat, ac certo discernat, illud esse; saepe vero tale perceptum objectum minime ab aliis valeat distinguere. Mens nostra primo casu ideam illius objecti *claram*, secundo *obscuram* habet, acceptis vocabulis a Physicis. Hinc male Condillachus (*Essai sur l'origine des connoiss. hum. P. I. Sec. I. C. I.*) obscurae ideae vocabulum eliminandum esse putat; nam aliud est nullam, aliud obscuram ideam habere. Idearum obscuritas ex eo enascitur, quod plura simul mens nostra contempletur, aut rapide ab uno ad aliud progrediatur objectum, aut ipsa mens affectibus pulseur, quo fit, ut probe non attendat.

110. Si mens nostra objecti percepti, et praecipuarum qualitatum essentialium, quibus ab aliis illud discernat, ideam

habeat, haec *distincta* dicitur; et *confusa* e converso, si mentem lateant illae qualitates. Ita Astronomus ideam Jovis *distinctam* habet, si compertae ei sint proprietates, quibus ille Planeta a ceteris distinguitur; *confusam* vero, si Jovem ita noverit, ut ejus nesciat essentielles proprietates, quibus ab aliis distinguitur. Idearum *confusio* praecipue oritur ex ideis qualitatum, quae in pluribus objectis diversae speciei esse possunt, uti maculata pellis leopardi, quae aliis convenit animalibus; et ex non determinata collectione idearum simplicium ingredientium in composita, uti videre est in quibusdam ideis moralibus, quae diversae solent esse in diversis hominibus. Verum claritas, et obscuritas, distinctio, et confusio non idearum affectiones sunt, sed mentis, quae agnoscit, vel non agnoscit, distinguit, vel confundit idearum suarum objecta.

111. Mens nostra deinde ideam habet *completam* alicujus objecti, si qualitates omnes essentielles, et accidentales illius percipiat, uti est idea trianguli in eo etiam, qui e limine Geometriam salutavit; *incompletam* vero, si primarias tantum notas perspectas habeat. Ast si mens humana in objecto percepto proprietates omnes tum essentielles, tum accidentales, necnon illius relationes, notasque notarum percipiat, idea tunc erit *adaequata*; uti erit *inadaequata*, si proprietates illas primarias, et secundarias tantum pernoscat.

112. Ex quibus inferri potest; 1. ideam claram cum confusa, distinctam cum incompleta, completam cum inadaequata fere idem esse; 2. analysi praecipue efformari ideas completas, quia analysi ideae decomponuntur; 3. minime nos posse substantiarum ideas reddere completas, et adaequatas, cum earum essentia sit nobis incomperta; 4. interim philosophum eo suas vires intendere debere, quantum potest, ut ideas rerum claras, dein distinctas, postea completas, demum adaequatas, quae tandem *comprehensivae* dici possunt, sibi, aliquo saltem modo, efformet.

## ARTICULUS QUARTUS

DE MEDIO, QUO MENS CONSPICIT OBJECTUM A SE DISTINCTUM.

113. Tota recentiorum controversia in eo praecipue versatur, quonam scilicet medio (§. 93.) principium cogitans in homine ideas procreet; sive quonam medio objecta eradant intelligibilia. Aliqui lumen aliquod incorporeum excogita-

runt, quo mens extra, et intra se intuetur objecta, eorumque ideas comparat, uti oculus corporeus luce mediante materialia conspicit. Hoc porro lumen aliqui cum Deo, in quo omnia intueatur mens, confundunt; alii quid increatum et divinum dicunt; alii ingentem quamdam ideam fulgoris instar coruscantem supponunt; alii quid creatum, et finitum. Ast verius cum Cl. Vincentio Gioberti est dicendum, nexum intelligibilis cum sensibili esse mysterium, ideoque frustra nos quaerere, quod numquam sumus intellecturi.

## CAPUT SECUNDUM

### DE IDEARUM SIGNIS.

114. Homo ipsius naturae impulsu ad societatem ineundam cum aliis ducitur, quidquid blateret Rousseau. In ipsa enim subsidium in indigentis, in ærumnis solatium, in labore requiem facili negotio reperit. Verum haec commoda nemo posset adipisci, nisi simul cogitata sua pandere aliis videret, aliique eum intelligerent. Interna sensa autem quisque aperire potest, aut naturali aliquo signo, ipsa natura impellente, uti *fletus*, aut signo aliquo arbitrario ab hominibus sancito. *Signum*, inquam, quod sui, et alterius rei ideam excitat, quodque *naturale* est, si ex natura sua rem demonstret, uti fumus ignem; *arbitrarium* vero, seu *artificiale*, si rem ex Dei, hominumve institutione ostendat, uti iris Dei pactum, cypreus sepulchrum. Ceterum saepe accidit, ut signum naturale arbitrarii veste induatur, uti si quis apposite in fletum, vel risum erumperet, licet neque tristitia afficeretur, cum flet, neque laetitia, cum ridet. *Signum* praeterea potest esse *rememorativum*, si rem praeteritam denotet, ut ossa, quae effossis sepulchris miratur agricola, denotant, ibi olim commissum fuisse praelium (*Geor. l. 1. v. 493*); *prognosticum*, si rem futuram significet, uti radii, qui sub lucem erumpunt inter densa nubila, denotant, pampinum male defendere mites uvas (*Geor. l. 1. v. 445*); et *demonstrativum*, si rem praesentem ostendat, uti umbrae majores cadentes de altis montibus labentis solis signum sunt (*Ecl. 1. v. 84*), quia (*Ecl. 2. v. 67*).

*Et sol crescentes decedens duplicat umbras.*

115. Creditur, homines in primis usos fuisse ipsis objectis, ut suas manifestarent ideas illis respondentes, uti auri



fragmentum demonstrabant Americani, ut fodinas auri Europaeis ostenderent. *Symbolicus* sermo hic dici potest, atque consistit in electione quorundam corporum vel formarum propriis ideis respondentium. Ad hunc sermonem reducuntur monumenta, insignia militaria, et gentilitia, et fortasse hieroglyphica, quamvis litteras ea alii putent. Ast suasi homines, objecta exprimi posse corporis actionibus, postea usi sunt *gestu*, qui *idioma mimicum* dici potest, quique est peculiaris motus corporis, quem adhibet mens humana ad suos patefaciendos conceptus. Ipso aliquando usae sunt cultiores nationes, Romanis non exceptis, et ipso etiam nunc utuntur in theatris culti populi. Sed demum sua cogitata homines voce manifestantes, ipsa voce conati sunt objecta imitari. *Vox* itaque est *sonus animalis ore prolatus*, (qui, sine articulis emissus, *inarticulatus* dicitur, *articulatus* vero, si emittitur per articulos, seu vocis inflexione) *cum intentione quidpiam palam faciendi*. Quare *vox* dici nequit campanae sonus, quia non est ore animalis prolatus, neque eadem est *vox* e. g. psittaci, et hominis, quia non illius, sed istius *vox* ad patefaciendas animi cogitationes est instituta. Ceterum bruta vocibus inarticulatis suos affectus solent promere sive inter se, sive hominibus. Ex articulatis vocibus confectus est *sermo*, cujus diversitatem ex vario modo, quo objecta conspecta sunt, et ex vario objecti characterē deducit Condillachus, cujus tamen systema hucusque allatum de sermonis inventionē refutat de Bonald, aliique. Cum vero noscerent homines, quod voce dumtaxat tempore, et loco praesentibus fuissent loquuti, *scripturam* invenere, quae est signum obsectorum figuris, hieroglyphicis, characteribus, aliisque notis expressum. Patet ex dictis, fere omnia haec signa esse arbitraria, quia non ad illas ideas indicandas a natura jam statuta.

116. Ast potuissentne homines in silvis aberrantes, et numquam sermonem audientes, uti aliqui falso putant, non praeceptorem aliquem, sed naturae institutum sectantes, sermonis notitiam, usumque nancisci? An sermonis usum ab naturae auctore receperint primi homines, vel potius ipsimet de facto excogitaverint? Quanam lingua locuti sunt primi nostri parentes? Haec diu, et saepe quaesita sunt. Verum ad primum dicimus, quod homines in silvis aberrantes, uti falso supponitur, sermonem numquam invenissent, et quia omnis vocis articulatae prolatio fit ab hominibus ad imitationem aliorum, quibus loquentibus deficientibus, illa haberi nequit; et quia sermo totus efformari debuisset, saltem relate ad suas

partes essentielles, sine quibus nulla fuisset significatio, quod tamen nequit concipi in hominibus sermone destitutis; et quia plura linguae elementa nullum sensum reddidissent, nisi multiplici eorum combinatione, quae supponi nequit ante sermonis inventionem; et quia homines illi in silvis aberrantes toti supponi debent in praecipuis vitae sensitivae, et animalis necessitatibus providendis, ad cujus functiones exercendas non est necessarius sermonis usus. Deinde homo a singularibus iucipit ideis (§. 103. not. 2.); dein ad universales ascendit; sed, ut ad has procedat, elementa siugularia examinet oportet. Quoniam porro in quovis sermone, sive idiomate haec analysis, hocque examen factum supponitur; ideo, si quis sermonem reperivit, supponitur hoc examen primum fecisse. Igitur ante sermonis inventionem inventor examen elementorum sermonis facere, suarumque cogitationum materiale, et formale distinguere debuisset. Verum haec tanta humanae intelligentiae evolutio in quavis gente est sermone posterior; artes vero, et scientiae sermonem efformatum supponunt. Igitur non hominis, sed Dei opus dicendus est sermo articulatus. Vide hac de re Bonald (*Legisl. Primit. t. 1.*); Spedialieri (*Drit. dell'uomo l. 1. c. 11.*); Cantù (*Stor. univ. t. 1.*). Hinc recte cl. Mastrofini notat, illos, qui quaesierunt, utrum homo potuerit excogitare sermonem, de homine locutos fuisse extra societatem constituto, ideoque imaginario, et proinde imaginariam esse hanc disputationem (*L'anima, e suoi stati t. 1. l. 2. §. 731.*). Ad alterum quaesitum dicimus, Deum non elingnes creasse primos homines, quos certe docuit sermonem, quo inter se uterentur, alioquin numquam illum formassent sermonem, uti ex primi quaesiti solutione eruitur. Deinde sine sermone Deus hominem reliquisset sibi uni in aerumnis, in miseriis, absque spe auxilium inveniendi. Ceterum veterum linguarum pleraque vocabula, ac in primis radices, a rebus ipsis extrinsecis profecta sunt, hoc sensu, quod inde veteres illi homines moti fuerint ad ea vocabula pronuncianda, uti ait Genuensis (*Log. Crit. l. 2. c. 8. §. 4. nota (a).* Basani 1778.). Ad tertium demum respondemus, hebraica lingua soynnhoj fuisse primos parentes, si Patribus, si Scripturae interpretibus, si Hebraeis Doctoribus sit adhibenda fides. -

117. Signa, quibus utimur ad nostras ideas aliis manifestandas, *verba* dicuntur, si voce proferantur, *termini* vero, si scribantur, licet hic utraque promiscue a nobis accipiantur. Et quoniam hisce signis homo veluti mente omnium hominum videtur cogitare; ideo verba et termini tum ad pate-

faciendas nostras ideas inserviunt, tum ad augendas nostras cognitiones. Et hoc adeo perspicuum videtur, ut ideae, et verba aequo pede ambulent, illaeque sint in ratione directa istorum (1).

118. Terminus, de quo hic agimus, dicitur *logicus*, quia est vox articulata, qua mens humana suas ideas explicat, aliisque pandit. Quare a *termino physico*, qui spatii cujusdam limitem denotat, secernitur. Quoniam vero ideae terminis logicis exprimiuntur, ideo tot fere sunt termini, quot diversae speciei ideae. Quare termini sunt *singulares, particulares, specifici, generici, simplices, compositi, abstracti, concreti* ... prout ideam explicant *singularem, particularem* ... Non hic loquemur de termino *complexo*, quem *simplici* opponit Lockius, cum ipse ad *compositum* reducat. Sed de natura vocabulorum, eorumque speciebus, atque de fine, imperfectione, usu, vel abusu eorundem legis Genuensem (*Logico-Crit.* l. 2.)

119. Insuper est *terminus positivus*, qui realem quamdam ideam exprimit, uti *lapis; negativus*, qui qualitatis alicujus absentiam manifestat, uti *tenebrae; inanis* qui nullam ideam complectitur, uti *circulus quadratus; proprius*, qui aliquod determinatum objectum constanter declarat, uti *Cicero; univocus*, qui pluribus inservit exprimendis rebus, quae iisdem qualitatibus essentialibus potiuntur, uti *homo; aequivocus*, qui ad diversa manifestanda, quae in essentialibus pror-

(1) Condillaei sententiam profecto non sequimur, asserentis, hominem sine loquela nec analysim, neque synthesim efformare, neque ideas universales condere, neque demum intelligentia potiri posse. Seimus enim et nos, non ideo hominem intelligere, quia loquitur, sed ideo loqui, quia intelligit; imo mentem nostram posse vi sua dividere, et componere, ideasque universales eudere. Interea tamen maximae utilitatis est sermo 1. quia res, non possunt esse semper praesentes, signaque nostri corporis nimis arcta sunt (§. 115); ideoque parvus progressus in scientiis sperari posset, si ad patefaciendas nostras ideas illis uti adstringeremur; 2. quia saepe signis multas rerum proprietates indicare deberemus, ut alii nos intelligerent, uti si ideam *auri* excitare vellemus; 3. quia quisque verbis ideas suas in mente figens, attentionem auget, memoriam adjuvat, imaginationem viviscent, meditationem diu sustinere valet, faciliusque analysim, atque synthesim perficit; 4. quia difficile ideas abstractas vitii, virtutis, gloriae aliis communiesse signis possemus, difficileque etiam nos efformare, amoto sermone; cum e contra verba sint veluti vestigia, quibus iter nostrae demonstrationis aliis monstramus, nosque ad nostrorum ratiociniorum initium regredi valeamus, atque ideas abstractas, veritatesque universales interposcuntur; 5. quia non signa, non res, sed verba sive viva voce prolata, sive scripturae consignata, faciunt, ut aliorum cogitatis, inrentis, experimentis proliferare valeamus praeteritis, aut in remotis regionibus factis.

sus differunt, adhibetur, uti *leo*, qui hominem, belluam, signum zodiaci exprimit; *analogus* seu *metaphoricus*, qui praedicatur de rebus essentia diversis, nonnullam tamen similitudinem habentibus, uti *pes*, quo utimur ad declarandam partem infimam montis, sumpta similitudine a membro hominis, qui *pes* dicitur; *synonymus*, qui eandem ideam excitat, ac alius terminus; quamvis veri termini synonymi minime existant, cum omnes termini, qui *synonimi* dicuntur, eandem ideam omnibus indutam circumstantiis non referant, eodem modo, eadem vi, eadem evidentia (1).

120. Sed operae pretium ducimus et heic vocabula, seu breves phrases explanare, quibus saepe usi sunt Theologi, aequae ac Philosophi scholastici, et modo etiam, licet non adeo tenacius, et frequentius, utuntur, ut illi, et isti recte intelligantur. *Per se* indicat, subjecto attributum necessario inhaerere; per *accidens* vero attributum accidentaliter convenire subjecto. *In actu* dicitur aliquid modo existens; *in potentia* aliquid extitutum, aut saltem possibile. *In actu primo* nuncupatur, quod exornatur potentia producendi aliquem effectum; *in actu secundo*, quod operando evolvit potentiam, qua ornatur. *In actu signato* dicitur scriptio explicationis alicujus rei intellectualis; *in actu exercitii*, quod speculative traditum practice completur. *Simpliciter* declarat, attributum sine ulla restrictione inesse subjecto, uti *Deus est simpliciter bonus*; *secundum quid* significat, attributum subjecto inesse cum aliqua restrictione. *Ut quod* causam principalem, seu subjectum denotat; *ut quo* indicat id, quo subjectum denominatur; uti *homo est sapiens*, homo principium *ut quod*, sapientia *ut quo* innuit. *In sensu diviso*

(1) Sed hic quaeri posset, nominibusne propriis, an universalibus, sive terminis propriis, an univocis primum homines vocaverint res? Leibnitius (*Essais, etc. liv. 5. ch. 5.*), et Rosminius (*Nuovo Saggio. vol. 1. sez. 3. c. 4. a. 8.*) contra Adamum Smith (*Dissert. sull' orig. del linguag.*) docent, homines primitus nominibus universalibus usos esse. Verum notat Melillo (*Nuovo Corso di Filos. Intell. Log. Emp. c. 2. a. 4. §. 5.*), originem nominum propriorum, et communium esse repetendam ex objectis, quae prius homines debuerunt nominibus indigitare; aliqua enim, si propriis nominibus exprimentur, confunduntur, uti *quidam homo*; alia vero nulla est necessitas distinguendi, ideoque neque propriis nominibus indigitandi, nisi bruta. Maxima tamen est nominum universalium utilitas: eorum enim adjutorio difficultatem in loquendo vitamus; facile in scientiis progredimur, in classes velati sectis earum objectis; facillime intelligimur ab aliis, qui secus non semper nos intelligerent, cum res singulares eodem modo omnibus non exhibentur. Revera omnia nomina cujuscunque linguae, paucis propriis exceptis, sunt universalia (Vide tamen §. 103. nota)

demonstrat, attributum actu non posse subjecto convenire; in *sensu composito* exprimit, attributum actu subjecto inhaerere, uti *caeci vident*, quae propositio vera esse potest in *sensu diviso*, sed falsa est in *sensu composito*. *Necessario* dicitur, quando subjecto adeo illud convenit attributum, ut oppositum repugnet; *contingenter*, subjecto convenire quidem illud attributum, sine quo tamen esse potest. *Materialiter* indicat, attributum ratione constitutivi subjecto convenire, uti *lapis est materialiter extensus*; *virtualiter*, subjectum consequi posse aliquam formam, qua actu caret; *eminenter* aliquam perfectionem, quae inest in aliquo subjecto, in alio splendidius, et defaecatius elucere. *Radicaliter* denum significat aliquam proprietatem, ad quam subjectum a sua natura impellitur, licet aliquando ea careat, uti *aqua est radicaliter frigida*, quamvis quandoque calefiat.

121. Ne pravus terminorum usus errorum origo sit, haec philosophus teneat; 1.<sup>o</sup> acquirat, noscat, adhibeat vocabula, quae satis aperte ideas proprias exprimant, ideoque vaga, obscura, inania devitet. 2.<sup>o</sup> Vim, et potestatem, quam usus vocabulis dedit, sciat, eoque in sensu, quo usus doctorum ea adhibet, iis et ipse utatur (1). 3.<sup>o</sup> Vocabula, quae necessitas invenire, aut adhibere cogit, usu contradicente, definiat. 4.<sup>o</sup> Determinatis, gravibus, concinnis utatur vocabulis; atque proinde tropos, et figuras, quantum rei ratio patitur, effugiat; nam haec pulchro utilissima sunt; ast, nisi noxia, saltem insidiosa vero (2).

(1) Nam verba non semper eandem res, neque apud omnes significant, ait enim Horatius.

*Ut silvae foliis pronos mutantur in annos;  
Prima cadunt; ita verborum vetus interit aetas,  
Et juvenum ritu florent modo nata, vigentque.*

(2) Sed prae oculis philosophus habere etiam debet 1. vocabula significare id, quod intelligit is, qui loquitur, vel scribit, sunt enim signa arbitraria; sic vox *Deus* non eodem sensu ab Aristotele, a Stoico, a Spinozista, a Theologo accipitur; 2. vocabula exprimentia affectiones internas animi, abstractasque ideas plerumque obscuritate laborare, quia non omnes intelligunt, neque possunt intelligere eandem affectionum intensitatem, collectionemque modorum idearum abstractarum iisdem vocabulis; sic nemo scire potest, quantus sit dolor meus ex parentis obitu, et quid intelligam sub nomine *justitiae*, quae apud Romanos a Gladiolorum ludis non abhorrebat; 3. vocabula exprimentia ideas relativas saepe confundi cum eis, quae absolutas exprimunt (§. 104.); uti magnam, parvum; 4. vocabula exprimentia ideas simplices defini non posse, ideoque neque intelligi, nisi prius idene illis respondentes sint in mente praconceptae; sic caecus ideas colorum non habens earum vocabula non capiat.

## CAPUT TERTIUM

## DE JUDICIO

122. Postquam mens humana ideas sibi acquisiverit (§. 92.), in suis progrediens operationibus, illas comparat, ut relationem, quae inter ipsas intercedit, attingat. Facta comparatione aut unam in altera contineri intuetur, et copulat; aut unam in altera non contineri, et separat. Haec mentis operatio *judicium* dicitur (§. 91.); quod est mentis operatio, qua attributum subjecto ipsa mens affirmat, negative, cognita prius eorum relatione. Ita ex. gr. *Deus est aeternus: materia non est cogitans*. Primum *judicium affirmativum*, *negativum* vero secundum nuncupatur. Ceterum *judicia negantia* subjective considerata ad *affirmantia* reducuntur, quia in illis mens *percipit* relationem non convenientiae; quae perceptio quid *positivum* in mente est. *Negatio* proinde est *objectiva*, nempe in forma expressionis, non in mente, licet contrarium videatur doctissimo Mastrofini, qui carpit Tracy, Cousin, Antonium Pezzi, qui *judicia negantia* rejiciunt (*L'anima, e suoi stati* t. 1. l. 2. n. 754).

123. In *judicio* notentur haec tria. Primo in ipso concurrunt *intellectus*, qui concutitur idearum relationem, et *voluntas*, quae affirmat, negative illarum convenientiam. Quare, deficiente actu voluntatis, idea non recte dicitur *judicium implicitum* (§. 92.). Ceterum multi negant, voluntatem concurrere in *judicio*, quod proinde definiunt claram perceptionem convenientiae, vel discrepantiae duarum idearum. Secundo ipsum *judicium* tria ingrediuntur, *subjectum*, de quo affirmatur, vel negatur aliquid; *attributum*, sive *praedicatum*, quod de subjecto affirmatur, vel negatur; *copula*, quae continet, vel exprimit nexum, seu relationem subjecti, et praedicati (1). *Subjectum*, et *praedicatum materiam* *judicii* continet, *copula* vero ejus *formam*. Tertio in *judicio* debet esse aliqua idea universalis, quae illi subjecto, aliisque ejusdem classis convenire debet, quaeque per attributum exprimitur. Sic ex. gr. *Petrus est sapiens; sapiens* ideam univer-

(1) Copula exprimitur per verbum substantivum *sum, es, fui, esse*, sed tempore tantum praesenti, quia *judicium* est actus mentis praesens. Quare proposito, *Virgilius fuit auctor Culicis*, respondet huic alteri, *Virgilius est ille, qui fuit auctor Culicis*.

saalem continet, Petro, pluribusque hominibus communem (1). Ast quoniam turba deorum repugnat, quod de Deo asseritur, uni Deo convenire debet.

124. *Judicia* alia sunt a *posteriori*, *experimentalia empirica, physica, contingentia, syntethica*, et alia sunt a *priori, rationalia, necessaria, analytica, pura, metaphysica*. Iudicium primo sensu acceptum est operatio mentis nostrae, qua dicimus, attributum, nobis experientia notum, convenire, vel non convenire enti subjecto sensibus internis, vel externis, uti e. g. *nix est alba*. Hoc iudicium dicitur a *posteriori* quia ex attributo cognito ad subjectum assurgimus: *experimentale, empiricum, et physicum*, quae vocabula idem sonant quia experientiae, et sensibus fulcitur; *contingens*, quia potest a subjecti idea removeri praedicatum, quin illa destruat; *syntheticum*, quia in ipso copulatur subjecto attributum extra subjecti notionem positum. Iudicium vero secundo sensu acceptum est operatio mentis, qua, absque experientiae adiutorio, tribuimus, vel negamus subjecto concepto in ipsa mente aliquod attributum; uti e. g. *nullus effectus est sine causa sui*. Hoc iudicium dicitur a *priori*, quia ab idea subjecti ad ideam attributi ducit; *rationale*, quia est mere opus rationis: *purum, et metaphysicum*, quia ab experimento non pendet; *necessarium*, quia mens nequit praedicatum non tribuere subjecto; *analyticum*, quia ex resolutione subjecti cognoscitur, ipsi tribuendum esse praedicatum in subjecti idea inclusum. Quare in primo iudicio ita subjecto attributum conjungimus, ut, attributo ablato vel posito, subjectum non destruat, neque ponatur; in altero vero, remoto a mente attributo, quod convenit, subjectum mutatur; posito attributo, quod non convenit, subjectum etiam mutatur vel destruitur. In primo ab experientia cognoscimus, subjecto illud inhaerere attributum, sed, utrum necessario inhaereat, nescimus. In hoc iudicio, quod affert Galluppi, *nix est frigida*, attributum *frigida* non est in idea *nivis* inclusum; et possum

(1) Verum non adeo generalis est haec regula, ut nullum sit iudicium, in quo attributum subjecto sit aequale in extensione. In iudiciis enim identiciis, de quibus postea loquemur, et in propositionibus, quae possunt converti, contrarium habetur, uti in iudicio identico:  $7 = 5 = 12$ , et in propositione: *homo est animal ratione praeditum*. Imo multa alia iudicia refert Alphonsus Testa (*Il nuovo saggio di Rosmini esaminato dall'ab. Alfonso Testa c. 1.*), in quibus idea generalis omnino rejicitur, uti sunt illa, in quibus nostrum *ego* est subjectum, ejusque modi sunt attributa, aut facta singularia sunt subjecta, eorum vero modi sunt praedicata.

concipere mente mea, *niven non esse frigidam*. In altero iudicio vero adeo attributum subiecto inhaeret, vel non, ut contrarium concipere non possimus. In hoc iudicio:  $2+2=4$ , adeo verum est,  $2+2$  esse aequalia  $4$ , ut contrarium concipere nequeamus. Itaque iudicium *a posteriori* distinguitur ab iudicio *a priori* 1. quia primum quoad suum obiectum est *reale*, secundum vero est *reale* in mente, sed est *hypotheticum*, seu *ideale* respectu naturae creatae: 2. quia in primo possumus concipere subiectum sine illo attributo, quin illud subiectum destruat, in altero hoc minime valemus efficere. Cl. Mastrofini ( n. 755. ) carpit tamen vocabula *analyticum*, et *syntheticum*, attributa iudiciis, quia *analysis* est tantum medium ad iudicia conficienda, non ipsa iudicia, et quia *synthesis* est conceptio mentis nostrae, non ipsa rei natura, juxta quam iudicia sunt statuenda. Iudicium praeterea est *theoreticum*, si mens nostra tantum convenientiam, vel pugnam attributi cum subiecto intueatur, et asserat: *practicum* vero, si haec convenientia, vel pugna ex morum regula colligatur. Sic *anima est spiritualis*, est iudicium theoreticum; *avaritia est fugienda*, est iudicium practicum. Sunt etiam iudicia *vera*, *falsa*, *certa*, *probabilia*, *improbabilia*, de quibus agemus, ubi de veritate erit sermo; *simplicia*, *composita*, *singularia*, *universalia*, de quibus verbum in sequenti capite faciemus (1).

(1) Kantius admisit etiam iudicium *syntheticum a priori* ( §. 67. ), reposuitque illud in veritate concepta necessaria a mente nostra, uti est iudicium *a priori*, sed attributum superadditum subiecto asseruit subiecto extraneum, uti est iudicium *a posteriori*. *Synthetica a priori* vocavit iste philosophus haec iudicia:  $7+5=12$ , et *nallus est effectus sine causa*; quia juxta ipsum in idea 12. non est idea  $7+5$ , et in idea ejusvis eventus non reperitur idea entis praecedentia. Cum vero non potuisset haec iudicia ab experientia ducere, vel trahere a subiecto, formas, seu categorias statuit, a quibus conatus est ea derivare. Sed fallitur hic Kantius. Nam 1. si mens concipit, ut ipse docet, in iudicio synthetico *a priori* veritatem necessariam, profecto concipit simul, subiecto necessario inhaerere attributum; ideoque attributum non esse subiecto extraneum, uti in synthetico iudicio; ac proinde non syntheticum, sed analyticum est iudicium. 2. Exempla allata a Kantio pro iudiciis *syntheticis a priori* fuleiuntur principiis identitatis, et contradictionis, de quibus postea loquemur; ideoque sunt tantum *a priori*. 3. In veritate necessaria, ac proinde in iudicio necessario, si affirmans est, adeo attributum subiecto inhaeret, ut, ille ablato, hoc destruitur; si vero est negans, adeo cum subiecto pugnat attributum, ut, hoc posito, illud destruitur. Hoc vero falsum foret, si attributum esset subiecto extraneum, quia subiectum in hoc casu non destruitur, ablato, vel posito attributo. Vide Melillo ( *Log. Raz. c. 3. a. 1. et Ideol. Gener. c. 4. a. 3.* ). Post Reid, et Cousin ( §§. 56. 64. ), Desmiron iudicia emergentia ex quodam mentis instinctu, atque antevertentia omnem idearum perceptionem probavit.



125. Interim hos canones habeto. Si ideae sunt iudicii fundamentum (§. 122.), iudicium vero cognitionum nostrarum veluti fulcrum; oportet, 1. ut, antequam iudices, praeiudiciis te expolies; 2. ut non iudices, nisi prius convenientiam, vel pugnam idearum pernoscas; 3. ut non iudices ultra quod perceperis. Peccant in *primam* regulam, qui pessimorum librorum lectione aliquando delectati ex praeconcep- ta opinione cetera efformant iudicia; in *secundam*, qui, quin ad omnes etiam minutas circumstantias, relationesque rerum attendant, festine concludunt, ita se res habere, uti qui turrim quadratam e longinquo visam asserat rotundam (Storchenau. *Log.* §. 93. *sch.*); in *tertiam*, qui sensationes in externis ponunt corporibus, quae tamen in ipsis non percipiuntur; vel qui duorum phaenomenorum, quae conjuncta conspiciunt, unum alterius causam, quod non capiunt, asserunt. Has tres regulas iudicandi generales statuit Cartesius.

## CAPUT QUARTUM

### DE PROPOSITIONE.

126. Sicut idea voce, vel scriptura expressa *verbum*, sive *terminus* dicitur (§. 117.), ita iudicium verbis expressum *enunciatio*, vel *propositio* nuncupatur. Hic itaque de *propositione* agemus. Sed quoniam *definitio*, et *divisio* ad propositionem aliquo pacto referuntur (1); ideo et hic de ipsis erit sermo. Quapropter in duos articulos totam rem partimur.

### ARTICULUS PRIMUS

#### DE PROPOSITIONE

127. Quoniam propositio est iudicium verbis prolatum (§. 126.), ac proinde *aliquid de aliquo affirmans, vel ne-*

Sed perperam. Siquidem 1. in hac hypothesi admittenda forent jam refutata iudicia *synthetica a priori* statuta a Kantio; iudicia enim haec *instinctiva* profuissent ex quadam naturae determinatione sine perspicientia motivi objectivi 2. In omni iudicio subiecto tribuitur, vel negatur praedicatum; isti termini proinde sunt comparandi, ut eorum convenientia, vel pugna perspicia- tur, ac propterea nullum est iudicium ortum ex *instinctu*. Vide Galluppi (*Lez. di Log. e Met.* lez. 88.).

(1) Imo non desunt, qui putant, definitionem esse veram propositionem; quia sicuti in propositione attributum asseritur, vel negatur de subiecto; ita in definitione definito, quod est subiectum, aliquid tribuitur, vel negatur.

*gans*; ideo, sicut tria in iudicio (§. 123.), ita et tria rependienda sunt in propositione; in qua tamen subjectum, et attributum *termini* vocantur, et quidem illud *extremum minus*, istud *majus*, quia majorem subjecto habet extensionem, licet aliquando attributum sit subjecto aequale in extensione (§. 123. nota). Non semper tamen illa tria exprimuntur, cum aut subjectum reticere possit, uti, *est tonans, caelum suppositum*; aut praedicatum, uti, *caelum pluit*, praeterito praedicato; aut *fulgurat*, subjecto, et praedicato omissis.

128. In propositione considerata sunt. 1. termini; 2. qualitas; 3. quantitas; 4. oppositio. Propositio, quoad terminos inspecta est *simplex*, quae unum subjectum, unumque praedicatum concludit, uti *Deus est aeternus*; *composita*, in qua plura sunt subjecta, aut attributa, aut utraque, uti *Deus est omniscius, et omnipotens*; *complexa*, in qua subjecto, aut praedicato additur aliqua explicatio per aliam propositionem, quae *incidens* dicitur, uti ex. gr. *viri, qui sunt Ecclesiastici, doctrina, et sanctitate fulgere debent*, in qua propositione *principalis* est: *viri doctrina, et sanctitate fulgere debent*; *incidens* vero, *qui sunt Ecclesiastici*. Propositio *incidens* aut est *restrictiva*, si ideam attributi, vel subjecti propositionis *principalis* coarctet; aut *exornativa*, seu *declarativa*, si dumtaxat explicet subjecti, vel praedicati ideam, nil addens, vel demens. *Restrictiva* est, quae continetur in hac complexa: *Leo, qui fuit Papa decimus, scientias promovit*. *Exornativa* autem continetur in hac altera: *homo, qui est animal ratione praeditum, cogitat*; ablata *restrictiva*, principalis propositionis sensus mutationem patitur, quod in *exornativa* non contingit. Quare incidentes *exornativae* non sunt nimium urgendae, neque pertinaciter scriptoribus imputandae, contra vero *restrictivae*, quae sunt veluti pars principalium propositionum. *Incidens* non semper clare patet, uti: *viri Ecclesiastici doctrina, et sanctitate fulgere debent*, quae resolvitur per aliam jam relatum. De propositione incidenti, ejusque speciebus videsis Galluppi (*Lex. di Log. e Met. lex. 43.*).

129. Propositio *simplex*, si modum quoque exprimat, quo praedicatum subjecto haereat, *modalis* vocatur, quae quatruxplex est ob modum quatruplicem, quo subjecto asseritur convenire attributum, nempe, *necessaria, contingens, possibilis, impossibilis*. Quare *modales* sunt sequentes propositiones: *circulus necessario est rotundus; lapis contingenter est gravis; possibile est, ut alter mundus creetur; im-*

*possibile est, ut circulus sit quadratus.* Si modus, quo sub-  
jecto conveniat attributum, non exprimatur, propositio dicitur  
*pura*, uti *circulus est rotundus*. Ut itaque propositio  
*modalis* sit vera, necesse est, ut attributum reapse conveniat  
subjecto, illoque modo conveniat.

130. Propositiones compositae sunt duplicis generis,  
aliae enim sunt *explicitae*, in quibus compositio patet; et  
aliae sunt *implicitae*, in quibus compositio latet. Propositiones  
primi generis sex recensentur. Nam explicite composita  
est 1. *Copulativa*, quae plura subjecta, vel praedicata con-  
cludit per voces copulantes *et, atque, nec, neque*; uti *ani-  
ma humana est spiritualis, et immortalis*; aut *neque divi-  
tiae, neque carnis voluptates, neque honores cordi hominis  
faciant satis*. Ut vera sit haec propositio, vera sint oportet om-  
nia membra, quae sunt totidem propositiones simplices.  
2. *Disjunctiva*, in qua subjecta, vel attributa copulantur in-  
ter se per particulas *aut, vel*, sic tamen, ut subjecto attributum  
asseratur vel negetur unum, quin dicatur, quale sit; *uti anima  
humana erit aeternum aut beata, aut misera*. Haec ut vera  
sit, membra nullum medium debent admittere. 3. *Conditio-  
nalis*, in qua praedicatum subjecto tribuitur sub aliqua con-  
ditione expressa per particulas *si, dummodo*; ex. gr. *si bene  
egeris, mercedem recipies, si male egeris, aerumnis afficie-  
ris*. Haec propositio constat *antecedente*, quod *conditionem*  
complectitur, et *consequente*, quod includit *conditionem*,  
illa istius rationem continente; ideoque *consequens* nexu ne-  
cessario cum antecedente connectatur opus est, ut *conditio-  
nalis* vera sit. (1). 4. *Causalis*, in qua ratio affertur, cur sub-  
jecto tribuatur, vel negetur *praedicatum*, quae ratio expri-

(1) Ceterum non ideo vera est propositio *conditio-  
nalis*, quod consequens  
descendat ab antecedenti, atque cum ipso connectatur; potest enim fieri, ut fal-  
sa sit hypothesis, seu antecedens, et tunc falsum quoque erit consequens, uti  
*si anima est corpus, est divisibilis*. Imo potest fieri, ut, ablato antecedenti,  
verum remaneat consequens, uti *si vesceris pane, satiaberis*, potes enim sa-  
tiari alio cibo. Deinde animadvertatur, in propositione *conditionali* nil dici  
de veritate conditionis, sed tantum respici connexionem antecedentis cum con-  
sequenti. In hac propositione, *si Deus non existat, mundus non existit*, non  
veritatem conditionis affirmo, sed tantum connexionem conditionis cum conditio-  
nato. Aliqui hic de propositione *categorica* loquuntur, in qua praedicatum  
subjecto sine ulla conditione tribuitur; uti est in illo versu: *sum pius Aeneas  
fama super aethera notus*. Credit Wolfius (*Riflessioni sopra le forze del-  
l'intell. c. 3. §. 7.*), *categoricam* propositionem reduci posse ad conditio-  
nalem; sic propositio, *Deus est omnipotens*, aequivalet huic alteri, *si Deus  
habet in altissimo gradu perfectiones, est omnipotens*. Vide Galluppi  
(Lez. 5.).

mitur per verba *quia*, *nam*, uti *anima humana est spiritualis, quia est intelligens*. Ratio vera esse debet, ut vera sit haec propositio. 5. *Relativa*, in qua una pars ad aliam refertur, seu quae duarum rerum relationem amplectitur, quae relatio exprimitur per voces *sicut*, et *ita*, *talis*, et *qualis*; ex. gr. *talis populus, qualis sacerdos*. Veritas hujus propositionis dependet ab existentia relationis, ita, ut necessaria sit propositio, si relatio sit necessaria, et dubia, si relatio sit dubia. 6. *Discretiva*, in qua subjecto unum attributum negatur, et unum asseritur, aut attributum uni subjecto tribuitur, alteri negatur; sic ex. gr. *pater amans, non indulgens esse debet*; vel *doctrina, non divitiae meritum constituunt*. Veritas hujus propositionis dependet ab oppositione partium, seu saltem diversitate partis negatae, vel affirmatae.

131. Propositiones *implicitae*, seu *exponibiles* sunt quinque; 1. nempe *exclusiva*, in qua uni tantum subjecto illud datum attributum, aut dato subjecto illud tantum attributum convenire asseritur, ceteris rejectis; e. g. *Deus tantum est omnipotens; magnes trahit ad se tantum ferrum*. Quando particula exclusiva afficit subjectum, propositio dicitur de *subjecto excluso*; quando afficit praedicatum, dicitur de *excluso praedicato*. Veritas est in hac propositione, si reapse datum attributum illi, et non aliis subjectis conveniat, aut dato subjecto illud tantum, et non alia convenient attributa. 2. *Exceptiva*, in qua alicui subjecto negatur attributum, quod ceteris ejusdem speciei subjectis tribuitur; uti ex. gr. *omnes in Adam peccaverunt, excepta B. V. Maria*. Vera erit haec propositio, si reapse datum attributum non conveniat excepto subjecto, et nullum sit ex ceteris ejusdem speciei subjectis, cui non conveniat. 3. *Comparativa*, in qua duo comparantur subjecta, quibus unum tribuitur praedicatum, uni tamen plus, minus alteri; uti ex. gr. *bona aeterna vitae futurae prae bonis hujus vitae optanda sunt*. Vera haec propositio erit, si reapse utrique subjecto attributum conveniat, sed uni plus, alteri minus. 4. *Inceptiva*, in qua initium asseritur alicujus rei; uti *Ordo Minorum incepit anno 1208*. 5. *Desitiva*, in qua asseritur alicujus rei finis; uti *scholae graecorum saeculo quarto aerae vulgaris desiere*. Veritas harum propositionum deducitur a veritate statuti initii, et finis. Inceptiva semper desitivam continet, et haec illam; quia qui e. g. dicit, in saeculo decimo quinto incepisse artem typographiae, simul asserit, illam non fuisse ante hoc saeculum.

132. *Propositio quoad qualitatem*, seu *formam* inspecta est *affirmans*, vel *negans*, prout sunt *judicia expressa* per ipsam. Sicut *judicium affirmativum* tantum est, si *subjective* consideretur, ita et *propositio*. Ceterum in *propositione affirmante* attributum minime habet sensum universalem, uti habet in *propositione negante*: ita in *affirmante* *justitia est virtus*; *virtus* ad *justitiam* coarctatur, et *propositio* aequivalet huic, *justitia est aliqua virtus*; in *negante*, *homo non est lapis*, *lapis* sumitur in tota sua *extensione*, et *propositio* est eadem ac ista, *homo non est ullus lapis*. Quare 1. *propositionis affirmantis* praedicatum semper signat ideam *particularem*, seu tantum *extensionem*, et totam *comprehensionem*, quae sunt in *subjecto*; 2. *propositionis negantis* praedicatum constanter exhibet ideam *universalem*, seu totam *ipsius extensionem*, et non totam *comprehensionem*, sed *complexum proprietatum simul acceptarum*. Vide *Storchenau* (Log. §. 104. 105.), et *Galluppi* (Lez. 46.). Quoad *qualitatem* considerata *propositio* dici potest etiam *infinita*, in qua *subjectum* ex una parte coarctatur, ex altera *infinitum* remanet, et hoc habetur cum *negatio* non *copulam*, sed *subjectum*, aut *attributum* afficit. Sic *anima est non mortalis*, aequivalet huic *propositioni*: *anima alio modo quocumque potest existere, sed non ut morti obnoxia*; nempe *anima est, vel potest esse in quocumque alio modo* (sicque *anima* remanet in *infinito modo*), *sed praeter modum, in quo morti est obnoxia* (sicque coarctatur). Ex quo patet, *propositionem infinitam* supponere *negantem*, sed tamen esse *affirmantem*, quia de *subjecto* asserit quodvis praeter id, quod *negatione* excluditur.

133. *Propositio quoad quantitatem* considerata respicit *subjecti extensionem*; ideoque est *singularis*, in qua *subjectum* est undique determinatum, et quidem aut per *nomen proprium*, uti *Cartesius fuit scepticus*, aut per *pronomen hic, iste, ille*, uti *hic homo est sapiens*; est *particularis*, in qua *subjectum* continens ideam *generalem* restringitur ad *partem aliquam* per *notas, aliqui, nonnulli*, uti *aliqui Principes Ecclesiam sunt persecuti*; est *universalis*, in qua *subjectum* sine ulla *restrictione* acceptum extenditur, quod per *voces omnis, nullus* exprimitur, uti *omnes sceptici sibi contradicunt*; est *indefinita*, in qua non sunt *quantitatis signa*, quae *subjecti ideam* determinent, uti *bruta non sunt pura puta automata*. *Propositio singularis* dici potest *universalis* eo tantum sub *respectu*, quod *subjectum, licet determinatum*, accipitur in tota *sui extensione*. *Universalis* *propositio* est

*metaphysice universalis*, si subjecto detur attributum, quod de omnibus omnino individuīs in subjecto contentis possit enunciari, uti *omnis homo est ratione praeditus*; et *moraliter universalis*, si non omnibus omnino individuīs tribui possit praedicatum, uti *omnes cantores rogati numquam inducunt animum cantare*. Hic recte jubent Logici, ut in legendis praesertim historicis, in quibus saepe universim omnibus tribuitur, quod tantum pluribus convenit, caveamus ne sine examine veluti *metaphysice* universalem intelligamus propositionem, quae est universaliter enunciata, neque proinde eam nimium urgeamus, neque demum ex ea propositiones indiscriminatim particulares deducamus. Propositio *indefinita* universalis erit, si praedicatum necessario subjecto conveniat; erit vero particularis, si conveniat contingenter. Hinc patet discrimen inter propositionem *indefinitam*, et *infinitam*; illa enim non habet adnexam notam quantitatis, haec vero habet particulam negantem ante subjectum, vel attributum; prima est: *homines sunt mendaces*; altera est: *Deus est non corporeus*.

134. Propositionum *oppositio* in eo reponitur, quod plures propositiones idem subjectum, idemque attributum habentes, inter se collatae, differant qualitate, vel quantitate, vel simul utraque. Hinc, quae differunt qualitate, seu una est negans, altera affirmans, dicuntur *contrariae*; uti *omnis homo est justus, nullus homo est justus*. Istae debent esse ambae universales, quia, si ambae sunt particulares, dicuntur *subcontrariae*, veluti *aliquis homo est justus, aliquis homo non est justus*. Quae autem differunt tantum quantitate dicuntur *subalternae*, uti *omnis homo est justus, aliquis homo est justus*. Quae demum differunt tum qualitate, tum quantitate dicuntur *contradictoriae*, uti *omnis homo est justus, aliquis homo non est justus*. Ad propositiones *contradictorias* reducuntur etiam duae singulares qualitate oppositae. Propositiones *contrariae* possunt esse ambae falsae, uti in supra allato exemplo, cum agitur de qualitatibus accidentalibus; aut una falsa, et altera vera, uti *omnis homo est ratione praeditus, nullus homo est ratione praeditus*, quia attributum est de qualitate essentiali; aut numquam ambae verae; modo attributum nullo pacto conveniat subjecto, quia in hoc casu possent esse ambae falsae, uti *omnis homo est animal volans, aliquis homo est animal volans*. *Subcontrariae* aut ambae verae sunt, si attributum qualitatem accidentalem exprimat, uti in exemplo supra allato; aut una

vera, et altera falsa, si praedicatum essentialem qualitatem exprimat, uti *aliquis homo est praeditus ratione*, *aliquis homo non est praeditus ratione*. Subalternae sunt semper aut una vera et altera falsa, uti in allato exemplo, quia de accidentali qualitate est attributum; aut ambae verae, si attributum essentialem qualitatem exprimat, uti: *omnis homo est ratione praeditus*, *aliquis homo est ratione praeditus*; sed numquam ambae falsae. *Contradictoriae* autem sunt semper una vera, altera falsa; uti constat ex exemplo supra posito.

135. De *conversione*, et *aequipollentia* hic loquuntur Logici. *Conversionem* in propositionibus vocant, cum subiecto attributum, et attributo subiectum *substituitur*, sed salva propositionis qualitate (§. 132.); ex. gr. homo est animal ratione praeditum: animal ratione praeditum est homo. Quoniam veritas laedenda non est hac *substitutione*; ideo *converti* nequeunt propositiones, in quibus, terminis *substitutis*, veritas illaesa non manet. Appellant vero *aequipollentiam*, si, iudicium aliquod exprimat diversis propositionibus eandem veritatem reddentibus; e. g. Titius iudicat: Titius est iudicans: Titius comparat ideas inter se: Titius percipit relationem suarum idearum, etc. Alii dicunt, *aequipollentiam* haberi, cum propositiones oppositae inter se conciliantur, atque ad eundem sensum reducuntur. Hoc vero fit, si particula *non* praefigatur alterutri subiecto, et copulae. Sic *aequipollentes* sunt: *omnis homo est ratione praeditus*: *nullus homo non est ratione praeditus*. Vide nostrum Fortunatum a Brixia (t. 1. Log. p. 2. sect. 5.). Haec innuisse sufficiat.

136. Apud Philosophos frequentissimus est usus aliquarum propositionum, quas explanare arbitramur. *Propositio* altera est *theoretica*, in qua solum subiecti, et attributi relatio notatur, uti *Deus est aeternus*; altera vero *practica*, in qua dicitur, aliquid esse faciendum, vel omittendum, uti *Deus est colendus*. Utraque vel ita manifeste patet, inspectis solis terminis, ut nulla indigeat demonstratione, et *indemonstrabilis* dicitur; aut demonstratione indigeat, ut intelligatur, et *demonstrabilis* nuncupatur. *Indemonstrabilis theoretica axioma*, *practica vero postulatam* dicitur; *demonstrabilis theoretica* dicitur *theoremata*, *practica vero problema*. *Lemma* est propositio, quae desumitur ex alio doctrinae capite, quaeque inservit ad demonstrandam veritatem, de qua disputatur; sic ex. gr. est lemma, si primum demonstrarem materiae non posse convenire cogitationem, ut dein animae spiritualitatem ostendam. *Corollarium* est propositio, quae

eruitur ex data definitione, vel facta demonstratione. *Scholium* est propositio, in qua clarius evolvitur, et explicatur proposita disputatio. *Hypothesis* est propositio, in qua, quia demonstratione non indigere creditur, uti vera supponitur, ac praemissa inservit probandae alteri propositioni, quae *thesis* appellatur. Quare axiomata, postulata, hypotheses non demonstrantur, sed interdum declarari debent.

## ARTICULUS SECUNDUS

### DE DEFINITIONE, ET DIVISIONE

137. Saepe contingit, ut alicujus rei, vel nominis sensum determinare oporteat, atque discrimen notare, quod inter illam rem, vel nomen, et cetera intercedit. Oratio illa, in qua explicatur, quod obscurum est, vocatur *definitio*. Haec *nominalis* est, si nominis alicujus sensum manifestet; *realis*, si rei naturam aperiat. Definitio nominis est haec: *nomine animae intelligo principium, quod in nobis cogitat*; realis definitio haec altera: *anima humana est substantia simplex, et ratione praedita*. Definitio *nominalis* arbitraria est, quia verba cum rebus nullam habent necessariam connexionem, atque ab *etymologia* distinguitur, quae est tantum *origo nominis*. Definitio *realis* saepe ad nominalem reducitur, quia nobis impervia est rerum essentia. Saepe etiam *nominalis* transit in *realem*, cum nominis explicatio simul rei naturam asserit, uti in hoc exemplo: *trianguli nomine intelligitur figura trium angulorum, triumque laterum*.

138. Definitio, in qua rei attributa notantur, *simplex definitio* dicitur; sed *descriptiva*, aut *descriptio* vocatur, si in ipsa etiam accidentaliter evolvantur. Haec utuntur Oratores, Poetae, Naturalistae; illa vero Philosophi. *Descripsit* hominem Cicero, qui eum vocavit *animal providum, sagax, multiplex, acutum, memor, plenum rationis, et consilii*. *Definiunt*, qui hominem dicunt *animal ratione praeditum*. Definitiones, et descriptiones inventae sunt, 1. quia non semper praesto sunt vocabula analogica ad aliquid significandum; 2. quia res definitione, vel descriptione clarius evadit; 3. quia res videtur elegantior sic expressa.

139. Definitione primus scientiarum gradus acquiritur, atque lites, quae ex multiplici praesertim vocabulorum usu enascuntur in scholis, e medio tolluntur. Ad haec obtinenda



ob oculos ista habeantur; 1. nulla definitione declaranda sunt, quae sunt per se evidentia, ne obscura reddantur; 2. voces adhibendae sunt, quae audienti, aut legenti sunt perspectae, atque definiendae eae, quae aequivocum, inusitatum, aut improprium sensum habent; 3. definitio facienda est per genus proximum, et propriam differentiam (§. 98.); 4. ac proinde vox, quae definitur, ingredi non debet definitionem; 5. definitio vitiosa est dicenda, quae latior, aut brevior est ipso definito, cum quo converti debet (§. 135.); 6. definitio facienda non est verbis negativis, quia negatio, quid res non sit, non quid sit, exprimit. Sed haec regula exceptionem patitur, cum ex rei alicujus negatione alterius rei sequitur affirmatio; uti *simplex est, quod non componitur partibus*. (1).

140. Totius in suas partes distributio dicitur *divisio*, quae *physica* est, si *divisum* sit reale physicum, ejusque partes reali gaudeant existentia; *logica* vero, si *divisum* non sit quid physicum extra mentem positum. Corpus *physice* dividimus in partes, quibus constat; *logice* dividimus genus in suas species. *Divisio logica* est 1. *essentialis*, si partes rei essentiam constituentes cogitatione considerentur separatae a parte rei; 2. *accidentalis*, si partes ad rei essentiam non pertineant; 3. *generica*, si genus in suas species dispescatur; 4. *specifica*, si species in varias suas distrahatur categorias.

141. Principales divisi partes possunt et ipsae dividi, et tunc habetur *subdivisio*, veluti si corpus humanum dividam in caput, brachia, pedes. . . , et postea caput denuo dividam in cerebrum, oculos, aures. . .

142. Haec circa divisionem prae oculis tenenda sunt; 1. ut divisio adhibeatur, quoties necessaria sit, ut clarae efficiantur ideae compositae, et complexae, aut alia hujusmodi perspicua reddantur; 2. ut divisio totum contineat, nempe omnes partes ingredientibus totum recenseantur; 3. ut una divisi pars alteram non complectatur, neque pars numeretur, quae in diviso non est; 4. ideoque divisio brevis sit, quantum rei ratio postulat.

(1) Quoniam definire est ideam pluribus verbis exprimere; ideo idea simplex (§. 104.) nequit definiri, quia plura in ipsa non discernimus.

## CAPUT QUINTUM

## DE RATIOCINIO

143. Non omnia primo intuitu (§. 92.), nec semper rei attributum prima fronte mens humana conspicit (§. 122.). Tunc ad ideas claras, quas acquisiverit, cupida confugit, earumque unam seligens, ipsam comparat cum illis, quarum relationem nondum perspectam habet, atque ex convenientia, vel pugna assumptae ideae cum istis deducit, has inter se convenire, vel pugnare. Haec mentis operatio vocatur *ratiocinium* (§. 91.); quod proinde est illa mentis actio, qua, cognita prius relatione duarum idearum cum tertia jam assumpta, deinde convenientiam, vel pugnam deducit: seu qua ex duobus notis tertium nondum notum eruit iudicium. Utrum anima humana sit spiritualis, ignoro. Tertiam ideam mihi notam, quae cum idea *animae*, et *spiritualis* nexum habet, assumam, nempe ideam *substantiae cogitantis*. Ratiocinium conficio: *substantia cogitans est spiritualis; sed anima est substantia cogitans; ergo anima est spiritualis*. In hoc ratiocinio ultimum iudicium continetur in primo, et secundum declarat, ultimum in primo contineri. Sed potest secundum poni in loco primi, et primus in loco secundi, dicendo: *anima est substantia cogitans; sed substantia cogitans est spiritualis; ergo anima est spiritualis*. In quo ratiocinio servatur *inventionis* ordo; cum, examinato subjecto, *invenitur* aliqua proprietas, cuius ope ignoratam reperimus. Porro in primo casu ratiocinium dicitur *demonstrativum*, quia, admissa veritate propositionis universalis, nequit particularis propositionis veritas negari; in secundo casu ratiocinium dicitur *inventivum*, quia in secundo iudicio novum *invenitur* attributum, et in tertio subjecto tribuitur praedicatum hoc, antea ignotum.

144. Ex quo sequitur, tres ideas requiri in ratiocinio; duas scilicet, quarum relatio quaeritur, et tertiam in subsidium assumptam, quae *media* vocatur. Ista *media* idea modo cum una, modo cum altera e duabus comparatur, et sic duo efformantur iudicia (§. 122.), ex quibus tertium eruitur, continens convenientiam, vel pugnam duarum idearum, quarum relatio ignorabatur. Duo priora iudicia *antecedens*, tertium vocatur *consequens*, et *consequentia* dicitur conse-

quentis cum antecedente connexio (1). Tria judicia *materia*, *consequentia* vero ratiocinii *forma* nuncupatur. Quapropter ut ratiocinium recte concludat, necesse est, ut *consequens* in antecedente continentur, atque illius veritas a veritate istius sequatur, uti videre est in exemplo (§. 143.) allato. Quare vitio laborat ratiocinium, si in *materia*, vel in *forma* peccet. Hinc fieri potest, ut *consequens* sit verum, licet non sequatur ab antecedente, quia deest *forma*. Sic ex. gr. *omne vivens est substantia*; atqui *anima est substantia*; ergo *anima est vivens*, quod *consequens* est verum, sed non ideo vivens est anima, quia substantia. Potest etiam fieri, ut *consequens* falsum sit, licet descendat nexu inviolabili ab antecedente, quia tunc deest veritas in *materia*. Sic ex. gr. *bonum est amandum*; sed *ebrietas est aliquid bonum*, ergo *ebrietas est amanda*, in quo ratiocinio secundum iudicium falsum est. Quamobrem ex vero antecedente falsum *consequens*, atque verum *consequens* ex falso antecedente legitime erui nequit.

145. Sicut in iudicio (§. 123.), ita in ratiocinio consensus, vel dissensus habet locum, cognita duarum idearum relatione, adiutorio tertiae (§. 144.). Hoc ratiocinium dicitur etiam iudicium discursivum (§. 86.), et quidem *deductivum*, si a generalibus ad particulare mens descendat, *inductivum* vero, si ascendat a particulari ad universale. Quae verba respondent supra allatis (§. 143.), quibus duplex ratiocinium descripsimus *demonstrativum*, et *inventivum*.

146. Cum mens humana duas ideas cum tertia comparat, unum e tribus fieri potest. Nam aut deducit inter se convenire, cognita utriusque ideae cum tertia convenientia; vel discrepare, cognita unius ex illis cum tertia discrepantia; vel nihil deducit, quia neutram cum tertia convenireprehendit. Primum illud nititur axioma: *quae conveniunt uni tertio, conveniunt inter se*. Secundum axioma: *ea, quorum unum cum tertio convenit, alterum non convenit, inter se non conveniunt*. Tertium axioma: *ea, quorum neutrum cum tertio convenit, inter se convenire, vel non convenire, perspicuum non est*.

147. Sicut judicia (§. 124.), ita et ratiocinia varia sortiuntur nomina, nempe *pura* et *a priori*, *empirica* et *a*

(1) Quapropter *consequens* differt a *consequentia*; illud enim est tertium iudicium ratiocinii, haec vero est *nexus* tertii iudicii cum duobus praecedentibus, qui *nexus* est quiddam intelligibile, quod mente concipi, non verbis exprimi potest.

*posteriori*, prout illis *puris*, vel *empiricis* *judiciis* coalescunt. Sed quoniam in ratiocinio unum *judicium* potest esse *purum*, alterum vero *empiricum*; ideo ratiocinium *mixtum* dari potest; sic e. g. *quae conveniunt uni tertio, conveniunt inter se; sed ens A. et ens B. conveniunt cum ente C; ergo ens A. et ens B. conveniunt inter se*; primum *judicium* est *purum*, secundum vero *nixum* *experientiae* *empiricum*. Item datur ratiocinium *simplex*, vel *compositum*, de quibus in sequenti capite disseremus.

148. Jam vidimus (§. 144.), ideam mediam adhiberi in ratiocinio. Sed haec idea undenam eruenda est? Duae sunt regulae, aut enim a subjecti idea, sed ad speciem perlatis, si individuum sit, vel ad genus, si speciem contineat, deducitur, aut ex attributi definitione. Primo casu, tribuitur subjecto, quod de specie, vel de genere asseritur; secundo vero praedicatur de subjecto, quod in definitione attributi continetur. Sic ex. gr. cum dico: *aer est corpus; sed corpus est grave*; ergo *aer est gravis*; ideam subjecti *aer* ad ideam generis, *corpus* eveho; cum vero dico: *quod premit corpora inferiora, est grave*; sed *aer premit corpora inferiora*; ergo *est gravis*, attributum *gravis*, definitio. Ratio primae regulae ex eo eruitur, quod individuum in specie, et species in genere contineantur, atque individuo tribuatur, quod speciei, et speciei, quod generi convenit (§. 101. n. 3.). Ratio secundae regulae patet ex eo, quod definitio cum definito converti debeat, ut recta sit (§. 139. n. 5.).

## CAPUT SEXTUM

### DE ARGUMENTATIONE

149. Sicut *judicium* verbis expressum dicitur *propositio* (§. 126.); ita ratiocinium, ut tale praecise sumptum (§. 143.), verbis prolatum, *sylogismus* nuncupatur. Quare in *sylogismo* quoque, uti in ratiocinio, reperiuntur *antecedens*, *consequens*, et *consequentia* (§. 144.). Tres ideae ratiocinii (§. 144.) in *sylogismo termini* vocantur, et quidem *major*, qui continet ideam attributi, *minor*, qui refert ideam subjecti (§. 123.), *medius*, qui ideam mediam (§. 144.) asserit. Terminus minor *extremum minus*, terminus major *extremum majus* nuncupatur in *sylogismo*. Verum non uno *sylogismo* ratiocinium proponi potest; sed aliis etiam formis, quae sub *argumenta-*

*tionis* nomine comprehenduntur. Quare, ut ordine hac in re procedamus, de singulis disseremus speciebus *argumentationis*, quae est modus connectendi propositiones ad veritatem consequendam aptus. Hae species sunt, ipse syllogismus, enthymema, epicherema, dilemma, sorites, exemplum, inductio, analogia.

150. *Syllogismus* itaque est argumentatio, quae constat tribus terminis, et tribus propositionibus ita connexis, ut a duabus primis tertia eruatur (§§. 144. 149.). Propositio continens praedicatum dicitur *major*, quae continet subjectum, *minor* vocatur, ambae *praemissae* appellantur, tertia vero dicitur *consequens*. Sic ex. gr. *omnis virtus est amanda; sed temperantia est virtus; ergo temperantia est amanda*. Syllogismus dicitur *simplex*, si simplicibus propositionibus construatur; *compositus*, si saltem earum una sit composita (§. 128).

151. Regulae observandae in syllogismo, ut recte procedat, sunt octo. Prima regula est: *terminus esto triplex; major, mediusque, minorque*. Nempe in syllogismo tres termini esse debent (§. 149.), ideoque vitiosus est syllogismus, in quo quatuor irrepserint termini, sive hoc expresse fiat, sive aliquis terminus duplicem sensum referat. Quatuor termini sunt in hoc syllogismo: *brutum est sensitivum; sed planta est vegetans; ergo planta est sensitiva*. Duplicem sensum continet vocabulum *taurus* in hoc altero: *quoddam animal est taurus; sed taurus est signum zodiaci; ergo quoddam animal est signum zodiaci*.

152. Secunda regula est: *nequaquam medium capiat conclusio oportet*. Hoc est, conclusionem non debet ingredi *medius terminus*, quia istius officium est, ut ejus ope extremorum relatio in praemissis dignoscatur. (§. 149), quae relatio in consequenti exprimitur. Vitio non caret proinde iste syllogismus: *omne corpus est grave; atqui lapis est corpus; ergo corpus est lapis*.

153. Tertia regula est: *aut semel, aut iterum medius generaliter esto*. Scilicet, medius terminus saltem semel in praemissis ideam universalem debet praeseferre; si enim bis particulariter sumeretur, duplicem sensum haberet, et ita quatuor termini forent (§. 151.). Vitium proinde latet in hoc syllogismo: *omnis arbor est substantia; sed homo est substantia; ergo homo est arbor*; quia *substantia* ad particularem ideam *hominis*, et *arboris* coarctatur. Ast quoniam idea singularis, accepta sine ulla restrictione, universali ae-

quivalet (§. 133.); ideo terminus medius bis singulari sensu accipi potest.

154. Quarta regula est: *quantum praemissae, referat conclusio tantum*. Si enim consequens in antecedenti contineri debet (§. 144); ideo latius patere nequit, quam est in praemissis. Sic non recte procedit iste: *Iudas Christum tradidit; sed Iudas fuit apostolus; ergo apostoli Christum tradiderunt*.

155. Quinta regula est: *ambae affirmantes nequeunt generare negantem*. Cum duae praemissae affirmantes sunt, continent relationem convenientiae subjecti, et attributi cum medio termino. Ergo consequens debet hanc convenientiam exprimere inter subjectum, et attributum (§. 144.), ideoque et ipsum affirmans sit oportet.

156. Sexta regula est: *Utraque si praemissa neget, nihil inde sequetur*. Nam, cum neutrum extremum convenit cum medio termino, non percipitur relatio convenientiae vel discrepantiae inter se (§. 146.). Sic in syllogismo: *Turcae non sunt Christiani; sed Itali non sunt Turcae; ergo Itali ...* nequit dici *sunt*, neque *non sunt christiani*.

157. Septima regula est: *Pejorem sequitur semper conclusio partem*. Idest in syllogismo, particularis relate ad universalem, et negans relate ad affirmantem, pejor, aut debiliior dicitur. Porro conclusio debet esse *particularis*, si alterutra praemissa fuit *particularis*, secus latius pateret conclusio, quam praemissae (§. 154.); debet esse *negans*, si alterutra praemissa *negans* fuit; quia tunc alterutrum extremum a medio termino discrepat (§. 146. ax. 2.).

158. Octava regula est: *Nil sequitur geminis ex particularibus unquam*. Nam istae particulares praemissae sunt aut ambae affirmantes, et syllogismus peccat contra tertiam regulam (§. 153.); aut ambae negantes, et peccat contra reg. sextam (§. 156.), aut una negans, et altera affirmans, et tunc syllogismus, si est illatio affirmans, peccat contra reg. septimam (§. 157.); si vero illatio est negans, syllogismus peccat contra reg. quartam (§. 154.), cum in conclusione negativa attributum sit universale (§. 132.). Ceterum istae regulae ad hanc unam reducuntur, ut nempe consequens in antecedenti contineatur, et ab ipso rite descendat (§. 144.). (1).

(1) Contra syllogismum, regulasque hic positas plura evomuerunt Raimundus Lullus, Platonici saeculi decimi quinti, Laurentius Valla, Rodolphus Agricola, Baco, Cartesius, Lockius, Condillachus, Tracivius, Bouchez, alique plures, qui dicunt, syllogismum ostendere veritates cognitatas, sed non dete-

159. Syllogismus compositus (§. 150.) est *copulativus*, si unam saltem ex praemissis habeat propositionem copulativam (§. 130.), et negantem. Ut recte construatur, 1. debent membra copulata esse vera, alioquin falsum foret consequens; 2. ita opposita, ut, uno posito, alia tollantur; 3. contenta in una ex praemissis, cum in altera debeat unum membrum affirmari, in conclusione vero cetera negari. Sic: *nemo potest simul dormire, et studere; sed tu dormis; ergo non studes.*

160. Syllogismus *disjunctivus* disjunctivam continet propositionem (§. 130 n. 2.). Ut recte concludat, debent membra opposita, et adaequate divisa esse ita disposita, ut, uno affirmato, cetera negentur, et vicissim. Sic ex. gr. non sunt opposita membra istius syllogismi: *Petrus aut pius, aut sapiens est, sed non est pius, ergo est sapiens*, potest enim esse destitutus pietate, et sapientia.

161. Syllogismus *conditionalis* est ille, in quo propositio major sub conditione aliquid enunciat (§. 130. 3.). Ut recte procedat, oportet, ut affirmetur, vel negetur *conditio-natum* in consequenti, si *conditio* affirmata, vel negata sit in antecedenti; et hoc valet, cum *conditio* est vera ratio, cur verum sit *conditionatum*. En exemplum: *Si quis plurimum dilexerit Deum, multa peccata remittuntur ei; sed Petrus plurimum dilexit Deum; ergo multa peccata remittuntur ei.*

162. *Causalis* syllogismus habet causalem propositionem (§. 130. 4.). Necesse est, ut allata causa sit vera ratio, cur tale attributum subjecto conveniat, vel non, ut probe procedat syllogismus. Quare male quis diceret: *Angelus est immortalis, quia citissime de uno in alium locum transcurrit; sed avis etiam citissime hoc peragit; ergo avis est immortalis*; nam ratio immortalitatis potius a spiritualitate deducitur (1).

163. Ad syllogismum refertur polysyllogismus, qui est plurium syllogismorum ita connexorum series, ut conse-

gere novas veritates. Verum syllogismum, ejusque regulas defenderunt, promoveruntque in Gallia Marmontel, Iosephus De Maistre, Cousinus, Saint-Hilaire; in Germania Leibnitius, Wolffius, Kanius; in Scotia William-Hamilton; in Italia nostra praeter Genuensem syllogismum sunt tuiti Galluppi, Ventura, Mamianus a Rovere, Romagnosi, Rosminius, alique viventes doctissimi philosophi.

(1) Nihil hic moramur de *figuris*, et *modis* syllogismorum, de quibus ad revim usque scholastici disputarunt. Vide-sis inter alios Galluppi. (Lex. 49. ad 53.)

quens primi sit major secundi, et ita deinceps. Regitur legibus syllogismi.

164. Syllogismum *methymema* sequitur, quod est argumentatio, in qua alterutra praemissa reticetur, quia facilis intellectu. Quare regitur legibus syllogismi. En exemplum: *bonum est amandum; ergo Deus amandus est; praetermissa minore. sed Deus est bonus.*

165. Si vero alterutri, vel utrique praemissae probatio addatur, syllogismus *epichierema* dicitur; uti: *qui vitiis indulget, nequit in scientiis proficere: quia in vanis, et noxiis tempus terit, et ad plura distrahitur; sed tu vitiis indulges: nam ludis, et vino das operam: ergo tu in scientiis non potes proficere.* Ratio addita vera sit oportet, ut haec recte procedat argumentatio.

166. *Sorites* est complexus propositionum, quae inter se ita colligantur, ut primae propositionis praedicatum sit subjectum secundae, et ita deinceps, donec subjectum primae, et praedicatum ultimae conclusionem constituant. Sic ex. gr. *anima cogitat; quod cogitat, est simplex; quod simplex est, partibus caret; quod partibus caret, in partes resolvi nequit; quod in partes resolvi nequit, est incorruptibile; ergo anima est incorruptibilis.* Sorites in tot syllogismos resolvi potest, quot sunt propositiones, duabus demptis. Ut recte concludat, opus est: 1.<sup>o</sup> ut nulla propositio sit falsa, vel dubia, alioquin talis erit conclusio; 2.<sup>o</sup> ut prae oculis habeantur regulae jam allatae (§. 151. ad 158.)

167. *Dilemma* est argumentatio, in qua disjunctivae propositionis membra ita disponuntur, ut, quodcumque eligat adversarius, semper aliquid contra ipsum in conclusione reperiat. Hujusmodi est illud, quo contra suum percussorem usus est Christus: *aut bene, aut male locutus sum; si male locutus sum, testimonium perhibe de malo; si autem bene, quid me caedis?* Ut vis argumenti non eludatur, oportet, 1.<sup>o</sup> ut medium nullum intersit inter membra disjunctivae propositionis, ita ut alterutrum concedere debeat adversarius; 2.<sup>o</sup> ut legitime sequatur conclusio ex membro concessio ab adversario; 3.<sup>o</sup> ut ab adversario in argumentantem retorqueri non possit.

168. *Exemplum* est argumentatio, in qua ex uno aliquo facto aliquid simile infertur. Sic ex. gr. *Si Magdalena salva facta est, quia Deum dilexit multum, et tu salvus eris, si multum Deum diliges.* Hac argumentatione utuntur praecipue oratores.



169. *Inductio* est argumentatio, in qua ex partium singularium accurata enumeratione universalis eruitur conclusio. Quare in ipsa mens nostra procedit a singularibus ad universale. Inductio erit *completa*, si omnia, quae sub idea universali deducenda continentur, recenseantur; *incompleta*, si dumtaxat aliqua. Illa ad probandum maximum robur habet (1); ista vero, si in necessariis, non in contingentibus adhibeatur (2). Sic non est necesse, ut omnes homines enumerem, ut concludam, *omnes homines ratione donari*, quia ratio necessario homini competit; ast, ut deducerem, *omnes alicujus societatis esse doctos*, enumerandi mihi forent, quia doctrina contingenter homini inhaeret.

170. *Analogia* est argumentatio, qua ex similibus effectibus similes causae, et ex similibus apparentiis similis natura deducitur. Videtur analogia quaedam inductio, quia idem singulis praedicatum tribuitur ex eo, quod similitudo in individuis conspiciatur (3).

(1) Licet enim nullam novam cognitionem nobis suppeditet *completa* inductio, utpote quae supponit satis probata singula, quae continentur sub idea universali; tamen ad scientiarum profectum mirifice confert ob unitatem quam tribuit singulis ideis, vel factis, et ob illationes inde deducendas. Sic, examinato, et reperto opaco quovis planeta, sole excepto, recte deducis, a sole omnes planetas lucem recipere.

(2) Imo aliquando ex uno facto consequentiam universalem inferimus. Sic puer, qui semel ob adustionem a candelae flamma dolorem expertus est, non amplius ad flammam digitum admovet, tribuens urendi proprietatem cuilibet flammæ.

(3) Videtur mens nostra sponte tendere ad deducendum universale a singularibus. Ipsa enim ex eo, quod observaverit, qualitatem aliquam alicui convenire objecto jam examinato, objectis similibus non observatis eam convenire deducit, nixa principiis *objecta similia similes habent qualitates*. Insuper ex eo, quod datas causas in positis circumstantiis observaverit datos gignere effectus, colligit naturas productiones, et mutationes, insulsa principii: *causae similes produciunt similes effectus, et e converso*. His porro principiis nititur *analogia*, nititur et *inductio*. Hinc patet, perperam Humium (§. 55) docere, nos non posse futurum ex praeterito umquam colligere, quasi natura in suo cursu non foret constans. Vide Galluppi (*Lett. Filos. lett.* 8.). Neque recte Paulus Costa (*Modo di comporre le Idee c. 3o.*), alique putarunt, inductionem tantum probabilitatis pondus habere, si sit incompleta; quia cum agatur de necessariis, et essentialibus, valorem certitudinis habet, uti patet ex exemplo allato (§. 169.), aliisque. Vide Melillo (*Log. Empirica c. 4. a. 1.*)

## CAPUT SEPTIMUM

## DE DEMONSTRATIONE

171. Est munus demonstrationis clarum, evidensque efficere, quod tenebris obvolvitur, ideoque probe deducere veritatem ignotam ex aliis indubiis. Quare *demonstratio* definiri potest *series propositionum inter se ita connexarum, ut ab notis ignota descendant tum ad veritatem assequendam, tum ad illam aliis suadendam.*

172. Demonstratio est *directa*, sive *ostensiva*, si innitatur principiis intrinsecis veritati demonstrandae, uti est illa, in qua Dei existentia a rerum contingentia educitur; et *indirecta*, seu *apogogica*, si ostendatur, sententiam nostrae oppositam ad absurda perducere, ut inde veritas intelligatur nostrae assertionis, uti si ex eo eruam Dei existentiam, quod in atheorum opinione causa foret sui causa, et effectus, atque effectus sine causa existeret, quae certe absurda sunt. Demonstratio *directa* assensum extorquendo docet; *indirecta* assensum extorquet, quin doceat (1). Insuper demonstratio est *a priori*, si a causa ad effectum, vel a rei natura ad ejus essentialia mens nostra procedat, uti si ex solis existentia illam lucis deducat; et *a posteriori* si ab effectibus ad causas mens nostra ascendat, veluti si a suis operationibus ad sui naturam introspectendam proficiscatur. Verum omnis demonstratio *a priori* dicenda est, non in *se*, sed *cognitione*, quia semper incipitur a notioribus.

173. Ad recte efformandam demonstrationem requiruntur; 1.<sup>o</sup> ut principia praestituta sint adeo vera et evidentialia, ut ipsi admittant adversarii; 2.<sup>o</sup> ut strictim, et legitime ex principiis immediatae eruantur conclusiones, et ab istis aliae, et sic deinceps. Ceterum leges observandae in demonstratione evolventur, ubi de methodo agemus.

(1) Quare praeferenda est demonstratio *directa*, ejus vi anima meditante in quiete manet, tutaque redditur ex cognitione veritatis deductae ex certis principiis. *Indirecta* e contra attrahit consensum, quin persuadeat. *Directa* tota fulcitur axioma, *consequens in antecedenti contineri*, cum veritas deducta sit consequens respectu principiorum praemissorum; *indirecta* autem axioma, *ex vero antecedenti non posse falsum consequens sequi.*

## CAPUT OCTAVUM

## DE SOPHISMATIBUS

174. Regulae syllogismi eo tendunt, ut veritas aperiat. Quare si spernantur, errorem pro veritate amplectimur, aliosque fallimus. Iam vero argumentatio illa, quae ad praescriptos canones non est disposita, vocatur *sophisma*, accepto vocabulo a *sophistis*, qui ad incautos decipiendos fallacem dicendi rationem usurpabant (§. 22.).

175. Sophisma aut in verbis, aut in sententiis est. In verbis est; 1.<sup>o</sup> *aequivocatio*, si idem vocabulum modo in uno, modo in altero sensu adhibeatur, uti vocabulum *populus*, quod arborem, et hominum multitudinem designat; 2.<sup>o</sup> *amphibologia*, si vocabula sint ita disposita, ut dubius, et incertus sit sensus, uti illud delphicum oraculum: *ajo te Aecida Romanos vincere posse*; 3.<sup>o</sup> *fallacia plurium interrogationum*, si plura postulentur, quibus una responsione nequit satisfieri; uti, si quis iudex interroget reuma solusne, vel cum aliis, nocte, an die crimen patnaverit, unica responsione reus certe nequit satisfacere; 4.<sup>o</sup> *a sensu composito ad sensum divisum*, si nempe in conclusione praedicatum, quod convenit subjecto affecto aliqua proprietate, tribuatur ipsi subjecto, etiam illa proprietate remota; uti si quis ex eo, quod caecus non videat, dum caecus est, deducet neque visurum, remota caecitate (§. 120.); 5.<sup>o</sup> *a sensu diviso ad compositum*, exprimit sensum contrarium antecedenti sophismati, uti si quis diceret, avaros non visuros regnum coelorum etiam poenitentia ductos, quia, dum avari sunt, regnum coelorum non videbunt; 6.<sup>o</sup> *a sensu colectivo, ad distributivum*, si nempe, quod toti collectioni tribuitur in antecedenti, tribuatur seorsim sumptis singulis in consequenti; 7.<sup>o</sup> *a sensu distributivo ad collectivum*, si, quod asseritur de singulis seorsim sumptis, de tota asseratur collectione; sed sophisma non foret, si de iis agatur, quae ab essentia dimanant; quia tunc rectum est argumentum *a distributivo ad collectivum*, essentia enim non pendet a collectione.

176. Sophisma est in sententiis; 1.<sup>o</sup> *ignorantia elenchi*, si quis nempe probaret, vel reprobaret aliud ab eo, de quo disputatur, uti faciebant Cartesiani, qui attractionem Newto-

nianam reprobabant, quasi haec sympatiā aristotelicā in vitam revocaret; 2.<sup>o</sup> *petitio principii*, si nempe quis veritatem probaret ex eo ipso, quod in quaestione versatur, uti si probaret animae immortalitatem ex eo, quod nequeat interire; 3.<sup>o</sup> *circulus vitiosus*, si ex duobus aequē dubiis unum per alterum, et hoc per illud probaretur, uti si quis vacuum negaret, quia ubique est materia diffusa, et materiam ubique diffusam diceret, quia nullum est vacuum; 4.<sup>o</sup> *non causa pro causa*, si nempe non vera ratio afferatur, cur subjecto tribuatur, vel negetur praedicatum, uti si quis Religionem Christi probrosam assereret ex eo, quod praetextu ipsius multae caedes factae sint, quasi nempe earum causa fuisset; 5.<sup>o</sup> *falsum suppositum*, si, quod falsum, vel saltem dubium est, tamquam verum assumatur; 6.<sup>o</sup> *fallacia accidentis*, si subjecto *necessario* tribuatur, quod illi per accidens convenit (§. 120.)

177. Ast sophisma etiam vocatur argumentatio *ad verendum*, qua utitur, qui rationibus destitutus auctoritatem laudat viri, cui adversarius nescit contradicere; *ad ignorantiam*, qua quis ad rejiciendam suam opinionem adigitur, et ad amplectendam nostram, eo quod ipsi pro sua desint rationes; *ad hominem*, si nempe quis ex adversarii principii ali- quid contra ipsum erueret.

## SECTIO II.

### DE METHODO

178. Hucusque de tribus mentis operationibus loquuti sumus, de perceptione, de iudicio, de ratiocinio, ac de modo etiam disseruimus, quo nostras ideas, iudicia, ratiocinia aliis patefacimus. Sed hoc non satis. Necesse est insuper, ut ordine procedamus tum in adhibendis mentis operationibus, tum in connectendis terminis, propositionibus, argumentationibus, ut rite veritatem assequamur, inventam vero aliis manifestemus. Jam vero ars illa, in qua regulae traduntur, quibus probe disponuntur nostrae ideae, nostraque iudicia tum in inveniēda, tum in detegēda aliis veritate inventa, *methodus* appellatur (1). Methodus itaque in demonstratione con-

(1) Aliqui definiētes *methodum* assumptionem principiorum, ordinemque, quo alicujus scientiae veritates evolvuntur, dicunt, *methodum esse iniciativam*, quae principia subministrat, et *progressivam*, quae modum pro-

sistit (§. 174), atque Logicam ratiocinantem, et sermocinantem respicit. Triplex *methodus* distinguitur, *analytica*, *synthetica*, *scientifica*.

179. Mens humana *analytica* utens *methodo*, rem, veluti totum, in principio respicit, dein in suas dividit partes, hasque in alias minimas veluti frangit, quas explorat, expendit, scrutatur, ut dein, quid totum illud sit, concludat. Quare *analytice* aliquid ostendimus, si a singulari ad universale, a composito ad simplicia, ab effectibus ad causam, a toto ad partes pedetentim gradum faciamus. Quapropter, qui hac utitur *methodo*, advertat primum, utrum res, in quam inquirat, composita sit, an simplex; dein iudicium efformet, cuius veritas sit perspecta, quodque sit toti inquisitioni fundamentum; postea ex hoc iudicio proximas deducat conclusiones, et ex istis alias et alias, usque dum veritatem, quam scrutatus est, conspiciat. Sic *analytice* procedimus in hac nostra philosophia, in qua a primis et notioribus animae operationibus, ab istis ad operationes magis complexas, ab his ad animae facultates, ab istis vero ad animae naturam, ortum, durationem, etc., ascendimus. Haec *methodus* dicitur etiam inventionis, quasi nempe ad veritatem inveniendam sit aptior. *Abstractione* praecipue ipsa procedit (§. 103.)

180. E converso operatur mens nostra in *methodo synthetica*; cum a partibus ad totum, ab universali ad singularia, a simplicibus ad compositum, a causa ad effectus procedat. Qui hanc adhibet *methodum*, demonstrationem ingreditur a definitionibus, et divisionibus rerum tractandarum, ab his ad quaestionis statum descendit, deinde ad notiores veritates contendit, hasque disponit meliori, quo credit, modo. *Synthetice* procedunt in philosophia, qui, praemissa animae definitione, ad ejus descendunt facultates, deinde ad operationes, etc. Haec *methodus compositionis* dicitur, quasi nempe per ipsam ens componeretur. *Compositione* proinde graditur (§. 103.) (1).

cessuum facultatis cognoscendi evoluit; atque *initiativam* dividunt in *rationalem*, si principia ratione naturali nitantur, uti sunt Geometriae axiomata; et in *empiricam*, si sensuum testimonio fulciantur, uti est existentia naturae tractatae pro Physicis.

(1) Solet comparari *methodus analytica* viae, quam aliquis arripit a valle ad montis cacumen; *synthetica* vero viae, quam quis persequitur a montis cacumine ad vallem: item *genealogiae*, quae incipiens ab aliquo ascendit ad avos, comparatur *analytica*; *genealogiae* autem, quae ab avibus ad aliquem descendit, *synthetica*.

181. Condillachus docuit, analitica tantum methodo procedendum esse tum in inquirenda, tum in manifestanda aliis veritate. Analysim saltem in veritatis inquisitione adhibendam esse, putant omnes, qui a conscientiae factis discedentes, nullamque ideam ingentam in anima admittentes, in sui investigationibus a sensibus, et experientia externa incipiunt, ac proficiscuntur, dicti proinde *empirici*, et *experimentales*. Verum *synthesi* utuntur, qui ab *ente absoluto*, ab *ego deificato*, aut ab *universali idea* incipiunt inquisitiones suas, atque omnes repetunt cognitiones. *Synthesim* proinde adhibuerunt Plato, Malebranchius, Neo-Platonici, Rosminius, Gioberti, recentioresque fere omnes Germani philosophi. *Syntesim* quoque veluti aptiorem in manifestanda aliis veritate plurimi amplectuntur. Nam, docent ipsi, tirones, quorum imbecillis mens est, magis definitiones, quae ideas continent universales, quam idearum congeriem objectum determinatum exhibentium capiunt, atque comprehendunt. In analysi, pergunt ipsi, ditissima veluti rerum fodina aperitur, seges idearum latissima, series propositionum, quarum una ab alia deducitur, quae omnia. haud attingere, multo minus memoria tenere valet juvenilis aetas. Demum concludunt, quomodo haberi potest analysis perfecta, quae profecto est necessaria in rebus philosophicis (§. 169.)? Verum non desunt, qui putant alteram ab altera methodo minime sejungi, atque amice conspirare. Siquidem philosophus analyticus a singularibus ad universalia procedens, in fine componit, et syntheticus evadit; syntheticus vero philosophus ab universalibus ad singularia descendens, in scrutandis singularibus divisione utitur, atque fit analyticus. Inductio praecedat analyticam, sequitur syntheticam demonstrationem. Quare quaevis methodus est *analytico-syntheticum* (1).

182. Ceterum quaecumque eligatur methodus, necesse est, 1. ut perspicue, nullisque ambagibus aperiatur quæstionis sensus; 2. ut dein definitiones, aut explicationes accuratissime tradantur; 3. ut divisiones, et subdivisiones fiant, ubi rei ratio postulat; 4. ut exordium sumatur a notioribus, et facilioribus, et dein, veluti per gradus, ad minus perspecta, et difficiliora descendatur, vel ascendatur pro methodi

(1) Operæ pretium scientiarum doctores, me saltem auctore, efficerent, atque auditores dimitterent capaciores, si postquam *syntheticè* veritatem tradiderunt, iidem docerent, quæ tandem ratione sit inventa: ita enim aliis inveniendis veritatibus aptiores evaderent tirones. Verba sunt Genuensis (*Log. Crit. l. 5. c. 5. §. 2.*).

diversitate; 5.<sup>o</sup> ut nil prætermittatur eorum, quæ ad propositam quaestionem solvendam, atque veritatem inveniendam aptiora videntur; 6.<sup>o</sup> ut animadversiones notentur, corollaria deducantur, quæ a re demonstrata prono velut alveo fluunt, scholia apponantur, si res ita postulare videatur. (1).

183. Methodus *scientifica*, seu *disputationis*, est ordo servandus in litteraria concertatione duorum, vel plurium de re ad quamcumque disciplinam pertinente. Qui statutam thesim tuetur, *defendens*, qui eam oppugnat, *opponens* dicitur. *Methodus disputandi* est *Academica*, si stylo perpolito, et eleganti, more rethorum, argumenta, et solutiones proponantur; *Socratica*, quia Socrati adrisit (§. 21), si per interrogationes, et responsiones mutuas fiat concertatio, quæ tunc *dialogistica* quoque vocatur, præsertim si inter duos versetur quaestio (2); *Scholastica*, quia per plura sæcula adhibita in scholis a summis Philosophis, et Theologis, si concertatio absolvatur per syllogisticas argumentationes ab opponente propositas, atque a defendente solutas, vel exceptas. Haec postrema methodus, licet ad veritatis hostes profligandos aptissima videatur, ob quemdam barbarum, incultumque sermonem, qui in ipsa adhibetur, aliquantulum in desuetudinem abiit. Nos tamen eam a majoribus omni doctrina clarissimis acceptam in nostris scholis persequemur, sed sermonis asperitate nudatam, academiae amoenitate emollitam, barbarisque vocabulis, quæ delicatis labiis sunt insuavia, prorsus expolitam (3).

184. Ut itaque hæc methodus scholastica recte in concertationibus litterariis adhibeatur, necesse est 1.<sup>o</sup> ut defendens, et opponens in aliquo convenienti iudicio, quod totius disputationis sit veluti fulcrum.

(1) Vide hæc regulas exemplis statutas, et demonstratas a Genuensi (*Log. Crit. l. 5. c. 5. §. 4. et seqq.*), penes quem et invenies (ibid. c. 6. et 7.) regulas proprias methodi analytici, et synthetici.

(2) Exemplo sit, quod narrat Facciolati. *Cithara daturne pulsanda nobili viro, an perito Citharædo? Perito Citharædo. Clavus daturne nobili viro, an perito Nauclero? Perito Nauclero. Valetudo permittiturne curanda nobili viro, an perito medico? Perito Medico. Ergo etiam ad Reip. regimen non viri nobiles, sed regendi periti.*

(3) Monemus proinde Seraphici Ordinis Lectores, ut quaestiones methodo syllogistica suis dicent æumnis, qui, ut in more est, theses vindicent ab adversariorum objectis quacumque non impedita hebdomada, coram omnibus, quibus harum litterarum concertationum locus est datum ingredi. Ad rem paucis hic adnectimus regulas, quarum auxilio æumni ipsi discere poterunt modum scholasticæ methodo disputandi.

2.<sup>o</sup> Ut defendens apertissimis, et clarissimis verbis suam proponat thesim, omni involucri expoliata.

3.<sup>o</sup> Ut dein opponens, vero propositionis sensu assecuto, conficiat argumentum ad Logicae regulas apprime constitutum, quod directe defendentis thesi adversetur.

4.<sup>o</sup> Ut postea defendens opponentis argumentum officiose excipiat, illud ad litteram, vel ad sensum repetat; in singulas argumentationis partes diligenter inquirat; iudicium deinde decernat; veram concedat, dubiam distinguat, falsam denegat; omittat, quod ad rem non facit. Caveat distinguere consequentiam, quae est nexus consequentis cum antecedente (§. 144.), quaeque proinde concedi, vel negari debet, prout concessum, vel negatum fuit consequens.

5.<sup>o</sup> Ut deinceps opponens, subsumendo, suum prosequatur argumentum, ostendens, propositiones a defendente negatas, vel ex parte exceptas esse veras eo etiam in sensu, quo negatae fuerunt, aut eas thesim penitus evertere; sed verba aspera devitet. Sic semper ambo amice procedant.

6.<sup>o</sup> Verborum strepitus, clamores, aequivoca verba, inusitatae voces cane pejus et angue ab huiusmodi concertationibus arceantur, defendens modeste opponentem moneat, si argumentum in *forma* peccans iste proponat; urbanitate eum ad medium terminum revocet, si nexum abruptens ab illo digradiatur.

7.<sup>o</sup> Defendens *falsum suppositum* (§. 176.) neget, si falsum, tamquam verum, statuerit opponens; atque ad *hominem* (§. 177.) respondeat, si ex principiis opponentis aliquid contra ipsum concludere valeat. Sed hae regulae magis usu ediscuntur.

### SECTIO III.

#### DE VERITATE.

185. Logicae munus est mentis operationes in veritatis inquisitione moderari, atque regulas tradere, quibus aliis monstratur detecta veritas. Sed quidnam est veritas? Quidnam error? Quinam utriusque fontes? Haec omnia in praesenti sectione evolvuntur.



## CAPUT PRIMUM

## DE VERITATIS ESSENTIA

186. *Veritas* generice sumpta innuit convenientiam unius cum altero. Dicitur veritas *metaphysica* convenientia entis cum sua essentia, seu complexus attributorum, quae nullam involvunt repugnantiam, et entis determinant essentiam; *moralis*, convenientia signorum externorum cum internis animae cogitationibus; *logica* convenientia idearum cum objectis, quae ipsae exhibent. Quare veritas *metaphysica* respicit res, *moralis* signa, *logica* mentis nostrae conceptus; ac proinde dicimus veras res, verum sermonem, veras ideas.

187. Germani praecipue philosophi, qui *proprium ego* statuerunt omnis veri basim (§. 67.), veritatem logicam dumtaxat *subjectivam* probarunt. Quare juxta hanc opinionem veritas est adeo mentis modificatio, et quidem independentem ab objectis, ut veritas ipsa deficeret, deficiente animae cogitatione. Alii e contra *subjectivam* negarunt, atque tantum *objectivam* admiserunt, quae objectum repraesentat a mente distinctum, ut in se reapse est, eamque putarunt aeternam, increatam, necessariam, immutabilem, atque sine dependentia ab intellectu existentem. Juxta hanc sententiam, quam verissimam dicimus, veritas *logica* reponitur in una convenientia praedicati cum subjecto percepta ab intellectu, nempe *radicaliter* est in objecto, sed intellectus intuitio requiritur, ut *formaliter* veritas sit (1).

188. Veritatem definivit Rosminius *id, quod est*, sed haec veritas *metaphysica* (§. 186.), et non veritas generice sumpta est dicenda. Adde, quod in sua definitione Rosminius supponat verum suum systema, nempe in omnibus ideis supponi ideam generalem *entis*, quam vocavit veritatem in genere, utpote rerum exemplar (§. 92.) (2). Logicam itaque ve-

(1) Verum veritas *logica* potestne in *ideis* requiri, an tantum in *judiciis*? Videtur praecipue reponenda in *judiciis*, quia veritas haec est cognitio objecti: cognitio autem *judicium* est, quia ipsa non habetur, nisi convenientia, vel pugna inter subjectum, et attributum videatur. Sed quoniam *ideae* objectis, quorum sunt *ideae*, respondere vel non respondere possunt; ideo et in *ideis* veritas perquiri potest. Recole, quae dicta sunt supra (§. 108.).

(2) Rosmini definitio est accepta ab Augustino (*Soliloq.* l. 2. c. 5.), et vindicata a Matthaeo Liberatore (*Log. Spec.* §. 27.).

ritatem ipse reposit in convenientia iudicii cum suprema ratione, quam in *ente ideali* constituit. Haec tamen est potius certitudo, quia in illa convenientia conquiescit animus, prout ipse eandem percepit.

189. Notamus interim, aliquid triplici modo cum nostra ratione comparari posse. Nam *secundum rationem* dicitur id, quod rationis naturalis virtute mens humana assequitur; *contra rationem* est id, quod principio contradictionis opponitur, ideoque naturae rationis humanae adversatur; *supra rationem* demum est id, quod aciem mentis humanae superat, atque transcendit. Quod est *contra rationem* pugnantia includit; sed nullam involvit contradictionem id, quod est *supra rationem*, a ratione autem naturali percipi nequit nexus subjecti, et attributi enunciatæ veritatis, uti sunt arcana nostrae Religionis Sacrosanctæ.

190. Insuper veritas *secundum rationem* dicitur *interna*, quæ sita est in convenientia cogitationis cum objectis, quæ extra animum non existunt, uti sunt veritates mathematicæ, aut aliter existunt, quam insident in animo; *externa* vero, quæ consistit in convenientia cogitationis cum objectis, quæ extra animum existunt. Veritas *interna*, uti patet, non semper secum trahit veritatem *externam*, quia objecta in animo existentia possunt rebus externis non respondere (§. 108). Demum hæc veritas, quæ *secundum rationem* est, dicitur *necessaria*, si prædicatum cum subjecto connexionem adeo necessariam habeat, ut contrarium repugnet, uti *totum est qualibet sua parte majus*; *contingens* vero, si relatio prædicati ad subjectum aliter esse possit, uti *mundus est existens* (§. 124.). Hæc multiplex veritas juxta objectum considerata magis demonstrat, eam objectivam esse, uti innuimus (§. 187).

## CAPUT SECUNDUM

### DE VERITATIS FONTIBUS, EJUSQUE SUPREMO CRITERIO.

191. Si veritas logica in convenientia sita est idearum cum objectis (§. 186), quomodo securus erit animus de hujusmodi convenientia? Quonam tandem medio noscet, iudicia a se efformata donari veritate? Ancepsne semper hærebit? Aliqua profecto debent esse *indicia*, quibus suffulta humana ratio securæ esse possit, uti mox videbimus contra Arcesilaum, Scepticos, Baylium, aliosque, qui putido ore, omne veritatis

criterium, omnemque proinde certitudinem inficiati sunt. Iam vero indicia illa aut omnem ab animo expellunt errandi metum, et *sufficientia* dicuntur, aut dubitationi locum relinquunt, et vocantur *insufficientia*. Ex sufficientibus indiciis enascitur *certitudo*, quae est status animi adhaerentis alicui propositioni, absque formidine errandi, quae certitudo *subjectiva* est, nam certitudo in statu animi humani reponitur. Hinc *certus* est aliquis, qui de iudicio suo, quantumvis velit, aut conetur, dubitare nullo pacto potest: si enim minima inest suspicio, aut sollicitudo, *certus* non est. Quae autem *objectiva* dicitur, potius *veritas* dicenda est, utpote reposita in objecto suis indiciis. exornato, absque relatione ad intellectum (1).

192. Licet indicia mentem illustrent, uti solis lux oculos corporis ferit, tamen non omnia eadem vi pollent. Aliqua enim nec decipiunt, nec decipere possunt, ideoque animum reddunt omnino tutum, et haec *certitudinem metaphysicam* gignunt; alia veritatem constanter quidem annuntiant, sed nulla foret contradictio, si eam aliquando non comitarentur, et haec indicia aut sensuum testimonio innituntur, et *physicam certitudinem* pariunt, aut humanae prudentiae legibus, et *moralem certitudinem* in animum inducunt. Quare discrimen harum certitudinum non a statu animi, qui in omnibus tutus est, debet repeti, sed potius ex motivo, et qualitate indiciorum (2). Indicia illa, quae certitudinem *metaphysicam* de-

(1) Ceterum *certitudo objectiva* dici potest, si consideretur ex parte motivi assensum trahentis, et in objecto positi. Sic dicuntur *objective certa* Dei existentia, animae libertas, aliae sexcenta. Imo et certitudo *vera* haec dici potest, quatenus est simul *objectiva*, et *subjectiva*, seu certitudo veritatem continens. Potest siquidem fieri, ut quis *subjective* sit de aliqua re certus, sive persuasus sit, rem ita se habere, attamen talis non sit, uti certus erat Laetantius de antipodum non existentia.

(2) Quare non ex omni parte probamus sententiam Filangieri (*Scienza della Legis. l. 3. c. 13.*), docentis, *relativam*, nempe pro mentium aestimatione, esse diversitatem certitudinis, non vero *absolutam*. Siquidem assensus cuicumque certitudini exhibitus excludit certe dubium, errandique periculum; sed perfectior est aetna voluntatis adhaerentis metaphysicae, quam physicae, physicae, quam morali certitudini; imo. maiori propensione. ratio nostra rapitur ad unam praeter aliam; maiori demum vi pollet motivum impellens ad assensum certitudini metaphysicae, quam physicae, physicae, quam morali. Quandoquidem certitudo *metaphysica* nititur connexionem necessariam subiectum inter et attributum, quam nec Deus auferre potest; uti est illa, quae habetur in hac propositione: *totum est sua qualibet parte majus; physica* vero. nititur constantia legum naturalium, quae a Deo inverti possunt, evenique frustrari; sique proinde potest evanescere connexio inter subiectum, et attributum, uti

clarant, resident in sensu intimo, si agatur de interna sensibili veritate; insidunt vero in intellectu, ratione; et sensu naturae communi, si illa indicia veritatem externam, et intelligibilem testentur. Indicia autem, quae certitudinem *physicam* includunt, ex sensibus externis anima colligit; uti ex auctoritate humana indicia certitudinem *moralem* inducentia. Hinc sensus intimus, intellectus, ratio, et sensus naturae communis nituntur ipsa rei natura, atque ex principio *identitatis*, sive a necessario nexu inter subjectum, et attributum, ratiocinantur, vel dicuntur; sensus externi legibus naturae, atque experientia ipsius facti fulciuntur; auctoritas demum humana fundatur in hominum testimonio, legibusque, quibus humani mores temperantur. De hisce proinde certitudinis, et veritatis fontibus est hic dicendi locus.

## ARTICULUS PRIMUS

### DE SENSU INTIMO

193. A sensu intimo initium sumimus, qui nobis propinquior est. Omnibus aequè patet, nos certos esse de nostra existentia, de nostra voluptate, de nostra tristitia, de nostro amore, de nostro odio, dum ad nostram attendimus existentiam, dum voluptate, vel tristitia afficimur, dum amamus, aut odio aliquem habemus. Iam vero illa quaecumque vis animi, qua hic semetipsum, suasque percipit actuales affectiones, dicitur *sensus intimus*, vel *conscientia*. Hanc aliqui vocant animae facultatem ab aliis facultatibus distinctam, quas tamen ipsa complectitur, et simul veluti suum objectum habet. Sic tenent Reid, Galluppi, aliique contra Aristotelem, Cartesium, William-Hamilton. *Conscientia* itaque revolvitur super terminum subjectivum, seu super statum *mei* internum, atque nosmetipsos nobis veluti revelat. Actus propterea *conscientiae* semper *reflexus* est, quippe qui reditu quodam super nosmet exercetur. *Conscientia* tamen solet dividi in *directam*, quae etiam *involuntaria*, et *spontanea* dicitur, et in *reflexam*, quae *voluntaria* dicitur, aut *simplex reflexio*. Prima habetur, quando apprehendimus internas animi affectiones ceu nobis inherentes, seu quo *ego* sentiens sentit, se sentire; secunda

est in hac propositione: *corpus tendit ad centrum*. *Moralis* demum fulcitur testimonio hominum, et stabilitate legum moralium, quae relationem dicunt ad libertatem, cuius vi minus aereus redditur nexus subjectum inter, et attributum, uti in hac propositione: *Alexander Darium subegit*.

habetur, quando affectiones internas confuse perceptas distincte nobis tribuimus, judicamusque, nos esse, qui illis affici-mur, seu qua *ego* sentiens vertitur super seipsum, atque seipsum existere cum suis affectionibus introspicit. In prima *passivum*, in altera *activum* se prodit *ego* nostrum. Porro non conscientia *directa*, sed *reflexa* mens nostra, dum alia cognoscit, de se etiam cogitat. Hinc docent Transcendentalistae, *ego spontaneum* distingui ab *ego reflexo*, quatenus primum sit subjectum cogitans cum conscientia *directa*, alterum vero sit idem subjectum cogitans, sed cum *reflexa* conscientia.

194. *Metaphysica certitudine gaudere, quae objecta sunt sensus intimi*, ex eo praecipue colligitur, quod affectiones, quas animus experitur, sint ipsius animi modificationes. Cum vero sentit se modificari, atque suas percipit modificationes, certus est; si enim certus non foret, sentiret, quia modificatur, non sentiret, uti est in hypothesi. Deinde nonne tu dementem diceres, qui te non sentire, quod sentis, effutiret? Diceresne phaenomenon, et non potius reale mentis iudicium, motivum illud, per quod percipis, quod sentis? Neque tu insistes, animum tunc illudi; non enim de causa suarum affectionum, sed de earum existentia, et praesentia in ipso animo hic loquimur. In statuenda hac, vel illa causa suarum affectionum certe animus potest illudi; ast non de ipsarum affectionum reali, et actuali existentia.

195. Neque proinde urgebis 1. exemplum somniantis, cui ex intimo sensu sibi et vigilare, et operari videtur, quod tamen falsum est. Nam et ipse somnians actu sensum vigiliae experitur, actu cogitat, actu sentit, se operari, actu dolet, actu tristatur, omnesque reapse, prout in vivida sua phantasia sunt, habet illas affectiones, dum dormit. Fallitur quidem, sed error est ex parte causae affectionum, quae aliunde, quam ex intimo sensu colligitur; non vero ex parte ipsarum affectionum, quae reapse insident in suo animo. Deinde nos de homine loquimur, prout, remotis impedimentis, reperitur in debita suarum facultatum dispositione, non autem de illo, qui est in statu non idoneo ad rite cognoscendum, et iudicandum; de conscientia *reflexa*, et non de *directa*, quae una habet locum in allato exemplo; de conscientia, et non de imaginatione, cuius potius perturbationi est adscribendum, quod somnians videat praesentia, et realia, quae absentia, et phantastica sunt. Et hic non est praetereunda quaedam Galluppi (*Lex.* 102). adnotatio, nempe fieri posse, ut aliquam singularem affectionem haud intimo experiamur sensu, attamen ipsa in anima reapse

insideat, quia forsitan ad ipsam attentionem non vertimus. Si quidem cum certi simus de aliquo in nobis existente, certi quoque sumus, in nobis non existere aliquid, quod pugnat cum eo, quod experimur.

196. Neque dicas 2., contradictoria non posse simul esse vera (§. 134), quae tamen veluti vera docet sensus intimus. Quandoquidem contradictoriae vocantur, quorum unum penitus destruit alterum; quod fit, cum idem de eadem re sub eodem respectu considerata modo affirmatur, modo negatur. Quare contradictoriae haud sunt, quae de eodem sub diversa ratione accepto praedicantur, et negantur. Ad vos. Sensus intimus quasdam affectiones secum pugnantes in nobis esse testatur, veluti caloris, et frigoris; sed in hisce affectionibus semper aliqua adest diversitas, vel *objecti*, veluti aqua, et ignis; vel *modi*, veluti intensior, et remissior; vel *actus*, veluti doloris et voluptatis. Sic ex. gr. si quis alteram in argentibus, alteram manum in ferventibus aquis demergat, duplicem frigoris, et caloris sensationem experitur, sed duplex causa est in duplicem agens corporis partem. Ita animus plures experitur affectiones specie contradictorias, quae contradictoriae non sunt, quia sub aliqua ratione diversa possunt, et debent considerari. Sed hoc sufficit de intimo sensu, quem criterium certitudinis metaphysicae statuimus circa veritates, quae sunt internae, et sensibiles.

## ARTICULUS SECUNDUS

### DE INTELLECTU, RATIONE, ET SENSU NATURAE COMMUNI.

197. Ubi mens humana aliquam contemplatur veritatem, haec aut statim illi affulget, aut subsidio alicujus mediae ideae. Prima principia sunt veritates primae classis, quia a mente capiuntur, vix cognita inter attributum, et subjectum relatione; conclusiones vero ab illis principiis deductae sunt veritates alterius classis. Hujusmodi veritates porro sunt, generatim acceptae, *necessariae*, *rationales*, *purae*, *a priori*, aut *contingentes*, *experimentales*, *empiricae*, *a posteriori*, prout sunt judicia, quae eas continent (§. 126.). Sed si de veritatibus a principiis primis deductis loquamur, eae sunt *purae*, aut *mixtae*, aut *empiricae*. Siquidem, si ambae praemissae in ratiocinio sint *a priori*, quia ambae veritates *necessarias* continent, ratiocinium erit *purum*, et talis erit veritas deducta a praemissis, veluti: *quidquid simplicem naturam habet, ca-*

*ret partibus; sed quod caret partibus, discerni, et dividi nequit; ergo quidquid simplicem naturam habet, discerni, et dividi nequit.* Si alterutra praemissa sit a posteriori, utpote quae continet veritatem *experimentalem*, et altera a priori, ratiocinium erit *mixtum*, et veritas in conclusione posita sequitur naturam *experimentalis praemissae*, quia debiliior haec est (§. 157.); uti *quadratum est figura habens quatuor latera aequalia, et quatuor angulos rectos; sed haec tabula habet quatuor latera aequalia, et quatuor angulos rectos; ergo haec tabula est quadrata.* Si demum ambae praemissae sint a posteriori, quia ambae *experimentales*, ratiocinium erit *empiricum*, et veritas deducta omnino contingens; veluti *qui studet doctus fiet; sed Petrus studet; ergo doctus fiet.*

198. *Principia*, quae sunt veluti *data*, ex quibus deducitur series argumentationum, sunt distinguenda a *principiis*, quae sunt *veritates elementares*, sine quibus series illa continuari non posset. Illa falsa esse possunt, licet recte procedat argumentatio, quae minime forsitan peccat in *forma*; haec vero sunt semper vera, quia *axiomata* sunt, veluti: *quae conveniunt uni tertio, conveniunt inter se*; licet series continuata falsitatem praeseferat, quia forsitan peccat in *forma* (§. 144.). Quare ex illis principiis veritas *materialis* sequitur; ex istis vero veritas *formalis* dependet; quia, ut verum sit iudicium deductum ab illis, illa vera esse debent; ut sit verum iudicium deductum ab istis, in istis iudicium deductum contineatur oportet. Insuper *principia* accepta veluti *data*, a quibus demonstratio initium sumit, sunt a priori (§. 197.), si universalitatem, et veritatem ex sola idearum relatione cognita praeseferant; veluti: *quae conveniunt uni tertio, conveniunt inter se*; a posteriori vero, si eorum veritas, et universalitas deducatur ab experientia. Porro quod recte sequitur ab illis principiis, verum est, quia conclusio induit naturam principiorum, ex quibus eruitur; quod vero recte deducitur ab istis, non semper verum est, quia forsitan non vera sunt principia a posteriori jam praestituta. Sed hic notetur cum doctissimo Mastrofini, iudicia a priori illa esse, in quibus essentia, et attributa concipiuntur ante existentiam in nostra analysi; et a posteriori, quae praesupponunt existentiam entium, ex quibus trahuntur attributa (§. 124.). Veritates geometricae sunt a priori, quia ante existentiam e. g. quadrati concipiuntur ejus essentia, et attributa; veritates experientiae suffultae sunt a posteriori; quia praesupponunt objecta, in quibus experi-

mentum, vel observatio facta est. Deinde alia iudicia sunt *a priori* ratione methodi, quae illa assumuntur prima in serie veritatum, et alia *a priori in se*, et ante quamcumque existentiam essentialiter animae intrinseca. Iudicia *a priori* primo sensu multa sunt; sed nulla in secundo sensu, quia non ab anima humana est, ut res creatae sint, quales supponunt illae ideae (*L'anima* ec. t. 1. l. 2. c. 5. a. 6.). Ex quo patet, illa principia, quae sunt *veritates elementares*, quaeque habentur veluti principia *a priori in se*, et eo magis *principia, quae sunt veluti data*, et a quibus initium sumit demonstratio, supponere analysim, quae illa deducuntur, et statuantur principia (§. 124). Ceterum nemo potest philosophari, nisi aliqua probet principia demonstrationi non obnoxia, quae innata veluti luce sua, et non ab aliis mutuata fulgent, tum quia veritas deducenda supponit praemissas, tum quia secus numquam finis poneretur postulationibus de veritate praemissarum. Istorum itaque principiorum non est petenda demonstratio, sed ad summum terminorum explicatio, istorumque idearum. *Itaque nec sine hac face progredi ulterius potest, qui philosophatur; et qui docet, auditorum mentibus tenebras effundit; tantum abest, ut eas illustret*, ait ad rem Genuensius (*Log. Crit.* l. 5. c. 5. §. 4.), qui tamen non negat, *principia scientiarum* ad examen revocari posse, et debere, cum plura huiusmodi principia post renatas in Europa litteras falsa detecta sint.

199. *Intellectus* hic est facultas, quae mens prospicit relationem attributi cum subjecto; *ratio* vero facultas, quae ex principiis alicujus veritatis alias, et alias mens humana deducit. De his diductius erit sermo in Ideologia speculativa. *Sensus naturae communis* est illa propensio, seu illa vis animo inhaerens, quae homines ratione utentes impelluntur ad quaedam efformanda iudicia, et ad aliqua perspicienda, quorum attributum inter, et praedicatum adeo necessaria est relatio, ut nequeat non videri a mente, sicuti nullus est, qui illico non intuetur, *binis binis addita efficere quatuor*.

200. Non de mera existentia *communis naturae sensus* hic loquimur, sed de ejus infallibilitate. Licet porro non facile sit decernere, ad quae ipse extendatur, tamen ad principia, in quibus prima fronte attributi, et subjecti relatio percipitur, et ad immediatas conclusiones exporrigi, communis est sententia. Quare iudicia, quae a *sensu naturae communis* dictantur, debent esse universalis, diuturna, constantia, principis naturae rationalis convenientia, et excludentia alias cau-



sas, a quibus possent repeti. Secus non a *sensu naturae communis*, sed a praeiudiciis originem ducerent.

201. Neque hic est confundendus *sensus naturae communis* cum *consensu omnium gentium*, aut cum *auctoritate humana*; nam primus respicit veritates (§. 200.) relatas; alter facta, quae in physico rerum ordine se praebent conspicienda; tertia facta historica. Ille incepit cum natura humana, quia veluti surgit ab intellectu, et ratione, et non a quadam caeca vi, qua moti homines in aliqua prorumpunt iudicia; non item consensus omnium gentium, et auctoritas humana. Ille fons est veritatum, quae intrinseca donantur evidentia, quae haud lucent, quae habentur ex consensu omnium gentium; et auctoritate humana. Ceterum *sensus naturae communis* amplectitur etiam universalem consensum, si iste respiciat principia generalia cognita; ast non vicissim. Quare nos confundimus *consensum universalem*, et *consensum omnium gentium*, licet non desint, qui distinguunt.

202. *Intellectus* itaque estne veritatis fons, et assertne certitudinem metaphysicam? Haec est prima inquisitio. Verum cum intellectus respiciat veritates *necessarias*, et principia *a priori*, non video, *quare fons veritatis dici nequeat atque metaphysicam non afferat certitudinem*. Siquidem, si illae veritates sunt semper eadem, si eandem semper retinent firmitatem, si nulla temporum vicissitudine obliuerantur, si ipsae, inspecta tantum natura praedicati et subjecti, rapiunt animum, atque assensum extorquent; perspicuum est, illas veritates esse certas relate ad animum nostrum, et quidem certitudine metaphysica (§. 192.); ideoque intellectum veritatis esse fontem. Nisi hoc foret, nonne omnes scientiae nutarent? Ablatis illis veritatibus, quae tamquam faces collustrant, et detegunt ceteras, nonne Deus nos continuo falleret?

203. Ast aliqui opponunt, principia illa, quae prospicit intellectus, non posse esse absolute vera, et quia nemo est certus, res tales esse, quales sunt in ideis, et quia nemo scit idearum naturam. Sed respondeo, ut illa principia sint vera, satis esse, ut intellectus inter ideas relationem percipiat, qualis datur inter ipsas, ideoque opus non esse, ut ipse intellectus videat, res tales esse, quales sunt in ideis; praesertim quia illa principia praesciunt a rerum existentia.

204. Verum quid *de ratione* dicendum? *Ipsa quoque est fons veritatis certitudinem pariens metaphysicam*. Quandoquidem, si veritates deductae a principiis necessariis recte deductae sunt; si conclusiones sequuntur naturam principio-

rum, a quibus illae deducuntur; si principia illa sunt veritates metaphysice certae, quisque noscit, veras esse conclusiones. Sed rationis opus hoc est (§. 199). Ergo *ratio* est fons veritatis, atque metaphysicam gignit certitudinem. Et nonne conclusiones prono alveo descendentes ab illis principiis consensum extorquent? *Hic liber est major quolibet suo folio*, est veritas deducta a principio: *totum est sua qualibet parte majus*. Quinam labor necessarius est, ut haec capiatur conclusio? Et quomodo aliquae acquirerentur veritates, quae ab aliis necessariis inferuntur, quaeque nec sensibus, nec experientia, nec auctoritate humana attingi a mente possunt? Nonne in fumum abirent omnes regulae logicae, si quoties ratiocinium neque in *materia*, neque in *forma* peccat (§. 144.), conclusio veritatem baud contineret, animumque non raperet? Nunc et Deus nos perenniter illusos vellet?

205. Contra vim rationis nonnulli dicunt; 1. rationem humanam esse finitam, ideoque essentialiter fallibilem; 2. plures doctissimos deceptos esse in conclusionibus vi ratiocinii illatis; 3. rationem esse quid commune generi humano, ideoque non individualement, sed generalem generis humani rationem esse veri fontem.

206. Sed ad 1: dicimus contra De La Mennais (§. 63), cujus est haec obiectio, rationem humanam fallibilem quidem esse in iis, quae superant ejus captum, uti fallibilis quoque est in iis conclusionibus, ad quas eruendas non adhibet media necessaria. Verum ex eo quod finita sit, minime sequitur, esse semper fallibilem. Ex eo enim, quod ipsa finita sit, non est *non ratio*, sed quid positivum est, ideoque aliquid debet certo cognoscere. Sequitur quidem ex limitatione rationis, plura esse, quae ejus vim excedunt, quaeque capit ratio Dei infinita; sed quia finita, finita cognoscere potest, et quidem si recte sua ratiocinia instituat.

Ad 2: respondentes non negamus, aliquos doctissimos viros in conclusionibus deceptos esse; verum hoc non ex eo ortum est, quod ratio in errorem inducat circa veritates legitime a veris principiis deductas; sed ex eo quod ratiocinium non recte institutum sit. Si falsae fuerunt praemissae, aut earum alterutra, sicque conclusio in praemissis non continebatur, profecto in errores prolabi debebant (§. 144.).

Ad 3: respondemus, sophisma hic confecisse De La Mennais; nam ratio est haereditas communis toti generi humano, quatenus istis individuis hoc componitur, ideoque est haereditas individuis data, quae singillatim eam adhibendo ve-

ritatem certo assequi possunt (1). Deinde, si ratio individui decipiat, nonne deciperetur ratio universalis, si existeret? An essentia mutatur per collectionem (§. 175. 7.)?

207. *Ad sensum naturae communem descendendo, qui fons veritatis est, et certitudinem metaphysicam affert.* Nam vixerunt apud omnes gentes quaedam judicia communia, et uniformia, quae neque ab educatione, neque a praepiis, neque ab opinionibus, neque ab auctoritate ortum habuerunt. Undenam illa, nisi ab ipsa natura rationali, quae in omnibus constanter eadem est? Undenam gentes cognoverunt ex. gr. *aliquod numen existere; post praesentem dari alteram vitam; Deum esse providum; unicuique suum esse reddendum?* Sed nisi vera essent illa judicia, quae a pectoribus veluti sponte erumpunt, et ad quae efformanda maxima hominum pars quodam naturae impulsu adeo adigitur, ut iaviti etiam illa conficiant, nonne Deus, et natura, qui nil frustra moliuntur, frustra huiusmodi impulsam naturae humanae fuissent largiti? Nonne Deus et natura, qui numquam in necessariis deficiunt, in necessariis omnino defecissent, nisi vera essent illa judicia, quae ad vitam humanam componendam sunt prorsus necessaria, atque ab uno naturae sensu derivari possunt? Imo nonne ad errorem perenniter, et *per se* homines natura rationalis impulisset, si, ipsa semper impellente, et assidue clamante, falsae tamen forent ejus voces? Nonne hoc foret ipsam naturam humanam pessumdare, atque scepticismo latam reserare viam? Vide Iosephum Aloysium Dmowski (Inst. Logicae pars altera a. 7.)

208. Contra *sensum naturae communem* plura etiam congerunt sceptici (§. 191). Dicunt enim 1. multos extitisse, qui nefandissime contra prima moralitatis principia peccarunt, ideoque sensum communem naturae non esse ve-

(1) Ad hunc errorem devenire aliqui *absolutistae*, ut humanas animas, mundumque materialem dicerent unius substantiae manifestationem; humanitatem unius entis membra; rationem unam esse, communem, immutabilem (§. 65.). Sed perperam. 1. quia neque mundus, neque animae humanae, uti postea demonstrabimus, sunt phaenomena, sed substantiae mutabiles, et contingentes; ideoque non Deus; 2. quia ratio humana in se considerata non est neque immutabilis, neque necessaria, neque infinita; 3. quia ratio humana est singularis, et personalis, uti docebimus infra (§. 423 nota); 4. quia Deus mutabilis, finiti, multiplicisque formas indueret, simulque foret immutabilis, infinitus, simplex. Itaque causa, cur homines sint conformes, unamque efficiant familiam, non ex unitate rationis communis, sed repetenda est a similitudine corporis, ejusque organorum, aequalium necessitatum, functionum, motuum, a quodam communi sermonis usu, atque demum ex similitudine, non vero identitate rationis.

ritatis fontem; 2. multa hujusmodi judicia, quae derivantur a sensu naturae communi, ortum habuisse a traditione primorum parentum; 3. certitudinem hanc, quae derivatur ex hoc fonte, esse omnino indignam philosopho, quia est certitudo moralis.

209. Sed ad 1: dicimus, impulsus rationalis naturae ad ponenda aliqua judicia respicere intellectus vim (§. 199); ex abusu vero libertatis factum esse, ut aliqui in nefandissima crimina prolaberentur. Quod certe stare potest, cum saepe nos videamus bona et probemus, sed deteriora sequamur. Deinde quaeri potest, utrum ii, qui contra moralitatis principia peccarunt, a natura rationali fuerint impulsus, ut judicarent, illa principia esse falsa; quod certe affirmari nequit. Insuper dato etiam, quod ita *speculative* alii credidissent, hoc unum sequitur, non recte ratiocinatos esse, sensumque naturae communem minime interrogasse. Demum non ex numero idem sentientium deducitur certitudo nostrorum judiciorum. Non idem est enim sensus naturae communis, et hominum consensus (§. 201). (1).

Ad 2: respondentes dicimus, potuisse quidem a traditione multa derivari judicia, quae a sensu naturae communi nos eruiamus. Hoc in sensu ait Gioberti (*Introduzione allo studio della flos. t. 2. c. 8. pag. 618. Ediz. Brusselle 1860.*), non esse individuum, quod aliquo modo non participet de revelatione primaeva, vel instaurata, atque ubique inveniri fidei reliquias, germina benefica, quibus utitur Providentia, ut humana sistat familia, reliquias vitales, quibus regna, et

(1) Licet supra innuimus (§. 201.), sensum naturae communem amplecti universalem consensum, tamen quoniam hic illud non includit, de universalis consensu aliquid praestat dicere. Itaque *omnium gentium consensus*, seu *universalis consensus* requirit locorum, temporumque universitatem; ideoque, ut hic habeatur consensus, necesse tantum est, ut aliquae veritates semper, et ubique sint creditae. Neque parvus numerus oppositum sentiens hunc consensum labefactat, quia pauci moralem universitatem (§. 135.) non tollunt, et quia illi pauci videntur contradixisse, ne veritates sibi ingratas admittere cogerentur. Hic proinde *consensus universalis pro veritatis fonte haberi debet*. Siquidem aliter error foret universalis lex naturae humanae, aut idem in omnibus decipiendi finis insidisset. Sed hoc postremum dici nequit, quia, experientia teste, homines contrarium sentiendi modum sectantur, et omnes ad veritates naturae duce pelluntur, ac tendunt; neque alterum, quod sapientiae, et bonitati Dei contradicit, qui naturam humanam ad errorem necessario pronam condidisset, haecque falsum pro vero necessario amplecteretur. Sed quoniam veritates, de quibus homines consentiunt, non ab hominum perquisitione sunt repetendae; ideo ad aliquod primum principium est recurrendum, a quo ad homines illae primum manarunt, quodque nequit esse, nisi Deus.

nationes nutriuntur. Ceterum, ut hujusmodi fidei reliquiae servarentur, ratio quoque, seu sensus iste requirebatur. Prava exempla, morum corruptio, non ubique recta educatio, praejudicia multa, ethnicorum traditio, totque inventae fabellae in causa fuissent, cur illa judicia oblita remansissent, ideoque non sufficienter fuisset humano generi provisum, nisi sensus naturae communis ad haec judicia impelleret.

Ad 3: demum dicimus, haud esse indignum philosopho, uti Baylio placuit, certitudinem derivari ex communi naturae sensu; nam si ejus oppositum pugnat (§. 207), certitudo haec metaphysica est dicenda. Et etiamsi certitudo haec moralis foret, non video cur philosopho indigna esset dicenda; cum et philosophus acquiescere omni debeat certitudini, quae eruitur ex principiis, seu indiciis naturalibus, et diversa est pro diversitate motivorum (§. 192.)

## ARTICULUS TERTIUS

### DE EXTERNIS CORPORIS SENSIBUS

210. De fonte veritatum sensibilium externarum rerum hic dicturi, ab *organis sensoriis*, quae definiri possunt media, quibus anima intuetur, quae extra ipsam sunt, initium sumendum ducimus. Quinque ipsa sunt, videlicet *visus*, *auditus*, *gustus*, *odoratus*, *tactus*, qui per totum diffunditur corpus (1). Ipsis totidem respondent species *sensationis*, quae actio mentis est, uti in Ideologia speculativa videbimus. *Nervos* hujusmodi sensus habent, et *optici* vocantur, qui a cerebro ad oculos desinunt; *acustici*, qui ad aures; *olfactorii*, qui ad nares; *gustatorii*, qui ad palatum et linguam; generatim *sensorii*, qui in cuticulam totum corpus ambientem derivantur.

211. *Sensatio* hic est affectio illa animi, quae dum adest, exhibet nobis aliquod ut actu praesens, quod *corpus* nominamus. Quare duo admittimus in sensatione, prout rei tractandae ratio postulat, nempe *actio* in organum sensorium excitata, et *operatio*, qua mens hanc actionem perci-

(1) Reapse ad *tactum* ceteri referuntur sensus; nam corporis saporis, et odoriferi moleculis tanguntur palatus, et nares; ab aere excitato a corpore sonoro aures; a lucis reflexione oculi. *Tactus* autem, ut est sensus speciei, non excitat sensationem copulatam cum sapore, odore, colore, sonus; sed ut est sensus generalis, est causa omnium sensationum.

pit. Hanc mentis perceptionem sequitur quaedam spiritualis cognitio, qua animus se cogitare animadvertit, et quae cum *conscientia*, seu *intimo sensu* confundi potest (§ 193). Haec pro confessis habemus.

212. Certum est, non ad omnia, quae existunt in rerum corporearum universitate, extendi organa sensoria, cum sensus omnino effugiant natura rerum, et modus, quo ipsis qualitates adhaerent. Quare in corporibus semper est aliquid, quod sensibus non perspicitur. Cum vero sensus, utpote materiales, fideliter mutationem acceptam referant, patet, ad animum spectare errorem, si quando credamus, aliquid ita esse, cum tamen ita non sit (1). Porro si aliquas adhibeamus conditiones, quas ratio, et experientia suppeditant, occasionem errandi vitabimus. Quare 1. organa sensoria sint recte disposita, nulloque inficiantur vitio; 2. objecta sint in debita distantia a sensibus; 3. nullum sit impedimentum inter sensus, et objecta; 4. medium, in quo respiciuntur objecta, sit constans, et uniforme; 5. cuique sensuum suum respondeat objectum, uti colores oculis, etc; 6. plures sensus adhibeantur, ubi fieri potest; 7. usus ipsorum sensuum diverso modo, et loco, et tempore fiat; 8. relatio sensuum praesens cum praeteritis conferatur; 9. instrumenta quoque adhibeantur, et quidem perfectiora; 10. mens attendat, dum sensus applicentur alicui objecto; 11. sensuum relatio sit conformis et testimonio aliorum hominum, et rectae rationi, sed praesertim divinae auctoritati.

213. Generatim testimonio sensuum adversati sunt sceptici antiquiores, et recentes, necnon Idealistae, quorum agmen ducit Georgius Berkeley (*Dialogues entre Hylas, et Philonous*). Aliqui tamen corporum existentiam inficiantur, dicti *dogmatici*; alii dubitant, dicti *proprie sceptici*; alii unis facultatibus mentis persuasionem, seclusis omnino sensibus, tribuunt, dicti *mystici*; alii ad nostram existentiam demonstrationis vim coarctant, dicti *egoistae*; alii cum Malebranchio ad Dei revelantis auctoritatem recurrunt, et ii creatis rebus vires denegant. Omnes una voce cum Francisco De La Mennais (*Essai sur l'indifférence* t. 2.) clamant, sensus nos illudere, nihilque certum ab ipsis accipere.

(1) Nam, ut aliquis decipiat, vel verum proferat, necesse est, ut iudicet, sensus autem judicare nequeunt; ergo neque decipere, neque verum proferre queunt. Objectum sensuum est quid reale, vel *phaenomenon*, sed ad animum spectat judicare, utrum illud quid sit verum, an falsum.

214. Quaeritur interim hoc loco, utrum ideae, quas animus sensuum ministerio assequitur, sint suis objectis conformes: ideoque sensuum ministerium sit adeo veritatis testis infallibilis, ut mens hoc nixa testimonio in convenientia idearum cum objectis sensibilibus acquiescat (1).

215. *Sensuum testimonium est veritatis criterium.* Nam 1. supposita corporis nostri existentia, et propensione referendi ideas nostras ad objecta praesentia, et externa, quae ex intimo sensu edocemur, certe ipsa corpora agunt in varia corporis nostri organa sensoria. Ast, si hisce nos decipiamur, quamnam normam habebimus vitae moderandae? 2. Deus nostrum corpus variis ornavit sensibus, ut per ministerium istorum objecta cujusque sensus propria, et quae ad nostri compositi conservationem aptiora sunt, nosceremus. Verum si per sensus decipiamur, nonne Deus nobis insufficientia tribuisset media? 3. Ablato sensuum testimonio, veluti veritatis fonte, ubinam erit tota illa cognitio, quae sensuum ope acquisita toti inservit societati? Ubinam erit revelatio ipsa divina, quae media sensibilia, et ideo sensuum ministerium supponit? 4. Neque sceptici, neque Idealistae facto suo negant, aliqua, quae per sensus habentur, esse vera, licet ore tenus hoc inficiantur; ipsi enim escam salubrem a noxis secernunt, liquidum a solido, magnum a parvo, album a nigro, et alia sexcenta. 5. Cum animus sensationem efformat, statim ad ideam agentis sibi externi recurrit, atque seipsum ab objecto modificante distinguit; quod certe argumentum est, sensus vera referre. 6. Saepe et nos, cum aliquid veluti certissimum asserere velimus, observasse testamur propriis sensibus; quod probat, omnes impelli ad credendum, sensus esse veritatis fontem.

216. Interim audiamus, quid dicant adversarii. 1. Sensus haud referunt res, quales sunt, in totque nos pellunt errores circa figuras, colores, sapes, distantias. 2. Si sensuum testimonio esset fidendum circa aliquas veritates, certe, qui a nativitate sensibus destituitur aliquibus, veritates per eas

(1) Scientia nostra sive intuitiva, sive demonstrativa (§. 86.), quae acquiritur attentione ad illas mutationes, quae ab objectis externis in organis sensorii producuntur, dicitur *experimentalis*. Verum objectum nostrae experientiae nostra industria, nostroque labore adhibito praeparatur, aut nobis exhibetur suapte natura, et sine nostra opera; in primo casu dicimus *experiri*, in secundo *observare*. *Observamus* eclipses, *experimur* aliquid quavis machina. Iam patet, objecta scientiae experimentalis esse singularia; haec enim tantum agere possunt in organa sensoria, atque mutationes efficere.

acquirendas numquam adipisceretur; quod absurdum est. 3. Sensus non sunt iidem semper, neque crastino die erunt ut hodie: quomodo certi essemus de rebus, quas hodie uno modo, crastino die autem altero modo sensus referunt?

217. Ad 1. tamen respondemus, sensus duo renunciare, nempe relationem, quam habent nobiscum objecta, et quasdam proprietates istis inhaerentes. Sed quatenus sit corporum essentia, quomodo illae proprietates adhaereant objectis, aliunde determinari debet. Deinde, ut sensus certitudinem in animum insinuent, debent applicari juxta regulas (§. 212.) allatas. Si aegrotu cibis amarulentus sit, si icterico colores flavescant, si frigore correpto odiferae non existant substantiae, si surdaster non distinguat, quid ad nos? Si laudatae regulae prae oculis haberentur, nullus foret error, qui, ut vidimus (ibid.), animae est, sensusque non amplius, uti infideles testes, damnarentur.

Ad 2. Etiam si aliquo sensu destitutus a nativitate veritates non acquireret, quas ope illius sensus alii adipiscuntur; non tamen inde sequitur, numquam sensibus esse fidendum, licet regulae ad hoc datae observarentur. Iste homo excipietur a lege ordinaria, quod firmat veritatem ipsius legis. Deinde etiam iste homo, saltem in iis, quae suam respiciunt conservationem, potest aliquid scire, si aliis, qui sensibus non carent, se committat.

Ad 3. Non est tanta organorum mutatio, ut quotidie diverso modo referant suos motus; quod patet ex propria experientia, qua edocemur, eundem cibum nobis salubrem esse, etiam si per menses ipso vescamur. Deinde et ex intimo sensu monemur, quando aliqua mutatio in organis sensoriis facta est.

## ARTICULUS QUARTUS

### DE AUCTORITATE HUMANA

218. Licet quamplurimae veritates aut sensu intimo, aut intellectu, et ratione, aut testimonio sensus naturae communis, aut ope sensuum corporeorum acquirantur, hique fontes ad certitudinem nos procul dubio perducant; adhuc tamen aliquae existunt veritates, quae his a fontibus non derivantur, quasque certe mens nostra consequitur, et in iis tuta quiescit. Undenam revera factum aliquod in loco a me



dissito, aut tempore praeterito ante meum ortum cognoscam, nisi alter mihi narret? En necessitas auctoritatis, quae est testimonium illius, a quo movemur ad aliquod ferendum iudicium sine errandi formidine, quaeque duplex est, *divina* nempe, et *humana*, prout testimonium fuit a Deo, aut ab homine. *Auctoritas divina* certitudinem parit metaphysicam; quia impossibile est, ut Deus, qui omniscius est, et verax, fallatur, aut decipiat; *auctoritas vero humana* parit certitudinem moralem, uti mox videbimus, si omnibus requisitis suffulta sit; quia legibus moralibus, quae vetant mentiri, et legibus prudentiae humanae, a quibus patet, omnes neminem umquam fefellisse, tota nititur. Consensus autem praestitus alicui assertioni propter testantis auctoritatem *fides* dicitur, quae et ipsa *divina* vel *humana* est pro diversitate testis. De humana auctoritate et fide est hic dicendi locus, quae praecipue locum habent in narratione historica.

219. Objecta, quae auctoritate humana inniuntur, sunt *speculativa*, si respiciant veritates rationales, quas sine errandi formidine amplectimur ob narrantis auctoritatem, quasque haud amplecti deberemus, alterius testimonio dumtaxat fulti (1); et *externa*, ac *physica*, quae facta externa nobis, et physica omnino respiciunt, quaeque in historia recensentur (2). De his sermonem habemus. Haec porro facta sunt *coaeva* illis, qui narrant, aut *praeterita*; sunt *publica*, aut *privata*; sunt *naturalia*, aut *supernaturalia*; sunt *magni*, aut *levis momenti*; sunt *secunda pravis affectibus*, aut *adversa*.

220. *Testis* est, qui narrat aliquod factum, isque dicitur *oculatus*, si factum propriis oculis conspexit; *auritus*, si ab alio audivit; hic vero aut est *coaevus*, si tempore, quo factum contigit, vivebat; aut est *posterioris aetatis*. Testes vero factum referre possunt pluribus modis, nempe *orali traditione*, si voce; *historia*, si verbis, aut scriptis; *monumentis*, si permanentibus signis illud tradant.

(1) Ceterum testimonium sapientum, et in arte peritorum pro rudibus norma esse debet, nisi ipsi, qui argumentorum vim percipere nequeunt, illis veritatibus, de quibus sermo est, destitui malint.

(2) Historia est *politica*, *naturalis*, et *litteraria*; prima enarrat, quae hominibus societate copulatis accidunt; secunda, quae pertinent ad naturam rerum; tertia, quae respiciunt res litterarias. *Politica* est divina, ecclesiastica, et profana, et potest esse generalis vel particularis; *naturalis* in multiplicem speciem dispescitur; *litteraria* etiam in varias dividi potest classes, prout respicit unam, aut alteram scientiam.

221. Illud in primis pro certo est tenendum, eo fortius moveri animum nostrum ab alterius testimonio ad aliquod ferendum iudicium, quo major *scientia*, majorque in illo supponatur *veracitas*, quae duae dotes in historico, seu quocumque teste, omnino requiruntur. Si enim testis factum nesciebat, aut scire noluit, vel nequivit, certe nulla est ei praestanda fides; uti non est adhibenda illi, qui *mentiri* solitus *veracitate* destituitur. Deinde hae regulae prae oculis sunt habendae. Relate ad factum, videndum est; 1. si sit *possibile*; si enim legibus naturae, et divinae repugnet virtuti, veluti falsum est rejiciendum; 2. si factum sit *sensibile*, nempe *sensibus* subjectum, et non ratiocinio, vel conjecturis suffultum; hoc enim in casu ad summum erit probabile; 3. si factum circumstantiis cohaereat; alias saltem suspectum reputetur. Relate vero ad testem haec considerentur; 1. si historicus alias mentitus sit: si mirabilibus delectetur: si a propria abripiatur auctoritate: si partium studio facile alliciat, suspicionem sui praebet; 2. testis oculatus meretur fidem prae aurito; doctior, et veracior prae ceteris; plures prae paucioribus, ceteris paribus; 3. coaevus praeferri debet recenti, dummodo ille non sit abreptus *insita hominibus libidine alendi de industria rumores*, uti Livius ait, et dummodo iste rationem mendacii coaevo non addat; 4. recentiores testes factum narrantes vetustum tantam merentur fidem, quantum valent monumenta, quibus nituntur; 5. factum narratum ab uno, aut altero coaevo, silentibus aliis, veluti saltem probabile tenendum est, quia argumentum negativum nil concludit; 6. factum narratum ab idoneis testibus, addita ratione, quae minime intelligitur, non ideo est rejiciendum; 7. successiva confirmatio narrantium, neque augeat, neque minuit primi narrantis auctoritatem, quae sola valet.

222. Quare haec sit generalis lex pro veritate historica. Si aliquod factum possibile stylo simplici, licet perpolito, narretur, nemine jure contradicente, a pluribus coaevs, sive oculatis, sive auritis diversis aetate, conditione, studio, educatione, religione, scientia, loco, tamen concordibus in essentialibus, pro vero accipiendum est. Imo certitudinem *quamdam* metaphysicam parit; si ob narrationem illius facti vexatio narrantium, incommodumque addatur; si coram illis narretur, quorum interest mendacium detegere, quique facile detegerent, si mendax testis foret; si demum nihil sit, quod jure opponi possit.

223. Ceterum multum deferunt auctoritati humanae, qui cum De La Menuais, et editoribus Bertini operis *De Institutionibus rationalis philosophiae*, impudenter asserunt, nullam relinqui certitudinem, ablata auctoritate divina, et humana, atque neminem posse dicere, *se existere*, nisi prius dicat: *credo*. Nempe isti, omnem scientiam auferentes, soli auctoritati fidunt, quasi suadeat magis auctoritas humana sine ratione, quam ratio sine hujusmodi auctoritate, et quasi non utantur ratione, qui ratione ducti putant, credendum esse auctoritati.

224. Medium iter itaque tenentes, *dicimus auctoritatem humanam derivatam a testibus idoneis* (§. 222.) *in pluribus casibus circa facta sensibilia esse certam veritatis normam*. Nam; 1. quando factum narratum omnibus notis comitatur relatis (*ibid.*); nulla est ratio dubitandi, nullumque dubium audienti, aut legenti relinquitur. 2. Tota facti certitudo praecipue eruitur ex scientia, et veracitate (§. 221) testis. Sed haec inveniuntur, ubi factum donetur circumstantiis relatis (*ibid.*). 3. Sceptici, quibuscum hic certamus, non negant, licet ore tenus aliter sentire videantur, extitisse Tullium, Virgilium, Demosthenem, Alexandrum, ac modo existere Romam, Parisios, Vindobonam, quamvis nec illos viros, nec has viderint urbes. Ergo aliqua veritas existit, quae tota fulcitur humana auctoritate. 4. Si omnia falsa forent, quae a testibus narrantur, tota rueret societas. Ecquis enim reum damuaret, ac innoxium absolveret, solum testibus suffultus? Ecquis Rectoribus crederet, eorumque jussa faceret, nixus alicujus Consiliarii, aut Ministri relatione? Ecquis se praecavere posset a tot malis, totque sibi commoda comparare, si nulli testi foret credendum?

225. Objectiones scepticorum praecipue ad has reduci possunt. Dicunt 1. Nullus historicus est, qui in aliquo non sit mentitus. 2. Aliqua facta prius uti vera recepta, postea falsa inventa sunt. 3. Sicut unus testis probabilitatem, ita et plures gignunt. 4. In factis miraculosis certitudo physica orta ex constanti legum cursu, pugnaret cum morali, cui proinde foret valedicendum, etc.

226. Ast contra est. Nam ad 1: dicimus, et concedimus, fere omnes historicos humanos in aliquo esse mentitos; sed nos non de uno historico hic loquimur, neque de facto ab illo tantum narrato. Nostra conclusio (§. 224) tota fulcitur pluribus concordibus testibus, omni exceptione majoribus (§. 222). Ecquis negaret Caesaris existentiam, a testibus nar-

ratam pluribus, licet diversimode sentientibus, ac aetate, loco, genio differrentibus?

Ad 2: respondemus, facta illa prius uti vera recepta, et postea falsa inventa, fuisse recepta absque examine, et sine regulis recensitis. Nisi examen praecedat, et regulae observentur, certe multa facta admittentur, uti vera, quae forsitan falsa sunt. Verum nemo falsam unquam dixit, si scepticus excipiat, ex. gr. Titi existentiam. Sic Baylio respondebis, qui objiciebat.

Ad 3: dicimus, unum testem ad summum probabile argumentum facere, quia de ejus scientia, et probitate non clare patet. Verum omnes testes non decepisse, imo neque conspirare in mendacium posse, ex dictis (§. 221. 222.) eruitur. Neque ex eo, quod unus fallax esse posset, sequitur omnes quoque simul collectos fallere potuisse, aut fefellisse. Siquidem a distributivo ad collectivum non valet argumentum, nisi in essentialibus (§. 175. 7.), et essentialis homini non est mentiendi voluntas. Deinde pugna illa, quam reposuimus in testibus (§. 222), satis superque monstrat, illos minime decipere, imo nec decipere potuisse.

Ad 4: demum dicimus, in factis miraculosis minime certitudinem physicam cum morali pugnare; nam illa respicit legum physicarum constantiam, haec vero exceptionem ex hac legum constantia. Si exceptio haec est factum publicum ab omnibus visum, et a testibus narratum, qui omnibus donantur dotibus (§. 222), ecquis illi contradiceret? Ille certe unus, qui miraculorum possibilitatem negaret, quae et ipsa in contingentia legum physicarum sita est, et in Dei omnipotentia, uti in Ideologia videbimus.

## ARTICULUS QUINTUS

### DE VERITATIS ULTIMO, ET SUPREMO CRITERIO

227. Plures sunt quidem fontes veritatis, qui certitudinem nobis afferunt, quique sunt veluti regulae partiales, a quibus hujusmodi certitudo hauritur, uti vidimus (§. 194. 202. 204. 207. 215. 224.). Verum hic de ultimo motivo est quaerendum, quod sit veluti ultimum complementum, et sigillum naturalis certitudinis, quodque alio non egeat criterio. Utrum hoc *criterium*, haecque *regula*, qua de veri-

tate omnium iudiciorum nostrorum pronunciamus, existat, et quanam ipsa sit, disputari potest (1).

228. Sed de ejus existentia haud erimus solliciti, cum sibi non cohaereant sceptici (§. 33.), et academici (§. 25), et qui cum iisdem sentiunt Petrus Baylius (§. 62.), Daniel Huetius (§. 54.), Berkeley (§. 54.), David Humius (§. 55.), alii-que; de omnibus enim dubitantes se produnt dementes; atque passim refutavimus, de fontibus veritatis agentes (2). Sed quodnam sit hocce criterium, potius hic est quaerendum. Quot capita forsitan, tot sunt sententiae. Tota lis est, uti nobis videtur, ex eo, quod diversam ineant viam in statuendo principio philosophiae, seu, uti dicitur, *il punto di partenza*. Ex hac opinandi diversitate circa laudatum initium factum est, ut Plato criterium in *evidentia intelligibili* reponeret (§. 24); Aristoteles partim in hac ipsa evidentia, et partim in ministerio sensuum (§. 26.); Epicurus in sensuum testimonio (§. 30), quem secutus est Sarpi (§. 70), omnesque materialistae. Cartesius in idea clara, et distincta rei (§. 45); Malebranchius in evidentia, quae vinci nequit, seu reali absoluto (§. 47); Leibnitiuss in triplici evidentia metaphysica, physica, et morali (§. 51); in sensu communi Reid (§. 56), Beattie etc. (ibid.), Basedow (§. 66.), aliique; in verbo Dei revelantis Bonaldus, De La Mennais (§. 63), aliique rigidi supernaturalistae; in quadam divina inspiratione Cousin (§. 64); in

(1) Quapropter, cur sensu intimo, aliisque evolutis acquirendae veritatis mediis non decipiamur, ratio est unicuique medio propria; cur vero eujuscumque medii rationibus non decipiamur, ratio generalis reddi debet, quae in *norma seu regula* ponenda est, qua prohibemur respuere certitudinem per illa media acquisitam. Iam patet, nos perquirere de criterio veritatis objectivae, non subjectivae; in hac enim veritate nulla falsitas esse potest, cum nulla pugna adesse queat inter ideas nostrae mentis, et nostra iudicia, secus non videremus, quae videmus. Deinde perquirimus de criterio veritatis, quae respicit rerum potius existentias, quam essentias, quae plerumque nobis sunt imperviae.

(2) Neque cum scepticis, qui de omnibus omnino dictitant dubitandum esse, disputari potest; quia ad disputandum est ab aliquo procedendum principio ab utraque parte admissio (§. 198); sceptici vero immoderati omne inficiantur principium, imo et de propria dubitant existentia. Hujusmodi veritatis hostes tantum verberibus corripri possunt, aut, si malis misericorditer agere, in dementium domibus eos recludas oportet. Mirum est, etiam Alphonsum Testa (*Filos. della mente disc. 4. Della scienza delle cose*) totum esse in destruendis probationibus hucusque desumptis a Reid, Galluppio, Romagnosi, Degerando, et aliis a sensu intimo, a sensu communi, a consensu hominum, ab experientia, atque pariter in oppositis Idealistarum responsionibus refutandis, quoniam, quid ipse opinetur, demonstret. Sic autem nos in scepticorum castris relinquit.

lumine mentem movente, et illustrante, aut in Deo, aut in ego deificato, aut in nihilo Kant (§. 67), Fichte, Schelling (§. 68); in idea absoluta Hegel (§. 69); in principio contradictionis Romagnosi (§. 72); in ratione Caesar De Oratiis *Sul metodo universale di filosofare*; in idea entis Ochinus, Andreas Sciolla, Rosmini (§. 77); in sensu intimo Galluppi (§. 80); in quodam increato lumine a Deo manante Vincentius Gioberti (§. 78); in consensu omnium gentium Quetelet, alique.

229. Ut certa ab incertis secernantur, notamus, criterium hocce universale distinctum esse a mente, seu ab activitate ipsius, quae potius est *principium reale, et efficiens* nostrarum cognitionum, praesertim vero, quia aliud criterium requireretur ad judicandum de mentis activitate. Hinc neque hoc criterium potest esse mentis operatio quaecumque, veluti perceptio, iudicium, quia de his idem dici potest ac de mentis activitate. Deinde animadvertimus, veritatem logicam esse *objectivam*, nempe consistere in convenientia subjecti cum praedicato a mente percepta (§. 187.), licet et *subjectiva* esse possit, sed tunc reponitur in convenientia idearum, et iudiciorum cum objectis a mente efformatis (§. 190.). Criterium itaque, quod quaerimus, debet adeo illustrare nostrum intellectum fulgore huic convenienti, et spiritali, ut intellectus illam clare intueatur convenientiam subjecti cum attributo, uti videt corpora circumstantia oculus corporis solis splendore percussus.

230. Hunc fulgorem in *evidentia* situm esse, nobis videtur, quae est veluti mentis lumen indicans ea, quae sunt, uti sunt; qua remota, noctis umbra obvolvitur; qua adstante, veritatem prospicimus. Sed antequam rem conficiamus, quid proprie evidentia sit, definiamus. Certum est, mentem humanam esse tali natura donatam, ut, vix ab ipsa cognita relatione attributi cum subjecto, sive unico intuitu, sive tertiae ideae subsidio, illico ad assensum praestandum rapiatur. Assensus iste itaque oritur quidem ex ipsa mentis naturali dispositione, sed simul supponit cognitam relationem, hancque relationem ipsi menti tanto fulgore occurrentem, ut umbra nulla sit, oppositumque repugnet. Jam vero illa quaecumque nostrae mentis dispositio, qua, positis aliquibus requisitis, impellitur ad sic, et non aliter judicandum de aliqua re, dicitur *evidentia*. Quare evidentia non est ipsa claritas relationis cognitae, abstracte considerata, quae claritas minime est in rebus, sed est *terminus*, ad quem mens ultimo pertingit. Neque est ipsemet intuitus mentis, qui praecedit eviden-

tiam, et ponitur ad evidentiam amplectendam, ut ita loquar. Neque est clara rei cognitio, quae est effectus evidentiae, et ab ista semper sequitur. Neque est certitudo, sed medium, sine quo certitudo non respicitur. Quare in conceptu *evidentiae* ingreditur elementum *ontologicum*, seu objectivum, quod consistit in veritate, et realitate objecti, quae evidenter apparent, vimque habent extorquendi mentis consensum: et elementum *psychologicum*, seu subjectivum, quod situm est in quadam animi dispositione, et determinatione ad verum.

231. *Evidentia est intrinseca*, si requisita posita, ad sic, et non aliter judicandum impellentia, ab ipsa rei natura depromantur; hac evidentia donatur propositio: *totum est quolibet sua parte majus*; est *extrinseca*, si mens ad sic judicandum a motivis extrinsecis cogatur: uti in hac propositione: *Romulus condidit Romam*. Est *metaphysica*, si innitatur relatione percepta inter subjectum, et attributum, cujus oppositum repugnat; *physica*, si requisita illa naturae legibus physicis nitantur; *moralis*, si illa requisita fulcianatur moralitatis, et humanae prudentiae legibus. Est *immediata*, si unico mentis intuitu; *mediata*, si tertiae ideae subsidio adhibito mens ad judicium impellatur. Ex quibus patet, eandem evidentiam esse posse simul *intrinsecam*, *immediatam*, *metaphysicam*, uti in hac propositione: *bina binis addita faciunt quatuor*: *extrinsecam*, *immediatam*, *physicam*, uti *Neapolis est urbs Italiae*, si ipsam vidi; *intrinsecam*, *mediatam*, et *metaphysicam*; *extrinsecam*, *mediatam*, *moralement* (1).

232. *Criterium generale pro omnibus veritatibus* 1. ad omnes reapse extendi debet, alioquin esset fons peculiaris; 2. nulla debet egere demonstratione, alias aliud ante ipsum admittendum foret; 3. intellectum debet cogere ad sic judicandum, aliter neque certae veritatis foret criterium, neque pro veritatibus necessariis inserviret, neque fulgore suo mentem repletet; 4. cum veritate semper connexum esse debet, alioquin non posset haberi pro veritatis criterio.

(1) Regulae observandae circa hujusmodi evidencias legantur in Del Giudice (*Log. de arte Crit. c. 1.*). Evidentiam aliqui dividunt etiam in *objectivam*, et *subjectivam*, utque *objectivam* reponunt in illa luce, et capacitate apparenti nostro intellectui, quibus gaudet motivum nostrum assensum attrahens; *subjectivam* vero in ipso mentis lumine perceptionem objecti perfundente. Neque falluntur, qui evidentiam *moralement* omnino expungunt, quia haec evidentia in iis habet locum, quae neque a nostro intellectu, neque a nostris sensibus, sed ab aliena haurimus testatione; porro *evidentia* non est, ubi *fides* obtinet, cum nulla claritas nostrae menti ex fide effulget.

233. Hisce praestitutis, asserimus, *ultimum, et generale criterium omnis veritatis esse evidentiam*. Quandoquidem ipsa donatur quatuor illis characteribus, quibus diximus, ordinandum esse veritatis criterium (§. 232.). Nam 1. ad omnes extenditur veritates, cum nulli veritati homo assensum praestet, nisi evidentia illa fulgeat, et cuique veritati illico exhibeat assensum, dummodo evidentiae fulgore splendere reperiatur. Certe ad evidentiam reducuntur omnes veritatis fontes, qui veritatis fontes haud essent, si evidentia non micarent. Quare enim tu ex. gr. credis, *Romulum condidisse Romam*? Quia testimonium, narrans *Romulum condidisse Romam*, est omni exceptione majus. Sed quare? Quia illud testimonium sua auctoritate consensum extorquet. Sed quare? Quia evidens est. 2. Evidentia nulla eget demonstratione, nam ipsa est adeo cum anima *identificata*, ut, fulgente ipsa, anima quiescat, ac etiam invita assensum praestet. Nonne tu dementem putares, qui diceret evidentiae ideam non esse *per se* claram? 3. Evidentia reapse cogit intellectum ad sic, et non aliter judicandum, cum, vix ipsa affulgente menti humanae, ne minimum de veritate intellectus dubitet, imo oppositum impossibile reputans, statim ad assensum prorumpat. 4. Evidentia demum semper cum veritate copulatur, uti quisque sibi testis est; nam, si aliquid est evidens, requisita ad veritatem habet, ideoque falsum esse nequit.

234. Sed opponi potest 1. Si evidentia foret universale veritatis criterium, omnia, quae certa et vera sunt, essent quoque evidentia; sed hoc falsum esse eruitur ex eo, quod mysteria nostrae Religionis haud sint evidentia, licet certa et vera sint. 2. Nullus est nexus inter evidentiam, acceptam veluti nostri intellectus dispositionem (§. 230.), et objectivam veritatem, quia illa tantum mentis est, haec vero est in objectis. 3. Multi defendunt errores, et dicunt, se ad judicandum impelli ab evidentia; et nos ipsi multa defendimus uti evidentia, quae postea falsa inveniuntur. 4. Si evidentia nos non decipiat, hoc nos eruimus ex usu facultatum nostrae mentis, a principio contradictionis, a veracitate Dei. Ergo non est ultimum criterium.

235. Sed ad 1. dicimus, omnia, quae sunt evidentia, esse simul certa, et vera. Evidentia enim non in objecti claritate reposita est (§. 230.), sed in dispositione mentis a requisitis infallibiliter impulsae ad sic judicandum. Quare si aliquam rem talia requisita comitantur, ut animum moveant quadam morali coactione, animus ipse illico tutus quiescit. Ceterum



animus aut novit rem ita esse, et quare ita sit, uti evenit in iis, quae *intrinseca*, et *metaphysica* evidētia donantur; aut novit tantum rem ita esse, uti accidit in iis, quae sunt *extrinsece* evidētia. In utroque casu adsunt requisita, quae ab animo omnem errandi metum removeant. Quare omnia, quae evidētia donantur, sunt etiam *certa*. Sic requisita, seu motiva credibilitatis sufficiunt, ut evidētia dicantur mysteria nostrae fidei, non quidem *in se*, sed quatenus, inspectis illis motivis, animus rapitur ad illa credenda, ageretque imprudenter, nisi ipsis fidem adhiberet. Sed *vera* quoque sunt, quae evidētia fulgent; nam veritas quidem est in objecto, sed ideo veritatem dicimus, quatenus ipsi assentitur mens (§. 187.); quae certe motivis, seu indiciis impellitur, quae motiva, mentem inducentia ad sic iudicandum, evidētiam constituunt. Igitur evidētia est motivum ultimum, cur certa, et vera credamus, quae illa fulgent evidētia. Verum non omnia, quae sunt certa, et vera, sunt etiam evidētia, quae est propositio conversa primae demonstratae, quae sic est: *omnia, quae sunt evidētia, sunt simul certa, et vera*. Multa siquidem sunt vera, imo et certa a nobis habentur, quin tamen evidenter apparent. Huiusmodi sunt, quae nostri intellectus aciem superant, aut, si non superent, fide divina sunt tenenda. In ipsis enim tuti, certique sumus ob Dei revelantis veracitatem; illisque firmissime adhaeremus, quin *evidens* eorum apparentia nos adigat. Imo aliqua asserta veluti *vera*, et *certa* tenere possumus ex humana auctoritate, quin tamen evidētia sint; *evidētia* enim non habet locum, ubi *fides* est (§. 231.) (1).

Ad 2. respondemus, nullum quidem esse nexum inter affectionem animi, et objecti veritatem; sed requisita necessaria ad veritatem consequendam, quae veritatem semper comitantur, consensum extorquent, nexumque proinde constituunt inter veritatem objectivam, et evidētiam, ex qua illa inferitur. Quare, posita evidētia, ponitur certitudo, ponitur veritas. Adde, quod evidētia *objectiva* quoque esse possit (§. 231.)

Ad 3. dicimus, multos quidem inveniri, qui errores defendentes dicunt, se impelli ad sic iudicandum ab evidētia;

(1) Itaque *scire*, et *credere* in hoc differunt, quod ea dicamur *scire*, quae exhibent intimus sensus, intellectus, ratio, sensus externi; *credere* vero, quae alterius auctoritas persuadet. Quare qui scit, ipse videt; qui credit, idearum connexionem non videt. Vide Genouensem ( *Log. Crit. l. 5. c. 2.* ). Fides *evidens* esse potest quoad credibilitatis motiva, sed erit obscura quoad objecta, quae ipsae docet.

sed experiuntur, quaeso, in mente quamdam coactionem ad illas defendendas? Si bona fide loqui vellent, certe evidentia se ductos non dicerent. Ceterum hoc ad summum fieri posset in veritatibus deductis, non vero in immediate evidentibus. Ast si etiam in illis veritatibus conditiones pro quolibet specie veritatis expenderentur, si attentio, uti par est, adhiberetur, si rationes omnes, amota quavis animi praeventione, cribrarentur, evidentia fulgeret, erroresque non defenderentur, aut saltem iudicium suspenderetur, evidentia non affulgente menti. Idem dicatur de nobis, qui aliquando defendimus veluti evidentia, quae postea falsa reperiuntur. Hoc est, quia non, uti aequum erat, nos ipsi gessimus prudenter, adhibendo nempe fontes veritatis, aut iudicium non suspendendo.

Ad 4. respondemus usum facultatum mentis nostrae esse causam efficientem, ob quam ponitur evidentia, non vero rationem certitudinis nostri iudicii (§. 230.). Principium contradictionis ideo verum dicitur, quia evidentia fulget. Deus est quidem prima veritas in se, et ratione originis, non vero prima ratio nostrae certitudinis. Imo ideo dicimus, Deum nos non decipere, quia evidentia cognoscimus, Deum non esse mendacem.

## ARTICULUS SEXTUS

### DE USU PROBABILITATIS.

236. Hucusque loquuti sumus de veritatis fontibus; est quaedam sunt, circa quae *indiciis insufficientibus* contenti esse debemus (§. 191.). Haec autem indicia insufficientia sunt aut quia fere aequiparantur indiciiis certitudinis, non omnino tamen auferentia errandi metum; aut quia possunt aequae fallere, et non fallere; aut quia potius fallere possunt, quam non. In primo casu illa constituunt *probabilitatem*, quae *intrinseca* est, si exurgat ab indiciiis depromptis ab ipsa natura rei, de qua agitur; *extrinseca* vero, si descendat ab hominum auctoritate (1): in secundo casu constituunt *dubium*,

(1) *Probabile* vi nominis idem est ac dignum, quod probetur, uti *amabile* dignum, quod ametur. Aliqui *probabilitatem* referunt ad momenta, eorumque pondus, *opinionem* vero ad statum mentis, quae haesitans de opposito assensum tamen objecto praebet. Hinc *probabilitas* est pondus rationum, quibus *opinamur*.

quod *positivum* est, si ex utraque parte indicia sint aequalia; si vero nulla ex utraque parte sint indicia, *negativum* dicitur, quod melius vocatur *ignorantia*, quae est idearum carentia; in tertio casu constituunt *improbabilitatem*. Si *certitudo* ex. gr. in gradu decimo resideat; *probabilitas* in sexto ad nonum; *dubium* in quinto; *improbabilitas* in primo ad quartum (1). Indicia praesertim definienda sunt a fontibus, de quibus loquuti sumus in toto hoc capite, et quibus quaevis nititur disciplina; ex. gr. indicia pro propositione physica ab ipsis scientiis physicis sunt colligenda.

237. Ex quibus eruitur, 1. aliquid esse posse magis, minusve probabile, vel improbabile pro indiciorum pondere, aut numero; 2. posse aliquid probabile esse falsum, et improbabile, et dubium esse verum; quia indicia pro improbabili, vel dubio usque ad certitudinem augeri possunt, deficere vero usque ad ignorantiam pro probabili; 3. quare non ideo aliquid rejiciendum esse, quia est improbabile, vel dubium, aut admittendum, quia probabile; 4. eo probabiliorum esse aestimandam aliquam sententiam, quo majorem convenientiam habet cum veritatibus certis, aut cum fontibus cujusque disciplinae; 5. unum indicium validum posse destruere plurima levia, et opposita: uti, si invenias famulum Petri sanguine conspersum, et manu ensem districtum tenentem, tu illico concludes, famulum interfecisse Petrum, licet scias, Titium inventum per viam fugientem, et pavore affectum esse Petro inimicum, cum Petro illa die rixatum fuisse, ac mortem Petro fuisse minatum; 6. nullius ponderis esse extrinsecam probabilitatem si desit intrinseca, quia ad veritatem nil prodest hominum auctoritas, si nulla sint indicia ex cujusque disciplinae fontibus deprompta: ita ex. gr. tu numquam mille hominibus credes, si aliquid tibi narrent, quia certo scis, id a nulla via colligere potuisse (§. 221.); 7. probabilitatem, et improbabilitatem definiri posse a recessu ab ignorantia, et ab accessu ad veritatem, quia eo probabilior est sententia, quo magis ab ignorantia recedit, vel ad veritatem accedit (2);

(1) Hinc deduces, quinque esse animi nostri status relate ad verum, nempe certitudinis, probabilitatis, dubii, improbabilitatis, ignorantiae.

(2) Animadvertit tamen Genuensis (*Log. Crit. l. 3. c. 4.*), probabilitatem non posse ex accessu ad veritatem definiri, quia in iis, in quibus probabilitatem sequimur, veritatem non habemus, et certitudo omnino ignoratur, quoniam gradu ab ea distet probabilitas. Hinc tenet, *probabile* dici, quod verisimilibus argumentis desumptis ex fontibus, et principiis cuique scientiae propriis potest comprobari, quae tamen non omne auferunt ab anima scrupulum.

8. probabilitatem, dubium, improbabilitatem esse posse in iudicio, in ratiocinio, in demonstratione, prout in istis indicia convenientiae attributi cum subjecto sunt maiora, vel minora; 9. conclusionem, quae eruitur a syllogismo, vel demonstratione, esse debere probabilem, dubiam, improbabilem, si talis fuit aliqua antecedens propositio, quia conclusio sequitur partem debiliorem (§. 157).

238. Usus probabilitatis esse potest in Traditionibus, in Hypothesibus, in Analogia, in arte Hermeneutica, in Critica. Loquimur primum de traditionibus. Saepe non scriptum est aliquod factum, vel dictum, sed de uno ad alium testem ore transmissum: tunc habetur *traditio*, quae proinde est oralis testium series numquam interrupta ab epocha eventus ad haec usque tempora. Quaedam considerata sunt in *origine traditionis*, quaedam autem in *serie testium sibi invicem succedentium*. In origine videndum est, utrum factum traditum fuerit publicum, necne; cujus aetatis sit; quaenam fuerit indoles populi, penes quem notum fuit; quaenam scientia, et probitate primus scriptor illius traditionis fulserit. In serie testium est considerandum, utrum quaelibet linea traditionalis factum narraverit; utrum narraverit eodem modo, saltem quoad substantiam; utrum posterioris aevi scriptores scientiam, et probitatem calluerint; utrum isti factum ipsum, et circumstantias scrutati, et rimati sint. Siquidem, si factum fuit publicum; recentis aetatis; primus scriptor scientia, et probitate micabat; ad fabulas laud pronus erat populus, penes quem contigit; quaelibet linea traditionalis ab ultima regrediendo ad facti originem plures testes habet, qui semper eodem modo factum ab ipsis saepe examini subjectum narrarunt; pro certo factum illud est tenendum, vel probabili, vel dubio, vel improbabili pro maiori, minorive harum circumstantiarum numero, et qualitate. Si enim omnes istae, et aliae huiusmodi simul connectantur, certitudo paritur, uti de factis historicis diximus (§. 222). Ex quo patet, falsos fuisse Lockium, D'Alembert, La Place, qui putarunt tantum minui traditionem, quantum ab origine recedit.

239. Ad hypotheses descendamus. (§. 136.). Cum philosophi alicujus phaenomeni causam ignorant, aliquam fingunt, quam probabilem credunt. Haec fictio *hypothesis* dicitur. Ut probabilior statuatur hypothesis, necesse est, 1. ut phaenomeni existentia prius statuatur; 2. ut omnes notentur circumstantiae, quae ipsum comitantur; 3. ut omnes causae possibiles examinentur; 4. ut illa, veluti probabilior ad-

mittatur causa, quae magis phaenomenon explicat. Ceterum quaecumque sit hypothesis, numquam probabilitatis gradum praetergreditur, et tunc solum ad certitudinem accedit, fitque *thesis*, cum observatione, et experimentis confirmatur. Caveat proinde philosophus ab hypothesisibus, quae saepe ruunt, veluti ignis fatuus, qui cito evanescit. Plurimi, qui de omnibus rationem reddere exoptant, ad hypotheses recurrunt; Politici, Moralistae, Antiquarii, Physici praesertim, et Astronomi; imo et Metaphysici, qui hypotheses circa societatem animi cum corpore multas posuere, ne de aliis loquar.

240. Etiam in analogia (§. 170) probabilitatis usus esse potest. Cum homo, naturam regi simplicioribus, ac constantibus legibus, conspiciat, saepe deducit ex similibus causis effectus similes, et e converso. Hoc est argumentari ex *analogia*, quae proinde tota in ipsa rerum similitudine sistit. Ut tamen argumentum ab ipsa deductum saltem probabile sit, necesse est; 1. ut *certa*, et non *apparentia* sicut similitudinum *signa*; 2. ut multa sint haec signa, ne decipiamur specie recti; 3. ut nulli observationi, nulli experimento rite instituto, nulli authentico monumento analogia adversetur, imo ab istis confirmetur; alioquin falsa amplectimur, vera relinquimus. Ex quibus patet; 1. eo maiorem vim habere argumentum analogicum, quo maior est similitudo; 2. difficile admodum esse hoc argumentum, quia omnes circumstantias similes noscere non semper, imo raro datum est; 3. ac proinde facile illudi posse, qui illo uti vellet, uti illusor dicitur, qui incolas terrae hominibus similes in luna reponit. Ceterum in vita sociali analogia vivimus; et vivere debemus, ne infelices essemus. Nonne analogia utor, cum cibum comedam, quem ex similitudine cibi alterius diei innoxium puto? Ita de aliis sexcentis dicas velim.

241. De usu probabilitatis in arte hermeneutica loqui necesse est. Scriptores, qui nobis aliquid memoriae tradiderunt non semper loquuti perspicue sunt, saepe clarius noluerunt, saepius non potuerunt loqui. Ars illa, qua traduntur regulae ad obscura loca alicujus auctoris intelligenda, *hermeneutica* nuncupatur. Tres regulae, quae alias complectuntur, prae oculis hac in re habendae sunt, ut pro certo, aut probabiliter auctoris sensum assequamur. Prima regula est, ut *ad usum, quem auctor in scribendo servavit, attendatur*. Quod fit, si materia, de qua agit auctor, legentem non fugiat; si textus legatur, et non versio, quae non semper auctoris mentem reddit; si proinde legens linguam cal-

leat auctoria; si codice utatur tutiori; si ipse commentaria pervolutet, ac perfectione propriae illius disciplinae dictionaria consulat; si comparet loca contextus; si vocabula referat ad usum illius loci, et aetatis, quibus auctor vixit; si vocabula, ubi nil impedit, in sensu obvio, et naturali accipiat. Secunda regula est, ut *intentio auctoris intelligatur*, si ex usu primae regulae nil collectum sit. Intentio auctoris eruitur ex usibus, moribus, gestis aetatis, et gentis auctoris; ex motivo scribendi, nempe si jussu, aut sponte scripsit; ex majori, vel minori libertate scribendi; ex eo, quod per incideus aut ex professo de illa re agat; ex definitionibus datis; ex exemplis allatis; ex systemate sectae, quam tenuit; ex indole propria auctoris; ex variis circumstantiis loci, temporis, in quibus, aut pro quibus scripsit auctor; ex amicis, et discipulis, et coaevis auctoris. . . Tertia regula est, ut, deficientibus primis regulis, *materia ipsa attente inspicatur, et perpendatur*. Hoc fit, si quaeramus in ipsa, quid auctor dicere debuerit, quidve potuerit; si antecedentia cum consequentibus locis, et loca parallela inter se comparemus; si rem, de qua agit, undequaque examinemus. Harum regularum auxilio aut certa, aut saltem probabilis auctoris sententia facile potest intelligi.

242. Demum de arte Critica disseramus, in qua plurimum est probabilitatis. Cum libri inveniantur multi, qui minime ab iis scripti sunt, quorum nomina praeseferunt, aut diversa, vel plura, vel pauciora continent, quam veri scripserunt auctores, aliquae requiruntur regulae, quibus veri auctores a suppositis, genuina scripta a spuris, secerantur, et quas suppeditat *ars Critica*. Liber est *genuinus*, seu *authenticus*, si sit auctoris, cui tribuitur; *suppositus*, si ab aliis, quam ab illo, cujus nomen praesefert, conscriptus sit. Liber est *integer*, si contineat ea tantum, quae scripsit auctor; *corruptus* vero, si plura, aut pauciora, aut diversa contineat, quam quae auctor scripsit, et dicitur *auctus*, si plura, *mutilus*, si pauciora, *interpolatus*, si diversa contineat. Dicitur etiam *authenticus* liber, qui licet *anonymus* sit, revera scriptus fuit ea aetate, et penes eam gentem, in quibus auctor vixit, nihilque ipsi additum, demptumve est, nihilque in ipso mutatum. Causae *corruptionis*, et *suppositionis* sunt; 1. mala fides scribentis; 2. scribarum ignorantia aut malitia; 3. dictantis non satis distincta pronuntiatio, aut festinatio, aut distractio, aut ignorantia, aut etiam malitia; 4. impostores, qui veterum scripta sunt imi-

tati, ut legentes fallerent; 5. criticorum ignorantia, aut superbia; 6. librariorum sacra auri fames; 7. Alexandriae Reges, qui undique libros quaerebant, quos recentes scribebant, veteribusque tribuebant, allecti spe magni praemii.

243. Iam vero *suppositus* est liber: 1. qui in veteribus cathalogis aetate auctoris posterioribus non recensetur, cum opportunitas non deesset, aut aliis tribuitur; 2. qui a veteribus suppositus est reputatus, ductis valida ratione; 3. qui continet, quae auctor non sentit, dummodo non constet, sententiam mutasse, uti patet de s. Augustino circa Manichaeorum principia; 4. qui continet quaestiones post auctoris aetatem motas; dummodo non probetur, has tantum in librum postea irrepsisse; 5. qui nugatoria, et contradictoria continet, et tamen auctori tribuitur, qui sapientia, et cultu floruit: si tamen non constet, in juvenili aetate illum scripsisse, uti *Iustinus* a *Metastasio*; 6. qui vocabula continet sequioris aetatis, urbes, oppida, gentes, homines, quorum nomina posteriori extitere tempore, aut stylum imitatur recentioris auctoris, dummodo non tradatur, illa tantum vocabula immissa in libro fuisse. *Corruptus* vero liber dicitur; 1. qui recentior editus plura, pauciora, vel diversa continet, quam quae in veteribus editionibus inveniuntur; 2. qui locum non habet ab alio auctore laudatum, aut excerptum; 3. qui vocabula, sententias, quaestiones continet, aut menti auctoris oppositas, aut recentioris aetatis. Quare admodum probabile est, librum esse *genuinum*, qui talis habitus est ab omnibus *proxime, et continuata serie sequentibus eum aetatibus*; *proxime* quidem a coaevis inspectus, emptus, asservatus, lectitatus; a *sequentibus aetatibus* asservatus, et numquam rejectus.

## CAPUT TERTIUM

### DE ERRORE, ET IGNORANTIA.

244. Ex praeiactis fontibus, et ex statuto ultimo veritatis criterio in toto capite antecedenti uberrima cognitionum copia hauritur, ac multiplex veritas. Veritati opponitur *error*, et *ignorantia*, licet diverso modo. De hisce igitur, eorumque causis est hic sermo.

245. Veritas logica, de qua praecipue hucusque loquuti sumus, in convenientia reponitur idearum nostrarum cum objectis (§. 186). Error itaque habetur, cum animo videre

videtur convenientiam, vel discrepantiam subjecti cum attributo, sed contrarium est. *Error* proinde est assensus praestitutus falso, negatus vero iudicio; ideoque est falsum iudicium deductum ex falsis principiis, vel non rite a veris. Sicut autem iudicium intellectus, et voluntatis actum supponere videtur (§. 123); ita et error. Et quoniam veritas in *ideis* inesse potest (§. 108.), ita et *error*, qui in illis habet locum, cum *ideae* minime objectis suis respondent, sed interim respondere putantur (1). Putat Gioberti (*Errori Filos. del Rosmini lett.* 5.) *verum* esse semper *subjectivum*, *errorem vero objectivum*, quia veritas a Deo, error est ab homine, a quo oritur, quidquid vitii in scientifica cognitione reperitur.

246. In principiis, quae donantur immediata, et intrinseca evidentia, atque in iis, quae intimus testatur sensus, dummodo requisita adhibita sint, nullus esse potest error, quia evidentia sunt. Ast in ceteris veritatibus intellectus humanus saepe errori est obnoxius, uti quisque sibi testis locupletissimus esse potest, et historia humanarum cognitionum abunde docet. Causae proinde perquirendae sunt nostrorum errorum, quia, cognito morbo, facilis est curatio, maxime cum causa quoque morbi noscitur. Hae causae plures sunt, dictae aliquae *praejudicia*, quae sunt opinioniones animo inhaerentes, quae ad falsa iudicia animum impellunt (2).

247. Causa errorum prima est *in infantia*. Nam nutricibus, magistris, parentibus, poetis, sociis veluti conspirantibus, tenella aetas, quae sensibus tantum regitur, omnia pro veris recipit, *praejudiciisque* repletur, quae vix extirpari poterunt, nam *dediscit animus sero, quod didicit diu*, uti ait Seneca. Quare unusquisque, cum se obtulerit occasio, doctos viros consulat, libros probatissimos legat, expendat, quae Christianae Religionis, et rectae rationi quadrare non videntur (V. Tullius *qq. Tusc. l. 3. c. 1.*)

(1) Ignorantia, an error est majus malum? Majus certe error; quia magis error, quam ignorantia, favet passionibus, magis error, quam ignorantia, contentione, et bella progignit; facilius ignorantia, quam error expellitur.

(2) Praejudicia, seu praeprejudicatae opinioniones in *Novo Organo* pulchre *idola* vocat Bacon, (§. 44.), quasi nempe sint vanae imagines, quae tamen veri speciem praesferunt; scilicet *idola tribus*, praeprejudicia universae naturae humanae in se spectatae communis; *idola fori*, praeprejudicia, quae dimanant ex vulgi opinionibus, mentemque ex eorum loquendi usu pervadunt; *idola specus*, quae cuique sunt propria, et ex ingenii, et temperamenti diversitate oriuntur; *idola theatri*, quae ex falsa philosophorum doctrinis, quae veluti fictitios mundos, scenicosque efficiunt, ortum habent.



248. Secunda causa est *populus*, atque *omnis undique ad vitia consentiens multitudo* (Tullius *qq. Tusc. c. 1. n. 2.*). A populo mille prodeunt fabellae, quia *ex veritate pauca, ex opinione multa aestimat*, uti ait idem Tullius. Cum populo itaque consuetudine agentes *in scimus opinionum pravitate, a naturaque desciscimus*, ut ipse docet Tullius; etenim *populus est instar fluminis, quod gravia mergit, levia transvehit*, uti acute notat Baco de Verulamio. Quare cum doctis societatem unusquisque, si velit ab hac causa se praecavere, inire debet, ac populum fugere, quantum satis est, quia *sanabimur, si modo separemur a coetu*, uti dicit Seneca.

249. Tertia causa est *receptae opinionis praejudicium*, quod, tamquam crudelis noverca, est simul causa iurgiorum, parensque systematum, quae sibi mutuo destruunt. Hoc praejudicio tenentur, qui adeo veterum philosophorum sententiis delectantur, ut falsum aestiment, quidquid novae inventionis sapit; et qui adeo novitatis studio abripiuntur, ut vetera cuncta fastidientes, omnia falsa putent, quae nobis vetusti sapientes tradiderunt. Quare utrumque scopulum quisque vitare curet, seligatque proinde, quae rationi, atque communi doctorum sensui magis congruere videntur.

250. Quarta errorum causa est *auctoritas*; nam saepe usu venit, ut quis ideo aliquid verum dicat, quia magni nominis praeceptor verum tenuit. Ita Pythagoram ejus discipuli, ita Aristotelem scholastici veteres venerabantur (S. 26. 31), ut illi, quod Pythagorae, isti quod Aristoteli verum visum erat, pro vero acciperent. Ex hac philosophandi servitute fit, ut etiam avide legantur libri, a quibus recta ratio exulavit, quique ex luculenta corruptorum officina eruti sunt. Porro: *Quo semel est imbuta recens servabit odorem - Testa diu...*, uti ait Horatius. Quare nostra utamur ratione, atque cogitandi libertate in iis, quae recta ratione acquiri possunt, nullius addicti jurare in verba magistri.

251. Quinta errorum causa sunt *affectus*, nempe illi vehementiores motus ex viva boni, malive sensibilis representatione in anima excitati. Affectus sunt *vitra colore perfusa, quibus rerum aliarum colores immutantur*, ait Plutarchus; sunt *nebulae, quibus serena mentis regio opacatur*, uti Plato dicebat; sunt motus in aqua excitati, in qua objecta prospecta confunduntur. Affectus siquidem mentem turbant, attentioni otium non relinquunt expendendi rationum momenta, ideoque in errores impellunt *popellum, aequae ac sapientes viros, qui plura judicant odio, aut amo-*

*re, aut cupiditate, aut iracundia, aut dolore, aut laetitia, aut spe, aut timore, aut alia perturbatione mentis*, uti animadvertit Tullius (l. 1. de Orat.). *Quare* animum ab affectibus turbulentis amovere; iudicia suspendere, illis frementibus; iudicia alias formata de eadem, aut re simili in memoriam revocare; praecipue amorem proprium cohibere tenemur. Iuvenes vero recordentur illius effati Caesaris apud Sallustium: *Si libido possidet, et dominatur, animus nihil valet.*

252. Sexta causa errorum est *festinatio*, ex qua fit, ut non clare, et distincte res percipiantur, iudicia dein falsa efformentur. *Quare* sive studeas, sive iudices, festinationem fugito. (Tull. de off. l. 1. c. 5.)

253. Septima causa errorum est *mentis propriae imbecillitas*, praesertim si copuletur cum immoderato discendi desiderio. Ex hoc fonte enim est, ut quaeramus, quae vincunt nostrae mentis virtutem, pluribus studeamus sine ordine, hinc ideas obscuras, et confusas conficiamus, sicque in errores labamur. *Quare* unusquisque debet ideas claras, ac distinctas rerum adipisci; se abstinere a perscrutandis, quae sunt supra rationem, aut ejus mentis virtutem vincunt; ordinata studia percurrere; praemittere necessaria utilibus, utilia voluptuosis; plura expendere, unumque seligere; omnia suo ingenio aptiora suscipere, docente Horatio:

*Sumite materiam vestris, qui scribitis, aequam  
Viribus, et versate diu, quid ferre recusent,  
Quid valeant humeri . . . .*

254. Octava errorum causa est *sensuum externorum abusus*, quo fit, ut credamus eorum relationi etiam in iis, in quibus certe erramus. *Tactu* siquidem decipimur in corporum qualitatibus, et circa frigus et calorem, circa dolorem et voluptatem, quando haec mere ad corporis nostri partes referimus; *oculis*, quando colores qualitates reales supponimus; *olfactu, palato, auribus*, quando odores, sapes, sonos corporis qualitates credimus. *Quare* conditiones (§. 212.) adhibeantur, alique veritatis fontes examinentur, ne sensibus, uti dicitur, decipiamur.

255. Nona causa errorum est *ipsa structura corporis*, qua fit, ut alii alio modo cogitent, prout diversa est aetas, sexus, valetudo, iudoles. *Quare* indolem nostram non sequamur, atque in iudicando non obliviscamur, quantam partem corporis structura habere possit.

256. *Proprii ingenii confidentia* est decima causa errorum. Ex ipsa enim fit, ut aliorum iudicia indiscriminatim spernamus, nostraque, utut falsa, plurimi faciamus. *Quare* quisque alios viros in quavis disciplina celebres consulat, si-bique uni non confidat; recordetur, neminem esse ad omnia aptum, atque magnos viros in magnos errores esse saepe pro-lapsos.

257. Undecima errorum causa sunt *falsae species*, quibus fit, ut objecta nobis alio modo, ac sunt, exhibeantur, uti videre est in artibus, in commercio, in tota vita sociali, ubi objecta opposita nobis monstrantur facie. *Quare* plures obser-vationes, plures sensus, aliique periti adhibendi sunt, ne spe-cie recti decipiamur.

258. Loquamur modo de *ignorantia* (§. 236. 244.), quae est idearum carentia, quaeque oritur 1. a mentis imbecillitate; 2. a laboris impatientia; 3. a memoria labili; 4. a mediorum inopia; 5. a studiorum confusione; 6. a cogitandi servitute, atque etiam ab iis causis, a quibus gignitur error. *Quapropter* ad expellendam ignorantiam oportet, ut 1. necessaria in primis perquiramus, deia superflua; 2. novas ideas continuo labore adipiscamur; 3. ideas nostras studio improbo claras, et distinctas reddamus; 4. *quaerendo semper, et patienter quaerendo*, uti de se dicebat Newton, attentionem adhibeamus; 5. studia seligamus iugenio, aetati, sexui, statui, aliisque circumstantiis aptiora; 6. pedetentim, et ordine procedamus; 7. memoriam continuo exerceamus; 8. eligamus. praeceptores doctiores, et meliores; 9. libros nobis comparemus lectissimos; 10. servitutem philosophandi in iis, quae ductu rationis capi possunt, excutiamus; 11. affectus turbulentos coerceamus, aliaque adhibeamus media, de quibus, cum de errorum causis sermo fuit, verbum fecimus.

259. Verum Cartesius unum medium excogitavit, ut errores vitemus, atque egrediamur ab ignorantia, *dubium* nempe *universale* (§. 45). Juxta ipsum de omnibus in principio examinis est dubitandum, etiam de veritatibus mathematicis, etiam de Dei existentia; dein omnia sunt expendenda; demum id confitendum, quod verum, id respuendum, quod falsum invenitur. Ast perperam. Si omnis demonstratio, omneque ratiocinium a certo principio debet initium sumere, quodnam hoc erit in inquisitione Cartesianae? An illud *cogito, ergo sum*? Sed hoc aenigma est, aut ludus in re seria. Nam *cogito, ergo sum*, idem est ac, *sentio me esse cogitantem, ergo existo*; nempe *sentio me existere cogitantem, ergo*

*existo* ; quod idem est ac *sentio me existere* , ergo *existo* ; hoc est, *ego existo*, ergo *existo*. En principium Cartesii! Si tamen ad alios convincendos de sui existentia hoc usus sit dilemmate, et non ad sui convictionem, defendi potest cum cl. Mastrofini (*L'anima umana, e suoi stati t. 1. l. 1. c. 1. a. 2.*), quia dum aliis dicit *cogito* , dicit implicite se existere. Verum si mens suae cogitationis adjutorio suam existentiam probare studeret, procul dubio existentiam suam ex cogitationis existentia deduceret, et e contrario cogitationis existentiam ex existentia sua inferret, quod est circulus vitiosus, uti notat Gioberti contra Cartesium (*Introduz. allo stud. della filos. t. 1. not. 59.*). Neque rem conficit Cartesii schola altero principio, nempe *verissimum esse, quod in idea clara, et distincta percipitur*, quia ulterius quaeri potest, quonam principio probetur, esse verum, quod in idea clara et distincta percipitur? Recte Regius de dubitatione Cartesianae (*Cartes. ver. Spinoz. architec.*) ait: „*Eja! an res nulla ante enormem istam negationem fuit certa? An non vividissimo sensu ante illam dubitationem de existentia sui fuit certus, et majorem per dubitationem acquisivit certitudinem? An non ante vixit sine Deo in mundo? An antea nulla fuit allata ratio, quae certo Dei existentiam demonstret?* Prudens, ac peculiare dubium non respuimus; verum aliqua sunt, quae nullimode in dubium possunt revocari, quin rationi nuncium remittamus. Igitur *sapientia hominis est, ut neque te omnia scire putes, quod Dei est; neque omnia nescire, quod est pecudis; est enim aliquod medium, quod sit hominis, scientia nimirum cum ignoratione conjuncta et temperata*, uti ait Lactantius (l. 3. Instit. c. 3.)

## CAPUT QUARTUM

### DE PRINCIPIIS DEMONSTRATIONIS

260. Quoniam alibi innuimus (§. 173.), demonstrationem esse fulciendam principiis, ut recte procedat; ideo coronidis loco de hisce loquemur. Quidnam sit, et quotuplex, et quomodo sit absolvenda demonstratio, vidimus supra (171 ad 173, et 178, et seq.). Ast quale est principium illud, a quo, ipso

indemonstrabili permanente, omnes deducantur veritates (1)? Philosophi plura recensent hujusmodi principia, nempe 1. *Non potest idem simul esse, et non esse*, quod vocant principium contradictionis; 2. *Quod est, est*, quod dicunt principium identitatis (2); 3. *Nullus datur effectus sine causa*, quod autumant principium causalitatis; 4. *Nil fit sine ratione sufficienti*, quod appellant principium rationis sufficientis; 5. *Sine substantia modus esse nequit*, quod nuncupant principium substantiae; 6. *Quodlibet est, vel non est*, quod nominant principium medii exclusivi. De principiis *possibilitatis*, et *essentiae* etiam loquuntur philosophi; sed haec non pertinent ad rem praesentem.

261. Veritates aliae sunt *necessariae*, si numquam fieri possit, ut attributum subjecto non conveniat; aliae *contingentes*, si subjectum sine illo attributo concipi possit (§. 190). Omnia principia *a priori* sunt veritates necessariae, contingentes vero principia *a posteriori* (§. 197. 198). Aliud proinde est exquirendum principium pro demonstrandis veritatibus necessariis, aliud vero pro contingentibus.

## ARTICULUS PRIMUS

### DE VERITATUM NECESSARIARUM PRIMO PRINCIPIO.

262. Quodcumque principium demonstrationis tribus praecipue characteribus exornetur necesse est. Debet nempe 1. esse ita *per se clarum*, ut uno terminorum intuitu perspicue intelligatur: alias non esset primum, quia alio indi-

(1) Cave credas, nos asserere tantum *primum principium*, quod perquirimus, esse notum, aliaque omnia principia esse per ipsum demonstranda; iudicia enim analytica (§. 124.) immediata profecto non indigent demonstratione. Hoc itaque tantum dicimus, aliquid nempe adesse iudicium, quod ceteris omnibus veluti implicitum sit, et legem generalem, qua mens in iudicando ad assensum rapiatur, constituat.

(2) Dicunt principium *identitatis*, quia attributum, quod exaequat totum, vel ex parte subjectum, videtur *idem* eum subjecto; porro *idem* sonat *est* subjectum ac attributum *quod est*. Aliqui vocant principium *analysis*, quia ope analysis invenitur in subjecto reperiri praedicatum. Sic e. g. *triangulus est figura trium angulorum, et trium laterum*, in quo exemplo attributum est *idem* eum subjecto; aut *triangulus est figura plana*, in quo exemplo attributum ex parte est *idem* eum subjecto. Aliqui principium *contradictionis* per illud *identitatis* demonstrare nituntur, hocque proinde ponunt pro supremo scientiarum principio, dicentes: si *quod est, est*; ergo *quod est, nequit non esse*, alioquin falsum foret *esse, quod est*.

geret, quò clarum fieret; 2. esse ita *indemonstrabile*, ut potius demonstratione obscurius fiat: alias non esset prima veritas in serie veritatum connexarum in demonstratione; 3. ita *universale*, ut ad omnes veritates extendatur: alioquin plura forent principia veritatum ejusdem classis. Verum quale ex dictis principiis (§. 260.) hisce donatur characteribus? Multi multa dicunt: sed nos, contra Lockium (*Intell. hum. l. 4. c. 4.*), aliosque, principium contradictionis pro necessariis veritatibus profiteamur. Quare

263. *Principium contradictionis est primum in veritatibus necessariis demonstrandis principium.* Nam 1. est *per se clarum*, quia intellectus illud primo intuitu attingit, neque quis tantisper illud negare, vel de eo dubitare potest, quin simul confiteatur; nam si neget, vel de eo dubitet, falsum esse putat; putat vero falsum, quia credit, non posse simul esse verum; sed a principio contradictionis fit, ut falsum esse non possit simul verum; 2. est *indemonstrabile*, quia si demonstrari posset aliqua propositione, quae prior foret contradictionis principio; undenam constaret, illam propositionem non esse falsam, nisi diceretur, esse veram, quia nequit esse falsa et vera simul, nempe nisi principium contradictionis admitteretur? 3. Est *universale*, nam nulla est veritas necessaria, cujus attributum essentialiter non conveniat subjecto. Si quis hoc neget, in principium contradictionis recidit. Finge enim, te negare, *circulum esse rotundum*; ergo est, et non est rotundus; est, quia ad essentiam circuli rotunditas pertinet; non est, quia hoc negasti. Sed hoc repugnat, quia *idem non potest simul esse, et non esse*.

264. Sed forsàn dices, principium contradictionis supponere principium identitatis 1. tum quia ideo verum est, *idem non posse simul esse, et non esse*, quia, *quod est, est*; 2. tum quia principium contradictionis est propositio *modalis*, quae posterior est *pura*, uti est principium identitatis (§. 129.); 3. tum quia principium contradictionis continet primum membrum negativum, quod certe est posterius positivo expresso in principio identitatis.

265. Nam respondemus ideo verum esse, id *esse, quod est*, quia repugnat, aliquid *simul esse, et non esse*, uti patet. Propositio dein *modalis* est quidem posterior *pura*, quia oportet, ut prius aliquid sit, et postea sit illo modo, sed tunc consideratur veluti complexus subjecti, attributi, et copulae. Si vero propositionem perpendamus, quoad perspicuitatem, tunc *modalis* est prior *pura*, quia illa est ista clarior. Demum mem-

brum negativum in principio contradictionis potest esse affirmans; nam potest dici: *esse simul, et non esse est impossibile*, in quo primum membrum est affirmans, et subjectum copulative continet *esse simul, et non esse*.

266. Neque demum dicas, hoc principio non detegi veritates ignotas; quia hoc unum hic tuemur, illo principio directe, vel saltem indirecte omnes veritates demonstrari. Ceterum veritates evidentes potius hoc principio declarantur, quam demonstrantur; si enim demonstrarentur, obscuriores evaderent. Hinc licet - *bina binis addita conficiunt quatuor* - principio contradictionis demonstrari posset; tamen hac via potius veritas obnubilaretur (§. 160. not. 1.)

## ARTICULUS SECUNDUS

### DE VERITATUM CONTINGENTIUM PRIMO PRINCIPIO.

267. Quoniam in veritatibus contingentibus (§. 261.) non repugnat, subjectum esse, aut non esse illo attributo adornatum; ideo principium contradictionis ipsis inservire nequit. Aliud itaque principium pro hujusmodi veritatibus est statuendum, hocque post Leibnitium in *ratione sufficienti* constituunt philosophi, qui illud nunciant: *nil datur sine ratione sufficienti*. Dicitur vero principium *rationis sufficientis*, quia ejus ope intelligitur, quare aliquid sit, vel non sit: hoc modo potius, quam alio. Principium *determinans* quoque vocatur, quia ipsius vi objecta evadunt determinata. Ratio vero sufficiens est *intrinseca*, si sit in ipsa re; *extrinseca* autem, si extra rem inveniatur.

268. Aliqui confundunt hoc principium cum illo *causalitatis*, quia attributum praeter essentiam subjecto conveniens, est veluti effectus actionis subjecti, et attributum reapse *effectum* vocant, nos vero *rationatum*. (1). Hoc princi-

(1) Sed perperam haec misecutur. Nam causa supponit aliquid fieri, ratio vero sufficiens aliquid *esse*; porro Deus non *efficitur*, sed *est*. Causa minus, latius vero patet ratio sufficiens; ideoque haec perquiri potest circa veritates a nobis admissas, et dicitur principium *cognitionis*; circa possibilitatem alicujus rei, et vocatur principium *possibilitatis*, circa res quascumque factas, et dicitur principium *actualitatis*; in quo ultimo tantum sensu eum causa confundi potest. Demum aliquid rationi sufficienti tribui potest, quod causae negari debet; sic e. g. Deus est esse existentiae ratio sufficiens, non causa.

pium utilissimum est ad res naturales expendendas, eorumque phaenomena exquirenda; nam, posita ratione sufficienti, casus expellitur, veraeque causae perquiruntur, cur res ita se habeat, vel non. Illud exsufflare praecipue conatus est Beguelin (*Dissert. Academiae Barolin. oblat.*), quem impugnavit Gerdil (*Reflexion sur une memoire de M. Beguelin*).

269. *Sed principium rationis sufficientis est primum in demonstrandis veritatibus contingentibus.* Nam 1. est *per se clarum*, siquidem omnes, non exceptis pueris, cum aliquid novi vident, *rationem* perquirunt; quod demonstrat, omnibus hoc principium, saltem implicite, notum esse; 2. est *indemonstrabile* per veritates contingentes, quarum est principium, licet sit demonstrabile per contradictionis principium, si accipiat in seipso, et ut veritas necessaria; 3. est *universale* relate ad veritates contingentes, quia cum in his attributum subiecto praeter essentiam conveniat, *ratio* sufficiens adesse debet, propter quam illa convenientiae relatio sit inter subiectum, et attributum. Si in omnibus veritatibus contingentibus haec ratio non foret, aliquis effectus esset sine causa, aut a nihilo, aut ipsum nihil effectus foret. Finge enim, ut Wolfii exemplo utar, te admovere lapidem in ardentibus prunis, atque hunc ex frigido fieri calidum. Si neges rationem sufficientem mutationis in lapide, admittere cogeris, aut effectum, nempe mutationem in lapide, esse sine causa, aut a nihilo originem habuisse; aut nihil in lapide accidisse, quae omnia absurda sunt.

270. *Sed fortasse oppones, plura in rerum natura casu, plura in somniis fieri sine ratione sufficiente. Respondemus, quae casu dicuntur fieri, rationem sufficientem habere.* Nam casu fiunt, quae fiunt praeter naturalem operantis determinationem; ita si dejectus a turri aliquis lapis hominem transeuntem interficiat; aut praeter agentis rationalis intentionem, uti si venator interficiat hominem, dum feram persequitur. *Ast ratio sufficiens est in actione posita a causa, quae tamen non erat ad illum effectum determinata, aut illum non respiciebat; vel saltem in Deo, qui omnia movet, ac dirigit.* Quare recte notat Tullius (*qq. academ. l. 2*): *propter obscuritatem, ignorantiamque causarum fortuna efficit multa improvisa, et inopinata.* Eorum vero, quae in somniis accidunt, ratio est in phantasia, quae objecta alias visa, audita, tacta, perspecta mentis acie, tanquam praesentia sibi exhibet, juxta illud:



*Omnia, quae sensu voluntur vota diurno,  
Pectore sopito, reddit amica quies.*

271. Neque denuo objicies, plura nos latere, quorum proinde rationem sufficientem ignoramus, uti ignoratur ratio, cur videamus bona, et probemus, interiora deteriora sequamur, uti de se agebat Medaea. Siquidem plura nos latere lubenter concedimus; ast quid inde? An ratio sufficiens neganda est in illis, quae tamen in omnibus notis contingentibus certe invenitur? Exemplum afferri potest alicujus rei, in qua latet ratio; ast nullum rei, in qua ratio non sit, dicebat Leibnitiuss Clarkio. *Videō bona, proboque, deteriora sequor*, quatenus in objecto finito aliquid boni conspiciens, ipsius boni specie allicior; sicque deterius sequor. *Ratio* itaque est in illa boni specie. Deinde *volo, nolo, volo rursus, stat pro ratione voluntas*, nempe in libertatis facultate illa ratio est.

272. Neque demum urgebis dicendo, principium hoc in multos dejicere errores. Nam abusus ipsius ad errores ducit, non usus. Si Leibnitiuss ex. gr. non in solis objectis, sed etiam in homine, sed etiam in Deo rationem sufficientem quaesivisset; seu nisi solam objectivam, sed subjectivam quoque rationem foret confessus, non abusus ea fuisset, neque ex ea eruisset, Deum, hominemque facere semper objective meliora; libertatem non necasset; non mundum in se optimum dixisset; non indiscernibilia negasset.

273. En igitur, altae spei juvenes, Logicam nostram, in qua triplicem mentis operationem in ideis, in judiciis, in ratiociniis examinavimus, regulasque docuimus, quae terminos, propositiones, argumentationes, demonstrationem, methodumque respiciunt, ac fontes indicavimus multiplices, a quibus quaevis veritas eruenda est, probabilitatem diverso sub respectu sumus intuiti, principiaque statuimus, ad quae omnes referri possunt veritates. Hanc itaque nocturna versate manu, versate diurna, praeceptisque praxim connectite, ut dein ad altiora mente prompta accedatis, ac veritatem, quam inhiatis, taudem consequi possitis.



# PHILOSOPHIAE RATIONALIS

## PARS SECUNDA

### DE ONTOLOGIA, SEU METAPHYSICA

274. Expositis Logicae regulis ad inveniendam, et aliis detegendam veritatem aptissimis, atque fontibus, a quibus mens humana veritatem ipsam, in qua indubiis suffulta principiis tandem secura quiescit, haurire potest; postulat rerum ordo, ut principia entium generalia, quae scientiarum omnium veluti fundamentum considerata sunt, ex iisdem fontibus eruamus. Logicam itaque ordine sequitur huiusmodi de entibus tractatio, quae *Ontologia*, ex usu in scholis recepto, vocatur, et quam nos *Metaphysicam* appellamus, recto sensu huic ab Andronico Rhodio (§. 26.), aliisque Aristotelicis dato, utpote quae de iis agit, quae supra physica posita sunt. Utilissima est haec generalissima philosophiae pars, quoniam non solum vocabula definit, sed etiam, quantum fert methodi ratio, doctrinas evolvit, quae cum illis connectuntur, et quarum est usus penes omnes scientias. Quapropter non immerito cum Aristotele *sapientia*, et *philosophia prima* vocari potest, atque, ut aliis adrisit, *scientia principalis*, cum nostrarum cognitionum fundamenta statuat, quibus formulas de cognitionibus perfectissimas praebens, ipsarum cognitionum proinde veluti apex censenda est. Hinc profecto factum est, ut, licet transacto saeculo nonnulli hanc praestantissimam philosophiae partem, quam deformem ipsi reddidere, a scientiarum albo expungere optarent, aetate tamen nostra doctissimi viri ad abstrusissimas redierint inquisitiones, quas metaphysicam gestientes nuncuparunt.

275. Interea hanc nostram Ontologiam, ut ordine procedamus, in sex capita partimur, acturi; 1. De Ente in genere; 2. De generalibus entium proprietatibus; 3. De variis entium speciebus; 4. De multiplici entium relatione; 5. De entium viribus; 6. De entium ortu, et interitu.

## CAPUT PRIMUM

## DE ENTE IN GENERE

276. Quidquid existit, vel existere non repugnat, *ens* vocatur. Hinc ens est *reale*, si actu existat: *ideale*, vel *logicum*, quod nullam quidem involvit in suis essentialibus repugnantiam, sed, dum a mente concipitur, nondum existentiam recipit. Quare ens *logicum* est quiddam reale in mente (§. 105.), quia non est merum nihil, neque a mente ipsa dependet. Quare *entis* nomine vocatur quaecumque res, quae existentiam habet realem vel idealem, ac proinde nomen *entis* potest cuique substantiae, et modo, et ideae tribui. *Ens* tamen *reale* existit independenter a nostrae mentis cogitatione, a qua separari potest; *ideale* vero utrum aequae ac *reale* existat, separarique possit a nostrae mentis conceptu, quaestio est postea resolvenda.

277. Enti apponitur *non ens*, seu *nihil*, quod *negativum* est, si realitatis defectum exprimat in subjecto incapaci, uti caecitas in lapide; et *privativum*, quod realitatis defectum innuit in subjecto capaci, uti caecitas in homine. Quare *nihil privativum* est idem ac ens *logicum* (§. 276.); ideoque includit semper possibilitatem recipiendi existentiam, et proprietates, quibus caret; non sic autem *nihil negativum*, de quo uno dicta sunt axiomata: *nihili nullae sunt proprietates, aut actiones, aut passiones*; et *ex nihilo, tanquam causa, aut subjecto, nihil fit*. In ente possibilitas, essentia, et existentia in primis considerata sunt. Quare sit

## ARTICULUS PRIMUS

## DE ENTIS POSSIBILITATE

278. De ente disserentes, de ejus possibilitate in primis quaerunt philosophi. *Possibile* dicitur, quidquid in suis essentialibus nullam involvit pugnam, uti alter mundus (1); *impossibile* vero omne id, cujus essentiales proprietates sese

(1) Ad efformandam ideam possibilis, sufficit, ut *aliquid* cogitetur, hoc cum existentia comparetur, ac demum cum ipsa componatur. Illud *aliquid* est conceptus idealis, cum tantum cogitatur, est *possibile* vero, si nulla pugna inter ipsum, ejusque existentiam introspectatur. Itaque finge ens a existens; aufer ab ipso existentiam, et habebis *possibile*.

mutuo destruunt, uti circulus quadratus. Quare *possibilitas* est non repugnantia essentialium in eodem subjecto, et dicitur *intrinseca*, si respiciatur ex parte ipsorum essentialium, quae simul stare possunt; *extrinseca* autem, si consideretur ex parte virium causae, quae *rei intrinsece possibili* existentiam dare potest. Sic alter mundus est *intrinsece* possibilis, quia nulla adest in suis essentialibus repugnantia; et *extrinsece possibilis*, quia Deus illum creare valet. *Impossibilitas* e converso generice sumpta est repugnantia ad existendum, quae aut est ex parte essentialium, quae simul stare nequeunt, et *intrinseca* dicitur; aut ex parte causae, quae non pollet vi donandi existentiam *intrinsece possibili*, et *extrinseca* vocatur. Circulus quadratus est *intrinsece impossibilis*; creatio alicujus rei est *extrinsece impossibilis* relate ad creaturas.

279. *Possibile extrinsecum* est semper *relativum*, quia semper dicit relationem ad vires causae, quae *intrinsece possibili* elargiatur existentiam; licet relate ad Deum *intrinsece possibile* in quocumque casu sit semper *extrinsece possibile*, uti mox patebit. *Impossibile extrinsecum* est etiam *relativum*, nempe relate ad vires datae causae; et hoc est *physicum*, si legibus naturae adversetur, uti est *physice* impossibile, corpus sibi relictum non tendere ad centrum; *morale* vero, si sit *absolute possibile*, sed ordinario non fit, uti est *moraliter* impossibile, aliquem non peccare labiis in multiloquio. Relate vero ad Deum illud solum est *impossibile extrinsecum*, quod tale est *ab intrinseco*, uti ex sequentibus clarum fiet.

280. Cartesius, Poiretus, Leibnitius, ablato discrimine inter intrinsecam, et extrinsecam possibilitatem, atque accepta omni possibilitate pro habitudine ad existendum, omnem rerum *possibilitatem* a Dei voluntate pendere, docuerunt. Alii e contra, retenta illa distinctione *possibilitatis*, *externam*, non vero *internam* a Dei nutu pendere existimarunt. Hanc sententiam et nos amplectimur, sed alio sensu, uti videbimus.

281. Quare *possibilitas rerum intrinseca a Dei voluntate non pendet*. Siquidem; 1. si *possibilitas intrinseca* a Dei voluntate penderet, ea tantum de ratione aliquid foret *possibile*, quia Deus *posset* illud efficere, in hypothesis enim adversariorum nihil est *intrinsece possibile* independentem a Dei voluntate. Ergo e contra ideo aliquid foret *impossibile*, quia Deus non *posset* illud efficere; nulla enim esset ratio,

cur non foret *possibile*. Igitur si *possibilitas intrinseca* a Dei voluntate penderet, Deus non *posset* aliquid efficere. Sed hoc Dei coarctat omnipotentiam. Ergo... Neque dicas coarctari Dei potentiam etiam in nostra sententia; nam *intrinsece impossibile* nos dicimus existentiae *incapax*, cum ejus attributa simul stare nequeant; possibile vero, quod nullam involvit pugnam in suis essentialibus. Porro cum intrinsece impossibilis proprietates essentielles sese mutuo destruant, profecto tale impossibile est nihil negativum (§. 277.). Igitur, si Deus impossibile posset facere possibile, nihil faceret, quod certe repugnat, quia terminus divinae omnipotentiae, ne frustra ipsa operetur, debet esse quid positivum. Quapropter Dei omnipotentia haud coarctatur in nostra sententia, sed potius commendatur. 2. Si a Dei voluntate interna possibilitas penderet, ideo aliquid foret possibile, quia Deus faceret, et impossibile, quia Deus non faceret. Ergo, si Deus vellet, posset facere possibile, quod est intrinsece impossibile; ideoque posset materiae dare cogitationem; facere, ut bina binis addita non conficiant quatuor, atque sexcenta, quae nos dicimus absurda, tot sint veritates. Sed quisnam haec deglutire potest? 3. Nos ipsi saepe possibile aliquid asserentes, minime ad Dei omnipotentiam respicimus, sed tantum convenientiam attributorum illius perpendimus; quod argumentum est possibilitatem intrinsecam a Dei voluntate non pendere. (1).

282. Verum *possibilitas extrinseca* pendetne a Dei voluntate? *Potestne* Deus creare omnia *possibilia*? *Potestne* Deus existentia donare saltem omnes simul *primas substantias*? Ad primum quaesitum dicimus, a Dei voluntate haud pendere *extrinsecam rerum possibilitatem*. Nam *possibilitas extrinseca* habetur ex respectu virium causae, quae *intrinsece possibilibus* valet existentiam tribuere (§. 278); ideoque consistit in relatione necessaria, quae est inter *possibilia intrinseca*, et potentiam Dei effectricem (§. 281. nota. cor. 2.).

(1) Ex quibus patet 1. Dei voluntatem non se extendere ad *possibilia intrinseca*, quae proinde hujusmodi sunt, absque ullo Dei nutu; 2. *possibilia intrinseca* esse etiam *extrinseca possibilia* relate ad Deum, qui proinde illis valet donare existentiam; 3. *possibilia extrinseca* propterea esse etiam, et quidem semper *possibilia intrinseca*; 4. *impossibilia intrinseca* esse respectu cujuscumque causae *impossibilia extrinseca*; si enim forent respectu alicujus causae *possibilia*, non repugnarent, ideoque non essent *impossibilia* contra hypothesim; 5. *impossibilia extrinseca* respectu Dei esse etiam *impossibilia intrinseca*, alioquin non forent *impossibilia intrinseca*.

Sed necessarium, et essentialia est Deo *posse* operari super universa intrinsece possibilia. Ergo necessarium, et essentialia quoque est Deo, ut *possit* efficere res *possibiles*; ideoque a Dei voluntate non dependet *extrinseca* rerum *possibilitas*. Cave tamen credas, Deum non *liberrime* efficere, vel non efficere; possibilia enim omnia liberrimis Dei operationibus subduntur, et aliud est *posse* efficere, aliud reapse *efficere*. Ad alterum dicimus, *Deum non posse creare omnia possibilia simul cum omnibus modis, et adfectionibus intrinsecis, quarum capacia esse possunt, neque cum omnibus relationibus extrinsecis*. Siquidem Deus nequit creare *intrinsece impossibilia* (§. 281. nota cor. 4.); sed descripta possibilia sunt mera impossibilia. Nam aliqui modi per contradictionem excludunt alios, uti color niger excludit album; quaedam adfectiones excludunt alias, uti simplicitas excludit materialem compositionem; aliquae relationes excludunt alias, uti relatio causae in eodem ente erga aliud excludit relationem effectus in eodem erga idem. Ergo Deus . . . Ad tertium quaesitum dicimus, *Deum creare posse omnes simul substantias primas*. Si enim nequiret, repugnantia foret ex parte ipsarum substantiarum possibilem, aut ex parte Dei. Sed non primum. Nam possibilitas unius substantiae non praecedit, neque sequitur alterius possibilitatem, neque ullo alio modo pendet ab alia substantia. Igitur inter omnes posibles substantias nou datur ulla causalitatis, dependentiae, vel connexionis relatio; ideoque inter ipsas nulla pugna, nullaqua collisio fingi potest. Porro possibilia exhibentur Deo, atque ad ejus referuntur omnipotentiam ordine, quem habent in sua natura. Igitur nulla repugnantia est ex parte substantiarum primarum possibilem, ut ad existentiam adducantur. Deinde res positiva neque negare, neque excludere potest existentiam alterius rei positivae; sed substantia existens est quid positivum essentiae, et existentiae; ergo quaelibet substantia potest existere, quin alterius substantiae existentiae adversetur. Non alterum. Quandoquidem omnipotentia Dei, utpote infinita, certe extenditur, quantum rerum extenditur possibilitas, cum possibilitas extrinseca respectu Dei nequeat esse minor intrinseca. Ergo . . . Neque dicas, universali, et simultanea creatione exhauriri Dei omnipotentiam; haec enim infinita est, ideoque numquam potest exhauriri; deinde potest Deus producta in nihilum redigere, et centies, et millies in infinitum in aliis locis, et temporibus reproducere; insuper, si verum hoc esset, potentia Dei, dum modo creat, minueretur, et ar-

ctaretur, quod nemo sanus dixit. Vide de his profundissima opera (*Fragmenta Cosmol.* c. 1. §. 15. et c. 2. §. 8. 9. 10. et *Disquisit. nov. de Deo. Append. ad c. 1. §. 3.*), quorum auctor est Cl. Aloysius Parchetti ex Somascorum Familia.

283. Verum dependetne a divino saltem intellectu *intrinseca* rerum *possibilitas*? Nempe *possibilia*, quatenus sunt *possibilia*, dependentne a divino intellectu, adeo ut non forent *possibilia*, facta absurda hypothese non existentiae Dei? Dmowski, Matthaeus Liberatore in *Metaphysica Generali* (§. 37. 38.), Aloysius Tapatelli (*Saggio Teoret. di Drit. Nat. vol. 1. nota 27. ediz. Nap. 1834.*) affirmantem sententiam tenent, tuentur, atque a contrariis objectis vindicare nituntur. Sed negantem opinionem extra omnem dubitationem posuisse auctorem *Fragmentorum Cosmologiae*, remur. Quod ut intelligatur, aliqua praemittimus ad seriem idearum intelligendam. Itaque

1. *Possibilia non sunt merae ideae Dei.* Siquidem 1. si *possibilia* essent merae *idea*e Dei, ipsa carerent tum *essentia*, tum *existentia*, in *se* non essent *res*, essent *nihil*. Sed repugnat, *possibilia* esse absolute *nihil*, praetereaque *nihil*. 2. Si *possibilia* essent merae *idea*e Dei, profecto *realitas*, atque *esse illorum* essent exemplaria, atque archetypae repraesentationes: quod pugnat cum universali locutione humani generis, quod tenet, *possibilia* non repraesentare aliquid a se diversum. 3. Si *possibilia* forent merae *idea*e Dei, objecta harum idearum essent aut ipsae *idea*e, aut *nihil*; quod utrumque esse nequit. 4. Si *possibilia* essent merae *idea*e Dei, non autem *substantiae*, non *res*, non *essentia*, non *ens*, forent *nihil*; ideoque ea Deus non cognosceret, cum intellectus divini objectum nequeat esse *nihil*; porro Deo injuriosum est non noscere *possibilia*. 5. *Idea*e in Deo sunt quid *reale*; ideoque debent habere objecta respondentia, quae certe nequeunt esse nisi saltem *possibilia*; ac proinde *possibilia* non *idea*e sunt, sed *vera*, et *realia* idearum, quibus repraesentantur, objecta 6. Posita adversariorum hypothese, cum Deus existentiam largitur *possibilibus*, aut suas creat *ideas*, in quas creationis actio terminatur; aut in creatione pro termino habet *nihil absolutum*, et negativum. Sed primum esse nequit, quia in Deo esset simul *passivitas*, et *mutabilitas*, cum in ipso existentiam reciperent *idea*e; alterum absurdum est, quia actio creatrix versaretur super *nihil*, et simul modus contingens, nempe *existentia*, adhaereret *nihilo*, tamquam *substantiae*. 7. Certum est, in Deo divinas *ideas*, divinam cognitio-



nem, divinum intellectum esse unum, et idem, neque *actum* distingui in Deo a *potentia*. Siabilia proinde forent merae ideae Dei, divinus intellectus a possibilibus non distingueretur; quod nemo sanus dicet. 8. In hypothese contraria Deus, dum creat, dat suis ideis existentiam mutabilem, et sensibilem; sed hoc in casu esset Deus substantia Spinozae, quia esset Deus, quodcumque vides, et quodcumque movetur.

2. *Numerus possibilium non est infinitus*. Nam 1. numerus quicumque infinitus omnino repugnat, quia, data hypothese, quod auferretur aliquid ab hoc numero, ac deinde denuo adderetur, ex duobus finitis infinitum oriretur, quod absurdum postea evolvemus. 2. Quodvis possibile a nulla causa quoad possibilitatem dependet (§. 281.); ergo nulla causa potest eorum numerum augere, vel minuire; ideoque numerus possibilium neque augeri, neque minui potest, sed est semper idem, ac proinde certus, fixus, determinatus, immutabilis: porro huiusmodi numerus est finitus. 3. In hypothese numeri infiniti possibilium, ipsa non potuissent esse ab aeterno objecta divino intellectui praesentia, neque subjici decreto voluntatis divinae, neque subordinari potentiae divinae creatrici; quod enim est infinitum, numquam finem habet, numquam terminum pertingit, numquam ad extremum perveniet. Quare aut Deus ab aeterno comprehendit, suaeque voluntati, ac potentiae subjecta habet omniaabilia, et finita numero dici debent; aut non, et tunc dicendum foret, Deum aliqua ante, aliqua postea comprehendere, aliqua adhuc non comprehendere, ideoque gradatim procedere ad augendum thesaurum suarum notionum; quod est blasphemum. 4. Certeabilia sunt minora numero, quam possunt esse eorum modi, adfectiones, compositiones. Nonne infinitus major, minusve daretur, siabilium numerus foret infinitus?

3. *Possibilia sunt extra divinum intellectum, nihilque commune cum Deo habent*. Nam 1. in quavis substantia existenti tria possunt concipi, modi nempe, existentia, essentia; in substantia possibili tantum essentia. Quare substantia, vel ens aliquod, antequam recipiat existentiam, et modos, et postquam his expolietur, est tantum possibile; hoc autem est. extra divinum intellectum; alioquin essentia esset in Deo sive non existens, sive existens; ideoque quod in Deo est, modo. existeret, modo non; quod certe dici nequit. 2. *Possibilia, in se inspecta, sunt finiti numeri, finitae entit.*

T. I.

tatis, finitaeque naturae; quod est finitum, in Deo esse nequit. 3. In adversariorum hypothesis ideo *possibilia* essent *possibilia*, quia forent in divino intellectu; ita, ut, hoc ablato, illa non amplius forent *possibilia*, deesset enim illud, in quo essent, et a quo penderent. Sed supposita rerum possibilitate dependente a divino intellectu, Deus ab aeterno habuisset potentiam statuendi, quid futurum erat possibile, quidque impossibile, cum Deus possit, quidquid intelligi potest. Ergo et ab aeterno ad libitum potuisset Deus efformare sibi ideas *possibilium*, easque commutare. Hoc vero absurdum est (§. 281). 4. Si *possibilia* non essent extra divinum intellectum, ipsa forent ipsae *ideae Dei*, quod absurdum exsufflavimus; aut numquam Deus sibi *possibilium* ideas efformasset, vel efformaret, quia deessent extra Deum objecta istarum idearum, quod denuo repugnat. Ergo . . . (1).

## ARTICULUS SECUNDUS

### DE ESSENTIA, ET EXISTENTIA.

284. Aliquid esse debet, propter quod ens constituitur in aliqua classe, atque ab aliis distinguitur. Hoc aliquid est *essentia*, quae facit, ut ens sit, quod est; ideoque constituit

(1) Ex quibus multa erui possunt, quae sequentibus lucem præbere possunt. Nam nequit dici 1. *possibilia* esse archetypas Dei ideas; 2. neque hoc, vel illud esse possibile in hypothesis, quod *possibilia* sint *ideae Dei*; 3. neque Deum dare existentiam *possibilibus*, si haec merae *ideae Dei* supponantur; 4. neque proinde possibilitatem internam pendere a divino intellectu; 5. neque possibilitatem esse perfectionem aliquam a Deo separatam, cum perfectio existentiam, possibilitas logicum statum supponat; 6. neque substantiam redire in nihilum sui, ablata existentia, cum redeat ad statum negatae existentiae, et non negatae possibilitatis; 7. neque substantias *possibiles* fuisse *alicubi*, quia *alicubi* supponit locum, ac proinde res existentes; 8. neque Deum educere e nihilo, et ad nihilum redigere, quia nihil nequit esse terminus creationis, et annihilationis; 9. neque existentiam esse id, quod ponitur extra *nihilum*, si possibile ponatur purum *nihilum*, quia *nihilum* extra *nihilum* poneretur; 10. neque existentiam esse complementum possibilitatis, quae iam completa est ante existentiam. Verum dici debet 1. substantiam quaecumque *esse*, antequam existat, quia *est* in sua possibilitate; 2. Deum *existere* ab aeterno et independenter etiam *existere*, *possibilia* autem *esse* quidem ab aeterno et independenter *esse*, quia aliud est *existere*, aliud *esse*; 3. *possibilia* pendere a Deo quoad existentiam, modos existendi varios, atque non existentiam, non vero quoad possibilitatem; 4. Deum dare, vel auferre existentiam *possibilibus*, quia actio Dei haec *possibilia* habet pro terminis; 5. *possibilia esse* in seipsis, gaudere *realitate*, *esse positiva* in se, et *negativa* quoad existentiam.

ens in aliquo ordine, atque ab aliis secernit. Essentia est *metaphysica*, *physica*, et *nominalis*. *Metaphysica*, quae definitur primum illud, quod in re quapiam concipitur, et ex quo ratio reddi potest reliquarum proprietatum, quae in eadem re sunt, vel esse possunt; *physica*, quae sita est in complexu proprietatum entis essentialium; ntraque haec essentia dicitur *realis*, quatenus opponitur *nominali*, vel *ideali*, aut *notionali*, quae reponitur in proprietate, vel complexu proprietatum a nobis in ente utcumque cognitarum (1). Ex quo patet; 1. essentiam metaphysicam rerum creatarum, nisi in sola possibilitate reponatur, a nobis ignorari, quia illud primum, quod in ente creato est, nos fugit; 2. essentiam *physicam* nos quoque ferme semper latere, quia nescimus omnium rerum creatarum proprietatum complexum (2); 3. ideoque essentias, quas de rebus scimus, esse plerumque semper *ideales*.

285. Deinde essentia est *actualis*, si actu ens habet existentiam, a qua haud illa distinguitur: alioquin existeret aliquod ens sine essentia; *futura*, si aliquando cum ente extitura sit; *possibilis*, si non repugnat, ut existat ens, cuius est essentia, quodque tamen est in sua possibilitate (§. 283. not. ult.). Essentia *actualis* in rebus creatis est mutabilis, quatenus existentia, qua modo gaudet, quaeque est contingens, carere potest. Quare, cessante existentia, illa in nuda remanet possibilitate. Verum non ita dicendum de essentiis metaphysicis repositis in nuda possibilitate (§. 284.), quae *immutabiles* semper sunt, utpote quae unam includunt essentialium convenientiam.

286. Mutabiles dicuntur essentias metaphysicas, qui possibilitatem intrinsecam a Dei voluntate repetunt (§. 280.). Ipsos vero falli, ut loquantur de essentia notionali, patet 1. quia

(1) Videtur tamen non posse haec essentia dici nominalis, uti eam vocavit Lockius, quia non ex arbitrio, sed ex fundamento immobili ex rebus de sumpto formatur ex ideis generis, et differentiae a mente nostra.

(2) Sed non ideo probandus est Lockius (*De Intell. hum.* l. 3. c. 3. §. 15. et c. 6. §. 21.), qui nobis ignotas asserit omnes omnino reales essentias; ex quo deducit suum dubium de materia cogitante. Nam 1. nos clare, distincteque, inquisitione instituta, saepe in physica constituenta pervenimus, uti in illa hominis, bruti, plantae, substantiae, circuli. 2. Plures nos cognoscimus mutuo inter se differri naturas, veluti hominem a bruto, brutum a planta, plantam a vegetabili, hocque a minerali; quae certe minime nosceremus, nisi earum rerum essentias reales internosceremus. Ceterum neque de omnibus essentiis hoc dici potest, neque *intuitive*, et *a priori*, sed *argutive*, et *a posteriori*, nempe a proprietatibus, vel effectibus, eas, quas novimus, valeamus internoscere.

eas nemo mutare posset, nisi unus Deus; sed hoc Deus facere non potest. Nam hoc in casu posset ipse mutare illud omne, per quod ens in aliqua specie vel genere constituitur, quin ex hac specie, vel genere illud extraheret. Id vero repugnat, quia illud ens, cuius essentiam Deus mutaret, esset illud ens, uti supponitur, et non esset, quia careret essentia, a qua constituitur. 2. In quavis re existenti creata tria considerari possunt, essentia, existentia, modi. Ablatis porro existentia, et modis, essentia *metaphysica* adhuc remanet, quia, uti supra (§. 284) uotavimus, est ipsa possibilitas rei, ultra quam nequit progredi Dei omnipotentia, uti supra quoque docuimus (§. 281). 3. Si Deus posset huiusmodi essentias mutare, posset simul, quod bonum et honestum est, malum et turpe deolotare, et, perjuria, fraudes, aliaque mala et inhonesta statuere uti bona; quod certe scientiam morum susque deque subvertit. Igitur non recte se gesserunt Puffendorfius, Thomasius, Coccejus, qui bonum, et malum morale, accepta, ut sunt, veluti convenientia, et pugna cum Dei ideis archetypis, a Dei voluntate repetivere.

287. Contra immutabilitatem essentiarum metaphysicarum opponunt adversarii, dicentes, 1. quod Deus numquam potuisset creare essentias, si forent immutabiles, quia simul essent aeternae; 2. essentiam unius saepe transire in essentiam alterius, uti videre est in vegetabilibus, quae in animalium essentias convertuntur; 3. potuisse Deum aliam essentiam largiri ex. gr. homini; ergo hominis essentia non est immutabilis.

288. Sed ad 1. dicimus, essentias metaphysicas considerandas esse in pura possibilitate, (§. 284), ideoque esse a divina voluntate (§. 281), et divino intellectu omnino independentes (§. 283), ac proinde immutabiles, atque aeternas. Ex hoc vero haud sequitur, Deum non potuisse, aut non posse eas creare, seu ipsis existentiam largiri; ad hoc enim duo requiruntur, potentia in Deo, et non repugnantia in essentia: cum porro haec reapse dentur, Deus creare potest ea, quorum essentiae metaphysicae sunt immutabiles. Observa tamen, essentias metaphysicas esse quid *logicum*, non vero quid *existens* ab aeterno.

Ad 2. respondemus, physicas rerum essentias mutari, cum rerum existentia destruitur, non vero essentias metaphysicas. Quare, quando ex. gr. vegetabilia transeunt in animalium substantias, destruuntur, non mutantur essentiae illae physicae, quae cum existentia et confunduntur et destruuntur, relictis interim illaesis essentis metaphysicis. Imo, si

recte loqui velimus, dicamus oportet, *essentias physicas*, seu *factas* esse ipsissimas *essentias metaphysicas*, hoc tantum discrimine, quod illae sint *essentiae metaphysicae*, quae a Deo receperunt existentiam, modum nempe accessorium, et contingentem, quo *essentiae metaphysicae* natura interior non mutatur. Hoc sensu *essentiae factae* sunt *metaphysicae*, quae aliquando dicuntur *intelligibiles*, sed vocabulo improprio, quia *essentiae metaphysicae* non sunt merae *ideae Dei*, meraque *intelligibilia*, sed quid positivum positum extra mentem intelligentem (§. 283. prop. 1.).

Ad 3. reponimus, potuisse quidem Deum aliam largiri *essentiam homini*; sed tunc homo non esset praesentis speciei. Ast posito, quod Deus hunc voluerit creare hominem, *essentiam*, quam ipsi dedit, dare debuit, alioquin hunc voluisset, et non voluisset hominem; voluisset, quia sic supponitur, non voluisset, quia ei hujus speciei *essentiam* non dedisset.

289. *Existentiam* alii alio modo definiunt, eo forte, quia ejus *idea* per se clara est; tamen dici posset *possibilitas ad actum redacta* (1). Circa *existentiam* haec tenenda sunt veluti canones. 1. Quidquid existit, certe prius fuit possibile, alias daretur possibile extrinsecum sine intrinseco, quod repugnat (§. 281. not. 3); ideoque ab *existentia* ad *possibilitatem* recte argumentum conficitur. 2. Ex eo quod aliquid non existat, haud sequitur non esse possibile, quia potest deficere vis causae externae (§. 278); ideoque a non *existentia* male infertur *impossibilitas* intrinseca. 3. Ex eo quod aliquid sit possibile, non inde sequitur esse *existens*, quia causa potuit non ponere suam vim; ideoque a *possibilitate* ad *existentiam* non valet illatio. 4. Ex eo quod res sit intrinsece *impossibilis*, recte infertur non *existere*, quia a nemine valet *existentiam* recipere (§. 281. not. 4.); ideoque ab *impossibilitate* ad non *existentiam* valet illatio. 5. *Existentia* nil proinde addit *essentiae*, cum *essentia* sit in ente *existente*; si autem *essentia* in abstracto, seu in mera *possibilitate* consideretur, tunc *existentia* est quid plus *essentia*, uti *existere* est plus, quam *simpliciter esse* (§. 283. nota 2. n. 2.) (2).

(1) *Existentia* est simplicissima entis adfectio, nec constat attributis, quae simul sumpta intrinsece *existentiam* constituent. Quare distincte percipi, et exponi nequit (§. 159. not. ), licet clarissime eam intelligamus, cum facile nobis sit statum rei extantis a rei possibili statu discernere.

(2) Inter ens *intrinsece possibile*, quod nempe *existere* non repugnat, et ens praesens, sive *existens*, quod scilicet per causam recepit *existentiam*, poni debet et ens *futurum*, quod modo non est *existens*, neque est nunc pos-

## CAPUT SECUNDUM

## DE GENERALIBUS ENTIIUM PROPRIETATIBUS.

290. Affectiones, seu proprietates entis sunt id omne, quod de ente praeter essentiam enunciari potest. Ipsae aliae sunt generales, speciales aliae. Generales entis proprietates, de quibus hic est sermo, sunt, quae enti cuique compellunt, qualenus est ens. Huiusmodi proprietates tres sunt, nempe *unitas, veritas, bonitas*.

sibile, sed ordinatum est a causa ad hoc, ut fiat praesens, seu ut existat. Hinc 1. ens *futurum* numquam exiit, neque existet in hypotesi negatae existentiae Dei, quia deesset causa, qua posset futurum e statu negatae existentiae ad statum existentiae transire. 2. *Futurum* includit ideam mutationis status entis contingentis; ens enim sua futuritione ordinatur a causa aut ad acquirendum statum positivum, quem non habet, aut ad omittendum statum positivum, in quo acta est. *Futurum* dividitur a laudato doctissimo Porchietti (*Disquisit. nov. de Deo c. 2. n. 1. ad 5. et 9.*). 1. in *aeternum*, cui Deus potest largiri existentiam in tempore per suam potentiam, aut per possibles creaturarum facultates; et *factum*, cui possunt dare existentiam per suas vires causae creatae. Sic futurum *aeternum* per Dei potentiam erat hic, aliisque mundis, icon vero Transfigurationis per possibles vires alicuius viri, e. g. Raphaelis; futurum *factum*, sive *contingens* erat ipsa Transfigurationis icon per existentis Raphaelis artem. 2. In *proxime futurum*, seu *absolutum*, quod evenire potest, quia alii status interponantur inter actuale suum statum, et ipsius existentiam; et *remote*, seu *hypothetice futurum*, quod evenire potest post alios status, per quos ipsum omnino transire debet, ut fiat existens; ideoque, ut *hypothetice futurum* existentiam recipiat, debet prorsus migrare per omnes status futuritionis remotae, atque ab his transire ad statum futuritionis proximae. *Futurum remote* est in momento, quo de jicio grave e turri, ut ipsam impingat in terram; proxime vero *futurum* in momento praecedenti tactum terrae. 3. Demum *remote futurum* potest esse *magis*, minusque *remote futurum*, prout per plures, paucioresque status transire debet, ut existentiam accipiat. Aliquando tacem dicitur aliquid *magis*, minusve *futurum* pro majori, minorive dispositione causae ad ponendum illud praee alio. Hisce positis, laudatus auctor sequentes statuit propositiones:

1. *Ad essentiam futuri non pertinet eventus actualis*. Siquidem, quatenus dicimus *futurum* aliquid, catenus ejus existentiam negamus; et quatenus dicimus *existens*, catenus ejus negamus futuritionem. Sed nihil potest esse sine sua essentia. Ergo.

2. *Non est necesse, ut eveniat, quod generice futurum est*. Nam 1. si necesse foret, ut eveniret, quidquid futurum est, libertas arbitrii omnino periret; actiones enim, quas posui, vel sum positurus, quia futurae erant, antequam posuisssem, vel sunt futurae, antequam ponam, certe necessario posuisssem, vel ponerem, si, quod est futurum, necessario eveniret. 2. Certe *futura aeterna* possunt remanere *futura*, quatenus Deus potest semper existentiam largiri, quia umquam largiatur: *facta remote futura* possunt in

291. *Unum* dicitur, quod indivisum est in se, at divinum a quocumque alio. *Unitas* itaque est affectio entis, qua ipsum redditur indivisum, et ab aliis distinctum. *Unitas est numerica*, qua individuum constituitur (§. 95); *specifica*, quae speciem continet; *generica*, quae includit genus. Titius est *numericus*, homo est *specificus*, animal est *generice* unum. Insuper unitas est *metaphysica*, si omnem partium compositionem excludat ab ente, quod dicitur unum, uti est Deus; *physica*, si exprimat unionem partium reapse separabilium, sed inter se arctissimo nexu colligatarum, uti est corpus quodcumque; *moralis*, si contineat collectionem plurium mutuo quidem inter se distinctorum, sed unius totius veluti membra constituentium, uti exercitus.

292. Hisce positis, dicimus, *quodcumque ens esse numericum unum*. Siquidem ad essentiam alicujus entis pertinet id omne, quo in aliqua classe reponatur, atque illud praecise sit ens (§. 284.); sed *numericum unum* est id, quo ens a quocumque alio distinguitur, et in aliqua classe evadit indivi-

statum reduci purae possibilitatis; *facta proxime futura*, quae possunt durare in suo statu, habita ratione ad Dei omnipotentiam, possunt remanere tantum in statu proximae futuritionis; *facta proxime futura*, quae fluunt, possunt fluere in statum alium, et non in proxime futurum. Quare ea tantum futura eveniant oportet, quae sunt *facta proxime futura*, nequeuntque fluere in alium statum, qui non sit status proxime futurus, uti necessario futura est existentia mundi, posita creatione, quae terminum existentem habere debet.

3. *Oppositum futuro potest esse futurum*. Nam 1. non est necesse, ut eveniat, quod futurum est (ex 2. prop.); ideoque potest esse futurum oppositum. 2. In decreto Dei aeterno, uti videmus in Theologia naturali, fuerunt simul decreta de faciendo, et de non faciendo; proindeque uni futuro potest aliud opponi. Neque dicas, crastina die Petrum esse peccatum, vel non esse peccatum, unumque esse verum; nam *aeque futurum* est, ut Petrus cras peccet vel non peccet. Sic laudatus auctor componit prophetias specie eventu destitutas.

4. *Nos non facimus futurum, quod antea non erat futurum*. Nam quod nos decernimus facere, est aut extra nostram potentiam, uti decernere caelum digito tangere, aut in potentiae nostrae viribus. Sed in primo casu quocumque nostro decreto non facimus futurum illud, quod a nobis non dependet: in secundo, quod futurum dicimus post nostrum decretum, jam antea futurum erat futuritione remota.

Quare 1. decretum Dei primitivum de faciendo supponit, non constituit, neque inducit *futuritionem rei remotam*; decretum vero de non faciendo supponit potentiam, quae illam in statu purae possibilitatis potest relinquere. 2. Ad praevidendum in singularibus casibus, quod probabilius erit futurum, perfectissima requireretur cognitio omnium entium creatorum universi, atque cujusque entis virium, ordinis, influxus, etc., quae procul dubio homo scire nequit.

duum (§. 291.), nempe illud præcise ens, et omnimode determinatum (§. 95.). Ergo ad essentiam cujuscumque entis pertinet, ut sit *numerice* unum. Si Petrus non est numerice unus, in plures dividi potest, non est amplius Petrus.

293. Inter *unum*, et *unicum* hoc discrimen ponitur, quod *unicum* excludat alterum ejusdem speciei, uti est Deus, qui unus alterum Deum omnino excludit; *unum* vero alia admittit ejusdem speciei numero distincta, uti Petrus, Paulus...

294. Altera entis generalis proprietas est *veritas*, quæ convenientiam dicit (§. 186.). Si hæc convenientia est in ideis nostræ mentis cum objectis, *logica*; si in verbis cum cogitationibus nostris, *moralis*; si in attributis entis cum sua essentia, *metaphysica* vocatur veritas. De hac una loquamur. Veritas proinde *metaphysica* est convenientia entis, vel attributorum entis cum sua essentia. Quare *verum* dicitur ens, quod habet omnia, quæ ad illud constituendum requiruntur. Et quoniam Deus omnia videt, uti sunt in seipsis; ideo aliqui dicunt *verum* ens, quod cum Dei ideis convenit.

295. Porro *omne ens est metaphysice verum*. Nam quodvis ens habet omnia, quæ illud tale constituunt, cum sua convenit essentia, ideisque Dei apprimè respondet, alioquin non esset ens, imò foret intrinsece impossibile. Sed in hoc præcise est veritas metaphysica (§. 294.). Quare falsum aurum, et argentum laud existunt, sed *falsa* vocantur ex apparentiis, quibus sæpe illudimur (§. 257.); sunt autem *verum* aurichalcum, ferrum, aliudve hujusmodi, quorum essentiam habent.

296. *Bonitas*, quæ perfectionem denotat, est tertia generalis entis proprietas. *Bonitas* generice sumpta indicat perfectionem entis in suo genere. *Bona* dicuntur fructus, panis, aqua, arbor, pharmacum, vestis, horologium, prout nobis prosunt, atque ad finem sunt apta. Hinc *bonitas* est *metaphysica*, si consideretur in ordine, et consensione perfecta essentialium entis; *absoluta*, si in ente accipiatur sine respectu ad alia entia; *relativa*, si illa bonitas relationem ad aliorum entium bonitatem dicit; *moralis*, si reponatur in conformitate actionum humanarum cum recta ratione, et morum regulis. Deus solus est *absolute* bonus; quivis homo est *relative* bonus; omnis actio legi divinæ respondens est *moraliter* bona.

297. *Verum quodcumque ens est metaphysice bonum*. Siquidem omne ens habet essentialia, uti postulat ordo essentiae ipsius, alias neque propria gauderet essentia, neque proinde existeret. Quare, licet omne ens creatum finitum sit, ideoque reperitur in ipso *malum metaphysicum*, quod in limi-



tatione perfectionum reposuit Leibnitius; tamen *metaphysice bonum* dicendum potius est hoc *malum*, quia etiam ad essentiam entis creati pertinet, ut sit limitibus circumscriptum.

298. Ast nonne malum est horologium, quod horas non indicat? Nonne mala aqua aegrotis? Nonne malum est marsupium auro plenum juveni vitis assidue indulgenti, et sexcenta alia, quae nobis nocent? Minime gentium. Nam hoc in casu *bonum*, et *malum* ex fine respicimus. Dicimus proinde *malum* horologium, cum finis ejus non obtinetur, licet pretiosa sit materia: *malum* aegrotis aquam, quia forsitan febrim augeat; *malum* marsupium juveni in vitia vergenti, quia scelestior fieret. Igitur ex fine solemus *bonum* metiri. Quare temerarie obloquuntur, qui omnes Dei fines nescientes in Dei opera debacchantur, quae tamen sunt *valde bona*.

## CAPUT TERTIUM

### DE VARIIS ENTIIUM SPECIEBUS.

299. Cum multiplicis generis sint entia, in varios articulos de ipsis, ut claritati consulamus, agemus.

### ARTICULUS PRIMUS

#### DE SUBSTANTIA, ACCIDENTI, SUPPOSITO, PERSONA.

300. Multiplices hucusque datae sunt *substantiae* definitiones. Cartesius eam definivit: *res illa, cui insunt formae sensibiles, et attributa*; Hebenstreit: *ens, quod non existit in alio, tamquam in subjecto*; Leibnitius: *ens, quod principium mutationum in se continet*; Wolfius: *subjectum perdurabile, et modificabile*; Genuensis: *subjectum illius, quod est*; Spinoza: *id quod in se est, et per se concipitur*; Rosminius: *vis, et energia, qua ens existit*. Imo Alphonsus Testa (*Fil. della mente. Dell'Identità della sostanza e della forza disc. 3.*) adeo in hanc definitionem *substantiae* instituit, ut dixerit, sentire cum Spinoza, qui *substantiam* a *vi* distinguit. Definitio tamen Cartesii in eo peccat, quod excludat a Deo *substantiam*, quia Dens non habet *formas sensibiles*. *Substantia* definita a Leibnitio videtur ne Deo quidem aptari posse, utpote qui nullam *mutationem* potest habere. Idem dicatur de *substantia* Wolfii, quae Deo nequit

convenire, qui *modificationibus* excipiendis non est idoneus. Neque videtur probanda illa cl. Rosminii, cui consonant Galluppi, Melillo, alique, quia *substantia* pollet vi, non autem ipsa est vis, et energia. Demum refutanda est *substantia* Spinoziana, quae est similis huic: *res, quae ita existit, ut a nullo alio dependeat in existendo*, quam Cartesio tribuit Mastrofini (*Met. Subl. t. 1. l. 1. c. 1. §. 13.*)

301. Verum reflexionem in nos convertamus. Certum est, in nobis esse animum, eumque diversis subjectum affectionibus. Ista affectiones mutantur quovis temporis momento, cum animus modo huc, modo illuc cogitatione transvolet; modo hoc, modo illo affectu pulsetur, ipso animo tamen eodem permanente. Aliud igitur in animo *per se existit*, nec, ut existat, indiget alio, cui inhaereat, et aliud ita existit, ut alio indigeat, cui inhaereat. Dic idem de aliis rebus creatis, in quibus semper duo considerari possunt, nempe, quod adeo existit, ut alio non egeat, in quo existat; et quod adeo existit, ut in alio necessario debeat existere. Primum est *substantia* a *substrato*, alterum est *accidens* ab *accessione*. *Substantia* itaque est ens ita existens, ut nullo alio indigeat subjecto, cui inhaereat, ut existat (1). *Accidens* vero, vel *modus* est id omne, quod indiget subjecto, cui inhaereat, ut existat, ideoque semper *accedit* subjecto, quod *modificat* (§. 107.) (2).

(1) Quae definitio ceterarum difficultatem non continet, ut sit idem Mastrofini (loc. cit. §. 14.), et convenit rei, sive *modificationibus* praetextatur, sive supra ambitum, et fluctuationem harum ottollatur; convenit proinde Deo, et rebus a Deo precreatis, quae Deo non inhaerent tanquam subjecto, utcumque vim Dei poscant sibi perpetuo, ut prodire valeant ad existentiam. Verum Auctor *Fragmentorum Cosmologiae* (c. 3. sect. 1. n. 5.) cupit, ut a definitione *substantiae* auferatur status accidentalis *existentiae*, quia et *possibilia* prima sunt verae *substantiae*, caedemque cum *substantiis* existentibus, atque in eo solum differentes, quod istae affectae sint *variabili* modo *existentiae*; atque vult, ut *substantia* dicatur *ens simplex*. Quare *substantia* juxta ipsum est *ens simplex*, quod, ut existat, nullo alio ente indiget, cui inhaereat. Quae doctrina videtur utilissima, imo necessaria ad statuendas plures veritates, et plures lites finieandas de *possibilitate*, quas supra proposuimus (§. 281. ad 289.).

(2) Neque hic est silendum de origine *ideae substantiae*, quam diversimode explicarunt philosophi pro uniuscujusque ingenio, et arbitrio. Nam Lockius, Condillachus, Degerando, alique *sensistae* dicunt, ideam *substantiae* a nobis efformari non posse neque sensatione, neque reflexione, sed tamen consistere in aggregato *modificationum*, et *affectionum*, quas tantum sensatione, et reflexione attingimus. *Schola scotica*, duce Reid, tota in examinandis facultatibus, actionibus, et affectionibus *mentis* cogitantis, quin de naturā

302. Substantia aut est *spiritualis*, si partibus careat, atque intellectu, et voluntate donetur; aut est *materialis*, si partibus physicis constet, atque ornatur soliditate, gravitate, etc. Deinde substantia aut existit per se tota, quin ordinetur cum alia ad efformandum aliquod tertium; aut ita existit, ut natura sua ordinetur ad aliam, cum qua copulata tertium quid totum efformet. Primo casu dicitur substantia *completa*, uti Angelus; secundo casu *incompleta*, uti anima humana ordinata ad efformandum hominem copulata corpori. *Completa substantia* vocatur quoque *suppositum*, quod proinde definiri potest substantia suorum actuum principium, et ultimo completa, uti lapis, arbor, canis, Angelus, Cartesius (1).

et substantia animae adlaboraret, credidit, ideam substantiae nullo modo haberi posse (§. 56.). *Transcendentalistae* Kantius, Fichteus, Bousterveckius, Bardilius, Schellingius, Hegelus, ac nuperrime Alphonsus Testa (*Filos. della mente disc. 1. dell' Essere, e del Princ. di sostanza*) dicunt, substantiae ideam efformari a priori occasione experientiae, sed non ab experientia, verum a ratione, quae ita est constituta, ut mutationum causam, ideoque substantiam cogitet. Hinc Scotica Schola ex iudicio instinctivo sub affectionibus substantiam probabat, quod et placuit Cousino (§. 64.), qui ex facultate *inspirationis*, seu ex spontaneitate rationis ideam substantiae deducere aegit; in sententia vero sensistarum, et *Transcendentalistarum* substantia omnino evanescit. Verum contra hos omnes intimum sensum opponimus, quem Testa fidelem iudicem minime hac de re credit. Nam nos *sentimus modo passivo actionem non mei super me, et modo activo reactionem mei super non me*. Igitur sentimus modo concreto actionem objectorum externorum super subjectum sentiens, et huius reactionem super objecta. Quare experientia interna, et externa nos experimur *aliqua subjecta*, eorumque modos; seu *realia agentia, realia subjecta*, quibus inhaerent actiones, *realia principia*, quae actiones producant. Porro haec subjecta sunt *substantiae*, quae sunt veluti *fulcra* affectionum, modorum, actionum, passionum, nec proinde aliena vi indigent, ut modos suos suscipiant, ut agat, utque patiat. Quapropter, si vim a substantia adimam, tolles etiam notas sustinendi, et resistendi; tolles existentiam *in se*, facies de substantia affectionem; aut saltem substantiam possibilem statuas (not. aut.). Quantum vero Lockius, ejusque sectatores distent a vero, dum in *congerie qualitatum simplicium sensibus perceptarum*, ut loquitur ipse Lockius, reponunt substantiam, ex eo patet, quod substantia sit quid *stabile*, qualitates vero perpetua successione mutantur; illa existit sine alio subjecto, cui inhaereat, hac vero subjectum, cui inhaereant, et sine quo esse nequeant, supponunt. Galluppi (*Elem. di Filos. l. 3. c. 4 §. 55*).

(1) Dicitur *substantia*, quia consuetudo non patitur, ut *suppositi* nomen tribuatur accidentibus vel modificationibus; *suarum actionum principium*, quia debet in *supposito* inesse principium integram suarum affectionum, seu operationum, quae deficiente conditione, brachium avulsam a corpore non est *suppositum*, cum non sit suarum actionum integram principium, quia pendet a corpore; *ultimo completa*, quia *suppositi* nomen tribuitur rebus individuis, et singularibus, non vero speciebus, et generibus. Sic fere ait Mastrofini (*Met. Subl. l. 1. §. 15. et 16.*)

Si deinde haec completa substantia ratione ornetur, dicitur *persona*, quae proinde est substantia, rationalis, singularis, sui juris, et ultimo completa, aut, uti placuit Boetio, *naturae rationalis individua substantia*. Ex quo patet, *personam* esse semper *suppositum*, non vicissim; uti *suppositum* est semper *substantia*, sed non e converso (1).

303. Modus existendi in substantia aut eam statuit in *esse* substantiae, et dicitur *independentia*, aut *perseitas*, uti scholastici loquuntur; aut ad rationem suppositi extollit, et vocatur *subsistentia*, et a graecis *hypostasis*. *Subsistentia* proinde est modus existendi, qui naturam entis reddit sui juris, proprium, et adaequatum principium suarum operationum. Haec vocabula *suppositum*, *subsistentia*, *hypostasis* idem significant apud Ecclesiae Patres, cum de spirituali substantia loquuntur; imo aliquando cum *persona* confunduntur. Ceterum non recte se gerunt, qui generice *subsistentiam* vocant *independentiam a subjecto inhaesionis*; nam modus existendi est, ideoque indiget ente existente.

304. Quoniam vero *suppositum* est substantia completa (§. 302.); ideo apud scholasticos natum est axioma: *actiones sunt suppositorum*. Verum vis agendi proprie spectat ad naturam, seu ad *substantiam*, ita ut ex diversis naturis diversae oriantur actiones. Quoniam vero *substantia* non potest actionem elicere, nisi sit subsistens, et completa; ideo actiones sunt *suppositorum*, seu substantiarum subsistentium. Ast si accipiat *suppositum* pro *subsistentia* (§. 303.), actiones tunc sunt *denominative*, uti dicunt, *suppositorum*, non vero *elictive*, quia ex. gr. non humanitas agit, sed natura humana (2).

(1) *Persona*, dicta a verbo *persono*, olim designabat histriones, qui vultui suo larvam quamdam accommodabant, una tantum via emittendae vocis aperta. Quoniam vero illi histriones personis inductis representabant individuos homines; ideo *personae* nomen translatum est ad significandum generice humanam substantiam, eique superfluas peculiare adfectiones animi, et corporis, imo etiam relationes nationum, patriae, generis. Sed relictis primogenia significatione, modo innuit, quod supra in definitione posuimus. Notatur tamen, in Boetiana definitione verbum *individua* stare pro *incommunicabilis*. Vide Mastrofini (*Met. Subl. l. 1. §. 19. ad 21.*)

(2) Hinc dicit Cl. Mastrofini (*Met. Subl. l. 1. §. 23. ad 31.*), *suppositum* debere in se habere principium suarum operationum, quod principium est ipsamet *natura*, quae est in supposito, quod illam peculiari modo existendi affectat, ultimo complet, et ab ea non re, sed cogitatione distinguitur. Hinc qui dicit *suppositum*, dicit etiam *naturam*, quae a supposito terminatur. Quare *suppositum* abstracte acceptum pro eo, quod *naturam* terminat, et complet, non est *functio*, et origo operationum, sed est conditio penitus necessaria, sine qua *natura* non operatur.

305. *Accidens*, de quo supra (§. 304.), *modus*, *qualitas* confundi solent, quia exprimunt, quidquid subiecto *accedit*, illud *modificat*, ad aliquam classem determinat, quae fere idem sonant. Verum distinguenda sunt; nam in ente *qualitas* est quaecumque proprietas, quae exprimit id omne, quod *proprium* est entis. *Proprietates* vero sunt aut ipsa essentialia, aut attributa, aut accidentia. *Essentialia* ipsam rei essentiam constituent, uti *animalitas*, et *ratio* in homine (1); *attributa* sunt proprietates ab essentialibus manantes, uti intellectus, voluntas, memoria in mente hominis (2); *modi* demum, sive *accidentia* proprie rationem habent in attributis, et ens ad individuum singulare melius determinant, et fere complent (§. 95. 96.), uti est doctrina, sanctitas in Francisco, in Paulo. Capacitas tamen habendi accidentia est attributum, quia haec capacitas ab essentia entis oritur. Vide Storckenau (*Ontol. sect. 2. c. 3. §. 57.*). Porro neque *essentialia*, neque *attributa* sunt variabilia, donec ens est hoc ens, secus non foret illud praecise ens (§. 284.); sed *modi* mutari continuo possunt, quin ens desinat esse illud ens (3). *Accidens* praeterea dispesci solet in *physicum*, quod nempe ens modificat, et sine subiecto esse nequit, uti doctrina; et *logicum*, quod enti qui-

(1) *Essentiale*, proprie loquendo, est primum illud, quod analysis exhibet, ut primum in ordine cognitionis, dum peragitur demonstratio. *Essentialia* essentiam constituentia nullam inter se admittunt dependentiam, neque tamen ens dici potest enasci ex *coadunatione* ipsorum essentialium, quasi nempe ista carerent naturali nexu. Quare unio essentialium, ut ait auctor *Fragmentorum Cosmologiae* (c. 3. sect. 1. §. 6. 7.), intelligenda est aeterna, et immutabilis, uti essentia metaphysica (§. 286); neque intelligi potest ens, quod illa simul non colligat. Iuterea tamen inter ipsa unum primum concipi potest ordine cognitionis, ex quo uno alia emanare concipiuntur, uti *aseitas* in Deo, ex qua aliae Dei proprietates profluere dicuntur.

(2) *Attributum* tamen videtur vocabulum inexactum, quia tacite insinuat, esse aliquid adiectum essentiae, et extrinsece adveniens. Sed inopin vocabulorum cogit, ut hoc verbum retineamus.

(3) Hinc *sine substantia modus esse nequit* (§. 260. n. 5.), quod philosophi vocant *principium substantiae*. Et recte quidem; nam quisvis *modus* non existit *in se*, alioquin foret *substantia*, ideoque simul substantia, et modus. Substantia vero capax modorum esse debet, alioquin modus pariter existeret *in se*, ideoque denuo substantia, et modus esset. Ceterum tantum substantia finita, utpote mutabilis, *modis* subicitur, sine quibus foret substantia indeterminata. Hoc autem principium continet veritatem necessariam, quia in propositione: *nullus modus potest esse sine substantia*; praedicatum *esse sine substantia* continetur in subiecto *nullus modus*, uti examinanti patet. Potest tamen cauciari hoc pacto: *quilibet modus est in aliqua substantia*.

dem haeret, sed substantia esse potest, uti vestis in humano corpore (1).

306. Cum porro multa existant in rerum universitate, et ita existant, ut alio subjecto non indigeant, in quo existant, patet, non unam esse substantiam, ideoque non recte eam definiisse Spinozam (§. 300.), qui inde conclusit, unam tantum esse substantiam. Et hoc constat etiam ex eo, quod aliae possibiles sint substantiae, quae certe non existunt, et poterant existere, quin proinde unam efformarent substantiam. Denum multa sunt in entibus, quae simul stare nequeunt, uti quadratum et rotundum, quae proinde in pluribus distinctis stare debent. Sed de his alibi.

## ARTICULUS SECUNDUS.

### DE ENTE CONTINGENTI, ET NECESSARIO, DE MUTABILI, ET IMMUTABILI

307. *Necessarium* est id, cujus oppositum repugnat; *contingens* vero, cujus oppositum esse potest. Circulus est *necessario* rotundus, mundus est *contingenter* existens. *Necessarium* vero est *existentiae*, si adeo ipsi existentia conveniat, ut nun existere repugnet; et *essentiae*, si adeo essentiam entis ingrediatur, ut oppositum esse nequeat. Deus est *necessarius existentiae*: attributum fontale in ente, utpote quod essentiam metaphysicam (§. 284.) constituit, est *necessarium essentiae*. Deinde *necessarium* est *absolutum*, cujus oppositum intrinsece repugnat; sic Deus est *absolute* necessarius; *hypotheticum*, cujus oppositum repugnat sub data conditione,

(1) Aliqui veteres scholastici probant etiam *accidentia absoluta*, quae nempe sine subjecto *naturaliter* esse non possunt, sed in ipso non sunt tamquam ejus partes; e. g. colores, sapes, etc. Haec doctrina falsa reputatur, uti notat auctor *fragmentorum Cosmologiae* (c. 3. sect. 2.). Nam 1. hac admissa opinione, existentia corporum nobis evanesceret, cum ex mente adversariorum *accidentia absoluta* aeque ac corpora in nostros sensus agere possunt. 2. Haec *accidentia* aut sunt de genere entium, ex quibus primo componi, et in quae ultimo resolvi potest mundus, et tunc *substantiae* sunt, aut non sunt ex eorum genere, et tunc non sunt *possibilia primitiva*, sed eorum possibilitas intrinsece pendet ab aliis substantiis. Quare *accidentia*, adfectiones, relationes, et quidquid contingens in ente reperitur, non sunt *absolute* possibili, sed *hypothetica*, hoc est ex suppositione existentiae primorum possibilium. Ita divisibilitas in corpore est possibilis, facta hypothesei existentiae corporis, ut notat idem auctor (c. 1. §. 8. nota, etc. 3. n. 7.)

aut sub aliquo respectu: sic Petrus *necessario* existit, facta *hypothesi*, quod existat. Ens *mutabile* est illud, quod potest esse aliter ac est; *immutabile* vero est illud, quod nequit esse aliter ac est. Quaevis creatura est *mutabilis, immutabilis* Deus. Ens potest esse *mutabile* quoad *existentiam*, et quoad ea, quae existentiam consequuntur. Utraque haec mutatio *interna* dicitur, quia variationem in ente ponit; *externa* vero mutatio, si non varietur ens intrinsecus, sed tantum extrinsecus, quatenus novam denominationem, novumque respectum recipit, uti mutatur *extrinsece* columna, cum circa ipsam immobilem aqua decurrit.

308. Hinc patet 1. necessarium absolutum, et contingens se invicem excludere; 2. se invicem quoque excludere necessarium absolutum, et hypotheticum; 3. simul stare posse contingens, et necessarium hypotheticum; 4. necessarium absolutum nec initium habuisse, nec finem habiturum, alioquin oppositum non repugnaret; 5. ideoque rationem suae existentiae in se habere, alias principium haberet; 6. ideoque necessarium absolutum esse immutabile, secus oppositum esse posset; 7. et proinde modis, seu accidentibus subjici non posse, quia accidentia esse, et non esse possunt (§. 305.); 8. necessario tamen absoluto non repugnare mutationem externam, quae nihil ponit in ipso, nihilque ab ipso detrahit; 9. contingens e contra initium habuisse, ac proinde in alio habere suae existentiae rationem; 10. contingens in omnibus iis, quae in ipso contingenter sunt, esse mutabile; 11. ideoque esse mutabile quoad existentiam, et quoad ea, quae existentiam consequuntur, quae omnia potest accipere, vel amittere, ac propterea ipsorum respectu esse aliter ac est; 12. ens contingens in ente necessario habere suae existentiae rationem, cum in alio contingente nequeat habere, quia hoc aliud rationem sufficientem suae existentiae in alio etiam habet, et quodvis contingens suae existentiae ratione sufficienti destituitur (ibid.); 13. ideoque, dato uno ente contingente, ens necessarium admittendum esse; 14. et proinde, admissa entium contingentium serie, ens necessarium esse admittendum, quia quodvis ens illius seriei indiget ente necessario; 15. existere entia contingentia, uti cuique patet; 16. ideoque existere ens necessarium.

## ARTICULUS TERTIUS

## DE ENTE COMPOSITO, ET SIMPLICI.

309. *Compositum* generatim sumptum dicitur id quod ex pluribus exsurgit; quod vero pluribus destituitur, *simplex* vocatur (1). Plura conjungi possunt ex se, et *compositum* erit *naturale*; aut consociantur hominum industria, et erit *artefactum*. Compositum est *metaphysicum*, si partibus realibus quidem caret, sed multis ex attributis veluti constat, quae tamquam ejus partes concipiuntur; ita est *metaphysice composita* mens humana, in qua intellectus, voluntas, memoria insunt. *Metaphysice* composita dicuntur etiam, quae constant *materia* et *forma*, *potentia* et *actu*, *essentia* et *existentia*. Compositum *physicum* est, quod partibus reapse separabilibus constat, uti corpus quodcumque. Compositum *logicum* demum dicitur, quod constat genere, et differentia. *Simplex* quoque multiplex est, nempe *metaphysicum*, quod uno exsurgit attributo, ideoque rejicit *materiam* et *formam*, *potentiam* et *actum*, *essentiam* et *existentiam*; *physicum*, quod rejicit partes reapse physicas; *logicum*, quod genus, et speciem a se repellit.

310. Compositum *physicum* est *extensum*, quatenus partes extra partes habet; hocque *extensum* dicitur *continuum*, si inter partes inter se adstrictas aliae partes interponi nequeant; *interruptum*, si inter partes suas partes aliae esse possint. Quare in *continuo* partes se mutuo excipiunt, atque communem terminum habent; in *interrupto* autem partes per contiguitatem ad communem terminum constituendum vergunt. Quodlibet ens corporeum est *interruptum*, quia quodvis corpus partibus constat, inter quas aliae esse possunt. Quapropter verum *continuum* est illud, quod intellectu mathematici conspiciunt, cum *continua physica* potius interrupta vocari possint.

311. Ex quibus inferimus, 1. enti tum simplici, tum composito competere omnia de ente in genere dicta, quia illa sunt istius species; 2. ens simplex, et compositum sese mutuo opponere, quia illud pluribus destituitur, istud vero pluribus constat; 2. ideoque inter ens compositum et simplex

(1) Idea *simplicis* non est *negativa*, sed exprimit in ente positionem realitatis, ex qua partium negatio emergit.



nullum dari medium, quia quodvis ens simplex est, aut compositum; 4. ens physice compositum in partium coagmentatione consistere, quia, hac remota, illud evanescit; 5. et proinde in hac partium coagmentatione esse ipsius essentiam repositam, alioquin illud existeret sine hac; 6. quare entis physice compositi essentiam esse sitam in quodam accidenti, cum coagmentatio partium esse, vel abesse possit ab ente, servato aut rupto partium vinculo, licet haec coagmentatio enti considerato uti composito necessario conveniat; 7. ideoque ens physice compositum esse etiam ens contingens, et mutabile (§. 307.), quia neque repugnat oppositum, neque nequit esse aliter ac est; 8. atque pluribus simplicibus, vel indecomponibilibus constare, ne dicatur in infinitum divisibile; 9. et propterea in composito esse plures substantias; 10. et simul dari entia simplicia, vel indecomponibilia,posito ente composito (1).

## ARTICULUS QUARTUS

### DE ENTE FINITO, ET INFINITO.

312. Illud *finitum* dicimus, quod in suis perfectionibus circumscriptum est, quodque proinde augmenti, et decrementi est capax, uti sunt omnes res creatae; *infinitem* vero, quod omnem realitatem complectens nullo modo augeri, minui potest. Infinitum aut est tale, quia hoc modo consideratur, et ulterius progredi est nobis negatum, et *indefinitum* vocari solet, uti quantitates arithmeticae: aut reapse nullum augmentum, vel decrementum admittit, et dicitur *infinitem absolutum*. Quare ideam *infiniti absoluti* ex idea *finiti*, et *realitatis* efformamus, consociando nempe realitates, omnesque limites removendo ab ente finito.

313. Hinc deducimus, 1. ens finitum esse contingens, quia augeri, minui potest, ideoque aliter esse ac est (§. 307); 2. ideoque ens finitum non in se rationem suae existentiae

(1) Circa essentiam entium simplicium notari oportet, ipsam non reponi in peculiari modo, vel forma afficiente, vel determinante illorum existentiam; quia peculiaris modus, vel forma perpetuo consequi debet entium simplicium existentiam, quae huiusmodi definitur vel circumscribitur. Modi huiusmodi proinde, vel formae non sunt illud, quod primum in entibus simplicibus concipitur (§. 284.). Sic idem in mente nostra non sunt ipsius mentis essentia, quia existentia mentis illa ideis alio et alio modo afficitur, vel terminatur, uti notat Mastrofini (*Met. Subl. L. 1. c. 1. n. 4.*)

habere, sed in alio; 3. hoc aliud non posse finitum esse, alioquin et ipsum alio indigeret; 4. ideoque entia finita in ente infinito habere suae existentiae rationem sufficientem; 5. ens infinitum omnes perfectiones in se continere, secus augmentum admittere posset; 6. ideoque etiam existentia donari ens infinitum, quae certe est aliqua perfectio; 7. deinde numerum absolute infinitum repugnare, quia numerus augeri, minuique potest, et hoc ipso non esset infinitus, (§. 283. prop. 1.); 8. proindeque neque dari extensionem infinitam, alioquin daretur numerus partium infinitus; 9. ideoque ens extensum esse non posse infinitum; 10. et propterea ens infinitum esse simplex; 11. infinitum omnes realitates in se continere, quae in omnibus entibus insunt, sed omni defectu defaecatas, alias aliqua privaretur perfectione; 12. plura infinita repugnare, secus unum forent, quia unumquodque aliorum perfectiones deberet habere, et proinde etiam id omne, in quo distinguerentur, utpote quod unumquodque supponitur infinitum.

## CAPUT QUARTUM

### DE MULTIPLICI ENTIIUM RELATIONE.

314. De specialibus relativis entium proprietatibus hic agendum est. *Relativae* entium proprietates sunt illae, quarum ope *unum ens alterius notitiam suggerit*, vel unus ejusdem entis status ideam alterius. Ita patris idea filii excitat ideam, et meae tristitiae status ideam status meae laetitiae in mentem mihi revocat. *Relatio* proinde est *nexus*, seu respectus quicumque unius ad aliud, aut ordo ille, quo unum cum alio cogitatur. *Relationis* idea est omnino *objectiva*, quatenus reapse aliqua inter se ita referuntur, ut unum aliud supponat; et quatenus non surgit illa idea in mente nostra ex quodam *judicio instinctivo*, ut vult Reid, aut quatenus non est quaedam forma intellectus puri, ut placuit Kantio. *Relatio* est *logica*, si a mentis consideratione pendet, uti est illa, quae adest inter modos, et substantiam, a qua modi dependent, et in qua existunt; haecque dici potest etiam *modalis*; relatio vero est *realis*, si viget in rebus ipsis ante omnem mentis operationem, uti est illa, quae intercedit inter causam, et effectum. Porro mens nostra certe valet ponere relationem inter varios respectus, et ordines suarum idearum; et certe in

multis rebus relatio realis reperitur. Logicam vero mens nostra veluti creat, *realem* in rerum universitate detegit. In *relativis* proprietatibus notari debet subjectum, *quod refertur*; terminus, *ad quem illud refertur*; fundamentum relationis, *ob quod illud ad istum refertur*, et terminos reddit relationis capaces (1). Hoc vero fundamentum potest esse tantum ex parte unius termini, quo in casu non est mutua relatio. Sic ex. gr. effectus dependet a causa, sine qua esse nequit; sed causa, uti *ens*, et *in esse sui*, potest esse sine effectu. Nonne Philippus Macedo poterat esse Philippus sine Alexandro, qui tamen sine patre esse nequibat? Plures sunt proprietates relativae, nempe identitas et distinctio, similitudo et diversitas, quantitas et aequalitas, successio, ordo, duratio, spatium, quae omnia hic expendenda sunt.

## ARTICULUS PRIMUS

### DE DISTINCTIONE, ET IDENTITATE.

315. *Distincta* ea dicuntur, quorum unum non est alterum. Hinc *distinctio* est affectio entium, qua unum non est alterum, nempe non sunt idem unum. *Distinctio* est *realis*, si intercedat inter res, quae ita inter se ante mentis cogitationem secernuntur, ut una altera non sit; *virtualis* vero, aut *rationis*, cum res mentis tantum operatione a se mutuo separari possunt. *Realis distinctio* dicitur *realis realissima*, quae intercedit inter ea, quae reapse separata sunt, vel saltem separari, et discindi queunt, uti corporis inter alicujus partes; *realis modalis*, quae reponitur inter substantiam, ejusque modos; *realis formalis*, quae statuitur inter ea, quae in re, seu a parte rei sunt quidem distincta, sed adeo inter se colligata, ut nullatenus separari possint, uti inter ejusdem substantiae attributa. *Distinctio* vero *virtualis* est *rationis ratiocinantis*, si intercedat inter ea, quae a mente separata concipiuntur sine fundamento in re, uti inter hominem, et animal rationale; et *rationis ratiocinatae*, quae cadit in ea, quae separari quidem nequeunt, sed a parte rei sunt distincta. *Distinctio formalis* habet auctorem Ioannem Duns. Scotum.

(1) *Absoluta* dicuntur, quae concipi possunt, quin alia intelligantur, uti Petrus. Hinc *Ens absolutum* est illud, quod ex se concipitur, nullamque dependentiam involvit, tale est Deus; e contra *ens relativum* dicitur illud, quod intelligi nequit sine alio, a quo dependet; tales sunt omnes creaturas. Hic est sermo Transcendentalistarum.

ex Minorum familia, atque non levis litis origo fuit. Sed *his* composita dicenda est, quia de vocabulis erat quaestio. Nonne Scotica distinctio *formalis* est eadem ac distinctio *rationis ratiocinatae*, quam tuentur, qui Scoticam rejiciunt?

316. Distinctioni adversatur *identitas*, quae efficit, ut ens unum aliud sit, aut saltem ambo *identificentur* in aliquo, licet forsitan distincta sint. *Eadem* autem possunt esse inter se duo entia primum *genere*, si ejusdem generis proprietate exornentur, uti materia, et spiritus, quae eadem sunt ratione substantiae; secundo *specie*, si habeant ejusdem speciei attributa, uti Petrus, et Paulus; tertio *numero*, si in eodem subjecto uniantur, licet distinctam habeant existentiam, uti intellectus, et voluntas in una anima. *Identitas numerica* est *realis* in iis, quae diversum inferunt conceptum, sed unam habent individuum essentiam, uti in intellectu, et voluntate; *formalis* vero in iis, quae nequidem diversam ideam praesferunt, uti in homine, et animale rationali. *Nulla numerica identitas*, quae est in subjecto, in quo eadem proprietates servantur, dicitur *physica*, vel *absoluta*, si subjectum nullam mutationem in se subierit; *relativa*, si subierit aliquam non apparentem mutationem; *moralis* si in hominum opinione pro eodem computetur, licet mutationem subierit; *metaphysica*, si nullam nec subierit, nec subire possit mutationem. Exemplum sit homo, in quo *identitas physica* est, donec tum in anima, tum in corpore nullam admittit mutationem; est *relativa*, si aliquid ex. gr. passus sit, quod tamen in corde servat: est *moralis*, si, licet coram Deo ex. gr. scelestus factus sit, adhuc tamen probus aestimetur; *metaphysica identitas* in uno Deo, qui immutabilis est, inveniri potest (1).

(1) Doctrinam ab omnibus fere traditam de identitate supra quidem docuimus; sed praeterire nequimus, quae acutissime tradit auctor *Fragmentorum Cosmologiae*. Docet itaque (c. 3. sect. 3, §. 4.), *identitatem praedicari* non posse de pluribus, sed tantum de uno, licet sit *modaliter* multiplex. Hinc dici nequit, mentem meam esse *eandem* cum tua, sed dici potest, mentem meam volentem esse *eandem* cum mente mea intelligente. Et reapse *omnino repugnant duo entia identica, seu eadem*. Nam nequeunt procul dubio dici *identica*, et *eadem* illa, quorum unum non est aliud; quae distinguuntur inter se; et quorum unius adfectiones, et modi non sunt adfectiones, et modi alterius; atqui quodlibet ens est *immutabiliter*, et *essentialiter* unum, ab alio distinguitur, atque suas adfectiones, suosque modos habet distinctos ab adfectionibus, modisque alterius. Ergo. . . . Absurdum proinde est axioma, *quae eadem sunt uni tertio, sunt eadem inter se*, nisi substituamus verbo *eadem* verbum *similia*, aut *aequalia*. (ibid. c. 2.

317. Leibniti<sup>us</sup> repetit *identitatem* nostrae personae a convenientia variorum statuum nostrae animae, et ab ipsius harmonia cum universi substantiis; Cudworthus ex unione animae cum quodam germine incluso indissolubili modo in nostro corpore; Bonnetus, personam respiciens quoad sui cognitionem, identitatem repetit propriae personae ex statuum praeteritorum comparatione cum praesenti, identitatem vero personae alterius hominis ex notitia habita, illam non esse loco, tempore, aliisque circumstantiis mutatam; Lockius vero ex conscientia referente praeteritas adfectiones, easque conjungente cum praesenti animae statu (1). Verum aut hic loquamur de identitate *moral*i, et homo conscius est de *identitate* suae personae comparando praesentem suum statum cum praeteritis; aut de *physica*, et tunc suae personae *identitatem* deducit a constanti permanentia animi sui, et a continuitate vitae animalis, quoad corpus. Ex his facile est eruere, quonam in sensu aliquis homo dici possit *idem physice*, *relative*, aut *moraliter*.

318. Licet porro *identitas*, et *distinctio* videantur inter se opponi, tamen possunt diverso sub respectu in eodem reperiri subjecto. Ita anima et corpus sunt *realiter distincta*, et tamen efformant *eundem* hominem; intellectus, et voluntas *formaliter* distinguuntur, et tamen sunt in una anima. Interim hos canones habeto; 1. quae sunt eadem uni tertio, sunt eadem inter se; 2. quorum unum est idem sub aliquo respectu cum tertio, alterum sub eodem respectu distinctum, sunt distincta inter se, considerata sub illo respectu.

## ARTICULUS SECUNDUS

### DE DIVERSITATE, ET SIMILITUDINE.

319. *Diversa* sunt entia, quorum unius notae non sunt in altero, ideoque, substitui nequeunt; *similia* sunt, quae habent easdem specie notas, proindeque possunt substitui. Quare proprie *diversitas*, et *similitudo* ad qualitates entium refe-

§. 5.). Si vera sunt haec, in fumum abeunt, et a philosophia sunt eliminandae illae variae identitatis species, de quibus supra locuti sumus, nempe generica, specifica, numerica, quasque retinimus ad intelligendos philosophos.

(1) Si vera esset Lockii opinio, in ebrietate, in somno, in dementia cessaret personae *identitas*, quia tunc conscientia, seu memoria non referret praeteritas adfectiones, nec cum praesentibus conjungeret, vel compareret; deinde expergeret illa *identitas*, aut revivisceret, conscientia redeunte.

runtur, non vero ad eorum quantitatem, nisi quatenus et quantitas inter qualitates adnumerari potest, uti collectio notarum potest dici quantitas. Quapropter diversa sunt semper a se mutuo distincta, licet distincta non sint semper diversa, quia easdem specie notas habere possunt (1). Diversa sunt aut *disparata*, quorum unius conceptus alterius conceptum non excludit, seu simul stare possunt, uti pietas, et doctrina in eodem homine; aut *opposita*, quorum unius conceptus excludit conceptum alterius, seu simul stare nequeunt, uti amor, et odium in eodem erga eundem.

320. *Diversitas* oriri potest ab *intrinsicco* entium, nempe ab ipsis proprietatibus essentialibus, aut accidentalibus, uti ratio, doctrina in homine; et ab *extrinsicco* entium, quatenus in separato loco, aut tempore existunt. Ceterum entia *similia* debent habere easdem prorsus qualitates, et quantitates, ut perfecte *similia* sint.

321. Stoicorum aetate jam versabatur quaestio, utrum nempe dentur, vel saltem dari possint duo entia, quae tum in essentialibus, tum in accidentalibus sint perfecte *similia*. Stoicos negautem sententiam tenuisse, docet Tullius (l. 2. qq. Acad.). Idem docuit Leibnitius, qui *indiscernibilia*, ea scilicet, in quibus eadem sunt, ob quae discerni deberent, nullimode dari posse, autumavit. Nam, ut ipse argumentabatur, si *indiscernibilia* dari possent, nulla foret ratio sufficiens, cur unum in uno loco, alterum in altero constitueretur, quasi haec ratio non posset esse subjectiva, et in Deo (§. 272). Neque recte hanc causam patrocinatus est Leibnitius, cum ex eo *indiscernibilia* deduxit, quod, si darentur, secerni non possent, ideoque unum forent, quasi scilicet ex diversa existentia distinguere nequirent. Igitur duo, aut plura entia perfecte similia dari possunt, cum nulla pugna sit, ut plura entia habeant easdem proprietates essentielles, et accidentales, ipsaque Deus ad existentiam perducatur. Adde: poteratne, quærso, unum ens creare Deus? Poterat certe, et quidem sine ratione dependente a re possibili. Ecce in alio loco, vel tempore nequit creare aliud primo simile? Utrum vero reapse dentur, necne, quaestio resolveri nequit, quia omnia elementa, omnesque res examinandae forent, quod ab homine numquam per-

(1) Ceterum non videtur reprobanda doctrina Auctoris *Fragmentorum Cosmologiae*, docentis (c. 3. sect. 3. §. 5.), similitudinem explicari non posse per *identitatem*; in pluribus enim nihil est *idem*, nihil est *commune*, atque subiugentia, notionem similitudinis esse simplicissimam, atque propterea respuere definitionem (§. 516. nota).

fieri potest. Ceterum *stoicum est quidem, nec admodum credibile, nullum esse pilum omnibus rebus talem, qualis sit pilus alius, nullum granum . . . Quid si in ejusmodi cera centum sigilla hoc annulo impressero?* ait Tullius (qq. acad. l. 2. n. 17. et 26.)

322. Hinc sequitur; 1. similia esse inter se, quae sunt similia cum tertio; 2. diversa esse inter se ea, quorum unum est simile tertio, alterum vero a tertio diversum.

## ARTICULUS TERTIUS

### DE QUANTITATE, ET AEQUALITATE.

323. *Quantitas* est id omne, propter quod aliquid partibus constat, atque in partes resolvi potest, ideoque augmenti, vel decrementi est capax, atque majus, minusve alio potest esse. Quare idea *quantitatis* est *relativa* (§. 106), quia aliquid potest esse magnum diverso sub respectu acceptum, semperque augmentum, et decrementum admitti potest. Iuxta mathematicos *quantitas* est *continua*, si in corpore respiciatur nulla in suis partibus interruptione intercepto (§. 310); et *discreta*, si consideretur in numero ab unitatibus inter se distinctis composito. Iam vero ea entia dicuntur *aequalia*, quae eadem sunt quantitate, licet diversa in *qualitate*; *inaequalia* proinde, quae eandem non habent quantitatē. Ex quo patet *aequalia* non semper esse *similia*, quia illa quantitatē, haec qualitatem respiciunt; sed perfecte *similia* etiam eandem *quantitatē* includunt. Ceterum, quae sunt *aequalia* possunt esse *similia*, sed *similitudo* tunc non ex conceptu quantitatis derivatur, quia *similitudinis* idea ad qualitates tantum dicit relationem, et in perfecte similibus *quantitas* veluti una ex qualitatibus accipitur (1).

324. Interim; 1. quae sunt aequalia uni tertio sunt aequalia inter se; 2. ea, quorum unum est tertio aequale, alterum inaequale, sunt inaequalia inter se.

(1) Relationes *identitatis*, *similitudinis*, et *aequalitatis*, earumque oppositae videntur prorsus subjectivae, quia nullus nexus, nullaque dependentia intercedit inter res *identitas*, *similes*, *aequales*, neque idea unius excitat alterius ideam, quae tamen requirerentur, si forent objectivae (§. 314.).

## ARTICULUS QUARTUS

DE ORDINE, SUCCESSIONE, DURATIONE, SPATIO.

325. Quando varia entia modum similem in existendo servant, atque quodvis eorum suo existit loco juxta finem quemcumque, illa *ordinata* dicuntur; uti *confusa* vocantur ea, quae nullum servant in existendo modum, aut saltem non suo quodvis existit loco, juxta aliquem finem statutum. *Ordo* itaque est ille modus similis, quo aliqua disposita, atque ad finem aliquem destinata sunt, aut est *parium*, *dispariumque rerum sua cuique loca tribuens dispositio*, uti ait s. Augustinus (l. 19. de Civ. c. 13.); *confusio* est negatio hujus modi similis quoad finem praestitutum. Sume exempla ex exercitu, ex acervo pecuniarum diversi pretii, ex aliquo sermone; nam *ordo*, vel *confusio* locum in omnibus rebus materialibus, et intelligibilibus habere possunt.

326. Ex quibus patet; 1. ordinem plura supponere ad eundem finem conspirantia; 2. quare aut fine, aut plurium numero deficiente, ordinem evanescere; 3. ordinem *modum*, seu regulam supponere, juxta quam illa plura disponuntur; 4. ideoque ordinem simplicem, vel compositum esse, prout una, aut plures sunt regulae; 5. posse ordinem, vel confusionem praesferre, quae ordinantur, pro finium diversitate; 6. ordinem semper voluptatem gignere, quia sensus suaviter excitant, animumque alliciunt, quae proportionem, regulisque procedunt.

327. Dicuntur sibi *succedere* ea, quorum unum ingreditur in alterius locum, uti videre est in aquis, quae in flumine labuntur. Quare *successiva* ea sunt, quorum alia sequuntur alia; *successio* vero est continuata existentia illorum, quorum unum ingreditur in alterius locum. Hinc *successio* habet locum in ente, qui non manet in eodem statu. Sic dicitur facta *successio* in aliquo ente, si statui existentiae status non existentiae, aut statui alicujus adfectionis status alterius adfectionis ita in eo *successerit*, ut unus status alterum neget. Ex quibus patet, *seriem successivam* non posse existere nisi ex statibus singularibus successivis, quorum ablata successionem, illa series nequit intelligi. Quibus positis, non abs re putamus aliquas de successionem statuere propositiones excerptas ex saepe laudato Parchetti (*Fragmentorum Cosmologiae* c. 8.). Itaque



1. *Quaecumque successiva series est continua.* Siquidem si continui non essent status successivi *A. B. C.*, inter ipsos alius, vel alii status forent admittendi; atque proinde hoc ipso admitterentur alii status, qui succederent statui *A.*, et praecederent statui *B.*, sicque omnes hi status forent *series successiva continua*. Adde, quod nullimode concipi posset aliqua *successiva series*, quin status alicujus rei succederet statui alterius rei, et sic deinceps. Ex qua veritate et lex patet *continuitatis* (§. 310.), quae sic potest enunciari: *mutationes omnes in entibus serie accurate continua evolvuntur, saltem quibuscumque minimis omnino exclusis.*

2. *Universitas successionum, et statuum successivorum factorum in entibus mutabilibus proficisci debet e variabili statu finitorum possibilium, quem nihil omnino praecessit.* Si enim alius status contingens praecessisset *universitati successionum*, et *statuum successivorum in entibus mutabilibus* praeter *variabilem finitorum possibilium statum*, quem nihil omnino praecessit, haec universitas haud universitas dicenda foret, uti supposita est. Ergo *universitas* . . . Hinc patet *statum absolute primum* in possibilibus finitis fuisse *statum ipsorum contingentem*; ideoque hunc statum esse terminum, ex quo mutationes, et successiones mutabilium entium omnes debent proficisci.

3. *Quaecumque contingentium statuum series actu evoluta, vel quae actu evolvi potest, debet constare successivis simplicibus, et indivisibilibus statibus, et statu contingentem absolute primo.* Siquidem quaecumque contingentium statuum series actu evoluta, vel quae actu evolvi potest, debet constare successivis simplicibus, et indivisibilibus statibus, quia debet esse *continua* (ex prop. 1.); sed universitas successivorum simplicium, et indivisibilium statuum in entibus mutabilibus supponit etiam statum *variabilem absolute primum* (ex prop. 2.). Ergo *quaecumque contingentium* . . .

4. *Nulla successiva series actu evoluta, vel quae potest evolvi, constare potest infinito terminorum numero.* Nam si infinito numero terminorum constaret, series illa successiva nullum haberet finem; sed hoc repugnat, quia quaecumque successiva series constare debet tantum successivis simplicibus, et indivisibilibus statibus, et statu contingentem absolute primo (ex. prop. 3.). Ergo *nulla successiva* . . .

328. Ab idea *successionis* (§. 327.) ad illam *durationis* progrediamur. *Durare* dicitur aliquod ens, cum manet in eodem statu, seu quando uni statui, in quo est illud ens, non

succedit alius status illi oppositus. Quare *duratio* est negatio successioneis, et mutationis sub ea ratione, sub qua ens *durat*, licet non *duret* respectu aliarum affectionum. Quapropter 1. *duratio* contradictorie opponitur successioni, et mutationi; 2. ideoque *duratio* est affectio *negativa*, licet verbo *positivo* expressa; 3. male proinde aliqui *durationem* definiunt *continuatam entis existentiam*, haec enim definitio supponit *possibilia*, quae non *existunt*, non *durare*; *durationem* consistere in serie successiva, quae continua esse debet (§. 327. prop. 1.); dari in aeternitate, quae procul dubio *durat*, successionem: quae tria sunt rationi absona; 4. ac per consequens potius *continuatio*, quam *duratio*, est dicendus status successioneis, et mutationis, cui in ente aliquo non succedit status contradictorie oppositus; e. g. *continuat*, non *durat* corpus in statu motus, quando huic motus statui non succedit oppositus status negationis motus. Sed huic doctrinae aliqua praestat addere ex Parchetti (*Fragmen. Cosmologiae variis locis c. 7. 8. 9.*) decerpta.

1. *Quodcumque ens, quod in aliquo suo statu durat, quatenus durat, adest omnibus statibus, qui, eo durante, praesentes fiunt, si quoad alios status in eodem ente, vel aliis entibus mutationes evolvantur.* Hac enim in hypothesisi, non mutato ente in suo statu, in quo *durat*, status illi, quos acquirunt, vel amittunt entia, in quibus evolvuntur mutationes, de possibilibus evadunt actu praesentes, aut de praesentibus evadunt possibles. Mutatio proinde tota se habet ex parte entium, in quibus mutationes evolvuntur, et respectu illorum statuum, qui mutantur, et non ex parte entis, quod *durat*, respectu status, in quo *durat*. Igitur *quodcumque ens...* Sic, *immota* stante columna in flumine, ad ejus contactum accedunt, perveniunt, recedunt aquae fluentes; mutantur enim *relationes locorum*, quas habent aquae ad columnam, quae numquam locum suum mutat.

2. *Series successiva mutationum physicarum, vel logicarum affectionum nequit dici composita duratio.* Nam entia composita existentia, seu durantia existentibus partibus constare debent; sed in serie successiva status praeteriti, et futuri non sunt extantes, cum tantum status praesens existat. Ergo *series successiva...* Quapropter, quando seriem successivam *durationem compositam* vocamus, tunc seriei terminos in mente nostra concipimus, sicque *imaginariam* compositionem efformamus.

Quare 1. quando nos alicujus entis *durationem* metimur ex statuum successivorum evolutione, consideramus ens, quod durat, non mutatum quoad statum, in quo durat, sed veluti immobile terminum, ad quem referuntur mutationes, quae, eo durante, contingunt, quibusque coexistit. 2. Ideoque dicimus, aliquod ens *durasse*, quamdium est evoluta successio statuum in aliis entibus mutabilibus, vel in eodem ente, quod durat, quoad alios status; *duraturum* vero, quantum temporis constituit numerus statuum successivorum, ente illo durante in statu suo. 3. Quare quaevis *duratio* commensurari potest ex numero successionum, quibus ens coexistit, vel coexistere potest; sic e. g. dicentes, rem aliquam annum *durasse*, asserimus, illam rem coexistisse revolutioni solis per zodiacum, quin ulla mutatio facta sit in ipsa re circa status, in quibus *duravit*. 4. Hinc dicitur *coexistere* aliquod ens statibus successivis, si, illo extante, status successivi praesentes sint; *coexistisse*, si, illo *durante*, status successivi fluxerint; *coexistiturum*, si illo existente, status illi futuri sint, licet non adhuc evoluantur. 5. Quapropter ex successionibus, quae, aliquo ente *durante*, contingunt, nullam patitur mutationem physicam ens illud, sed tantum subjectum evadit novarum denominationum, seu subjectum mutationis logicae, quae neque Dei aeternitati adversatur (§. 328. prop. 1.). 6. Ac propterea dicitur aliquod ens *coepisse extare ante aliud*, cum plures effluerunt mutationes, ex qua coepit extare unum, quam ex qua coepit aliud; *semper fuisse*, quod fuit in omnibus mutabilibus statibus hucusque evolutis in entibus quibusque; *non semper fuisse*, quod fuit in aliquibus tantum hujusmodi statibus mutabilibus; *semper extitisse*, quod extitit, dum fuere universae hucusque evolutae successiones; *semper futurum*, quod est ordinatum ad existendum in omnibus statibus evolvendis in rebus finitis; *semper extiturum*, quod est extiturum in omnibus statibus evolvendis post illum, in quo coepit extare. 7. Ideoque ens necessarium *extat*, *semper extitit*, *semper erit extiturum*; *possibilitas* vero *externa* semper fuit, est, futura erit. 8. Deus itaque non posset dici *extitisse*, aut *semper extitisse*, sed tantum *extare*, si nullae fuissent successiones statuum contingentium. 9. Hinc absque errore potest dici; Deum modo *plus durasse*, quam *ante* annos mille; quia *modo* pluribus coexistit statibus successivis, quam *ante* annos mille. 10. Quare *duratio* Dei accepta *in se ipsa* non est *nunc major*, quam fuit *ante*; considerata vero quoad physicas mutationes in entibus finitis, sive quoad rela-

tionem coexistentiae cum successivis entibus, potest vocari *major*. 11. Ceterum *duratio* non est distincta a re, quae durat, tum quia, duratio est adfectio rei durantis, tum quia secus suae naturae necessitate extitisset primus durationis terminus, cum nihil ipsum praecedere potuisset.

329. Ex idea *successionis* (§. 327.) illam *temporis* efformare possumus. *Tempus* itaque est multitudo mutationum contingentium, singularium, et indivisibilium in serie continua, et successiva (§. 327. prop. 1.). Quoniam vero in successiva serie mutationum tantum compositio *imaginaria* datur (§. 328. prop. 2.); ideo tempus est multitudo, seu compositum *imaginarium*. Hinc 1. tempus est *majus*, vel *minus* ex numero durationum singularium; *minimum*, si duabus constet hisce durationibus; *maximum*, si omnibus constat durationibus; sed hoc dari nequit, quia numerus durationum potest in infinitum augeri; 2. *tempus* semper refertur ad *successionis* ideam, sine qua illud nequit concipi; 3. ac propterea, ablata *successione*, non possumus tempus metiri; imo omnis idea temporis evanescit; 4. ideoque tempus incepit cum mundo, cum quo rerum successio exordium habuit; 5. frustra proinde quaeritur, quare mundus *ante*, et non *post* creatus sit, cum *ante*, et *post* cadant in tempus, quod nullum fuit ante mundum creatum; 6. tempus mensuratur *successivis*, sed a *successivis*, et a *successione*, quae cum tempore procedit, reapse non distinguitur; 7. tempus eo longius est, aut videtur, quo *major* est numerus *successivorum*; 8. etiam *idearum* a mente humana confectarum *successione*, possumus tempus dimetiri, dummodo illae advertantur *ideae*; 9. et ideo brevius vocatur tempus ab illo, qui in aliqua detinetur voluptate, cum *idearum* *successionem* haud sentiat, vel advertat; 10. e contra vocatur tempus aequo longius ab illo, qui aliqua afficitur aerumna, a qua sperat eripi, aut bonum cupit, quod sperat adipisci, quia omnes *tristitiae* *ideae* sentit, a quibus, veluti a mallei ictibus, contunditur; 11. et ratio dein patet, cur hebetes, segnes, otio, ac voluptatibus dediti abhorreant a studio, a virtute, a disciplina, a solitudine, quae omnia eos *tristitia* afficiunt, nullam ipsis voluptatem creant, ideoque in illis longissimum insumere tempus ipsi gloriantur; 12. dicitur autem aliqua res *extare in tempore* aut quia, ipsa durante in statu suo, et externas tantum mutationes acquirente, extant *successivi* status tempus constituentes (§. 328. prop. 1.); aut quia ejus *existentia* habetur ex statibus, ex quibus tempus constare intelligitur; sed primo in sensu extant *in tempore*, quae

durant in statu suo: in secundo sensu extant *in tempore* finita, quorum existentia succedit inexistentiali, et evadit, vel evadere potest novus temporis terminus; 13. quare status possibilium absolute primus non est *in tempore*, quia nulli alii successit (§ 327. prop. 2.); sed tantum est terminus in *potentia*, quatenus evadit terminus temporis, si desinat per creationem possibilium; 14. proindeque *instans* est quaecumque duratio contingens solitarie spectata, seu status quicumque contingens, in quo nulla potest concipi multitudo partium seriei successivae. 15. hocque propterea sub respectu *instans* dici potest duratio entis absolute una, et simplex, si, ente durante in statu suo, successiones contingant in aliis entibus, vel in aliis ejusdem entis statibus (*cap. 8. §. 33. ad 39. Fragm. Cosm.*).

330. Ex eo quod successione metiamur tempus, recte infertur, ideam temporis non esse *formam sensibilitatis*, seu *intuitum sensus nostri interni a priori*, nempe *subjectivum intuitum*, independentem tum ab externis objectis, tum ab affectionibus animi, uti docuerunt Kantius. ejusque assecrae (§. 67.). Siquidem ideam temporis mens humana inter objecta ipsa sibi efformat, uti optime notat Mastrofini (*L'anima, e suoi stati l. 2. c. 4. a. 3.*), qui dignus est, ut attente legatur. Quare, licet tempus sit compositum imaginarium (§. 329), quatenus status praeteriti, et futuri successivae seriei non existunt praesentes, ideoque non efformant durationem compositam (§. 328. prop. 2.); tamen non male hoc tempus dicitur *reale*, et *physicum*, quatenus mutationes *reales*, et *physicas* humana mens respiciens, tempus *praeteritum reale* metiri valet. Sic porro efformata idea temporis *realis*, facile est menti ex illa etiam sibi cudere temporis *idealis*, sive *imaginarium* ideam, quae est idea possibilitatis multitudinis contingentium singularium, et indivisibilium durationum in serie continua, et successiva. Hoc tempus imaginarium vocant *purum* recentes, quia, ut ipsi dicunt, ex experientia non oritur.

331. Ex idea durationis (§. 328.) efformamus ideam aeternitatis, quae est *perfectissima duratio*. Duratio proinde dispesci potest in *aeternam*, et *contingentem*; duratio aeterna, quae est eadem ac *aeternitas*, consistit in necessaria negatione mutationis, uti est duratio summi Entis; *contingens* vero habetur, cum non datur quidem mutatio in aliquo ente quoad statum in quo est (alioquin non foret duratio), sed dari potest. Hinc patet, *status durationis aeternae* non posse seriei successivae terminos esse, alioquin non forent dura-

tionis status; *statum possibilem* non posse alium habere ante se ( §. 327. prop. 2. ), sed posse alium habere post se, id eoque posse evadere initium seriei successivae, si ille status commutetur; *status durationis contingentis* actu evadere successivae seriei terminos, si actu illi commutentur; *statum rei extantis finitae* esse successivum alii, vel aliis praecedentibus, et posse ulterioris seriei esse terminum. Posita *aeternitatis* definitione, 1. definitio Boetii *vitae interminabilis tota simul, et perfecta possessio*, debet sic corrigi: *interminabilis vitae minime successiva, et perfecta possessio*; quia illud *tota simul* innuit partes, quae in aeternitate non sunt; 2. id eoque successio, mutatio, tempus opponuntur aeternitati, quae est posita in perfectissima duratione; 3. ac propterea falsus est Lockius, qui aeternitatem efformat ex infinita temporis multiplicatione, cujus initium nec datur, nec dari potest: 4. non videtur autem probanda aeternitas *a parte ante, et a parte post*, sive *antecedens*, et *consequens*, si loquamur de aeternitate absoluta, in qua nulla successio, mutatio, vel divisio esse potest; si vero de aeternitate loquamur, quae adfuit, vel adfutura est statibus entium finitorum evolutis, vel evolvendis, ipsa dividenda est in *antecedentem, praesentem*, et *consequentem*, alioquin negaretur aeternitas statibus praesentibus praesens; 5. hinc aeternitas *antecedens* dici potest *infinita*, quatenus terminari non potest ullo statu rerum, qui antecesserit ipsam aeternitatem; *consequens* vero *infinita* dici potest quatenus nullus erit status coniugens futurus, qui huic aeternitati finem imponat; 6. quae *consequens* aeternitas proprio nomine dicitur *aevum*, et utraque vocatur *sempiternitas*, sed haec vocabula facile confunduntur. Interim sit sequens propositio.

*Entia finita, considerata uti possibile, vel uti futura, nequeunt dici coexistere aeternitati.* Nam 1. affectio, affectionisque negatio nequeunt simul coexistere uni tertio, alioquin simul esset, et non esset affectio; atqui, si aeternitati, quod est hoc tertium, coexisterent, entia finita possibile, et futura, simul coexisterent, uti est in hypothese, et non coexisterent, quia non extant. 2. Entia finita *successive* existunt; non enim possunt omnia simul existere cum suis possibilibus affectionibus ( §. 282. ); sed ad essentiam successivarum rerum pertinet, ut earum termini per contradictionem oppositi non existant simul ( §. 327. ); simul vero existere deberent possibile, et futura, si coexisterent aeternitati ( §. 328. cor. 4. ). Vide *Fragmenta Cosmologiae* ( c. 7. et 8. ).

332. Ex coexistentibus ( §. 328. cor. 4. ), quae *simultanea* quoque dicuntur, quia *simul* existunt, ideam *spatii* possumus conficere. Nam *spatium reale*, seu *physicum* recte definiri potest quaedam extensio orta ex simultanea coexistentia in serie physica continua corporum hujus mundi; *ideale* vero, sive imaginarium, extensio capax recipiendi corpora simultanea. Hinc cl. Mastrofini spatium *plenum*, quod nos dicimus *physicum*, extensionem definit acceptam cum impenetrabilitate; et spatium *vacuum*, sive *ideale*, extensionem a mente conceptam sine impenetrabilitate (*L'anima, e suoi statii: t. 1. l. 2. c. 3. a. 10. n. 682.*); nempe sine impenetrabilitate reali, sed cum impenetrabilitate possibili, alioquin extensio possibilis, et idealis non posset concipi. *Vacuum* substantivè positum potest concipi etiam inter res existentes materiales, quae se mutuo non contingunt, et dicitur *disseminatum*, cum nempe exurgit ex spatio reali, et ideali, seu est interceptum ex extensionibus actu extantibus. Ex data idea spatii illa enascitur *loci*, qui est realis, ac determinatus modus coexistendi ceteris simultaneis, et *situs*, qui est modus existendi in serie interrupta. Quare 1. spatium *reale*, *locus*, *situs* ita referuntur ad simultanea, ut, hisce ablatis, illorum ideae evanescant. 2. Sed *locus*, et *situs* non habent adeo intrinsecam connexionem cum entibus, quae sunt in loco, vel situ, ut, hisce mutatis, mutentur et entia; haec enim possunt *durare* absque relatione ad hunc locum; e. g. quin sint in loco superiori, in quo prius erant, cum possint simultanee transire de superiori ad locum inferiorem. 3. Ceterum si unum tantum ens existeret, non posset dici esse in *loco*, quia deessent *simultanea*, ad quae relationem dicere debet, ut dicatur in loco, vel in illo loco. 4. Ideoque petere, *ubinam Deus esset ante mundi creationem, et ubinam mundus creatus sit*, est supponere absurdum, nempe esse locum ante res creatas. 5. Spatio tantum reali possunt tribui *magnum, parvum, immensurabile, quantum*, quae voces in spatio *ideali* ideas mentis tantum exprimunt. 6. Verum male diceretur spatium *reale* receptaculum trine extensum, atque a cunctis rebus distinctum quia, assereretur substantia quaedam composita alio spatio indigens, et sic procedendum foret ad infinitum. 7. Spatium *plenum* potest esse perfecte *plenum*, quando inter extensionis elementa nihil intercipi potest, salva eorum mutua positione, et non perfecte *plenum*, cum nempe in ipso habetur vacuum disseminatum, seu cum extensionis elementa nec se mutuo contingunt, neque inter se extensionem com-

prehendunt. 8. Item vacuum potest esse *ante-mundanum*, et *extra-mundanum*, quorum priorum est extensio possibilis, cujus elementa possunt existere contigua, et non compenetrata; alterum vero est ipsum spatium *ante-mundanum* *extra mundi limites*.

333. Hinc perperam hic quoque dicitur Kantius, nempe ideam *spatii physici* esse *formam subjectivam* animae, seu *visionem*, et *intuitum nostrae sensibilitatis*. Nam, uti vidimus, *spatium physicum* oritur ex coexistentia corporum, atque proinde, istis deficientibus, ipsum quoque deficit. *Spatium vero ideale* ad normam *spatii physici* cogitamus, illudque statuimus in possibilitate corporum coexistentium in extensione nullis limitibus circumscripta (1). Videatur *Maestrofini (D'anima, e suoi stati t. 1. l. 2. c. 3. n. 684; et o. 4. n. 720, et seqq.)*, qui Kantismum hinc inde paucis discutit, atque ideas temporis, et spatii ab Kantii Formalismo vindicat.

## CAPUT QUINTUM.

### DE ENTIIUM VIRIBUS.

334. *Agere* dicitur res materialis, si partem sui in aliam convertat, uti tellus in herbam, aut etiam sine sui partitione, uti si una alteram ad motum determinet; *agere* dicitur ens animatum, sive *intra se* actionem exerit, sive *ad extra* in aliud influit: sic *agit* anima humana cogitando, aut sui corporis membra movendo; *agere* demum dicitur Deus simplicissimo suae omnipotentis voluntatis nutu. *Agere* itaque idem est ac aliquam mutationem producere. Abstractum dicitur *actio*, quae est id omne, cujus causa ultimo contingit muta-

(1) Non abs re erit hic notare, *spatium reale* posse concipi 1. aut veluti extensionem alicujus corporis suis qualitatibus primariis, et secundariis carentis; 2. aut veluti distantiam, quae inter plura corpora intercedit; 3. aut veluti id totum, in quo locatae sunt res creatae. In primo casu spatium est conceptus mentis, quia abstractione ejus ideam efformamus; in secundo casu est etiam conceptus mentis, quia ideam ejus efformamus ex comparatione unius corporis ad aliud, et ex abstractione mentis considerantis capaciter recipiendi corpora alia inter alia; in tertio casu est etiam mentis conceptus, quia abstractione mentis concipimus id, in quo res sunt locatae. Dum tamen *subjectivam* dicimus ideam spatii, nil de ejus veritate *objectiva* detrahimus, cum haec idea subjectiva ex coexistentibus, atque ex entibus realibus educatur. Vide Pluquet (*Examen du fatalisme t. 2. p. 2. liv. 1. sect. 2. chap. 1.*).



tii. Sed ens, quod agit, *potentia agendi* pollere debet, alioquin agere nequiret. Verum haec *potentia agendi* aliquid requirit, ut in actum prorumpat, quia *potentia* nudam agendi possibilitatem includit. Hoc aliquid est *vis*, quae est veluti potentiae evolutio, actionisque existentiae rationem sufficientem continet. Igitur in ente agente supponenda sunt *potentia activa, vis, actio*. Huiusmodi potentia est in *actu primo*, si inspiciatur, antequam vires adhibeat, in *actu secundo*, si consideretur tempore, quo operatur, hocque in casu est ipsa *vis* in exercitio posita. Potentia agendi supponit in alio *potentiam patiendi*, seu capacitatem recipiendi mutationem a potentia activa producendam. Ignis, qui calefacit, habet potentiam *activam*; lapis, qui calefit, potentiam *passivam*, seu patiendi.

335. Deinde illud omne, quod in ente patiente, seu passivo gignit potentia activa, *effectus* vocatur. Igitur agens activa potentia adornatum est *subjectum* actionis, effectus vero est *terminus* actionis. Iam vero, si terminus actionis intra subjectum maneat, actio dicitur *immanens*, uti perceptio in anima, in qua remanet terminus perceptionis, nempe idea; si vero terminus actionis extra subjectum sit, tunc actio dicitur *transiens*, uti actio pictoris, extra quem icon sistit. Quare subjectum, seu principium actionis nullam gignit in objectis extra se positis mutationem actione sua *immanenti*, e. g. nullam mutationem efficit perceptione sua mens mea in objecto percepto; sed mutationem efficit actione *transeunti*; e. g. pictor mutationem in ligno producit. Cave tamen credas, agens actione sua *transeunti* diffundi extra se in *patiens*, quod Thomas Campanella, atque emanatistis adrisit; actione enim sua agens producit mutationem, licet modus, quo hoc eveniat, ignoretur. *Actio* praeterea dicitur *creatio*, et *potentia*, et *vis* dicuntur *creatrices*, si actionis terminus tam formam recipit, quam existentiam, seu si, antequam illius actionis terminus fieret, erat nihil. Si vero terminus unam recipit formam, *actio* dicitur *productio*, et *potentia*, et *vis* *productrices*. Igitur *creatio* supponit rem eductam e nihilo sui, et subjecti; *productio* vero tantum e nihilo sui (1).

(1) *Creatio* est actio *immanens*, an *transiens*? Videtur neutrum dici posse. Si enim dicatur *immanens*, videntur creaturae poni in Deo *formaliter* existentes, quia actio quaecumque conjuncta est cum eo, in quod terminat, si vero dicatur *transiens*, videntur creaturae ante creationem exiitisse, quia actio quaecumque supponit subjectum, in quod transit. Quare potius dicendum videtur cum auctore *Fragmentorum Cosmologiae* (dissert. 1. n. 19.), u-

336. Insuper ens, quod agit, effectumque producit, substantia esse debet, tum quia vis activa non nisi in substantia esse potest, cum sit aliqua proprietas; tum quia praeter substantias nihil aliud existit, quod in substantiis non reperiatur (§. 301, et 305. not. 3.). Quare cum alicui potentiae seu facultati actio tribuitur, medium dumtaxat innuitur, quo substantia ad suas perficiendas actiones utitur. Ita tribuitur cogitatio intellectui, quatenus illo, tanquam medio, utitur mens humana, ut cogitet.

337. *Principium* est id, quod continet in se rationem alterius; hoc vero alterum *principiatum* audit. Principium proinde, 1. debet esse *principiato prius*, vel *origine*, quatenus principiatum a principio oriri intelligitur; vel *natura*, quatenus principium supponitur completum in sua natura ante principiatum; vel *tempore*, quatenus principium existit, nondum existente principiato; 2. debet aliquid continere, ex quo fluit principiatum; 3. debet aliquo pacto distinguí a principiato, ne dicatur sui ipsius principium. Multiplicis generis esse principium vidimus (§. 260.). Verum illud animadvertimus, principium nempe considerari posse in se absque respectu ad principiatum, et quatenus est principium. In primo casu sumitur *materialiter*, et potest *tempore prius* esse principiato; in secundo spectatur *formaliter*, et tunc debet *natura*, aut *origine* esse *prius* principiato (§. 314.).

338. Hisce praejectis, dicimus, *causam* esse principium, quod in se rationem sufficientem existentiae alterius a se natura distincti continet, et ideo vocari etiam *principium causalitatis*, vel *actualitatis*, vel *existentiae*. Diximus vero *a se natura distincti*, ut *causa* a *principio* distinguatur; principium enim in suo conceptu tantum alterius rationem includit, sive sit, sive non sit *natura* distinctum ab hoc altero. Quare quaevis causa est principium, sed non vicissim.

339. *Causalitas* dicitur in causa ratio sufficiens illius, quod in effectu reperitur. Sed cum multiplici modo haec ratio esse possit, ideo multiplex *causa* assignatur. Nam 1. est *efficiens*, quae sua vi efficiendi producit effectum: sic Deus est *causa efficiens* mundi; 2. *materialis*, quae est ipsissima *materia*, quam causa efficiens adhibet ad aliquid efficiendum, quaque demum componitur effectus; 3. *formalis*, quae

trunque actionem ingredi ideam creationis, sique actionem creationis esse modo *subjectivam*, modo *terminativam*. Siquidem est in Deo *immanens* ab aeterno, et respiciebat e. g. mundum creandum, est *transiens*, et mutabat statum possibilitatis mundi in statum existentiae.

est *forma*, seu dispositio, quam causa efficiens largitur effectui; 4. *finalis*, quae rationem continet, propter quam causa efficiens operatur; 5. *exemplaris*, quae est veluti prototypum, quod respiciens causa efficiens aliquid simile operatur. Pictor est *causa efficiens* iconis: colores, et tela sunt *causa materialis*: dispositio a pictore tributa coloribus in tela ad illam efficiendam iconem, est *causa formalis*: lucrum, aut gloria sunt *causa finalis*: icon ex. gr. a Raphaele efformata est *causa exemplaris*, ad cuius normam pictor aliam efformat iconem.

340. Omnes recensitas causas vero nomine causarum donari, aliqui inficiantur. Verum, statuta analysi, diversa res videbitur. Siquidem causa *efficiens* influit vi sua in effectum; *materialis* influit in effectum, quatenus ex ipsa efformatur, imo saepe movet causam efficientem, aut saltem eam ad agendum reddit expeditam; *formalis*, quae consistit in quadam determinatione data praeexistenti materiae, influit in effectum, quatenus ipsum in data classi, et in suo *esse formali* constituit; *finalis* movet omnino causam efficientem, ipsiusque potentiam activam percellit, impellitque ad ponendum effectum; *exemplaris* in effectum influit, dirigens causam efficientem, ut prototypo assimilet effectum.

341. Hinc patet, perperam omnino Humium (§. 55. not.) docuisse, *necessitatem causae pro quacumque existentia haud esse suffultam aliqua demonstrativo, aut intuitivo argumento*; quod idem est ac dicere, non posse demonstrari effectum impossibilem sine causa. Ast nonne aliqua existunt, quae initium existentiae habuerunt? Nonne *effectus* exprimit aliquod factum antea non existens? Nonne resistentia nobis facta aliquod supponit, quod illam gignit? Anue haec omnia concipi possent sine causa? Nonne, si causas tolles, omnia casu contingere, dicere cogeris? Ignota quidem potest esse causa, sed est tamen existens (1).

(1) Deinde potest hoc *causalitatis* principium probari hoc alio ratione. Quidquid existit aut habuit initium, aut non. Si initium non habuit, *effectus* vocari nequit, quia ulinquin penderet ab alio, a quo proinde initium habuisset. Igitur quod *effectus* dicitur, habuit initium. Initium aliquod esse habere potest per creationem, vel per productionem (§. 535.); quod creatur vel producit, ab alio dependet, a quo initium habet; quod ab alio dependet, ut habeat initium, supponit hoc aliud causam sui. Ergo *nullus est effectus sine causa*. Quare ex analysi causae, et effectus eruitur, effectus ideam in illa causae contineri. Quapropter *principium causalitatis* est purum, identicum, analyticum, necessarium, immutabile, universale. Ex quo patet, ex idea causae, et effectus hoc principium derivari, et non ab *instinctu*, ut vult Humius,

342. Palet quoque *causam efficientem* non confundendam esse cum *conditione*, *sine qua non* ponitur effectus. Nam causa efficiens vi sua effectum producit; *conditio* vero, *sine qua non*, tantum requiritur, ut virtus causae reddatur expedita ad actum, seu est *requisitum*, ut causa agat, vel melius agat. Causa combustionis est ignis; sed, ut ignis comburat, requiritur siccitas, et justa propinquitas in ligno, quae constituent *conditionem*, *sine qua non* ignis combureret lignum.

343. Causa efficiens est multiplex; nam 1. est *necessaria*; aut *libera*. Illa operatur juxta totam vim sibi inditam a naturae auctore, quin valeat se temperare; ista vero suo consilio, et arbitrio agit, idoque praetermittere, minuere, augere, etiam positis ad agendum requisitis, suas actiones potest. Ignis comburens lignum est causa *necessaria*; homo volens, aut nolens est causa *libera*. 2. Est *prima*, aut *secunda*; *prima* existit *a se*, nullique subijcitur, et vi propria a nemine mutuata operatur; *secunda* tum in existentia, tum in operatione alteri subijcitur. Deus est causa *prima*, creaturae causae *secundae*. 3. Est *totalis*, et *partialis*; *totalis*, sive *adaequata*, vi sua totum gignit effectum *partialis*, sive *inadaequata*, sociata alteri effectum producit. Unus equus rhedam trahens est causa *totalis*; duo equi rhedam trahentes sunt causae *partiales*. 4. Istae causae *partiales* vero sunt *subordinate*, si una ab alia dependeat; *sociatae*, si una ab alia non dependeat. Avus, et pater sunt causae *subordinate* respectu istius filii, vir, et uxor sunt causae *sociatae* respectu eorum filii. 5. Istae porro causae *subordinate*, aut tales sunt *essentialiter*, si una ab alia pendeat quoad existentiam et actionem; aut *accidentaliter*, si una ab alia dependeat tantum quoad existentiam. Pater, et filius sunt causae *essentialiter subordinate*, si actio a filio patrata a patre fuerit praecepta; si praeceptum defuerit, sunt causae *accidentaliter subordinate*. 6. Causa *subordinata* est etiam *immediata*, vel *mediata*; *immediata*, seu *proxima* effectum producit, sine ulla intermedia causa; *mediata*, sive *remota* effectum producit ope causae *immedia-*

neque a *vi instinctiva*, ut credit Reid, neque a *lege primitiva naturae rationalis*, ut vult Testa post Royer-Collard, neque ex *intellectu puro*, ut placuit Kantio. Vide Galluppi (*Saggio filos.* t. 1. c. 4. § 96. et t. 4. c. 3, § 51.), quem tamen cum aliis dixerat, studeatque refutare Alphonsus Testa (*Filos. della mente disc. 2. Nozione di causa e del principio di Causalità*), qui petitionem principii credit videre in Galluppiana demonstratione; quia cum dicitur, *quidquid existit, aut habuit initium*, aut non, supponitur, haberi aliquid, quod *habuit initium*, ideoque dari principium causalitatis. Sed aliquid habere initium, experientia docet, neque hoc negat Testa.

*tae*. Avus est causa *mediata*, pater causa *immediata* filii. 7. Causa efficiens est quoque *per se*, et *per accidens*. Prima propria natura, vel deliberatione effectum producit; altera effectum producit non intentum a propria natura, aut propria deliberatione. Ignis comburens lignum, et homo interficiens feram sunt causae *per se*: lapis decidens a tecto, et perimens transeuntem, atque venator hominem pro fera interficiens, sunt causae *per accidens*. 8. Demum causa efficiens est *principalis*, aut *instrumentalis*. Illa effectum gignit vi sibi inhaerente; ista inservit principali instar instrumenti, atque vi principalis in effectum influit. Scriptor est causa *principalis*, calamus causa *instrumentalis* scriptionis.

344. Causa finalis (§. 339. n. 4.) est id, cujus gratia agit causa efficiens. Quapropter, 1. causa efficiens, quae ad agendum a fine allicitur, intelligendi facultate pollere debet, secus finem respicere nequiret, neque a fine moveretur; 2. finis aliquod bonum verum, vel saltem apparens esse debet, quia tantum a boni representatione causa intelligens movetur; 3. finis supponit media, in quibus ratio existentiae finis continetur, et cujuscumque obstaculi remotionem; 4. ideoque media adhibere debet, ac remove obstacula, qui finem cupit: alias finem non vellet, uti non cupit doctus fieri, qui nec multa patitur, nec sudat, nec alget, nec se abstinere a vitiiis; 5. finis in mente agentis creatae causae est ante mediorum conceptum, quia media propter finem praeconceptum exquiruntur; 6. et proinde finis est *primus in intentione*, *ultimus in executione*: media vero sunt *prima in executione*, *ultima in intentione*; 7. media, quae adhibentur ad assecutionem aliorum, evadunt *fines partiales* relate ad *ultimum finem*, quicumque ille sit in causae intelligentis mente; 8. ex quo series enascitur causarum finalium subordinatarum, quae ad communem aliquem finem directae, sapientiam ordinantis demonstrant.

345. Causa *physica*, *moralis*, *occasionalis*, inter causas quoque recensentur. Causa *physica* actione propria effectum producit; causa *moralis* vero ad effectum ponendum ministerio alieno utitur. Dominus mandans famulo, ut Titium occidat, est causa *moralis* homicidii; famulus vero causa *physica*. Quare causa *physica* est ipsa causa efficiens, quae immediate et vi sua effectum producit, et relationem habet ad *causam moralem*, quae mandato, consilio, consensu, precibus, aliisque hujusmodi mediis causam *physicam* ad agendum movet. Ceterum causa moralis sine *physica* haberi nequit; sed haec sine illa intelligi, et esse potest. Causa demum *occasionalis* di-

citur, quae causae efficientis virtuti praebet occasionem exercendi suas vires. Ita conceptio hominis in utero mulieris est *causa occasionalis*, quae sua praesentia Deo occasionem animam creandi praebet. Quapropter haec causa viribus destituitur ad effectum ponendum, nec proinde in effectum influit. Sic accepta causa *occasionalis* confundenda non est cum illis *occasionibus*, de quibus fit sermo in moralibus disciplinis, quaeque alliciendo, aut alio modo impellendo causam efficientem, in effectum influunt, melius dicendae *causae morales*.

346. Cartesius, Malebranchius, aliique, *occasionalistae* dicti, res creatas viribus activis expoliarunt. *Nullae in mundo materiali sunt vires, nullae in mundo sensibili, nullae potentiae, nullae verae causae*, ait Malebranchius in libro *de inquirenda veritate*. Quare juxta ipsos nec anima vi sua movet corpus, nec avis sua vi spatia transvolat, nec equus sua vi ambulat, nec terra sua vi germinat herbam virentem, nec ignis vi sua ligna comburit, nec lapis sua gravitatis vi percutit; sed tantum ex hujusmodi causarum praesentia arripit Deus occasionem laudatos effectus producendi. Ceterum non omnes occasionalistae eodem modo sentiunt. Aliqui enim *rigidissimi*, vires activas omnibus causis creatis, ipsique humanae menti denegant; alii *rigidiores*, animas humanas in liberis suis actionibus excipiunt; alii demum *benigni*, causis tantum materialibus vires inficiantur.

347. Sed cujuscumque classis sint hujusmodi occasionalistae, certum est, *causas secundas viribus activis potiri*. Si quidem, 1. nulla repugnantia est, ut creaturae *efficaciter* agant; non ex parte ipsarum, quia vis, quam iis tribuimus, finita est, ipsisque proportionata; neque proinde ex parte Dei, qui efficere valet, quidquid intrinsece possibile est (§. 279.) 2. In mundo est ordo, seu series entium coordinatorum, et subordinatorum; haec series vero intelligi nequit, quin alia entia agant, et alia patiantur. Ergo hujusmodi entia viribus activis pollere debent. 3. Deus certe creavit omnia cujuscumque generis entia propter aliquem finem; sed quomodo ad hunc praestitutum finem dirigerentur activis viribus destituta? 4. Quanam autem de ratione omnes fere homines effectus alicujus causam exquirere nituntur, quoties non constat, Deum esse illius causam, aut illum effectum excedere vires creatas, nisi quia omnibus persuasum est, creatas causas viribus activis pollere? 5. Si ignis vi sua non calefaciat, aqua sitim non extinguat, panis non nutriet, canis non allatret, bos terram aratro non exerceat, atque sexcenta, quae causis secundis tribuimus, in quibus proinde

vires activas supponimus, ecquid Deus haec omnia creavit? *Si res creatae nullo modo operantur ad effectus producidos, sed solus Deus operatur, frustra essent adhibitae ab ipso aliae res ad producidos effectus*, inquit appositè S. Thomas (l. 3. *cont. Gent.* c. 69.). 6. Demum, ut de anima humana loquar, si ipsa viribus suis activis destituatur, libera non est, corpus ipsa non movet, peccatrix non est, nullam mereatur laudem, nullo praemio, nullaque poena est afficienda. En absurda, quae nobis sorbenda largiuntur occasionalistae! Nonne experientiae internae, externaque adversatur, qui negat, animam agere in corpus; corpora externa in nostrum agere corpus; corpora agere in alia corpora, quae movent?

348. Neque dicas, Deum haud esse perfectissimam causam, nisi ipse unus ageret omnia. Nam perfectissima causa est Deus, quia causa prima est, atque a nullo dependens; et quia vi sua non aliunde accepta excellentissimo modo agit; et quia bonitate sua ductus, et non aliqua indigentia pulsus creaturis vires activas dedit. Ex quibus tamen haud sequitur, creaturas *agere* non posse, cum creaturae viribus activis ornatae ab ipso Deo actiones, ejus concursu adjunctae, ponant, atque, prout earum fert natura, producant effectus, quin aliquid praestantissimae causae suffurentur.

349. Urgebis: si anima moveat se, moveat corpus suum; profecto se conservat in suis successivis cogitationibus, conservat corpora in diversis successive locis; quod certe est unius Dei. Verum respondemus, aliud esse animam vim habere, qua valet cogitationes perficere, et de una in aliam transire, et aliud se *conservare*, quod Dei proprium est. Illud primum supponit animam existentem, et a Deo conservatam; hoc alterum vero supponit tantum existentem. Idem dicatur de corpore ab anima ad motum excitato; nam translatio de loco in locum, in quo corporis motus consistit, supponit corpus conservatum a Deo, et vim omnino finitam in anima, quae illud vi voluntatis suae movet.

350. Ast denum instabis dicendo, spiritum toto caelo differre a corpore, ideoque in corpus agere non posse. Verum, si hoc foret, neque Deus in corpora operari posset cum et Deus spiritus sit. Et licet ignoremus, quomodo id fiat, non ideo negandum est, quod est apertum. V. Storch. (*Ont. sect.* 3. c. 4. §. 148, et *seqq.*), Mastrof. (n. 151, et *seqq.*), Dmowski (*Metaph.* n. 31. et *seqq.*), Spagni (*de causa efficiente*).

351. Circa causas *partiales* (§. 343. n. 3.) ad eundem effectum producendum concurrentes, adliuc notari oportet,

ipsas esse aut *diversi generis*, uti efficiens, et finalis; aut *ejusdem generis*, uti duae causae efficientes; aut *ejusdem generis*, sed *diversi ordinis*, uti Deus, et creatura; aut *ejusdem generis*, et *ejusdem ordinis*, uti duo homines pondus attolentes. Deinde illud quoque quaeri potest, utrum duae causae *adaequatae* unum numero effectum producere valeant, sed quaevis earum integrum. Verum distinguendum est, nam si duae illae causae *adaequatae* sunt *ejusdem ordinis*, certe non possunt; uti quivis e duobus artificibus nequit integram unam statuam conficere, et ratio est quia effectus supponitur productus integer ab una causa; ergo si produceretur ab alia, bis produceretur, ideoque non unus, sed duo forent effectus. Si vero illae duae causae sunt *diversi ordinis*, ut prima, et secunda, aut tantum *diversi generis*, uti efficiens et finalis, possunt producere eundem numero effectum, quia simul agunt, simulque influunt in effectum.

352. Ex hucusque dictis recte inferri possunt varii canones, quorum frequentissimus est usus penes omnes scientias. Et 1. *nullus est effectus sine causa sui*, alioquin aliquid existeret sine ratione sufficiente, quod certe repugnat (§. 269. et 341. cum not.). Ex quo patet, luisse in re seria Tracyum, et Kantium, qui specie tenus differunt, et quorum primus substantias spirituales, et materiales dixit sensationum aggregatum, alter vero dumtaxat phaenomena, quasi sensationes non supponerent aliquid sentiens, et sentitum, et phaenomena aliquod subjectum reale. V. Bonelli (*t. 2. Ontol. c. 7. p. 187.*). 2. *Nihil est in effectum, quod non reperiatur in causa*; nam si in causa non foret, quidquid in effectum reperitur, in nihilo haberet rationem sufficientem, quod etiam repugnat (§. 277.). 3. *Quidquid est in effectum, in causa esse debet*, aut *formaliter*, nempe prout est in effectum, uti sanguis in venis; aut *virtualiter*, nempe in potentia causae efficientis, uti creaturae in Dei omnipotentia; aut *eminenter*, nempe si effectus in causa est, non uti in se sistit, sed nobiliori, et excellentiori modo, omnibusque defectibus defaecatus, uti sunt perfectiones creaturarum in Deo. Si enim nullo e tribus modis laudatis effectus in causa esset, foret in nihilo. 4. *Quaevis causa est prior suo effectum prioritatem naturae*, si nullum intercedat tempus inter causam, et effectum, uti sol praecedit suos radios; aut *prioritate temporis*, si causa aliquo temporis intervallo effectum praecedat, uti in humanis pater praecedit filium. Ratio autem est, quia causa in se rationem sufficientem continere debet existentiae effectus, ideoque aliquo sensu



prior esse debet. (§. 337.). 5. *Nulla res valet esse sui ipsius causa*, alioquin operaretur, antequam existeret, nempe dum esset nihil, quod repugnat (§. 277.), et simul foret causa, et effectus sui. 6. *Duae causae nequeunt sibi mutuo esse causae existentiae*, alioquin quaevis earum operaretur ante existentiam, foret prior, et posterior, causa simul et effectus, quae omnia repugnant. 7. *Causa causae est etiam causa causati*. Notandum vero est, *causam causae* esse quidem *causam causati*, sed tunc dumtaxat, quando causatum produci-  
tur a causa eadem actione sibi communicata a *causa causae*, uti avus est *causa* nepotis, qui a patre istius productus est actione sibi ab illo communicata; ast si alio modo causatum existat, *causa causae* non est *causa causati*, uti non est causa peccatorum filii pater, qui peccata filii nullo modo actione ab ipso communicata producit. Hoc idem est ac si dicas, *causam causae* esse *causam causati*, cum *causatum* dependet *essentialiter* a *causa*, et haec a *causa causae*, non vero si dependeat *accidentaliter* (§. 363. n. 5.). 8. *Nequit dari progressus causarum secundarum, sibi subordinatarum in infinitum*; neque *circularis*, in quo, amota prima causa, ad illam e serie causarum subordinatarum reditur, in qua progressus inchoatur; neque *rectilineus*, in quo, etiani ablata prima causa, ab una e subordinatis inchoatur, et sic in aliis sine fine progredimur. Cujus rei ratio est, quia in *serie circulari* quaevis causa subordinata esset simul causa, et effectus, et operaretur antequam existeret; in *serie rectilinea* vero prima e subordinatis contineret rationem sufficientem existentiae omnium subordinatarum in infinitum, quod repugnat in causa secunda, quae finita est; et in se, vel in nihilo rationem sufficientem sui haberet, quod denuo esse nequit. 9. *Ex iisdem causis, positis iisdem adjunctis, iidem effectus*; et *ex similibus similes profluunt*, tum quia natura regitur constantibus legibus, tum quia nulla esset ratio, facta contraria hypothesis.

353. Tandem, ut recte in causarum theoria iudicium feramus, haec observanda sunt: 1. Antequam alicujus effectus causam exquiras, illius effectus existentiam probes oportet; alias quaeres rationem sufficientem nullius. 2. Antequam alicujus effectus causam assignes, praedictis te expolis, omniaque deinde rectis Religionis Christi, et verae philosophiae ideis metiaris. 3. Teneas necesse est, quaecumque substantiam pro causa alicujus effectus esse posse, quia viribus activis omnes creatae res pollent (§. 347.); omnipotentia

vero infinita Deus. 4. Frustra alias requiras causas, si unam reperiveris satis sufficientem ad illum effectum explicandum; alias tempus supervacaneiores. 5. Ex eo, quod una res cum alia, aut post aliam procedat, non illico inferes, illam ab ista oriri; cum requiratur praeterea, ut, una comparente, alia compareat, non evanescente, altera evanescat, atque nexus sit inter primam; et secundam, huiusque nexus semper, et constanter videatur. 6. Uni causae non attribuas, quae ex pluribus oriri possunt, uti aliqua popularis insurrectio a pluribus enasci potest. 7. Alicui causae liberae non illico tribuas aliquam seruumnam, aut quemvis effectum, qui malum putetur, si legibus physicis id explicare valeas. 8. Effectum naturam causae sequi teneas, ideoque liberae causae liberae, necessariae causae necessariae actiones semper reputabis.

## CAPUT SEXTUM

### DE ORTU, ET INTERITU ENTIIUM

354. Cum entia *oriri* dicantur, quando existentiae initium; atque *interire*, quando existentiae finem recipiant; ideo *ortus* est principium, *interitus* est finis existentiae entis alienius. Verum entia nec omnia uno modo oriuntur, nec uno modo intereunt. Nam aut oriuntur ex nihilo sui, et subiecti, et intereunt quoad se, et subiectum; aut oriuntur ex nihilo sui, seu ex praeexistenti materia, et intereunt tantum quoad se, non destructa materia praeexistenti. Primo casu *ortus* dicitur *creatio* (§. 335.), et *interitus* *annihilatio*; in secundo casu *ortus* dicitur *simplex productio*, et *interitus* *corruptio*. Animae humanae *creantur*; corpora a Deo *annihilari* possunt; statua *producitur* ab artifice; statua ipsa post diuturna tempora *corrumpitur*.

355. Ex quibus definitionibus sequitur; 1. entia, quae oriri, vel interire possunt, esse contingentia, quia aliter esse possunt (§. 307.); 2. ideoque ens necessarium, quod aliter esse nequit (*ibid.*), neque oriri, neque interire posse; 3. ens simplex oriri non posse ab ente simplici per partium sui distractionem, transformationem, compositionem, quia simplex partibus caret (§. 309.); 4. neque proinde ens simplex oriri posse ab ente composito, quia alias partibus constaret; 5. igitur ens simplex oriri non posse ex praeexistenti quocumque ente per istius separationem, aut additionem, aut detractionem, aut interpositionem, aut transformationem;

6. ideoque oriri non posse, nisi per creationem (§. 354.), nempe a nihilo sui, et subjecti; 7. ergo creatione multiplicari entia existentia, quae prius erant possibilia; 8. ideoque perperam Spinozam impossibilem credidisse unius substantiae ab alia productionem, acceptam pro quocumque ortu, ac unam asseruisse existere substantiam (§. 306.); 9. quare neque corruptione ens simplex interire, quia partibus caret, et proinde esse sua natura immortale; 10. ideoque, si ens simplex intereat, omnino cessare, nulla sui parte superstite, ideoque *annihilari*; 11. ens simplex, et quidem necessarium creare posse, quia entia simplicia contingentia rationem sufficientem existentiae in alio, quod contingens non sit, habent (§. 308. 12.); 12. ideoque nullum ens contingens, et finitum creare posse (Mastrof. *L'anima ecc. t. 1. n. 160. et seqq.*); 13. ens simplex, necessarium infinitum annihilare posse, a quo fit creatio; 14. creationem itaque, et annihilationem esse possibiles; 15. ens compositum oriri posse tum creatione, tum productione, prout non oriatur, vel oriatur ex praeexistenti materia; 16. ideoque etiam annihilatione et corruptione interire posse, ac proinde esse mortale; 17. productionem, et corruptionem fieri posse ab entibus contingentibus, quia productio est modificatio super praeexistenti materia, et corruptio hujusce modificationis destructio, quod vim causarum secundarum non excedit.

356. Et haec est, optimae spei juvenes, altera pars nostrae philosophiae rationalis. In ipsa minime, uti vidistis, in nudis explanandis vocabulis substitimus, neque de una in aliam velocissime transivimus illationem. Verum, non sprete objectorum consideratione, doctrinas quoque evolvimus, quae inde possunt erui, quaeque sunt aliarum disciplinarum fundamenta. A nihilo disquisitionem incepimus, atque ad possibilitatem, ad essentiam, ad existentiam descendimus; cribratis, quantum instituti nostri ratio ferre poterat, quae circa possibilia, et essentias metaphysicas moveantur, quaestionibus. Hinc ad generales gradum fecimus entium proprietates, illorumque unitatem, veritatem, bonitatem vindicavimus. Deinde claras de substantia, de qualitate, de persona ideas attulimus; atque evidenter entia specialia, contingens, et necessarium, mutabile et immutabile, simplex, et compositum, finitum, et infinitum, omnibus ontologice discussis, enucleavimus. Ad relativas postea transivimus entium proprietates, et uberrimam segetem idearum circa distinctionem, et identitatem, diversitatem, et similitudinem, quantitatem, et aequa-

litem, ordinem, sucessionem, durationem, tempus, et spatium vobis attulimus. Entium vires dein examinavimus, atque de causis addidimus plurimas non spernendas doctrinas. Tandem de modo, quo entia oriuntur, ac intereunt, loquutissimus, eaque deduximus, quae ad rem nostram pertinere videbantur. Haec est illa Philosophiae pars, in qua omnes magni circuli scientifici radii copulantur, atque communis totius scientificae pyramidis basis, a qua scientia quaecumque sua debet accipere principia, atque directionem, ait Gioberti (*Errori filos di Ant. Rosmini lett. 3. p. 174. et lett. 4. p. 204. Copolago 1846.*). Fertilis hic ager est, sed assidue excolendus, ut vobis et aliis uberes fructus largiatur.

# FINIS TOMI PRIMI



MAG 2005 FM

# INDEX

---

<i>Epistola auctoris ad sui Ordinis Ministrum Generale[m] . . . . .</i>	3
---	---

## PHILOSOPHIAE HISTORIA

### EPOCHAE I.

<i>De Philosophiae Historia a mundi exordio ad Graecas usque scholas . . . . .</i>	9
--	---

### EPOCHAE II.

<i>A Graecis scholis usque ad Eclecticos Philosophos, . . . . .</i>	15
---	----

### EPOCHAE III.

<i>De Philosophiae vicissitudinibus ab Eclecticis Philosophis ad illius instaurationem , . . . .</i>	26
--	----

### EPOCHAE IV.

<i>A Philosophiae instauratione ad haec usque tempora . . . . .</i>	32
---	----

## DE PHILOSOPHIA RATIONALI

<i>Anteloquium . . . . .</i>	67
------------------------------	----

### PARS PRIMA

<i>De Logica . . . . .</i>	68
----------------------------	----

### SECTIO I.

<i>De Animae humanae actionibus . . . . .</i>	70
---	----

### CAPUT PRIMUM

<i>De simplici Perceptione . . . . .</i>	70
--	----

### ARTICULUS PRIMUS

<i>De Ideis quoad subjectum inspectis . . . . .</i>	71
---	----

## ARTICULUS SECUNDUS

<i>De Ideis quoad objectum inspectis . . . . .</i>	„ 72
--	------

## ARTICULUS TERTIUS

<i>De Ideis quoad modum repraesentandi objecta inspectis . . . . .</i>	„ 78
--	------

## ARTICULUS QUARTUS

<i>De modo, quo mens conspicit objectum a se distinctum . . . . .</i>	„ 79
---	------

## CAPUT SECUNDUM

<i>De Idearum signis . . . . .</i>	„ 80
------------------------------------	------

## CAPUT TERTIUM

<i>De Iudicio . . . . .</i>	„ 86
-----------------------------	------

## CAPUT QUARTUM

## ARTICULUS PRIMUS

<i>De propositione . . . . .</i>	„ 89
----------------------------------	------

## ARTICULUS SECUNDUS

<i>De Definitione et Divisione . . . . .</i>	„ 96
--	------

## CAPUT QUINTUM

<i>De Ratiocinio . . . . .</i>	„ 98
--------------------------------	------

## CAPUT SEXTUM

<i>De Argumentatione . . . . .</i>	„ 100
------------------------------------	-------

## CAPUT SEPTIMUM

<i>De Demonstratione . . . . .</i>	„ 106
------------------------------------	-------

## CAPUT OCTAVUM

<i>De Sophismatibus . . . . .</i>	„ 107
-----------------------------------	-------

## SECTIO II.

<i>De Methodo . . . . .</i>	„ 108
-----------------------------	-------

**SECTIO III.**

<i>De Veritate . . . . .</i>	„ 112
------------------------------	-------

**CAPUT PRIMUM**

<i>De Veritatis Essentia . . . . .</i>	„ 113
--	-------

**CAPUT SECUNDUM**

<i>De veritatis fontibus, ejusque supremo criterio . . . . .</i>	„ 114
--	-------

**ARTICULUS PRIMUS**

<i>De Sensu Intimo . . . . .</i>	„ 116
----------------------------------	-------

**ARTICULUS SECUNDUS**

<i>De Intellectu, Ratione, et Sensu Naturae communi . . . . .</i>	„ 118
---	-------

**ARTICULUS TERTIUS**

<i>De Externis corporis sensibus . . . . .</i>	„ 125
--	-------

**ARTICULUS QUARTUS**

<i>De Auctoritate Humana . . . . .</i>	„ 128
--	-------

**ARTICULUS QUINTUS**

<i>De Veritatis ultimo, et supremo Criterio . . . . .</i>	„ 132
---	-------

**ARTICULUS SEXTUS**

<i>De Usu Probabilitatis. . . . .</i>	„ 138
---------------------------------------	-------

**CAPUT TERTIUM**

<i>De Errore, et Ignorantia . . . . .</i>	„ 143
---	-------

**CAPUT QUARTUM**

<i>De Principiis Demonstrationis . . . . .</i>	„ 148
--	-------

**ARTICULUS PRIMUS**

<i>De Veritatum necessariarum primo principio . . . . .</i>	„ 149
---	-------

**ARTICULUS SECUNDUS**

<i>De Veritatum contingentium primo principio . . . . .</i>	„ 151
---	-------

# PHILOSOPHIAE RATIONALIS

## PARS SECUNDA

*De Ontologia, seu Metaphysica* . . . . . „ 155

### CAPUT PRIMUM

*De Ente in genere* . . . . . „ 156

#### ARTICULUS PRIMUS

*De Entis Possibilitate* . . . . . „ 156

#### ARTICULUS SECUNDUS

*De Essentia, et Existentia* . . . . . „ 162

### CAPUT SECUNDUM

*De Entium Proprietatibus* . . . . . „ 166

### CAPUT TERTIUM

*De Variis Entium speciebus.* . . . . „ 169

#### ARTICULUS PRIMUS

*De Substantia, Accidente, Supposito, Persona* „ 169

#### ARTICULUS SECUNDUS

*De Ente Contingente, et Necessario, Mutabili, et  
Immutabili* . . . . . „ 174

#### ARTICULUS TERTIUS

*De Ente Composito, et Simplici* . . . . . „ 176

#### ARTICULUS QUARTUS

*De Ente Finito, et Infinito* . . . . . „ 177

### CAPUT QUARTUM

*De Multiplici Entium Relatione* . . . . . „ 178



## ARTICULUS PRIMUS

*De Distinctione, et Identitate . . . . .* „ 179

## ARTICULUS SECUNDUS

*De Diversitate, et similitudine. . . . .* „ 181

## ARTICULUS TERTIUS

*De Quantitate, et Aequalitate . . . . .* „ 183

## ARTICULUS QUARTUS

*De Ordine, Successione, Duratione, Spatio . . .* „ 184

## CAPUT QUINTUM

*De Entium Viribus . . . . .* „ 192

## CAPUT SEXTUM

*De Ortu, et Interitu Entium . . . . .* „ 202



## ERRATA

## CORRIGE

<i>pag.</i>	<i>lin.</i>		
7	10	singulos	singulas
17	7	duobus	duabus
ibid.	21	mulieri	muliebri
32	1	phisopficum	philosophicum
50	11	philosophi	philosophici
ibid.	26	retrogado	retrogrado
55	24	exponi	exponit
82	37	sqnnboq	loquutos
104	3	methymema	enthymema
107	17	reuma	reum
147	26	7. eli -	8. eli -
156	16	apponitur	opponitur
159	26	Nullaqua	nullaque
165	41	(1)	(2)
171	32	sustineat. . agat. . . patistur	sustineant. . agant. . patiantur
183		identitas	identicas



**NIHIL OBSTAT**

Fr. Antonius Maria ab Arignano Ordinis Minorum Procurator Generalis.  
Censor Theol. Deputatus.

---

**REIMPRIMATUR**

Fr. Dom. Buttaoni Ord. Praed. Sac. Pal. Ap. Mag.

---

**REIMPRIMATUR**

Joseph. Canali Archiep. Coloss. Vicesg.



